

新五代

宋宋 徐無黨隊 註 撰

中 華 書 局

卷 第

至 王卷三一(紀

傳)

册

出版説明

五代史。 共七十四卷。 新五代史,宋歐陽修撰,原名五代史記,後世爲區别於薛居正等官修的五代史,稱爲新 。全書有本紀十二卷、列傳四十五卷、考三卷、世家及年譜十一卷、 四夷附録三卷, 記載了自後梁開平元年(公元九〇七年)至後周顯德七年(公元九六〇年)共

五十三年的歷史。

記載,從他寫給尹師魯、梅聖俞等人的信來看,在景祐三年(公元一〇三六年) 參加了范仲淹領導的「慶曆新政」活動,後被貶爲地方官,一直到至和元年(公元一〇五四 於神宗熙寧五年(公元一〇七二年)。他在宋仁宗慶曆三年(公元一〇四三年)任諫官時, 寫,到皇祐五年(公元一〇五三年)基本上完稿,先後經過十八年左右的時間。 歐陽修字永叔, 江西廬陵(今吉安)人, 生於宋真宗景德四年(公元一〇〇七年),死 才被調回宋廷中央,任翰林學士,主編新唐書。新五代史編撰的時間没有明 確 的 前已着手編

臣善惡,與其百事之廢置」,目的在於「垂勸戒,示後世」。在他看來,舊五代史還没有完全 歐陽修在編撰新五代史時,寫給尹師魯的信中説 「史者國家之典法也」,史書記載「君

狂. 做 {代 到 (史 這 前 一點,有「繁猥失實」的地方,没有起到它應起的作用。 首要地位 一,並以 孔子編撰春秋的「義例」,作爲自己立論的原則, 所以他把「褒貶義例」放在新 用「春秋 心筆法」

新的 崴, 下, 的藩 出 禍 五代 相 篡 現 或 國 繼 擁 的 割 鎮 一。各個 甚者三、 更替,中 歷 五 是由 弑 兵 據 短暫分裂局 割 代 史 割 .相尋」「こ,五代「五十三年之間,易五姓十三君, 勢 據 進 是 據 於 Ŧ 一勢力。 力。 行 唐「安史之亂」以 |朝統治的 凉 獨 個封 四歳 褒貶。 以 唐 霸一 外的 但是, 朝 建 而亡 画 方。 滅亡 分裂割據的時代,中原有後梁、後唐、後晉、後漢、 時間 地區 新五代史的作者對於這種 後,他 黄巢. 唐末黄巢農民大起義的 都比 分裂爲吴、南唐 起義最後遭到 後中央集權制度被破壞, 出現 們繼續 較短促,用 置 獨佔一 一君猶易吏, 歐陽修的話 前前 1 方,互 蜀、後蜀、吴越、楚、閩、南漢、 失敗 革命 分裂割據現象 相 變 篡 威 來說,「於此之時,天下大亂 [國若傳舍] 而亡 批在 奪 地方藩鎮 力摧毁了 攻擊 鎮 國 採 壓 被弑者八, 在大地 造成 取了 唐 起 義 王 中 否定的態 了 朝 後周五個 主豪强 這種 我 形 南平 或 成 沉 長者不 歷 的 重 局 度。 史上 勢 小 面 軍 打 中國之 之所 王朝: 力支 過十 北漢 閥 擊 但是, 成 舊 持 以 的 餘 等

Ξ

C |)新五代史 卷六一 吴世家

方考以外,其他的典章制度一概没有寫。 代時期「天理幾乎其滅」,是一個「亂極矣」的時代,根本没有什麼禮樂制度可談,因而他說: 法。在新唐書中,他重視典章制度,不厭其詳地加以記載,而在新五代史中,由於他認爲五 道絶,而先王之制度文章,掃地而盡於是矣。」

「

「

因此,他採取了和編寫新唐書不同的做 父父子子之道乖,而宗廟朝廷人鬼皆失其序」的「亂世」「一」。真是「禮樂崩壞,三綱五常之 他把分裂割據的根本原因,歸結爲封建道德的敗壞。在歐陽修看來,五代是一個「君君臣臣 「五代禮樂文章,吾無取焉,其後世有必欲知之者,不可以遺也。」因此,他除寫了司天考、職

節傳、死事傳、一行傳、雜臣傳,等等。 時間的先後進行編排。舊五代史不分類編排列傳,新五代史則把列傳分爲各朝家人傳、死 朝一史,各成體系,新五代史則打破了朝代的界限,把五朝的本紀、列傳綜合在一起,依 在編撰體例方面,新五代史改變了舊五代史的編排方法。舊五代史分梁書、唐書等書,

薛居正五代史,止用歐陽修所撰」。 500至于南方的南宋,由于理學盛行,更是獨尊新五代 北宋亡後,北方的金政權在章宗泰和七年(公元一二〇七年)明令「新定學令内,削去

[] 新五代史 卷一六 唐家人傳論 [

〔三〕,新五代史 卷一七 晉家人傳論

(三)金史卷

=

二章宗紀

ŧ.

代史是 資 料 、郭崇韜 吕琦 使讀者加深對五 他往 可以互爲 楊 往 、安重誨 陽修編寫新五代史後於舊五代史, 湿等傳都或多或少地補充了若干事實, 採 浦小 補充的 、李茂貞、孔謙、王彦章、段凝 代時期的 説、筆記之類 人物和事件的瞭解。 公的記 載 補充了舊五代史中所没有的 、趙在禮、范延光、盧文紀、馬 看到了舊五代史編撰者所没有看到 就歷史資料方面而言,新五 有些則插入比較生動 的 些史實。 情節 胤 代 孫 史和 姚顗 以小 如 的 E 些

經書院 監 即 南 本、汲古閣 未 我 河門這 本)、 刻 本,附有劉 殿本、 次點校,以百 本、鄂本(清崇文書局本)、徐注本(清徐烱注 南昌 氏等五代史記校勘札記)以及傳增湘校勘成都書局本本 [本(清南昌彭元瑞五代史記注)。 [衲本(影印南宋慶元本)爲工作本,對校了貴池本 補五代史記抄本)、劉 參校了明汪文盛 本、 (清貴池劉氏 紀 校本 部 南 份 監本、北 (清味

遺失。 師範 版 社 大學參 古 本 書 籍 九七一 編 「文革」前 加點校的有(依姓氏筆畫爲序)石淑儀、李國鈞 輯 室 組織 年,新五代史和舊唐書、新唐書、舊五代史、宋史等五 在陳垣 力量在 同志的指導下,由柴德賡同志進行點校,但已完成 上海繼續進行工 作。 本書的點 李德清 校 由 華 東 沈灌羣、 一史決 師 範 定 大學完成 由 的 周子美、林艾 點 上 校 海 稿 民 後 東 出 來

百豐、趙善詒、戴家祥、 園 、金祖孟、袁英光、徐震堮、徐德嶙、馬興榮、陳光祖、陳懷良、梁永昌、張惠芬、 簡修煒同志。 復旦大學中國歷史地理研究所鄒逸麟同志參加了本 張瑞璠、葉

參加全書編輯整理工作的有陸楓、葉亞廉、劉德權、馮菊年、周琪

性同志。(以上名單及排列順序均由各單位提供)

書部份清樣的校閱工作。

這次重印,就已經發現的問題和可能條件做了少量的修正。

中華書局編輯部

新五代史目錄

新五代史目錄	莊宗 李存勗上	唐本紀第四	卷四	末帝友 貞	梁本紀第三	卷三	太祖下	梁本紀第二	卷二	太祖朱 溫上	梁本紀第一	卷一
	晉本紀第八	卷八	廢帝從 珂	愍帝從 厚	唐本紀第七	卷七	明宗嗣 源=	唐本紀第六	卷六	莊宗下	唐本紀第五	卷五

恭帝宗 訓	世宗 柴 榮 1	周本紀第十二	卷十二	太祖郭 威10元	周本紀第十一	卷十一	隱帝承 萜	高祖 劉知遠	漢本紀第十	卷十	出帝 重 貴	晉本紀第九 —	卷九	高祖 石敬瑭••••••
友倫	チ 友 寧・・・・・・・・・・・・・・・ 三	兄存	友 誨	友能	チ友諒	太祖兄全昱	次妃郭氏	末帝德妃張氏	昭容李氏・・・・・・・・・・・・・・・・・・・・・・・・	昭儀陳氏	太祖元貞皇后張氏一元	太祖母文惠皇后王氏一三	梁家人傳第一	卷十三

嗣肱	子嗣弼	克脩	太祖弟克讓	德妃伊氏··························	淑妃韓氏	莊宗神閔敬皇后劉氏一三	貞簡皇后曹氏	太祖劉太妃	唐太祖家人傳第二	卷十四	友孜	友珪	友文	太祖子友裕一壹
卷十五	機 處」	繼 蟾	機 嵩	繼 潼」	莊宗子繼岌	存紀	存確	存义	存渥	存禮	存霸一三	太祖子存美	克寧·····	克恭

廢帝皇后劉氏一十一唐廢帝家人傳第四	從敏	明宗姪從璨	班宗子從璟 	愍帝哀皇后孔氏 淑妃王氏] 云	宣憲皇后魏氏	明宗和武憲皇后曹氏」至上唐明宗家人傳第三
出帝子延煦····································	高祖子重信····································	敬聲		太妃安氏一完高祖皇后李氏一完	晉家人傳第五卷十七	重美

Æ.	新五代史目錄
熙讓	德妃董氏················ 元
藏	貴妃張氏
誠	淑妃楊氏
世宗子誼108	太祖皇后柴氏
後立皇后符氏	周太祖家人傳第七
宣懿皇后符氏10月	卷十九
世宗貞惠皇后劉氏	信一类
柴守禮	弟 崇····························
周世宗家人傳第八	姓
卷二十	承勳
遜	高祖子承訓
奉超	高祖皇后李氏
姪守愿100	漢家人傳第六
信	卷十八
太祖子侗一九	延寶

卷二十二	寇彦卿 二九	劉捍二九	符道昭	張存敬	霍存二六	葛從周	龐師古	李唐賓	朱珍	敬翔	梁臣傳第九	卷二十一	熙誨	熙謹····································
王檀	賀壤	王景仁===	楊師厚三壹	梁臣傳第十一	卷二十三	徐懷玉	王重師	歸弁	弟歸厚	張歸霸	牛存節	劉鄩三三	康懷英	梁臣傳第十

新五代史目錄	史建瑭	彦饒 二六六	彦卿·····	于 彦超	符存審	周德威	唐臣傳第十三	卷二十五	安重誨==	郭崇韜	唐臣傳第十二	卷二十四	謝彥章	王虔裕三二	馬嗣勳」
÷	毛璋	李仁矩	李嚴	張延朗	孔謙	鳥震	符習	唐臣傳第十四	卷二十六	西方鄴	袁建豐	安金全	元行欽	王建及	子匡翰

八

李襲吉	盧程	豆盧革	唐臣傳第十六	卷二十八	樂彥稠	康義誠	康思立	劉延朗	馮贇	朱弘昭	唐臣傳第十五	卷二十七
基章	蘇逢吉三七	漢臣傳第十八	卷三十	吳樹	景延廣	桑維翰	晉臣傳第十七	卷二十九	何費	劉樹	蕭希甫三四	張憲三二

新五代史目錄	劉仁贍	裴約	王彦章	死節傳第二十	卷三十二	扈載三宝	鄭仁誨	王朴	周臣傳第十九	卷三十一	郭允明	後贊	聶文進	李業	劉銖····································
九	一行傳第二十二	卷三十四	孫晟	史彥超	王清	沈斌	張萬迪	翟進宗	張敬達	王思同	姚洪三	夏魯奇	張源德	死事傳第二十一	卷三十三

卷三十六 郭從謙	杜曉	蘇循·············	薛貽矩	趙光逢	張策	楊渺・・・・・・・・・・・・・・・・・・・・・・・・・・・・・・・・・・・・	張文蔚。 李存璋	唐六臣傳第二十三	卷三十五 李存孝:	李自倫 李有信·	程福 贇····· 李嗣恩·	石昂······ 李嗣本·	張薦明	鄭遫・・・・・・・・・・・・・・・・・・・・・・・・・・・・・・・・・・・・	
諏	瓊	I 00	曆 三九九	伶官傳第二十五		駁員 三九五	璋	進	孝	信	因心	本	昭	第二十四	

新五代史目錄	李仁福	韓建	李茂貞	雑傳第二十八	卷四十	劉守光	王處直	羅紹威	王鎔	雑傳第二十七	卷三十九	張居翰	張承業·····	宦者傳第二十六	卷三十八
	勇瑾····· 3至0	朱宣	雑傳第三十	卷四十二	趙匡凝 医引	鍾傳	雷满	韗全播	盧光稠	雑傳第二十九	卷四十一	温韜	高萬興	楊崇本	韓遜

孫德昭····································	孔循	章寰	裴迪····································	李振四分	李彦威	氏叔琮	雑傳第三十一	卷四十三	馮行襲	趙犨	王珂	孟方立	李罕之	王師範
朱漢賓	袁象先	朱友謙	張全義	雜傳第三十三	卷四十五	康延孝	閻寶	賀徳倫	丁會	劉知俊	雑傳第三十二	卷四十四	蔣殷	王敬薨

新五代史目錄	卷四十七	郭延魯	康福	王堼立	安重霸—————————————————————	王晏球	房知温	電彦威五0日	趙在禮	雑傳第三十四	卷四十六	陸思鐸 ₹00	周知裕	劉	段凝
	安彦威	皇甫遇================================	馬全節三二	張廷蘊	相里金	張希崇三六	李承約	劉處讓	李周	楊彥詢三三	弟錢	張筠	麦從簡至 0	華温琪三九	雑傳第三十五

安叔千至0	白再榮	第行珪	高行周	王周	劉審交	王弘贄	尹暉	楊思權	李金全	盧文進	雜傳第三十六	卷四十八	劉景嚴	李瓊
王環至穴	劉訶	王般	王峻	雜傳第三十八	卷五十	孫方諫	常 田心・・・・・・・・・・・・・・・・・・・・・・・ 五五九	王進	唐景思·····	皇甫暉	馮暉·······	翟光鄴	雜傳第三十七	卷四十九

新五代史目錄	張彥澤	李守貞五九	杜重威	雑傳第四十	卷五十二	楊光遠	安從進	安重榮	妻繼英	范延光	董璋 至七四	朱守殷至三	雑傳第三十九 ————————————————————————————————————	卷五十一	折從阮
一五	卷五十五	司空頭•••••	盧導・・・・・・・・・・・・・・・・・・・・・・ 一二	李愚	鄭珏	兄 英······ 六三	李琪	馬道····································	雜傳第四十二	卷五十四	慕容彦超	趙思綰	王景崇	雜傳第四十一	卷五十二

鉴:	和凝	雑傳第四十四	卷五十六	李懌	崔梲	崔居儉	盧損 原映傳文	馬縞	劉岳	姚顗	馬胤孫	盧文紀	劉昫	雑傳第四十三
允	段希堯	賈緯	李鳞	李崧	雜傳第四十五	卷五十七	龍敏	史圭	王權	何澤~~~~~~~~~~~~~~~~~~~~~~~~~~~~~	薛殿	呂琦 	盧質	馬玉

新五代 史目 錄	吳世家第一	卷六十一	職方考第三	卷六十	司天考第二10年	卷五十九	司天考第一	卷五十八	趙延義	馬重績	王延	斐 羽 · · · · · · · · · · · · · · · · · ·	王仁裕	裴皞	王松
一七	卷六十四	子衍	王建	前蜀世家第三	卷六十三	景子 煜 • • • • • • • • • • • • • • • • • •	子 县录・・・・・・・・・・・・・・・・・・・・・・・・・・・・・・・・・・・・	李晃	南唐世家第二	卷六十二	徐温····································	溥····································	隆演	チ渥	楊行密

希範	子希聲 子延翰…	馬殷 王審知	楚世家第六	卷六十六 卷六十八	晟子 鋹 · • · · · · · · · · · · · · · · · · · 	新弟晟····································	99子玢***********************************	弟龍····································	劉隱 < 05	南漢世家第五 卷六十七	卷六十五 子保權::	→ 親••••••••••••••••••••••••••••••••••••	孟知祥:	後蜀世家第四 一 一	第 五 代 史 目 鲜
	翰八四七	八四五	入		俶	佐•	雅		第七			····· 八三0		廣	 ブ

東漢世家第十	保融于 繼 冲 六六〇	後 等 保 融 · · · · · · · · · · · · · · · · · ·	奥家第九	卷六十九	延政	延羲	 第子
四夷附錄第三10元卷七十四	四夷附錄第二	四夷附錄第一	十國世家年譜第十一六宣卷七十一	繼元•	承勢子 繼 圏・・・・・・・・・・・・・・・・・・・・・・・・・・・・・・・・・・・	于承鈞	劉旻

知;唐、漢、蜀則加東、南、前、後,以別其世家。梁初嘗封沛、東平,南唐初嘗稱齊,三號當時已不顯著,故皆略而 又稱晉,李昪又稱唐;劉襲已稱漢,而劉旻又稱漢;王建已稱蜀,而孟知祥又稱蜀。石晉自爲一代,不待別而可 唐,各從其實也。 徐無黨曰:凡諸國名號,梁本紀自封梁王以後始稱梁,唐本紀自封晉王以後始稱晉,自建國號唐以後始稱 自傳而下,於未封王建國之前,或稱梁、稱晉、稱唐者,史官從後而追書也。 唐胥稱晉, 而石敬瑭

不道。五代亂世,名號交雜而不常,史家撰述,隨事爲文,要於理通事見而已,覽者得以詳焉。

新五代史卷一

梁本紀第一

本紀,因舊以爲名,本原其所始起而紀次其事以時也。卽位以前,其事詳,原本其所自來,故曲而備之,見其

起之有漸有暴也。卽位以後,其事略,居尊任重,所責者大,故所書者簡,惟簡乃可立法。

然爲人頗長者。 子,日全县、存、温〇。 誠卒,三子貧,不能爲生,與其母傭食蕭縣人劉崇家。 太祖神武元聖孝皇帝,姓朱氏,宋州碭山午溝里人也。其父誠,以五經教授鄉里,生三 存、温勇有力,而温尤兇悍。 全昱無他材能,

D 變諱某書名,義在稱王註中。

爲東 數爲 草莽,幸唐衰亂,直投其隙而取之爾,非有功德興王之業也,此豈足與共成事哉!今天子在 南面行營先鋒使,攻陷同州,以爲同州防禦使。 河中王重榮所敗,屢請益兵於巢,巢中尉孟楷抑而不通。 唐僖宗乾符四年,黃巢起曹、濮,存、温亡入城中。 是時,天子在蜀,諸鎭 巢攻嶺南,存戰死。 温客謝瞳說温 會兵討賊〇。 巢陷京師 曰:「黄家起於 、以温

梁本

紀第

蜀 諸鎭 之兵 秦而 日集以謀興復,是唐德未厭於人也。 歸楚也。」温以 為然,乃殺其監 軍嚴實, 且 將 自 軍力戰於外,而庸人制之於 歸 于 河 中 因王 重榮以降。 內,此章 都統

0 諸鎖, 記當時語也。 唐謂節度使所治軍州爲藩鎮,故有赴鎮、移鎮

左金吾衞大將軍、河中行營招討副使,天子賜温名全忠

鐸

不承制

拜

温

留後 巢已 平 巢 等。 兵于 湪 田 宣 挺 置 全忠。 敗 犨 事 身 陳 中 師 以 月 東 去 州 和 儒 封 全忠爲 走 Ī 三年三月, 來 沛 全 **一**,至 剪, 徐州 溥 奔 郡 志 雖 泰 侯。 全忠 及克用 殺 時期日 德 爲 山 之。 都 光 始 狼 拜全忠汴州 心歸于宣 統 啓 虎谷、為時溥 附 追敗之于 為東 遣 面 二年三 朱珍、 不 焉。 武。 親 南 兵。 面 月, 李唐賓陷滑州 是時 郾城 刺史、宣武軍節度使。 是歲 行 進 追 几 營兵馬都 Ξ, 倒 兵所 河東 年 黄巢出藍 巢 王。 全忠 殺。 走 个李克用 中牟 統 義 乃自 以胡 成 九月,天子以全忠 田 軍 會東 下兵太行 翮 將 眞爲留後。 又敗之于 亂 、諸鎮 逐 儿 陷 月, 其節 蔡州 兵以救 , 率 諸 度 主滿。 諸鎭兵破巢,復京師。 度使 河, 十二月 爲 鎭兵 節度 陳。 出洛陽, 安師 檢 巢 、擊敗巢 校司 使秦宗權叛 走 、徙 陳 儒 封丘 州刺 封 徒、 興 推 吳 將 東 芽 同 史趙犨亦乞 興 兵 叉 黄 將張聽 中 级附于巢 郡 會 大敗之。 鄴 書門下 巢 |撃巣。 尚讓 走藍

○ 凡稱某州某人者,皆其節度使。

自黄巢死 秦宗權稱帝 陷陝、洛、懷、孟、唐、許、汝、鄭州 遣其將秦賢、 盧 瑭、 張晊攻

洛之兵 兵小却 兵之至 兗、 取 盲 瑭 於 王令珍引兵磁大林,而自率精騎出其東,伏大冢間。 曰:「咥見吾兵,必止。 而 一來赴 萬勝 洛陽以來附。 去。 東 鄭, 方 賢 一也,兗、 後回 軍板 、爲宗權守者, ,王引伏兵横 宗權至蔡,復遣張晊攻汴。 誣 ,而求救于兗、 **瑭** 敗, [其誘汴亡卒以東,乃發兵攻之,取其曹州、濮州。 0 投水死。 |耶之兵又從而合擊,遂大敗之,斬 王置酒軍中, 十月,天子使來,賜王 出,斷壓軍 聞蔡精兵皆已殲於汴, 瓤。 望其止,當速返,毋與之關也。」已而晊見珍在後, 宗權聞瑭等敗,乃自將精兵數千,栅北郊。 三年春,珍得萬 | 唐軍萬勝,環汴爲三十六栅。王顧兵少,不敢出〇。乃遣朱珍募兵 中席, ·爲三而擊之。 王陽 王 聞咥復來,登封禪寺後岡 一紀功 起如 人、馬數百 碑。 廁 因各潰去。 晊 朱宣、朱瑾 首二萬餘級。 大敗,脫 以 /輕兵出 匹 |咥 以 身 故諸葛爽將李罕之取 歸。 而 北 遂遣朱珍攻鄆州, 兵 走。 食、食畢 門襲咥, (助)汁, 乃擊賢板橋 宗權與晊夜走, 宗權 望旺兵過, 五月,兗州 十,拔旗! 已破宗權 怒, 而樂聲不輟。 斬脛。 果止。 以拔其四栅。 幟 遣朱珍躡之, 過鄭 大敗而還。 東歸 朱瑾 河陽 馳擊珍。 而 珍 河陽、陜、 卽馳 張 屠其 鄭州 王移 咥 全義 又擊 戒 城

一月,天子使來,賜王鐵劵及德政碑。

○流俗本「宜」從「王」者非。○始而稱名,旣而稱爵,旣而稱帝,漸也。 爵至王而後稱,著其逼

)流俗本「宜」從「王」者非。

涩

本

紀

第

太

祖

上

秦宗權 行 軍 剖 准 陷 馬 南 襄州 李璠爲留後。璠之揚州 節 度使高駢死, ,以趙德諲爲節度使。 場。楊行 密入揚州。 ,行密不納。文德元年正月,王如淮 德諲 叛于宗權以來附。 天子因以王爲 蔡州 天子以王兼淮南節度使。 南,至宋州 王乃表行密爲副使,以 而還。 四 面 是時

李罕之。 遺 朱珍助從訓 三月庚子 罕之奔于河東。 攻魏。 ',僖宗崩。 而魏軍殺彥貞 天雄軍亂,囚其節度使樂彥貞。 李克用遣 兵圍河陽, ,從訓戰死,魏 全義來求救,遣丁會、 人立羅弘信,珍乃還。 其子相州 刺史從訓攻魏,來乞兵。 牛存節救之,擊敗河 張全義取 河陽,逐 東

以德諲爲副

南亂 溥獨 司 言送瓚還楚州。 兵于沇河 西 1牙將 · 李璠獻俘于京師,表郭璠准西留後。 楚州 稱都統,王 五月,行營討蔡州 遂攻宿州,下之。珍屯蕭縣, 中叢 刺 ;史|劉瓚來奔,納之,及王兵攻|蔡不克,還,欲攻|徐, 執秦宗權 乃上書,論溥討蔡無 **溥怒論己,又聞珍以兵來,果出兵** , 圍之百餘日, 不克。 ,折其足, 將檻送京 別遣 功而不 龐師古攻徐州。 三月,天子封王爲東平王。 落 師 是時, 都統,且欲激怒溥以 別將 (拒之。 時溥已爲東 郭璠殺叢, 珍戰于 龍紀元年正月, 乃遣 南面都統, ,吳康,大敗之, 篡宗權以 起 朱珍將兵數 兵端。 七月,朱珍殺李唐賓 師古敗溥于呂梁。 又以王統行營而 初, 千 髙 取 王遣行軍 が其豐、蕭 ·以東, 騈 死

王 一如蕭縣,執珍殺之,遂攻徐州。 多,大雨,水,不能軍而旋。

南 ·大亂,行密走宣州,儒入揚州。 初,秦宗權遣其弟宗衡掠地淮南,是歲,宗衡爲其將孫儒所殺,儒攻楊行密于揚州。 大順元年春,遺龐師古攻孫儒于淮南,大敗而還。四月,宿

敗于斗門,王軍後至,又敗而還。多,友裕取濮州,遂攻徐州。二年四月,龐師古克徐州,殺 **賓殺其刺史郭饒來降。十二月,丁會敗朱瑾于金鄉。** 及魏人戰于內黃,大敗之,屠故元城,羅弘信來送款。 兵所當出,而辭以糧乏,皆不許。於是攻魏。十一月,張濬之師大敗于陰地。二年正月,王 度使,遂如滑州,假道于魏,以攻河東,且責其軍須,亦所以怒魏爲兵端也。魏人果以謂非 潞州。 兵,以兵二千屬濬而已。濬屯于陰地。河東叛將馮霸殺路州守將李克恭來降,遣葛從周入 堅。天子不得已,許之。 |濬私與||汴交,王厚之以賂,|濬爲||汴請伐||河東。||唐諸大臣皆以爲不可興師。||濬挾||汴力,請益 源驛,夜以兵攻之。。克用踰城而免,訟其事于京師,天子知曲在汴而和解之。至是,宰相張 將張筠以宿州復歸于時溥,王自將攻之,不克。 初,黃巢敗走,李克用追之,至于冤朐,不及而旋。 李克用遣康君立攻之,從周走河陽。九月,王如河陽。十月,天子以王兼宣義軍節 五月,以濬爲太原四面行營都統,王爲東南面招討使。然王不親 十月,克宿州。十一月,曹州將郭紹 景福元年二月,攻鄲州,前軍朱友裕

深

紀

第一

太祖

Ŀ

*†*0 徐州 ,以師古爲留後,遂攻克

子落落 遂攻 優韶 攻魏 兗州。 止 鉅 乾 芝。 寧元 、送于魏 羅弘信來求救,遺葛從周救魏。 屯于宿州。 朱瑾 叉請 (年二月,王及|朱宣戰于|漁山,大敗之。 二年八月,又敗宣于梁山。 一克、鄆求救于河東,李克用發兵救之,假道于魏。 彩,殺之。 奔于 遷都洛陽,不許。 ,淮南,以葛從周爲兗州留後。 楊行 七月,鳳翔李茂貞犯京師,天子出居于華州。 密遣朱瑾先擊淸 匹 |年正月,魔師古克鄆州 是歲,李克用封晉王。 口,師古敗死。 九月,攻淮南 從周亟返兵,至于渒河,瑾 旣 王 三年五月,戰于 而魏人擊之,克用怒, 如鄭州,以朱友裕爲留後。 ,龐師古出清 王請以兵赴難 ,洹水,擒克用 口 ,葛從周出 月, 大 叉 舉

叔琮、 後,其將朱簡殺蹯來降。 原,不克。 州 王 光化 幽州 康懷英 惺 襄州 一、馳歸 元年三月,天子以王 七月,李克用 劉 趙匡凝自其父德諲時來附, 、攻匡凝,取其泌、隨、鄧三州 仁恭攻魏,羅紹威來求救。 取澤、路。 以簡爲保義軍節度使。 一兼天平軍節度使。 十一月,保義軍亂,殺其節度使王珙,推其牙將李璠爲留 匡凝 Θ 王救魏,敗仁恭于內黃。 又與楊行密、李克用通 匡凝 三年四月,遣葛從周攻劉仁恭之滄州 四月,遣葛從周攻晉之山東, 請和乃 止。 十二月,李罕之以路州 一,而其 四月, 事 遣氏叔宗攻晉太 泄 0 取邢、洛、磁 七月,遺氏 來降。

附于晉。遂攻鎭州,破臨城,王鎔來送款。進攻定州,王郜奔于晉,其將王處直以定州降。 其德州,及仁恭戰于老鵶堤,大敗之。八月,晉取洺州。 王如洺州,復取之。是時,鎭、定皆

曾三異校定曰:三異案,唐書地理志:唐州,天祐三年朱全忠徙治泌陽,表更名泌州。則是天祐二年唐州舊名猶 在,至三年始更爲泌。光化之初,未當有泌州之名。今書爲泌,則誤也。

鎭、定之兵,皆會于太原,圍之,不克,遇雨而還。五月,天子以王兼河中尹、護國軍節度使。 六月,晉取慈、隰。 救,乃來降。三月,大舉攻晉。氏叔宗出太行,取澤、潞。葛從周、張存敬、侯言、張歸厚及 封王爲梁王。遣張存敬攻王珂于河中,出含山,下晉、絳二州。王珂求救于晉,晉不能 唐宦者劉季述作亂,天子幽于東宮。天復元年正月,護駕都頭孫德昭誅季述,天子復

宣武、宣義、天平、護國兵七萬,至于河中,取同州,遂攻華州,韓建出降。 之。乃選美女,內之宮中,陰令伺祭其實。久之,果得胤奏謀所以誅宦者之說,全誨等大懼, 且至,即以岐、邠宿衞兵劫天子奔于鳳翔。王乃上書言胤所以召之之意。 等皆遭子弟以精兵宿衞天子,宦官韓全誨等亦因恃以爲助。天子與胤計事,宦者屬耳,頗聞 日夜相與涕泣,思圖胤以求全。胤知謀泄,事急,卽矯爲制,召梁兵入誅宦者。十月,王以 自劉季述等已誅,宰相崔胤外與梁交,欲假梁兵盡誅宦者。而鳳翔李茂貞、邠寧王行瑜 天子怒,罷胤相, 全誨等聞梁王兵

梁 本 紀

太祖上

兵馬元帥,王爲副元帥。 後入,殺宦者七百餘人。二月甲戌,天子賜王「回天再造竭忠守正功臣」,以輝王祚爲諸道 轡,且泣且行,行十餘里,止之。人見者,咸以爲忠。己巳,天子至自鳳翔,素服哭于太廟 「吾未識天子,懼其非是,子來爲我辨之。」天子還至興平,胤率百官奉迎。王自爲天子執 軍,約出天子以爲解。甲天子出幸梁軍(1)。遣使者馳召崔胤,胤託疾不至。王使人戲胤曰: 以兵救鳳翔,王遣孔勍襲鄜州,虜周彝之族,徙于河中, 慶、衍 久,城中食盡,自天子至後宮,皆凍餒。三年正月,茂貞殺韓全誨等二十人, 及李茂貞戰于武功,大敗之。王兵犯鳳翔,茂貞數出戰,輒敗,遂圍之。十一月,鄜坊李周彝 于蒲縣,取汾、慈、隰,遂圍太原,不克而還,汾、慈、隰復入于晉。四月,友寧引兵西,至興平 責授工部尚書 几 州 降。 「, 韶梁兵還鎭。 王引兵去,攻邠州,屯于三原。 崔胤奔于華州。 王乃留子友倫爲護駕指揮使(日)以爲天子衞,引兵東歸。 二年春,王退軍于河中。 周彝乃降。 晉攻晉、絳。遺朱友寧擊敗晉軍 邠州節度使楊崇本以邠、寧、 是時, 岐兵屢敗 囊其首, 示梁 天子餞 而 圍

0 曾三異校定曰:三異案,家人傳友倫乃王兄存之子,其後中書上議,亦皆謂之皇姪

于延喜樓,賜楊柳枝

江曲

寧攻靑州。 初,梁兵已西,青州王師範遣其將劉鄩襲據梁兗州。 師範敗之于石樓,友寧死。 九月,楊師厚敗青人于臨朐,取其棣州,師範以青州 王已還梁,四月,如鄲州 遺朱友

降,而鄩亦降。 友倫擊鞠, 墮馬死。 王怒,以爲崔胤殺之,遺朱友謙殺胤于京師(三〇。其與

○ 曾三異校定曰:三異案,家人傳殺崔胤者朱友謀,非友謙。友倫 撃鞠者,皆殺之。

來,賜王「迎鑾紀功碑」。 年二月,遣蔣玄暉殺德王裕等九王于九曲池。六月,殺司空襲贄等百餘人。七月,天子使 十月,王朝于京師,殺朱友恭、氏叔琮。十一月,攻淮南,取其光州,攻壽州,不克而旋。二 本復附于岐。王乃以兵如河中,聲言攻崇本,遣朱友恭、氏叔琮、蔣玄暉等行弒,昭宗崩。 趙匡凝、蜀王王建、吳王楊行密 ⊖ 聞梁遷天子洛陽,皆欲舉兵討梁,王大懼。 六月,楊崇 是,天子左右皆梁人矣。四月甲辰,天子至自西都。是時,晉王李克用、岐王李茂貞、楚王 內圍小兒等二百餘人。行至瀔水,王教醫官許昭遠告其謀亂,悉殺而代之,然後以聞。由 王朝于行在,先如東都。是時,六軍諸衞兵已散亡,其從以東者,小黃門十數人,打毬供奉、 正月,王如河中,遺牙將寇彥卿如京師,請遷都洛陽,幷徙長安居人以東。天子行至陝州 自天子奔華州,王請遷都洛陽,雖不許,而王命河南張全義修洛陽宮以待。天祐元年

會三異校定日:三異案,克用本紀及茂貞傳,建、行密世家,皆書其在唐所授,獨匡凝不書其在唐,此乃闕文。

王欲代唐,使人識諸鎮,襄州趙匡凝以爲不可。遣楊師厚攻之,取其唐、鄧、復、郢、隨、

本紀第

太祖上

均、房七州。 下兵馬元帥。王益怒,遣人告樞密使蔣玄暉與何太后私通,殺玄暉而焚之,遂弒太后于積 盧、匡國、鎭國、荆南、忠武二十一軍爲魏國,備九錫。王怒,不受。十二月,天子以王爲天 | 義、天平、護國、天雄、武順、佑國、河陽、義武、昭義、武寧、保義、忠義、武昭、武定、泰寧、平 欲祈天以延唐。天子懼,改卜郊。 十一月辛巳,天子封王爲魏王、相國,總百揆。以宣武、宣 留後趙匡明奔于蜀。 又殺宰相柳璨,太常卿張延範車裂以徇。天子韶以太后故停郊。 王如襄州,軍于漢北。 遂出光州,以攻壽州,不克。 天子卜祀天于南郊,王怒,以爲蔣玄暉等 九月,師厚破襄州,匡凝奔于淮南。 師厚取荆南 荆南

長蘆。 而紹威已殺牙軍,其兵之在外者皆叛,據貝、衞、澶、博州,王以兵悉殺之。遂攻滄州,軍于 三年春,魏州羅紹威謀殺其牙軍,來假兵以虞變,王爲發兵北攻劉仁恭之滄州,兵過魏 劉仁恭求救于晉。晉人取潞州,王乃旋軍。

校勘記

甲天子出幸梁軍 劍寨, 子」日赴朱全忠營。 權駐 驆帝 薛居正舊五代史(下簡稱薛史)卷二梁太祖紀載:「甲子,昭宗發雕鳳翔,幸左 此處「甲」下當脫「子」字。 新唐書卷一〇昭宗紀及資治通鑑卷二六三(下簡稱通鑑)亦云唐昭宗於「甲

配

(三) 遺朱友謙殺胤於京師 曾三異謂「殺崔胤者朱友謀,非友謙」。按本史卷一三梁朗王存傳載:

「友謙」、「友謀」並誤。

「乃遣友諒至京師,以兵圍開化坊殺胤。」友諒爲梁太祖兄朱全昱之子,本史及薛史俱有傳。疑作

新五代史卷二

梁本紀第二

開平元年春正月壬寅,天子使御史大夫薛貽矩來勞軍。 宰相張文蔚率百官來勸進。

夏四月壬戌,更名晃。 升汴州爲開封府,建爲東都,以唐東都爲西都。 甲子,皇帝卽位②。戊辰,大赦⑤,改元,國號梁。 廢京兆府爲雍州四。 賜東都酺 封唐主為濟陰 日。

契丹阿保機使袍笏梅老來圖。

王曾。

- Θ 自即位以後,大事則書,變古則書,非常則書,意有所示則書,後有所因則書。 非此五者,則否。
- 赦文皆曰大赦天下,此書大,見其志之欲遠及也,不曰天下,質有所不及也,
- 高 謂天子為唐主、錄其本語如此。
- 四 州縣廢置,見職方考,惟京都則書。
- **(H)** 夷狄來,不言朝,不責其禮;不言貢,不貴其物。故書曰來。五代亂世,著其屢來,以見夷狄之來不來,不因治亂。 丽

亂世屢來,不足貴也。

梁本紀第二 太祖下

下平章事。 五 月丁 戊寅, 丑: 並朔, 渤海、契丹遣使者來曰。乙酉,兄全是爲廣王,子友文博王曰, 以唐相張文蔚楊涉爲門下侍郎、 御史大夫薛貽矩爲中書侍郎:同中書門 友珪野王,

院,太府卿敬翔爲使。是月,潞州行營都指揮使李思安及晉人戰,敗績⑤。 友璋福王,友貞均王,友徽建王,姪友諒衡王,友能惠王,友誨邵王。甲午,改樞密院爲崇政

- 夷狄君臣姓名、官爵、或曹或否,不必備,或因其舊史之詳略,但書其來以示意爾。
- □ 友文非子而書子,語在家人傳。
- ③ 我敗曰敗續,彼敗曰敗之,文理宜然。已見行營,故戰不言地。

六月甲寅,平盧軍節度使韓建守司徒,同中書門下平章事

妣劉氏諡曰昭懿,考誠諡曰文穆,廟號烈祖,妣王氏諡曰文惠。 日宣悟;會祖茂琳諡日光獻,廟號敬祖,祖妣楊氏諡日光孝;祖信諡曰昭武,廟號憲祖 秋七月己亥,追尊祖考爲皇帝,妣爲皇后:皇高祖黯諡曰宣元,廟號肅祖,祖妣范氏諡

〇 於此書,見不爲瑞也。

八月丁卯,同州虸蚄蟲生。

隰州黄河清⊖。

九月,括馬。

多十月己未,講武于繁臺。

十一月壬寅,赦亡命背軍、髡黥刑徒曰。

0 於好殺之世,小赦必書,見其亦有愛人之意也。

二年春正月丁酉,渤海遣使者來。己亥,卜郊于西都。 弑濟陰王⊖。

Θ 弑,臣子之大惡也,曹濟陰王,從其實,曹弑,正樂罪名。

二月辛未,契丹阿保機遣使者來。

三月壬申朔,如西都曰。丙子,如懷州曰。丁丑,如澤州。 戊寅,封鴻臚卿李崧萊國公,

爲二王後曾行。壬午,匡國軍節度使劉知俊爲潞州行營招討使。癸巳,改卜郊。張文蔚薨。

○幸,已至也。如,往而未至之辭。 書如,則在道。有事,可以書。

五代亂世,兵無虛日,不可悉書。 故用兵無勝敗,攻城無得失,皆不曹。其命大將與天子有所如,自著大事爾。 此

如懷、澤者,以兵方攻潞州也。

梁瞥更「戊」曰「武」,而舊史悉復爲「戊」。

夏四月癸卯,楊涉罷。 吏部侍郎丁兢爲中書侍郎,翰林學士承旨禮部侍郎張策爲刑部

侍郎:同中書門下平章事。 壬子,至澤州。

本 紀

第二

太

祖下

五月己丑,潞州行營都虞侯康懷英及晉人戰于夾城,敗績曰。戊戌,立唐三廟。

使者來。

○ 築城圍潞,戰于城中,故書地。

六月壬寅, 忠武軍節度使劉知俊爲西路行營招討使,以伐岐②。 己酉,殺右金吾衞上將

軍王師範,滅其族⑤。丙辰,劉知俊及岐人戰于漠谷,敗之。

用兵之名有四:两相攻曰攻,以大加小曰伐,加有罪曰討,天子自往曰征。 隨事爲文,不得不異,非有褒貶也。

□ 當殺日伏誅,不當殺者,以兩相殺爲文。

秋九月丁丑,如陝州〇,博王友文留守東都。

① 以晉人攻晉、絳故也。

多十月丁未,至自陝州。

十一月癸巳,張策罷,左僕射楊涉同中書門下平章事。

十二月己亥,以介國公爲三恪,酅國公、萊國公爲二王後。

三年春正月甲戌,如西都。 復然燈以祈福口。 庚寅,享于太廟。 辛卯,有事于南郊 🛢,

大赦。 丙申, 羣臣上尊號日容文聖武廣孝皇帝。

0 然燈,風俗相傳,自天子至于庶人,舉天下同其奢樂,而風俗敝之大者,故錄其詔意,則其失可知。

- ② 祀天于南郊,書曰有事,錄當時語。
- 二月壬戌,講武于西杏園。 甲子,延州高萬興叛于岐來降日。
- Э 唐末之亂,强弱相抖,或去彼來此,不可爲常,難於遽資。 至此乃書曰叛,始正其定分也。

三月辛未, 渤海國王大諲譔遣使者來。 甲戌,如河中〇。山南東道節度使楊師厚爲路

州四面行營招討使。劉知俊取丹州。

夏四月丙午,知俊克延、鄜、坊三州〇。

○ 易得日取,難得日克,文理宜然爾。

五月己卯,至自河中,殺佑國軍節度使王重師。

六月庚戌,劉知俊執佑國軍節度使劉捍,叛附于岐○。辛亥,如陝州□。乙卯,冀王朱友

謙爲同州東面行營招討使。 □以身歸曰降,以地歸曰附,亦文理宜然爾。知俊爲忠武軍節度使,以同州附岐,今直曹知俊叛,而不言地,蓋忠武已 劉知俊奔于岐。丹州軍亂,逐其刺史宋知誨。

〇以劉知俊叛故也。

見上文。

秋七月,商州軍亂,逐其刺史李稠,稠奔于岐。 乙丑, 克丹州, 執其首惡王行思()。乙

本

亥,至自陜州。 甲申、襄州軍亂、殺其留後王班官。房州刺史楊虔叛附于蜀。

- 初不知首惡之人,故直曰軍亂,旣克而推得之也。克丹州,無主將姓名,行思無官爵,又不見伏誅日,皆舊史失亡。
- 智不足以衞身,才不足以治衆而見殺,不書死之,而以被殺爲文,見死得其死者,士之大節,不妄以予人。

八月辛亥,降死罪囚。辛酉,均州刺史張敬方克房州,執楊虔。

閏月癸酉,契丹遣使者來。己卯,閱稼于西苑。

承旨工部侍郎杜曉爲戶部侍郎:同中書門下平章事。 王檀爲路州東面行營招討使。 九月壬寅,行營招討使左衞上將軍陳暉克襄州,執其首惡字洪〇。丁未,保義軍節度使 辛亥,韓建、楊涉罷。 太常卿趙光逢爲中書侍郎、 辛酉,李洪、楊虔伏誅 翰林學士

命暉討亂,舊史失不書,至此始見。 既克而推得其首惡,故初亦且書軍亂

多十一月甲午,日南至,告謝于南郊⊖。己酉,搜訪賢良。 鎭國軍節度使康懷英伐岐。

南至不必書,因其以至日告謝而書。 十二月,懷英克寧、慶、衍三州。及劉知俊戰于昇平,敗績。 告謝主用至日,故書之。不曰有事于南郊,亦從其本語。 蓋比南郊禮差簡。

四年春正月壬辰朔,始用樂〇。丁未,講武于楡林。

○自唐末之亂,禮樂亡,至此始用樂,故書。

二月己丑,閱稼于穀水。

秋八月丙寅,如陝州〇。河南尹張宗奭留守西都。 辛未,護國軍節度使楊師厚爲西路

行營招討使以伐岐。

□以岐人、鬥人攻夏州故也。

九月己丑,至自陝州。辛亥,搜訪賢良。

多十一月己丑,寧國軍節度使王景仁爲北面行營招討使以伐趙。 趙王王鎔、北平王王

處直叛附于晉,晉人救趙。

十二月癸酉,頒律令格式。

乾化元年春正月丁亥,王景仁及晉人戰于柏鄉,敗績。 庚寅,赦流罪以下囚,求危言正

夏日月三日,空子可长幾畳走者で。 癸巳,天雄軍節度使楊師厚爲北面行營招討使。

諫。

五月甲申朔,大赦,改元。癸巳,幸張宗奭第夏四月壬申,契丹阿保機遣使者來。

秋八月戊辰,閱稼于榆林。 渤海遣使者來。 戊寅,大閱于興安鞠場。

九月辛巳朔,御文明殿,入閤曰。庚子,如魏州曰。張宗奭留守西都。

梁本紀第二 太祖下

9 御殿而云入閣,錄其本語。 書之以見禮失。事在李琪列傳。 此禮,其後壓行,皆不書,一書以見其失足矣。

〇 以晉人攻魏故也。

多十月丙子,大閱于魏東郊。

十一月,高萬興取鹽州。 壬辰,至自魏州。 乙未,回鶻、吐蕃遣使者來。

左散騎常侍孫騭、右諫議大夫張衍、兵部郎中張儁。 二年春二月丁巳,光祿卿盧玭使于蜀。甲子,如魏州母,張宗奭留守西都。 戊寅,如貝州。 次白馬,殺

〇 亦以晉人及鎭、定攻相、魏也。

三月丙戌,屠棗疆〇。丁未,復如魏州。

〇 書「屠」,著其酷之甚者。

夏四月已已,至自魏州〇。戊寅,如西都。

○下書「如西都」,則此至東都可知。

五月丁亥,德音降死罪已下囚空。 罷役徒,禁屠及捕生。 渤海遺使者來。 是月,薛貽矩

薨。

六月,疾革,郢王友珪反①。 戊寅,皇帝崩⑤。

0 叛者、背此而附彼、猶臣於人也。反,自下謀上、惡逆之大者也。日月之書不書,雖無義例,而事亦有不得而日,反

非一朝一夕,不能得其日,故反者皆不日。

年六十一。 不書崩處,以異於得其終者。乾化二年十一月,友珪葬之河南伊闕縣,號宜陵。以不得其死,故不書

梦

罪,不可得而掩爾。使爲君者不得掩其惡,然後人知惡名不可逃,則爲惡者庶乎其息矣。 其實。其實嘗爲君矣,書其爲君。其實篡也,書其篡。各傳其實,而使後世信之,則四君之 聖人之於春秋,用意深,故能勸戒切,爲言信,然後善惡明。夫欲著其罪於後世,在乎不沒 者,用春秋之法也。」「然則春秋亦獎篡乎。」曰:「惟不絕四者之爲君,於此見春秋之意也。 予應之日:「是春秋之志爾。魯桓公弑隱公而自立者,宣公弑子赤而自立者,鄭厲公逐世子 忽而自立者,衞公孫剽逐其君衎而自立者,聖人於春秋,皆不絕其爲君。此予所以不僞梁 或譏予大失春秋之旨,以謂:「梁負大惡,當加誅絕,而反進之,是獎篡也,非春秋之志也。」 嗚呼,天下之惡梁久矣!自後唐以來,皆以爲僞也。至予論次五代,獨不僞梁,而議者

粱

本紀

第二

太祖下

校勘記

爲君而不得掩其惡,以息人之爲惡。 於大惡之君不誅絕之者,不害其褒善貶惡之旨也,惟不沒其實以著其罪,而信乎後世,與其 是謂用意深而勸戒切,爲言信而善惡明也。傑、紂,不待貶其王,而萬世所共惡者也。 能知春秋之此意,然後知予不偽梁之旨也。」

校勘記

(1) 封鴻臚卿李崧萊國公爲二王後 五七及醉史卷一〇八有齊崧傳,其人未受梁封。五代史纂誤補(下簡稱漢誤稱)卷一謂作「崧」誤。 「崧」,薛史卷四梁太祖紀及五代會要卷五作「嵸」。按本史卷

新五代史卷三

梁本紀第三

末帝 ",太祖第三子友貞也⊖。爲人美容貌,沈厚寡言,雅好儒士。 太祖卽位,封均王,

⊖「末」非諡號,從其本語。

爲左天興軍使、東京馬步軍都指揮使。

乾化二年六月, 太祖遇弑, 友珪自立, 殺博王友文, 以弑帝之罪歸之。 以王爲東京留

守、開封尹,敬翔爲中書侍郎、同中書門下平章事,戶部尚書李振爲崇政院使。 明年,友珪改元曰鳳曆。二月,駙馬都尉趙巖至東都,王私與之謀,遣馬愼交之魏州,

以懷州 年,今日尚爲友珪所殺,汝等安所逃死乎!」因出太祖畫像示諸將而泣曰:「汝能趨洛陽擒 屯兵叛,方捕索之,王乃僞爲友珪詔書,發左右龍駿在東都者皆還洛陽,因激怒之曰:「天子 見楊師厚計事。師厚遣小校王舜賢至洛陽,告左龍虎統軍袁象先使討賊。是時懷州龍驤 [屯兵叛,追汝等欲盡坑之。」 諸將皆泣,莫知所爲。 王曰:「先皇帝經營王業三十餘

梁本

紀第三

末帝

新五代史卷三

逆賊 討賊,友珪死,杜曉見殺。 ,則轉禍爲福矣。」軍士皆呼萬歲,請王爲主,王乃遣人趣象先等。 象先遣趙巖持傳國寶至東都,請王入洛陽,王報曰:「夷門,太祖 庚寅,象先等以禁兵

是月,皇帝即位於東都②,復稱乾化三年,復博王友文官爵。

所以興王業也,北拒抖汾,東至淮海,國家藩鎭,多在東方,命將出師,利於便近。」

○ 即位大事,失其日而書「是月」,見亂之甚。 「於東都」,終上文也。

三月丁未,更名鳇。

夏五月,楊師厚取滄州。

秋九月甲辰,御史大夫姚洎爲中書侍郎、同中書門下平章事

多十二月,晉人取幽州。

四年夏四月丁丑,貶于兢爲萊州司馬。 武寧軍節度使蔣殷反,天平軍節度使牛存節討

真明元年春正月,存節克徐州O。

之。

□ 蔣脫自烯死,故不書伏誅。

德軍 宣徽使張筠爲節度使。 三月丁卯,趙光逢罷。 平盧軍節度使賀德倫為天雄軍節度使也,分其相、澶、衛州爲昭 己丑,天雄軍亂,賀德倫叛附于晉母。 **邠州李保衡叛于岐,來**

附。

- 母 命官不書,非常而有故則書,此書爲天雄軍亂張本。
- 軍亂掛,首惡不書而書應倫叛,責貴者深也。 德倫不可加以首惡,而可資其不死以叛。 張彥寶首恶,而略不舊,彥,

微者,德倫可以誅而不誅,故以德倫獨任其貴。

夏六月庚寅朔,晉王李存勗入于魏州,遂取德州。

冬十月辛亥,康王友孜反,伏誅□。

⊖ 反者不日、誅反者有日、故書。

十一月乙丑,改元。耀州温昭圖叛于岐,來附。

是歲,更名瑱曰。

〇 舊史失其月日。

二年春二月丙申,楊涉罷。

三月,鎮南軍節度使劉鄩及晉人戰于故元城,敗績,奔于滑州。 晉人取衞州、 |惠州。

梁本紀

新 五 化 史 卷 \equiv

生都將李霸 反,伏誅。

夏六月,捉生都將張温叛降于晉。

秋七月,晉人取相州,張筠奔于京師,安國軍節度使閻寶叛附于晉。

九月,晉人取滄州,橫海軍節度使戴思遠奔于京師。 八月丁酉,太子太保致仕趙光逢爲司空兼門下侍郎、同中書門下平章事。 晉人克 具州,守將張源德死之〇。

Θ 警「死」,得其死也。

多十月丁酉,中書侍郞鄭珏同中書門下平章事。

三年夏四月辛卯,右千牛衞大將軍劉璩使于契丹。

冬十二月,宣義軍節度使賀瓌爲北面行營招討使。 己巳,如西都卜郊。 晉人取楊劉。

四年正月,不克郊,己卯,至自西都。

夏四月己酉,尙書吏部侍郞蕭頃爲中書侍郎、同中書門下平章事。 己巳,趙光逢罷。

多十二月庚子朔**,** 賀瓌殺其將謝彦章、孟審澄、侯温裕。 癸亥,瓌及晉人戰于胡柳,

敗績。

○ 舊史不書,亡其月日,故書于歲末,爲明年克兗州張本。

五年春正月,晉軍于德勝曰。

⊖ 用兵無勝敗不書,此梁、「晉得失所繫,故書也。

多片月,劉郸克岳州,長宁進犬朱。 秋八月乙未朔,開封尹王瓚爲北面行營招討使。

多十月,劉鄩克兗州,張守進伏誅。

十二月,晉人取濮陽。 天平軍節度使霍彥威爲北面行營招討使。

事。 河中節度使朱友謙襲同州,殺其節度使程全暉,叛附于晉,泰寧軍節度使劉鄩討之。 六年夏四月已亥,降死罪以下囚。乙巳,尚書左丞李琪爲中書侍郎、同中書門下平章

秋七月,陳州妖贼母乙自稱天子。

九月庚寅,供奉官郎公遠爲契丹歡好使。

多十月,母乙伏誅。

龍德元年春,趙將張文禮殺其君鎔來乞師,不許曰。

〇 文禮初爲鎔養子,號王德明,此書張文禮者,從舊史。

三月丁亥朔,禁私度僧尼。陳州刺史惠王友能反。

夏五月丙戌朔,德音改元,降流罪已下囚。

秋,赦友能,降封房陵侯。 天平軍節度使戴思遠爲北面行營招討使。

多十月,思遠及晉人戰于戚城,敗績。

二年春正月,思遠襲魏州,取成安。

秋八月,滑州兵馬留後段凝攻衛州,執其刺史李存儒。 戴思遠克洪門

三年春三月,潞州李繼韜叛于晉,來附。

夏閨四月,唐人取鄆州〇。

 Θ 晉未即位,已自與梁爲敵國,至其建號,於梁無所利害,故不書。 唐建號而書「唐人」者,因事而見爾

秋八月,段凝爲北面行營招討使。 五月庚申,宣義軍節度使王彥章爲北面行營招討使,取德勝南城。 先鋒將康延孝叛降于唐

傳國寶奔于唐。戊寅,皇帝崩⑤。梁亡⑤。

○ 凡官皆不重書,此書者,嫌彦章已罷招討使而與唐戰,蓋罷使而別將兵以戰也。

日 年三十六。

€ 書曰「梁亡」,見唐莊宗之立速也。四月,莊宗立,稱唐,十月,梁始亡,見唐不待滅梁而立。

新 五代史卷

唐本紀 第 四

莊宗光聖神閔孝皇帝,其先本號朱邪,蓋出於西突厥,至其後世,別自號曰沙陀,而以

朱邪爲姓

甘州 盡忠戰死,執宜獨走歸唐,居之鹽州,以隸河西節度使范希朝。 居之定襄神武川之新城。 而役屬之。 唐德宗時,有朱邪盡忠者,居於北庭之金滿州。 其後贊普爲回鶻所敗,盡忠與其子執宜東走,贊普怒,追之,及于石門關 其部落萬騎,皆驍勇善騎射,號「沙陀軍」。 貞元中,吐蕃贊普攻陷北庭,徙盡忠於 希朝徙鎮太原, 執宜從之,

刺 朱邪赤心爲太原行營招討沙陀三部落軍使。以從破勛功,拜單于大都護、振武軍節度使,賜 姓名曰 史、大同軍防禦使,國昌稱疾拒命。 執宜死,其子曰赤心。 李國昌,以之屬籍。 沙陀素疆,而國昌恃功益横恣,懿宗患之。 懿宗咸通十年,神策大將軍康承訓統十八將討龐勛於徐州, 十三年,徙國昌雲州

以

唐 本 紀 第 ДŲ 莊 宗 上

禦使段文楚,據雲州,自稱留後。 國昌 子克用,尤善騎射,能仰中雙鳧,爲雲州守捉使。 唐以太僕卿盧簡方爲振武節度使,會幽、抖兵討之。 國昌已拒命, 克用乃殺大同 軍防

行至嵐州江了軍潰,由是沙陀侵掠代北爲邊患矣。

度使、宣慰沙陀六州三部落使日,以招緝之。 明年,僖宗卽位,以謂前太原節度使李業遇沙陀有恩,而業已死,乃以其子鈞爲靈武節 拜克用大同軍防禦使。

① 六州三部落,皆不見其名處,據唐書除使有此語爾。

僖宗乃拜鐸大同軍使,以李鈞爲代北招討使,以討沙陀。 亦閉關拒之。國昌父子無所歸,因掠蔚、朔間,得兵三千,國昌入保蔚州,克用還據新城。 居久之,國昌出擊党項,吐渾赫連鐸襲破振武。 克用聞之,自雲州往迎國昌,而雲州人

乾符五年,沙陀破遮虜軍,又破岢嵐軍,而唐兵數敗,沙陀由此益熾,北據蔚、朔,南侵

忻、代、嵐、石,至于太谷焉。

其叔父友金以蔚、朔州降于琢,克用聞之,遽還。 廣明元年,招討使李琢會幽州李可舉、雲州赫連鐸擊沙陀, 可舉追至樂兒嶺,大敗之,豚軍夾擊,又敗 克用與可舉相拒雄武軍。

之于蔚州,沙陀大潰,克用父子亡入達靼 克用少曉勇,軍中號曰「李鵶兒」,其一目眇,及其貴也,又號「獨眼龍」,其威名蓋於代

其在達靼,久之,鬱鬱不得志,又常懼其圖己,因時時從其羣豪射獵,或掛針于木,或立

馬鞭,百步射之輒中,羣豪皆服以爲神。

靼 節度使鄭從讜與之錢千緡、米千石,克用怒,縱兵大掠而還。 京 了,承制以爲代州刺史、鴈門以北行營節度使。 黃巢已陷京師,中和元年,代北起軍使陳景思發沙陀先所降者,與吐渾、安慶等萬人赴 行至絳州, 沙陀軍亂, 大掠 流而還。 景思念沙陀非克用不可將,乃以詔書召克用於達 率蕃漢萬人出石嶺關,過太原,求發軍錢。

書門 戰望 黨驚曰:「鵶兒軍至矣!」二月,敗巢將黃鄴於石隄谷;三月,又敗趙璋、尙讓於良田坡,橫 三十里。 下 春宮昇陽殿,巢敗,南走出藍田關,京師平, ·平章事、河東節度使,以國昌爲鴈門以北行營節度使。 一年十一月,景思、克用復以步騎萬七千赴京師。 是時,諸鎭兵皆會長安,大戰渭橋,賊敗走入城,克用乘勝追之,自光泰門先入 克用功第 三年正月,出于河中,進屯乾坑。 ___<u>.</u> 十月,國昌卒。 天子拜克用檢校司空、同中

井關 別爲 且 |走且戰,至中牟,臨河未渡,而|克用追及之,賊衆驚潰。 一假道 昭義 + 軍回。 月,遣 河陽 黄巢 ,諸葛 其弟克脩攻昭義孟方立,取其澤、路二州。 常南 走至蔡州 ,降秦宗權,遂攻陳州。 四月, 敗尚讓於太康, 四年,克用以兵五萬救陳州 比至封丘,又敗之,巢脫身走,虎 方立走山東,以邢、洛、磁三州 又敗黃鄴于西華。 出天

唐

本

紀

第

74

莊

宗上

用追之,一日夜馳二百里,至于冤胸,不及而還。

昭義軍在唐時跨山東、西,管五州,至是澤、潞入于晉,邢、洛、磁孟氏據之,故當時有兩昭義。

等,隨電光,縋尉氏門出還軍中。七月,至于太原,訟其事于京師,請加兵於汴,遣弟克脩將 兵萬人屯于河中以待。僖宗和解之,用破巢功,封克用隴西郡王。 郭景銖滅燭,匿克用牀下,以水醒面而告以難。會天大雨滅火,克用得從者薛鐵山、賀回鶻 ,休軍封禪寺,朱全忠饗克用於上源驛,夜,酒罷,克用醉臥,伏兵發,火起,侍者

因僞爲詔書示克用曰:「此朱全忠之謀也。」克用信之,八上表請討全忠,僖宗不許,克用大 韶克用以兵護處存之鎭⊖。 重榮使人給克用曰:"天子詔重榮,俟克用至,與處存共誅之。」 光啓元年,河中王重榮與宦者田令孜有隙,徙重榮兗州,以定州王處存爲河中節度使,

D克用不僭號,故不稱王。

馬都監楊復恭與克用善,乃遣諫議大夫劉崇望以詔書召克用,且道復恭意,使進兵討政等。 **遂犯京師,縱火大掠。** 王煴,迫之稱帝,屯于鳳翔。 重榮旣不肯徙,僖宗遣邠州朱政、鳳翔李昌符討之。 天子出居于興元,克用退屯河中。 僖宗念獨克用可以破政而不能使也,當破黃巢長安時,天下兵 朱政亦反以兵追天子,不及,得襄 克用反以兵助重榮, 敗政于沙苑,

克用陽諾而不行。

敗伐之。昭宗以克用破黃巢功高,不可伐,下其事臺、省四品官議,議者多言不可。宰相張 可,昭宗然之,詔諭全忠等。 濬獨以謂沙陀前逼僖宗幸興元,罪當誅,可伐。軍容使楊復恭,克用所善也,亦極諫以爲不 赫連鐸於雲州。 明年,孟方立死,弟遷立。大順元年,克用擊破孟遷,取邢、洛、磁三州,乃遣安金俊攻 幽州李匡威救鐸,戰於蔚州,金俊大敗。於是匡威、鐸及朱全忠皆請因其 全忠陰路濬,使持其議益堅,昭宗不得已,以濬爲太原四面行

引咎,優韶答之。 濬、建遯歸。 克用兵大掠晉、絳,至于河中,赤地千里。 克用上表自訴,其辭慢侮,天子爲之 用遣李存孝執揆于長子,又遣康君立取潞州。十一月,濬及克用戰于陰地,濬軍三戰三敗, 是時,路州將馮霸叛降于梁,梁遣葛從周入路州。唐以京兆尹孫揆爲昭義軍節度使,克

營兵馬都統,韓建爲副使。

林中,壽其馬曰:「吾世有太原者馬不嘶。」馬偶不嘶以免。前軍李存孝取臨城,進攻元氏。李 于鎭州。 雲州,圍之百餘日,鐸走吐渾。八月,大蒐于太原,出晉、絳,掠懷、孟,至于邢州,遂攻王鎔 二年二月,復拜克用河東節度使、隴西郡王,加檢校太師兼中書令。四月,攻赫連鐸于 克用栅常山西,以十餘騎渡滹沱覘敵,遇大雨,平地水深數尺。鎮人襲之,克用匿

本紀第

70

莊

乾寧元 ||哑 | 擊鎔,且以書招鎔,而急攻其平山, 《年三月,執|存孝,殺之。 冬,攻|幽州,|李匡|儔棄城走, · 鎔懼,遂與克用通和, 追至景城,見殺,以劉仁恭爲留 獻帛五十萬匹, 出兵助攻邢州

州 以 韓建 鎭 争者 茂貞假子閻圭亦謀劫幸鳳翔 請 兵 年 犯 7 京師 珙。 七月,至于河中,同州 ,河中王重盈卒,其諸子珂、珙爭立,克用請立珂, ,聞克用亦起兵,乃皆罷 昭宗初兩難之, 乃以宰相崔胤爲河 王行約 了京師 大亂 奔于 去。 1、昭宗 京師 六月 陽言 ,克用攻絳州 出居于 一節度使,旣而許克用立 日:「沙陀十 右門。 鳳翔李茂貞、邠寧王行瑜、 ,斬刺史王瑤。 萬 至矣! 珂。 |瑤 奉天子幸哪 一、洪弟 茂貞 〈等怒 助 珙

臣, 以爲邪寧 克用 封晉王。 克用軍留 還 軍 应 是時 雲陽 月餘不 面 行營都 满擊茂貞 進 昭宗遣 統。 昭宗還京師。 遇雨六十日,或勸克用入朝 昭宗慰勞克用, 延王 一戒丕、 丹王 + 使與茂貞 元允兄事 月, 克用擊破邠州 克用, 解 (仇以 克用未決。 且. / 紓難 一告急。 王行瑜 拜克用「忠正 都押衙蓋寓曰:「天 八月, 走 克用 至 慶州 一平難 進 軍渭 功

子還自石門,寢未安席,若晉兵渡渭,人情豈復能安?勤王而已,何必朝哉?」克用笑曰:

「蓋寓猶不信我,況天下乎!」乃收軍而還。

將擊魏,戰于洹水,亡其子落落。六月,破魏成安、洹水、臨潭等十餘邑。十月,又敗魏人于 爲相,則臣將暮至闕廷!」京師大恐,濬命遽止。朱全忠之攻克、鄆也,克用遣李存信假道 魏州以救朱宣等,存信屯于莘縣,軍士侵掠魏境,羅弘信伏兵攻之,存信敗走洛州。克用自 三年正月,昭宗復以張濬爲相,克用曰:「此朱全忠之謀也。」乃上表曰:「若陛下朝以濬

四年,劉仁恭叛晉,克用以兵五萬擊仁恭,戰于安塞,克用大敗。

白龍潭,進攻觀音門,全忠救至,乃解。

公橋,德威大敗。多,潞州守將薛志勤卒,李罕之據潞州,叛附于朱全忠。 光化元年,朱全忠遣葛從周攻下邢、洛、磁三州。克用遣周德威出青山口,遇從周于張

昭復取澤、潞。三年,嗣昭敗汴軍于沙河,復取洺州,朱全忠自將圍之,嗣昭走,至青山口, 二年,全忠遣氏叔琮攻破承天軍,又破遼州,至于楡次,周德威敗之于洞渦。秋,李嗣

遇汴伏兵,嗣昭大敗。秋,嗣昭取懷州。是歲,汴人攻鎮、定,鎭、定皆絕晉以附于朱全忠。

爲 《書幣 聘梁以求和。梁王以爲晉弱可取,乃曰:「晉雖請盟,而書辭慢。」 因大舉擊晉。 四 天復元年,全忠封梁王。梁王攻下晋、絳、河中,執王珂以歸。晉失三與國,乃下意

本紀

常四

莊

宗上

路, ,其別將白奉國破承天軍 L,遼州守將張鄂、汾州守將李瑭皆迎梁軍降,晉人大懼。 會天大

年,進攻晉、絳,大敗于蒲縣,梁軍乘勝破汾、慈、隰三州,遂圍太原。 雨 :霖,梁兵多疾,皆解去。 五月,晉復取汾州,誅李瑭。 六月,周德威、李嗣昭取慈、 克用大懼, 謀出奔雲 關。

州 又欲奔匈奴,未決,梁軍大疫,解去,周德威復取汾、慈、隰三州。

Ħ 稱,乃仍稱天復。 四年,梁遷唐都於洛陽,改元曰天祐。 克用以謂劫天子以遷都者梁也,天祐非唐號,不

五年,會契丹阿保機於雲中,約爲兄弟。

彼常困我而我急其難,可因以德而懷之,是謂一舉而兩得,此不可失之機也。」克用以爲然, 爲梁患者,其所憚者惟我與仁恭耳,若燕、晉合勢,非梁之福也。 吾復振之時也。今天下之勢,歸梁者十七八,彊如趙、魏、中山,莫不聽命。是自河以北,無 六年,梁攻燕滄州,燕王劉仁恭來乞師。 克用恨仁恭反覆,欲不許,其子存勗諫曰:「此 夫為天下者不顧小怨, 且

燕出兵攻破路州,梁圍乃解去,以李嗣昭爲路州留後

年,梁兵十萬攻 路州 圍以夾城。 遣周德威救路州, 軍于亂柳。 冬,克用疾。

梁滅唐,克用復稱天祐四年。

當唐太宗時,破西突厥諸部,分同羅、僕骨之人於此磧,置沙陀府,而以其始祖拔野古爲都 督,其傳子孫,數世皆爲沙陀都督,故其後世因自號沙陀。 至其後世,別自號曰沙陀,而以朱邪爲姓,拔野古爲始祖。 ·呼,世久而失其傳者多矣,豈獨史官之繆哉!李氏之先,蓋出於西突厥,本號朱邪, 其自序云:沙陀者,北庭之磧也,

非其始祖,而唐太宗時,未嘗有沙陀府也。 然予考于傳記,其說皆非也。夷狄無姓氏,朱邪,部族之號耳,拔野古與朱邪同時人,

時,有朱邪盡忠及子執宜見於中國,而自號沙陀,以朱邪爲姓矣。 徽二年,處月朱邪孤注從賀魯戰于牢山,爲契苾何力所敗,遂沒不見。 朱邪者,處月別部之號耳。太宗二十二年,已降拔野古,其明年,阿史那賀魯叛。至高宗永 其別部有同羅、僕骨、拔野古等以十數,蓋其小者也;又有處月、處密諸部,又其小者也。 野古爲幽陵都督府,未嘗有沙陀府也。當是時,西突厥有鐵勒,延陀、阿史那之類爲最大; 唐太宗破西突厥,分其諸部,置十三州,以同羅爲龜林都督府,僕骨爲金微都督府,拔 後百五六十年,憲宗

狄無文字傳記,朱邪又微不足錄,故其後世自失其傳。 蓋沙陀者,大磧也,在金莎山之陽,蒲類海之東,自處月以來居此磧,號沙陀突厥,而夷 至盡忠孫始賜姓李氏,李氏後大,而

夷狄之人遂以沙陀爲貴種云。

校勘記

(二)簡方行至嵐州 嵐州俱屬河東道; 版武軍在鄯州, 使盧簡方爲張武節度,至嵐州而卒。 「嵐」,各本原作「鳳」。 屬隴右道。 考新唐書地理志,鳳州屬山南西道,大同軍置在代州, 按舊唐書卷一九上懿宗紀、通鑑卷二五三並云以大同軍 自代州赴版武, 不可能至鳳州。 祭誤補卷一 謂 與

「鳳」當作「嵐」。 據改。

PH O

新五代史卷五

唐本紀第五

行老矣,此奇兒也,後二十年,其能代我戰于此乎!」存勗年十一,從克用破王行瑜,遣獻捷 家。」及長,善騎射,膽勇過人,稍習春秋,通大義,尤喜音聲歌舞俳優之戲。 于京師,昭宗異其狀貌,賜以鸂鶒巵、翡翠盤,而撫其背曰:「兒有奇表,後當富貴,無忘予 至于衰老之際,聲甚悲,坐上皆悽愴。時存勗在側,方五歲,克用慨然捋鬚,指而笑曰:「吾 存勗,克用長子也。 初,克用破孟方立于邢州,還軍上黨,置酒三垂崗,伶人奏百年歌,

霧中,攻其夾城,破之,梁軍大敗,凱旋告廟。 乘其怠擊之。」乃出兵趨上黨,行至三垂崗,數曰:「此先王置酒處也!」會天大霧畫瞑,兵行 有大喪, 德威軍且去, 因頗懈。 王謂諸將曰:「梁人幸我大喪, 謂我少而新立, 無能爲也, 宜 二月,執而戕之,且以先王之喪、叔父之難告周德威,德威自亂柳還軍太原。 梁夾城兵聞晉 天祐五年正月,卽王位于太原。叔父克寧殺都虞侯李存質,倖臣史敬鎔告克寧謀叛。 九月,蜀王王建、岐王李茂貞及楊崇本攻梁大

给

安,晉亦遣周德威攻其晉州,敗梁軍于神山。

去,攻魏。别遣周德威徇梁夏律、高唐,攻博州,破東武、朝城,遂擊黎陽、臨河、淇門,掠新鄉、 月,敗梁軍于柏鄉,斬首二萬級,獲其將校三百人,馬三千匹。進攻邢州,不下,留兵圍之, 多,梁遣王景仁攻趙,趙王王鎔來乞師,諸將皆疑鎔詐,未可出兵,王不聽,乃救趙。八年正 劉知俊叛梁,來乞師,王自將至陰地關, 遣周德威攻晉州,敗梁軍于蒙阬。 七年

尚書令,始建行臺。 年,殺燕王劉守光于太原,用其父仁恭于鴈門曰。於是趙王王鎔、北平王王處直奉册推王爲 臣于梁,而亦陰附于晉。十年十月,劉守光請降,王如幽州,守光背約不降,攻破之。十一 趙,屠棗彊,李存審擊走之。八月,朱友謙以河中叛于梁來降,梁遣康懷英討友謙,友謙復 于承天軍。 燕王劉守光聞晉攻梁深入,乃大治兵,聲言助晉,王患之,乃旋師。七月,會趙王王鎔 劉守光稱帝于燕。九年正月,遣周德威會鎭、定以攻燕,守光求救於梁,梁軍攻 七月,攻梁邢州,戰于張公橋,晉軍大敗。

剖心以祭墓也

張彥,以其兵五百自衞,號帳前銀槍軍。 十二年,魏州軍亂,賀德倫以魏、博二州叛于梁來附。王入魏州,行至永濟,誅其亂首 六月,王兼領魏博節度使。 取德州。 七月,取澶

洛州。 取澶州 城,又敗之,鄰走黎陽。 一西歸。 八月, 圍 晉軍與鄰對壘于幸,晉軍數挑戰,鄰閉壓不出。 軍于洹水,王率百騎覘其營,遇鄩伏兵圍之數重,決圍而出,亡七八騎。 | 鄭聞晉王且去,即引兵擊魏,攻城東。 邢州,降其節度使閻寶。 三月,攻梁衞州, ,降其刺史米昭 梁張筠棄相州、戴思遠棄滄州而逃,遂取二州,而 王行至 具州,返擊鄩,大敗之, ·,克磁州,殺其刺史靳昭。 十三年正月, 王留李存審于幸, 追至于故元 八月,梁復 四月,克

貝州人殺梁守將張源德,以城降。

存審 盧龍、 月,進 大敗之,遂軍 十月,廣 晉 相距于楊劉,彥章決河水以隔晉軍。六月,渡水擊彥章,破其四寨。 敗梁 多,梁謝彥章軍于楊劉。 契丹寇蔚州 軍臨濮,梁軍追之,戰于胡柳,晉軍 横海、昭義、安國 徳勝 軍 于同州 北城。 德勝 ,執振武節度使李嗣本。 ,爲夾寨。 十二月,敗梁軍于河南。 及鎭、定之兵十萬、馬萬匹, 十六年正月,王 。十二月,攻楊劉,王自負芻以堙塹,遂破之。 大敗,周德威死之。 十四年,契丹寇新州,遂寇幽州,李嗣源擊走之。 兼領盧 十七年,朱友謙襲同州 龍 軍于麻家渡。 軍節度使。 梁軍暮休于土山,晉軍 梁王 謝彦章軍于行臺。 瓚攻德勝南城, 梁遣劉鄩擊友謙,李 八月, 十五年正月,梁、 大閱 于魏,合 不克。 ·復擊, 十 二

--八年正 唐 本 紀 第 月, नं 魏州僧傳眞獻唐受命寶一。趙將張文禮弑其君鎔, 加: 宗 ጒ 文禮來請命。 四 二月,

以 使閻寶、 存 入禮爲鎭 審、 義 大同 面 州 軍 軍 兵馬留後。 節度使王 節度使李存璋、 一處直、 三月, 安國 振 河中節度使朱友謙、 武 軍 軍節度使李存進 節度使李嗣 源、 昭義 鎭 匡 州 國 兵 軍節度使李嗣 軍 馬 節度使朱令德, 留後 張 文禮 昭 横 頟 請王 天 海 平 軍 節 卽 軍 度 皇 節 使 度

位

解,

友謙等三請,

王曰:「予當思之。」

死。 城。 其子處瑾 王處直 四 八月, 十月, 月 九 年 李存審克鎭州 嗣 遣趙王 Ė 叛 昭 閉 附 月, 戰死,以李存進代之。 城 于 敗契丹于新 王鎔故將符習及閻 契丹, 拒 守。 其子 九月 兼領成德軍 城、望都, 都幽處直以 建塘 戰死。 八月, 寶 追奔 史建瑭等攻張文禮於鎭州 來 梁取 至于 十月, 附。 使。 衛州 幽州 十二月, 梁戴思遠攻德勝 九月, 三月, 契丹寇涿州 閻寶 存進敗鎭 敗 北 于鎭 城 建塘 **遂寇定州** 李嗣 州 取 東垣 趙州 以 源 李嗣 敗之于 張文 存進 昭 戚 代

日 光元 年春三月, 李繼 韜以 路 州 叛附 于

王

節

度

盧 程 為 夏 辺 1/1 ·
書
侍 息 皇帝 同 申 即位 書門 一大赦 下平章事 一, 改 元 ; 中門使郭崇韜、 國號唐。 行臺 左 昭義監 丞 相 豆 軍張居翰爲樞密使①。 盧 革爲 門 下 侍 鄓 右 以 丞 魏 相

州

爲

東京,太原爲

西京,

鎭州爲北都

Θ 樞密使,唐故以宦者爲之,其職甚微,至此始參用士人,而與宰相權任鈞矣,故與宰相並習。

昌、祖妣秦氏皆諡曰文景,廟號獻祖,考諡曰武,廟號太祖。 閨 .月,追奪祖考爲皇帝,妣爲皇后:曾祖執宜、祖妣崔氏皆諡曰昭烈, 立廟于太原,自唐高祖、太宗、 廟號懿祖; 祖國

懿宗、昭宗爲七廟⊕。壬寅,李嗣源取鄆州母。

- 追奪祖考,則立廟可知,故皆不書「廟」,此書者,以立高祖已下四廟故也。 此大事也,舊史失其日。
- 後唐太祖置義兒軍如李嗣昭等甚衆,初皆賜姓名,而不全若子,故曹李嗣源者,曹其所賜姓名爾,不以子曹也,與友

文、從珂異

五月辛酉,梁人取德勝南城。

六月,及王彥章戰于新壘,敗之。是月,盧程罷。

秋八月,梁人克澤州〇,守將裴約死之。

⊖ 唐末,澤、潞皆屬晉,梁初已得澤州,至此又屬晉,而梁克之,中間不見晉得澤州年月,蓋舊史闕不皆。 五代之亂,戰

争攻取,彼此得失不常,多類此也。

九月戊辰,李嗣源及王彥章戰于遞坊,敗之。

丙戌,貶鄭珏爲萊州 冬十月壬申,如鄆州以襲梁♡。甲戌,取中都。丁丑,取曹州。己卯,滅梁。敬翔自殺⑤。 ·司戶參軍, 蕭頃登州司戶參軍;殺李振、趙嚴、張漢傑、朱珪,滅其族。

僭

糺 第 Ŧī.

北 宗 下

己丑,德音降死罪囚,流已下原之。

- ⊖ 掩其不備,疾馳而入之,故曰「爨」,文理宜然,無褒貶也。
- \bigcirc 翔爲梁臣,梁所以亡唐,翔之謀爲多。梁之亡也,翔雖死之,不書「死」而書「自殺」,死,大節也,見不輕予人也。

光胤爲中書侍郎, 十一月乙巳,復北都爲鎭州,太原爲北都。 禮部侍郎韋說: 同中書門下平章事。戊午,新羅國王金朴英遣使者來。 丙辰,復汴州爲宣武軍。 丁巳,尚書左丞趙

○ 洛京,從當時語。

辛酉,復永平軍爲西都。

甲子,如洛京日。

十二月庚午朔, 至自汴州。 辛巳,李繼韜伏誅。 繼韜之弟繼達殺其兄繼傳于潞州曰。

壬辰, 败于伊闕。

繼僑以被殺書,非不予其死,蓋繼達殺兄,自當著其罪爾。 與嘗弑君者同。

陽〇。 英及其泉州節度使王逢規皆遭使者來行。乙卯,渤海國王大諲譔使大禹謨來。 辛酉,至自河陽。 二年春正月,河南尹張全義及諸鎭進暖殿物。 丁卯,七廟神主至自太原,祔于太廟。 己酉,求唐宦者曰。庚戌,新羅國王金朴 朝獻于太微宮。 庚申, 戊辰,享于 如河

太廟。

- 〇 凡譽過惡辭無譏貶者,直魯其實而自見也。
- 迎皇太后也。 太后曹氏,莊宗母也。 莊宗即位,遺盧程奉册爲皇太后。舊史、實錄皆無奉册月日,故不書。

二月己巳朔,有事于南郊、大赦。 癸酉,羣臣上尊號日昭文睿武光孝皇帝。戊寅,幸李

嗣源第。癸未,立劉氏爲皇后〇。

五代十三君,立后者七,辭有不同:立得其正者,曰「以某妃、夫人某氏爲皇后」,其不正者,直曰「立某氏爲皇后」。

嫌與得正同爾,無褒貶也。

三月己酉, 党項來。 庚戌, ,賜從平汴州及入洛南郊立仗軍士等功臣。 庚申, 工部與中

李塗爲檢視諸陵使〇。潞州將楊立反。

〇 唐諸帝陵也。

王大諲譔遣使者來。 夏五月壬寅,教坊使陳俊爲景州刺史,內園栽接使儲德源爲憲州刺史曰。丙辰,渤海國 丙寅,李嗣源克路州©。

- D 命官不書,此書其甚也**。**
- ○不書命將、舊史闕。

六月丙子,楊立伏誅。 己丑,封回紇王仁美爲英義可汗。

秋七月己酉,如雷山賽天神[○]。

唐本紀第五 莊宗下

〇 夷狄之事也。

八月,大雨霖,河溢。

九月壬子,置水于城門,以禳熒惑日。甲寅,幸郭崇韜第。 丙辰,黑水遣使者來。

○ 本紀書災不書異、熒惑爲置水、非禮書爾、見其有懼禍之意、而不知畏天以修德。水、早、風、蝗之類害物者、災也、 故書;其變逆常理不知所以然者,異也,以其不可知,故不書爾。

多十月癸未,左熊威軍將趙暉妻一**產三男子**⊖。

母此亦變異,而書者,重人事,故謹之。後世以此爲善祥,故於亂世書,以見不然。

十一月癸卯,畋于伊闕。 丙午,至自伊闕〇。丁巳,回鶻使都督安千想來。

○書「至」,見其留四日而荒甚。

十二月庚午,及皇后幸張全義第。

三年春正月庚子,如東京,毀卽位壇爲鞠場。

二月己巳,聚鞠于新場。 乙亥,射鴈于王莽河。 辛巳,突厥渾解樓、渤海國王大諲譔皆

遺使者來。 三月乙未,寒食 射鴈于北郊。 望祭于西郊^(c)。庚申, 乙酉,射鴨于郭泊。 至自東京。 庚寅,射鴈丁北郊。 字 酉, 改東京爲鄴都,以洛京爲

東都。

○ 俚俗之祭也,非禮,故書。

夏四月乙亥,及皇后幸郭崇韜、朱漢賓第。旱。 庚寅,趙光胤薨。

五月丁酉,皇太妃薨,廢朝五日〇。已酉,黑水、女眞皆遣使者來。

○太祖正室,於莊宗爲嫡母,書「太妃」及「輟朝」,見亂世禮壞而恩薄。

○ 少帝,濟陰王也。梁嘗諡曰「哀皇帝」,唐人謂之「少帝」,從其本語。

六月辛未,宗正卿李紓爲昭宗、少帝改卜園陵使日。括馬。

·秋七月壬寅,皇太后崩♡。

○ 不書「册皇太后」,已見上注。

八月癸未,殺河南縣令羅貫。

九月庚子,魏王繼岌爲四川四面行營都統,郭崇韜爲招討使以伐蜀。 自六月雨至于是

月。丁巳,射鴈于尖山。

冬十月壬午,奚、吐渾、突厥皆遣使者來。 戊子,葬貞簡太后於坤陵。

十一月丁未, 高麗遣使者來。己酉,王衍降⊖。郭崇韜殺王宗弼及其弟宗渥、宗訓, 滅

其族。

唐本紀第五 莊宗下

0 唐兵入蜀 ,不攻不戰,君 臣迎降,故直書其實,以見下書「殺衍」爲殺降。

十二月己卯,畋于白沙。 癸未,至自白沙

里 月辛亥,封弟存美爲邕王,存霸永王,存禮薛王,存渥申王,存义睦王,存確通王,存

紀雅王。

答、 契丹使梅老鞋里來。庚辰,殺其弟睦王存乂及河中護國軍節度使李繼麟,滅其族。 周唐殷、楊師太、王景、來仁、白奉國,皆滅其族。 沙州曹義金遣使者來。丙戌,回鶻阿咄欲遣使者來。 74 「年春正月壬戌,降死罪以下囚。甲子,魏王繼岌殺郭崇韜及其二子于蜀 (l)の。 丁亥,殺李繼麟之將史武、薛敬 戊

質皇后劉氏作教與繼岌使殺崇韜,而書「繼岌殺」者,繼岌將兵在外,后教非天子命,可止而不止。

于冷泉。 月己丑,宣徽南院使李紹宏爲樞密使。癸巳,鄴都軍將趙在禮反于貝州〇。甲午,畋 趙在禮陷鄴都,武寧軍節度使李紹榮討之。 邢州軍將趙太反,東北面招討使李紹

眞討之。 甲辰,成德軍節度使李嗣源討趙在禮。

反者皆不書日,獨在禮書日,推迹其心可知爾。 之名,豬原其本心而異於他反者。 於此見凡書人善惡,不妄加之也如此。 其事具本傳。 蓋在禮初無亂心,以是日見迫而反爾。 雖加以大惡

三月,趙太伏誅。 李嗣源反。 博州守將翟建自稱刺史。甲子,殺王衍,滅其族〇。 嗣源入于汴 乙

丑; 甲戌,至自萬勝⑤。從馬直指揮使郭從謙反。 如汴州。 **壬**: 申, 次祭澤。 龍驤指揮軍使姚彦温以前鋒軍叛降于李嗣源。

- 州 Θ 許其不死,降而殺之,又滅其族,於殺非罪此爲甚,而曹無異辭者,前曹「衍降」,義自見也。
- 帝至萬勝鎮,聞嗣源已入汴州,乃還。
- 夏四月丁亥朔,皇帝崩〇。
- 9 年四十三。帝尸爲伶人焚之,明宗入洛,得其骨燼。 天成元年七月,葬之河南新安縣,號落陵,至晉避廟諱,更日伊

陵。其不書「葬」,與梁太祖同。

校勘記

- 〔1〕泉州 五代會要卷三〇作「康州」。
- (ii) 魏王繼岌殺郭崇韜及其二子于蜀 卷二七四,郭崇韜子從死於獨者,止延信、延誨二人。本史卷二四郭崇韜傳亦云「崇韜有五子, 「二子」,各本原作「三子」。按薛史卷五七郭崇韜傅、 通鑑

其二從死於蜀」。據改。

唐

本紀

第

五

校

勘

ا ياة

新五代史卷六

唐本紀第六

明宗聖德和武欽孝皇帝,世本夷狄,無姓氏。 父霓,爲鴈門部將, 生子邈佶烈, 以騎射

事 ,太祖,爲人質厚寡言,執事恭謹,太祖養以爲子,賜名嗣源。

源 別以兵三千先擊梁兵,梁兵解去。 梁攻克、鄆,朱宣、朱瑾來乞師, 太祖遺李存信將兵三萬救之。 存信留莘縣久之,爲羅弘信所襲,存信敗走,嗣源獨 存信留幸縣不進,使嗣

而還,太祖以嗣源所將騎五百號「橫衝都」。

道後至,謂嗣昭曰:「爲公一戰。」乃解鞍礪鏃,憑高爲陣,左右指畫, 光化三年,李嗣昭攻梁邢、洛,出青山,遇葛從周兵,嗣昭大敗走,梁兵追之。 梁追兵望之莫測。 嗣源 從 嗣 间 源

中四矢, 急呼曰:「吾取萬公,士卒可無動! 太祖 解衣賜藥以勞之,由是李橫衝名重四方。 」乃馳騎犯之,出入奮擊, 嗣昭繼進, 梁兵解去。 嗣源身

梁、 晉相 拒于柏 鄉, 梁龍驤軍以赤、白馬為兩陣, 旗幟鎧仗皆如馬色, 晉兵望之皆懼。

唐

本紀

邻

六

明宗

吾 廏 舉 ·鍾以 间。 莊 飮 宗 嗣 大喜曰:「卿當以氣吞之。」因引鍾飲醋,奮檛馳騎 源 「卿望梁家赤、白馬懼乎? 雖吾亦怯也。」嗣源笑曰:「有 犯其白 馬, 其表 挾二裨將而 爾, 翌 日

魏 州 莊宗 因 徇 攻劉守光, 下磁、 相, 嗣 拜 源 相 及李嗣昭將兵三萬別出飛狐,定山後, 州 刺 史、昭德軍節度使。 久之,徙鎭安國。 取武、嬀、儒三州。 契丹攻 幽 莊宗 莊 遣 嗣 平

源

與

图

寶等擊走之。

梁兵

敗

少,以

)功拜

代州

刺

史。

乎? 濟 嗣 源 帳 日 耶 嗣 中, 光 州 源 元 。對日:「· 謂 年 椰 日 人無備、塗襲 徙鎭 夾河之兵 繼 横海。 留以 上黨降梁, (久矣, 《破之, 是時,梁、 即拜天平軍 茍 非 唐相拒于河上,李繼韜以潞州 而 、出奇, 梁方急攻澤州 則大 節 度使、 計 不 蕃漢 決, 吾 出不 馬 臣 步 一請獨 意襲 軍 常堂。」 副 叛降梁, 莊宗 郭州 都 總管 乃以 以 **断梁右** 步 有 騎 憂 五. 臂, 色, 千 涉 可 召

軍 追 梁 至 軍 中 攻 都 破 擒彦章 徳勝 南 及梁監 棚,莊宗 軍 退保楊劉 張漢傑 Ŧ 彦章急攻 軍 州,莊宗 悉 軍 教之, 嗣 源 為前 鋒擊梁

彦章之敗 数萬 彥章 之衆,舟 雌 凝 敗 猶 īfii 楫 未 段凝 非一 知 使其 悉將梁兵 日具也 聞 之, 屯河上,莊宗 遲 此去汴州 疑 定計 ,不數百里,前無險阻,方陣而行, 亦 未 須 知 _ 所嚮, 日 諸將多 縱 使 料 吾 言 所 乘 向 勝 辽 귮 取 發 青、 | 救兵 信宿 齊, 可至, 嗣 必渡 源

攻封丘門,王瓚開門降。 州已破,段凝豈足顧哉 莊宗後至,見嗣源大喜,手攬其衣,以頭觸之曰:「天下與爾共之。」 」而郭崇韜亦勸莊宗入汴,莊宗以爲然,遣嗣源以千騎先至汴州,

拜中書令。

二年,莊宗祀天南郊,賜以鐵券。 五月,破楊立于潞州。 六月,徙鎭宣武, 兼蕃漢內外

馬步軍總管。多,契丹侵漁陽,嗣源敗之于涿州。

請赴山陵,許之,而契丹侵邊,乃止。十二月,遂朝于洛陽。 三年,徙鎭成德。莊宗幸鄴,請朝行在,不許。貞簡太后疾,請入省,又不許。太后崩,

臣皆請遣嗣源討賊,莊宗不許,羣臣屢請,莊宗不得已,遣之。 天成元年⊖,郭崇韜、朱友謙皆以讒死,嗣源以名位高,亦見疑忌。趙在禮反於魏,大

質同光四年,而書「天成元年」者,大赦改元文見下可知。莊宗本紀自書「同光四年」,各從其所稱,旣曰改元,不嫌

三月壬子,嗣源至魏,屯御河南,在禮登樓謝罪。甲寅,軍變,嗣源入于魏,與在禮合,

夕出,止魏縣。 丁巳,以其兵南,遣石敬瑭將三百騎爲先鋒。 嗣源行過鉅鹿,掠小坊馬二千

匹以益軍。 壬申,入汴州。

海爲 樞密使。 四月丁亥,莊宗崩。 殺元行欽及租庸使孔謙。 己丑,入洛陽。 壬寅,左曉衞大將軍孔循爲樞密使。 甲午、監國、朝羣臣于興聖宮。 乙未, 丙午,始奠于 中門使安重

海國王大諲譔使大陳林來。是月,張居翰罷。

西宫〇,

皇帝卽位于柩前⑤,

易斬緩以衮冕雪。

壬子,

魏王繼岌薨回。

甲寅,大赦,改元。

渤

- 〇 曰「始奠」,見其緩也。 自己丑入洛,至此二十日矣。
- (3) 柩前即位,嗣君之禮也。 反逆之臣自立,而用嗣君之醴,曹從其實而不變文者,蓋先已暫反,正其罪矣。 此書其實

者,見其猶有自愧之心,而欲逃大惡之名也。

- ⑤ 既用嗣君之禮矣,遽釋縗而服冕,故書以見其情許。
- (PM) 諸王薨不書,此書者,見明宗舉兵實反,會從謙弑逆, 遂託赴難爲名。 及即位時,莊宗元子猶在,則其辭屈矣。

五月丙辰朔,太子賓客鄭珏、工部尚書任圜爲中書侍郎:同中書門下平章事。 戊辰, 趙

在禮爲義成軍節度使回。

① 在禮始亂宜談,而明宗因之以反,命以方鎭,報其功也,故書。

六月丁酉,汴州控鶴軍亂,指揮使張諫殺其權 知州 事高逖。 己亥,諫伏誅。

己卯, 秋七月庚申, 貶豆盧革為辰州刺史, 章說敍州刺史。 安重 一海殺殿直馬延于御史臺門♡。 甲申,流革于陵州, 契丹使梅老述骨來, 脱于合州 渤海使大昭佐來。

Θ 御史臺所以糾百官之不法,殺人于臺門,惡其甚。

者□。閱稼于冷泉宮。己亥,契丹犯邊。 八月乙酉朔,陝州硤石縣民高存妻一產三男子。丁酉,以象笏三十二賜百官之無笏 丁未,平盧軍節度使霍彥威殺其登州刺史王公嚴。

甲寅、醫官張志忠爲太原少尹。

⊖是時朝廷衰弱之甚,故書。

九月己未,幸至德宮及袁建豐第。

多十月丁亥,雲南山後兩林百蠻都鬼主、右武衞大將軍李卑晚使大鬼主傅能何華來。

辛丑,契丹使沒骨餒來告阿保機哀,廢朝三日。旱,辛亥雨。

二年春正月癸丑朔, 更名亶。 癸亥,端明殿學士兵部待郎馮道、太常卿崔協爲中書侍

郎:同中書門下平章事。

囚。 郭從謙爲景州刺史,旣而殺之曰。戊戌, 二月壬午朔, 新羅使張芬來。 西川節度使孟知祥殺其兵馬都監李嚴。 山南東道節度使劉訓爲南面招討使, 丙申, 以伐荆 赦京師

Θ 從識弑君,不討而命以官,故書。與在禮同罪宜誅,而書「殺」者,明宗亦同罪,不得行誅,故以兩相殺書之。 唐 本 紀 第 六 明 宗

南〇。

是時,荆南自絕於中國而附吳,不足以有罪,不書討而書「伐」,見非內臣,不責其叛,

三月壬子朔,幸會節園,羣臣買宴②。盧臺亂,殺其將烏震。 新羅使林彥來。

Θ 遊幸若不過度,則小事也,皆不書。 惟莊宗及晉出帝之世則書者,著其過度耳。 明宗於五代爲勤儉之君,遊幸無過

度,此書以著買宴,見君臣之失矣。

夏四月庚寅,盧臺軍將龍晊等伏誅。

六月丙戌,任圜罷。 庚子,幸白司馬坡,祭突厥神〇。

〇 夷狄之事也。

秋七月甲子,隨州刺史西方鄴取夔、忠、萬州。 癸酉,殺豆盧革、韋說。

八月乙酉,牂牁使宋朝化及昆明使者來。

九月庚午,党項使如連山來。壬申,契丹使梅老來。

守殷自殺空。乙未,殺太子少保致仕任圜臣。辛丑,德音釋繫囚。 多十月乙酉,如汴州。 宣武軍節度使朱守殷反,馬步軍都指揮使馬彥超死之。己丑, 是月,傳箭于霍彦威昌。

- 不書克汴州者,天子自以兵討,未嘗攻戰,直入其城也。 佗「自殺」不書,爲書克州;此不書克州,故書「自殺」。
- 實安重轟矯韶殺之,不書重誨殺者,明宗知而不貴,又下韶書誣闡以罪,故以明宗自殺書之。
- ⑤ 夷狄之事也。

十一月乙亥,契丹使梅老來。

張氏諡曰孝質順; 祖琰諡曰孝靖,廟號烈祖, 后:高祖書諡日孝恭,廟號惠祖,祖妣劉氏諡日孝恭昭;曾祖敖諡日孝質,廟號毅祖,祖妣 十二月己丑,回鶻西界吐蕃遣使者來。甲辰,畋于東郊。丙午,追尊祖考爲皇帝,妣爲皇 祖妣何氏諡曰孝靖穆; 考諡曰孝成, 朝號德

三年春正月丁巳,契丹陷平州。

祖,妣劉氏諡曰孝成懿。

立廟于應州。

一月辛巳,吐渾都督李紹虜來(1)。 乙未,孔循罷。 戊戌,回鶻使李阿山來。

三月丁未朔,御札求直言。 己未,鄭珏罷。 癸亥,成德軍節度使王建立爲尚書右僕射、

同中書門下平章事。 西方鄴克歸州。 戊辰,宣徽南院使范延光爲樞密使。

夏四月戊寅,延光罷。 乙酉, 達靼遺使者來。 義武軍節度使王都反。 壬寅, 歸德軍節

度使王晏球爲北面行營招討使。

五月,契丹秃餒入于定州。 辛酉,右衞上將軍趙敬怡爲樞密使。 封回鶻可汗王仁裕爲

順化可汗。

秋七月己未,殺齊州防禦使曹廷隱。

唐本紀第六

明

佘

八月,盧龍 軍節度使趙德鈞執契丹首領惕隱赫邈。 慶州防禦使鋄廷琬反。

冬十月,靜難軍節度使率敬周討之。丁巳,突厥使張慕晉來。

十一月壬午,吐渾使念九來。甲午,王建立罷。

十二月,李敬周克慶州,竇廷琬伏誅。辛亥,幸康義誠第。

四年春正月壬辰,回鶻使掣撥都督來。

二月癸卯,王晏球克定州〇。辛酉, 晏球獻馘俘。 趙敬怡薨。 丁卯, 崔協薨。 庚午,至

自汴州。

〇 王都自焚,故不書伏誅。

三月丙戌,殺姪從藥。

夏四月,契丹寇雲州。 癸丑,契丹使撩括梅里來求禿餒, 殺之。 甲寅, 端明殿學士、尚

書兵部侍郎趙鳳爲門下侍郎兼工部尚書、同中書門下平章事

五月已已,朝羣臣,賀朔曰。 乙酉,追諡少帝日昭宣光烈孝皇帝。 契丹寇雲州

0 不曰視朝,而曰「賀朔」,著非禮。視朝常事,自不書爾。 五月賀朔,出於道家之說,自唐以來用之。容之見風世舉非

醴之不急者。此禮其後屢行,皆不復書者,與入閤同。

秋七月壬申,殺右金吾衞上將軍毛璋。

八月乙巳,黑水使骨至來。 丁未,吐渾首領念公山來。 乙卯,党項折遇明來。 己未,高

麗王建使張彬來。

九月癸巳,殺供奉官鳥昭遇。

冬十二月辛丑,殺西平縣令李商。

長興元年春正月丁卯,閱馬于苑。 辛卯、宣徽南院使朱弘昭爲大內留守。

太微宮。甲寅,享于太廟。乙卯,有事于南郊,大赦,改元。

二月,戊戌,黑水兀兒遣使者來。

乙巳,天雄軍節度使石敬瑭爲御營使。

癸丑,朝獻于

三月庚寅,立淑妃曹氏爲皇后。

通、侍衞步軍指揮使樂彥稠討之。 夏四月戊戌,安重酶使河中衙內指揮使楊彦温逐其節度使從珂。 辛亥,自通執彥温殺之〇。戊午,羣臣上尊號日聖明神武 壬寅,西京留守索自

文德恭孝皇帝。辛酉,吐蕃首領于撥葛來。

彥溫雖有罪,有命獲而勿殺,自通擅殺之,故不書「誅」而書「殺」· $\mathcal{F}_{\mathbf{L}}$ 月丁丑, 回鶻使孽栗祖來。 庚辰, 回鶻使安黑連來。

唐本紀第六 明宗

新五代史卷六

秋七月壬午,訪莊宗子孫瘞所曰。

0 莊宗子孫而不知瘞所,見明宗舉兵不順,禍害所罹者可哀也。 於此始求之,見事緩而無恩也。

滅其族。 八月乙未, 忠武軍節度使張延朗爲三司使⁽⁾。 吐渾來附。 封子從榮爲秦王。戊申,海州將王傳極殺其刺史陳宣, 飯于吳來降。 壬寅, 殺捧聖都軍使李行德、十將張儉,

乙卯,吐渾康合畢來。丙辰,封子從厚爲宋王。

□ 三司使始於此,而今遂因之。

九月壬戌,吐蕃使王滿儒來。 東川節度使董璋反。甲申,成德軍節度使范延光爲樞密

使。丁亥,石敬瑭爲東川行營都招討使。

多十月丁酉,始藏冰。甲辰,曉衞上將軍致仕張筠進助軍粟。乙巳,董璋陷閬州,殺節

度使李仁矩,指揮使姚洪死之。孟知祥反。

十一月庚申朔,秦王從榮受册,謁于太廟也。丙戌,契丹東丹王突欲來奔回。

- 册禮廢於亂世,至此始一行之,故書。
- □ 夷狄不可以禮義資,故不曰叛于契丹•

十二月丁未,二王後、秘書丞、酅國公楊仁矩卒,廢朝一日。丁巳,回鶻順化可汗王仁

裕使翟末斯來。 安重誨討董璋〇。沙州曹義金遣使者來。

二年春正月戊辰,党項使折七移來。 庚辰,達靼使列六薛孃居來。

二月丁酉,幸安元信第。戊戌,突厥使杜阿熟、吐渾使康萬琳來。 辛丑,安重誨罷

三月,趙鳳罷。丁亥,太常卿李愚爲中書侍郎、同中書門下平章事

夏四月甲辰,宣徽北院使趙延壽爲樞密使。 甲寅, 董璋陷遂州, 武信軍節度使夏魯奇

死之。乙卯,以旱赦流罪以下囚。

閏五月丁酉,殺太子太師致仕安重誨及其妻張氏、子崇贊崇緒。

秋八月己未,契丹使邪姑兒來。

九月丁亥,放五坊鷹隼。

冬十一月戊申,吐蕃遣使者來。 辛丑,旌表棣州民邢釗門閭〇。

〇 干戈之世,王道息而禮義亡,民猶有自知孝悌,而時君旌表,猶有勸民之意,故兩善而書之。

來。 辛未,渤海使文成角來。 十二月甲寅朔,除鐵禁,初稅農具錢四。 党項寇方渠。 己未,西凉府遣使者來。 己巳,回鶻使安求思

⊖ 至今因之,故書。

唐本紀第六 明宗

三年春正月庚子,契丹使拽骨來。 己酉,渤海、回鶻皆遺使者來。

二月己卯,靜難軍節度使樂彥稠及党項戰于牛兒谷,敗之。

三月甲申,契丹遣使者來。

夏四月庚申,新羅遣使者來。

五月己丑,二王後、詹事司直楊延紹襲封酅國公。 丙午,孟知祥攻董璋,陷綿州

六月甲寅, 封王建爲高麗國王、大義軍使。 孟知祥殺董璋,陷東川。 達靼首領頡哥以

其族來附。

秋八月已卯、吐蕃遣使者來。

冬十月庚申,幸石敬瑭第。

四年春正月庚寅,端明殿學士、兵部侍郎劉昫爲中書侍郎、同中書門下平章事。

二月戊午、孟知祥使朱滉來曰。

Θ 十國外而不書,此當者,知鮮本唐臣而反,至此改過自歸,絕之則嫌不許其自新,錄之則倘冀其遷善,然其來也,臣

體不備,故如夷狄書之。

三月甲辰,追册晉國夫人夏氏爲皇后。

夏五月戊寅,封子從珂爲路王母,從益許王,姪從温克王,從璋洋王,從敏涇王。 **丙戌**

契丹使述骨卿來。

○ 從珂非子,而書「子」,與樂博王友文同。

秋七月乙未,回鶻都督李末來,獻白鶻,命放之。

八月戊申,大赦。

九月戊戌,趙延壽罷。 山南東道節度使朱弘昭爲樞密使。

多十月庚申,范延光罷。 三司使馮贇爲樞密使。 壬申,幸士和亭,得疾曰。

○書「得疾」,爲從榮事詳之。

十一月壬辰,秦王從榮以兵入興聖宮,不克,伏誅曰。乙未,侍衞親軍都指揮使康義誠

殺三司使孫岳。戊戌,皇帝崩于雍和殿即。

- 君病不侍疾,以兵求立,罪當誅,故書「伏誅」。其意以謂帝崩矣、懼不得立,而舉兵自助,非反,故不書反。
- 年六十七。清泰元年,葬河南洛陽縣,號徽陵。 雖得其死,而爲賊所葬,故亦不害葬。

嗚呼,自古治世少而亂世多!三代之王有天下者,皆數百年,其可道者,數君而已,況

於後世邪!況於五代邪!

書褒廉吏孫岳等,以風示天下。 其愛人恤物,蓋亦有意於治矣。 然數曰:「天以火戒我,豈宜增以侈邪!」歲嘗旱,已而雪,暴坐庭中,詔武德司宮中無掃雪, 罷宮人、伶官;廢內藏庫,四方所上物,悉歸之有司。 廣壽殿火灾,有司理之,請加丹雘,喟 「吾何以堪之,當與公等作好事,以報上天。」吏有犯贓,輒寘之死,曰:「此民之蠹也!」以詔 曰:「此天所以賜我也。」數問宰相馮道等民間疾苦,聞道等言穀帛賤,民無疾疫,則欣然曰: 嘗夜焚香,仰天而祝曰:「臣本蕃人,豈足治天下!世亂久矣,願天早生聖人。」自初卽位,滅 予聞長老爲予言:「明宗雖出夷狄,而爲人純質,寬仁愛人。」於五代之君,有足稱也。

息,年屢豐登,生民實賴以休息。 其卽位時,春秋已高,不邇聲色,不樂遊畋。在位七年,於五代之君,最爲長世,兵革粗

起倉卒,卒陷之以大惡,帝亦由此飲恨而終。 然夷狄性果,仁而不明,屢以非辜誅殺臣下。至於從榮父子之間,不能慮患爲防,而變

失行不足懼,天象變見不足懼,小人訛言不足懼,山崩川竭不足懼,水旱蟲蝗不足懼也,賢 當是時,大理少卿康澄上疏言時事,其言曰:「爲國者有不足懼者五,深可畏者六:三辰

相徇,而毀譽亂眞之敝矣。然澄之言,豈止一時之病,凡爲國者,可不戒哉! 言不聞深可畏也。」識者皆多澄言切中時病。 士藏匿深可畏, 四民遷業深可畏, 上下相徇深可畏, 廉恥道消深可畏, 毁譽亂眞深可畏, 直 若從榮之變,任圜、安重誨等之死,可謂上下

校勘記

(二) 吐渾都督李紹虜 魯爲吐渾寧朔府都督」。 爲都督, 賜姓名爲李紹魯。 本史卷七四四夷附錄載:吐渾有首領白承福,唐莊宗爲置寧朔、奉化兩府,使 當即此人。 薛史卷三九唐明宗紀亦云「以吐渾寧朔、奉化兩府都知兵馬使李紹

新五代史卷七

唐本紀第七

孔循女也,安重誨怒循以女妻從厚,三年,罷循樞密使,出從厚爲宣武軍節度使。 成二年,以檢校司徒拜河南尹、判六軍諸衞事,加檢校太保、同中書門下平章事。 愍皇帝,明宗第五子從厚也。 爲人形質豐厚,寡言好禮,明宗以其貌類己,特愛之。 明年 從厚妃, 徙

鎭河東。

長興元年,封從厚宋王,徙鎭成德。二年,徙鎭天雄,累加兼中書令。

質爲橋道頓遞使。 康氏。丁巳,馮道爲大行皇帝山陵使,戶部尙書韓彥惲爲副,中書舍人王延爲判官,禮部尙 書王權爲禮儀使,兵部尚書李鏻爲鹵簿使,御史中丞龍敏爲儀仗使,左僕射權判河南府盧 于西宫②。庚戌,登光政門樓,存問軍民。 辛亥,殺司衣王氏。癸丑,始聽政。 乙卯,殺司儀 日。十二月癸卯朔,發喪于西宮,皇帝卽位于柩前,羣臣見於東階,復于喪位。丙午,成服 四年十一月,秦王從榮伏誅。明宗病甚,遣宦者孟漢瓊召王于鄴,而明宗崩,祕其喪六 丁卯,潭。

二代五 君 一於此始見嗣 ·君即位服喪之事,先君得其終,嗣君得其始,而冤禍亂於臣民,於篡亂之世,稀見之事也,故

特群冒之。

應順元年春正月壬申朔,視朝于廣壽殿日。 乙亥、契丹使都督沒辣于來。戊寅、大赦、

改元,用樂。 回鶻可汗王仁美遣使者來行。沙州、瓜州遣使者來。乙未,朱弘昭、馮贇獻錢

○著非醴也。

助作山陵。

閏月丙午,册皇太后♡。甲寅,册太妃王氏。 北京留守石敬瑭獻銀絹助作山陵。

○ 不書姓氏,不曰册某人爲太后者,母尊不可斥,其事自見於傳也。

二月庚寅,視作山陵。 鳳翔節度使潞王從珂反。 辛卯,西京留守王思同爲西面行營都

部署,靜難軍節度使藥彥稠爲副。

爲副 殺侍衞親軍都指揮使朱弘實。 三月丙辰, 西京副留守劉遂雅叛降于從珂,思同奔歸于京師,不克,死之。 思同兵潰、嚴衞指揮使尹暉、羽林指揮使楊思權以其軍叛降于從珂。 癸亥,河陽三城節度使康義誠爲 鳳翔行營都招討使,王思同 丁 卯,京城巡檢使安 辛酉,

從進叛,殺馮贇,朱弘昭自殺,從進傳其二首于從珂。 戊辰,如衞州⊖。

我同年,其敢戰亦類我。」 勇善戰,明宗甚愛之。自晉兵戰梁于河上,從珂常立戰功,莊宗呼其小字曰:「阿三不徒與 魏氏有子阿三,已十餘歲,明宗養以爲子,名日從珂。 廢帝,鎭州平山人也。 本姓王氏,其世微賤,母魏氏,少寡,明宗爲騎將,過平山, 及長,狀貌雄偉,謹信寡言,而驍 掠得

聞,明宗召王還京師,居之淸化里第。 戍兵自曲陽、盂縣馳出常山以追明宗。明宗之南也,兵少,得從珂兵在後,而軍擊大振。明宗 左衞大將軍、西京留守。 患之,乃矯詔河中裨將楊彥温使圖之。王閱馬于黃龍莊,彥温卽閉門拒之,王止于虞鄕以 入立,拜從珂河中節度使,封路王。是時,明宗春秋已高,王於諸子次最長,樞密使安重誨 同光二年,爲衞州刺史突騎指揮使,戍于石門。 重酶數請行軍法,明宗不聽,後重酶見殺,乃起王爲 明宗討趙在禮,自魏反兵而南,從珂

馮贇用事,乃罷 長興三年,爲鳳翔節度使。 重吉兵職,出爲亳州團練使。又徙王爲北京留守,不降制書而宣授,又 王子重吉自明宗時典禁兵,爲控鶴指揮使,愍帝卽位,朱弘

唐本紀第七

廢帝

以李從璋爲代 初,安重誨得罪罷河中,以從璋爲代,而重誨見殺,故王益自疑,遂據城反。

愍帝遣王思同會諸鎭兵討之,思同戰敗走,諸鎭兵皆潰。

康義 次華州,執藥 彦稠。 |誠叛于唐, 來降。 清泰元年三月丁巳, 王以兵東。 殺宣徽使孟漢瓊。 丙寅,次靈寶,河中安彥威、陝州康思立叛于唐,來降。己已,次陝。 庚申, 次長安, 愍帝出居于衛州 西京副留守劉遂雅販于唐,來降。 甲

丙子, 死之(三)。 拜,王答拜。 夏 쬭 《四月壬申,入京師,馮道率百官迎王于蔣橋,王辭不見。 入哭于西宮,遂見羣臣,道 河南民財以賞軍。 乙酉, 入居于至德宮。 大赦,改元。 丁丑,借民房課五月以賞軍。 戊子,殺康義誠及藥彥稠⑤。 癸酉,以太后令降天子爲鄂王, 戊寅,弑鄂王母,慈州刺史宋令詢 命王監國。乙亥,皇帝卽位。

- 〕義與「弑濟陰王」同。
- € 義誠叛于愍帝,罪宜曰「誅」,而廢帝同惡相殺,故書曰「殺」。

戌 馮道罷。 五 一月丙 天 雄 端明 軍 節度使范延光爲樞密使。 殿學士、左諫議大夫韓昭胤爲 甲寅,賜勸進選人、宗子官。 樞 密使, 莊宅使劉延朗爲樞 密副使。 庚

六月庚辰,幸范延光及索自通第。

秋七月辛亥,太常卿盧文紀爲中書侍郎、同中書門下平章事。 丁巳,立沛國夫人劉氏

爲皇后。

八月辛未,尙書左丞姚顗爲中書侍郎、同中書門下平章事。 許御署官選○、

⊖「御署官」,疑是廢帝初舉兵時所置之官,以其非吏部正授,故須有旨方得選。 此於事無勸戒,不必書,以舊史不

詳,故存所不知,慎傳疑也。

九月,契丹寇邊。

冬十月戊寅,李愚、劉昫罷。

十二月乙亥,雄武軍節度使張延朗爲中書侍郎、同中書門下平章事。 契丹寇雲州。 庚

寅,幸龍門。旱。

二年春二月甲戌,范延光罷。 己丑,追尊魯國太夫人魏氏爲皇太后〇。

○非嫡母,故詳其爵氏。

三月辛丑,忠武軍節度使趙延壽爲樞密使。

夏五月辛卯,宣徽南院使劉延皓爲樞密使。 契丹寇邊。

六月癸未,羣臣獻添都馬曰。

唐本紀第七 廢帝

七四

○「都」者,軍伍之名。

秋 七月丁酉,回鶻可汗王仁美使其都督陳福海來。 劉延皓罷。

九月已酉,刑部尚書房屬爲樞密使。 乙卯,渤海遣使者來。

三年春正月乙未,百濟遣使者來。丁未,封子重美爲雍王

三月丙午,翰林學士、禮部侍郎馬胤孫爲中書侍郎、同中書門下平章事。 河東節度使

石敬瑭反。

夏五月乙卯,建雄軍節度使張敬達爲太原四面都招討使,義武軍節度使楊光遠爲副。

戊申,先鋒指揮使安審信叛降于石敬瑭。已酉,振武戍將安重榮叛降于石敬瑭。

雄軍屯駐捧聖都虞候張令昭逐其節度使劉延皓。

六月癸亥,以令昭爲右千牛衞將軍,權知天雄軍事曰。 甲戌,宣武軍節度使范延光爲

天雄軍四面招討使。

D 佗命官不書「以」,此書「以」者,明令昭猶可「以」。

秋七月戊申,克魏州。 壬子,張令昭伏誅。 癸丑,彰聖指揮使張萬迪叛降于石敬瑭。

八月戊午,契丹使梅里來。

九月甲辰,張敬達及契丹戰于太原,敗績,契丹圍敬達于晉安。 戊申,如河陽。

多十月壬戌,括馬,籍民爲兵。

十一月戊子,盧龍軍節度使趙德鈞爲行營都統。丁酉,契丹立晉。

閏月甲子,楊光遠殺張敬達,以其軍叛降于契丹⊖。甲戌,契丹及晉人至于潞州。

丑,至自河陽。辛巳,皇帝崩⑤。

○一敬達不書死之而書「殺」者,敬達大將,宜以義貴光遠而誅之,雖不果而見殺,猶爲得死,乃諷光遠殺已以叛,故書之

如其志。

⊖ 年五十一,帝自焚死,晉高祖命葬其燼骨於徽陵域中。

有知,其有媿於重誨矣,哀哉! 身赤族,其隙自茲。及愍帝之亡也,穴於徽陵,其土一壠,路人見者,皆爲之悲。使明宗爲 而言,則雖忠而不信,事至而悔,其可及乎?重誨區區獨見路王之禍,而謀之不臧,至於殞 嗚呼,君臣之際,可謂難哉!蓋明者盧於未萌而前知,暗者告以將及而不懼, 故先事

校勘記

(1) 回鶻可汗王仁美遣使者來 訛」。今查薛史卷七八晉高祖紀、冊府卷九七二于淸泰、天福中,亦屢書仁美入貢、受封。是記 次記仁美遣使、受封事。 二十二史考異 (下簡稱透異) 卷六一謂「此四條『仁美』字似皆『仁裕』之 卷七四四夷附錄略同。而本史本卷順應元年、清泰二年及卷八晉高祖紀天福三年、四年,凡四 九六七及五代會要卷二八並云:同光二年仁美卒;天成三年,唐明宗封仁裕爲順化可汗。本史 按薛史卷三二唐莊宗紀、卷一三八回鶻傳、冊府元龜(下簡稱冊府)卷

(11) 慈州刺史宋令詢死之 「慈州」,薛史卷四六唐末帝紀及通鑑 卷二七九作「磁州」。

載前後矛盾,非止本史,孰是孰非,有待詳考。

新五代史卷八

晉本紀第八

其後,晉王李克用起於雲、朔之間,梟蜧鷄以善騎射,常從晉王征伐有功,官至洛州刺史。 高 祖 聖文章武明德孝皇帝,其父臬捩鷄,本出於西夷,自朱邪歸唐,從朱邪入居陰山。

泉 頻 鷄 生 敬 瑭 , 其 姓 石 氏 , 不 知 得 其 姓 之 始 也 。

莊宗已得魏,梁將劉鄩急攻清平,莊宗馳救之,兵未及陣,爲鄩所掩,敬瑭以十餘騎橫 敬瑭爲人沈厚寡言,明宗愛之,妻以女,是爲永寧公主,由是常隸明宗帳下,號左射軍。

村,爲梁兵所敗,敬瑭常脫明宗於危。 年,莊宗戰于胡柳,前鋒周德威戰死,敬瑭以左射軍從明宗復擊敗梁兵。 槊 馳擊,取之以旋。莊宗拊其背而壯之,手啗以酥,啗酥,夷狄所重,由是名動軍中。十五 明宗戰切盧套、楊

趙在 :一豈有 [禮之亂,明宗討之,至魏而兵變,明宗初欲自歸于天子,明己所以不反者。 軍變 一於外,上將獨無事 ,者乎?且猶豫者兵家大忌,不如速行。 願得騎兵三百先 敬瑭獻

晉

本

紀第

八

高硼

七七

宗遂入 收其散卒。 攻汴 州 汴。 莊宗 莊宗遇弑,明宗入立,拜敬瑭保養軍節度使,賜號「竭忠建策興復功臣」,兼六軍 天下之要害也,得之可以成事。」明宗然之,與之驍騎三百, 自洛後至,不得入,而兵皆潰去。莊宗 西還,明宗以敬瑭 渡黎陽爲前鋒 為前鋒 趣 汜水, 且 明

書褒 廉吏普州安崇阮、 在 陝爲 政 以廉聞。 洛州 是時,諸侯多不奉法,鄧州陶旺、亳州李鄴皆以贓汙論 張萬進、耀州孫岳等以諷天下 ,而以敬瑭 為首 明宗下韶

諸

衞

副

使

落六軍副 徙鎭 延光、趙延壽等卒以敬瑭爲請, 碙 軍 ,不欲爲其副,乃自請行。 副 五月, 使如 河陽三城,未行,而契丹、吐渾、突厥皆入寇,是時, 天成 使, 故; 三年 拜駙馬 乃行 改賜「耀忠匡定保節功臣」。三年四月,徙鎭天雄,拜同中書門下 十月,從幸汴州, 都尉。 董璋反東川,爲行營都招討使,不克而還。 及制出,不落 乃拜河東節度使、大同彰國振武威塞等軍蕃漢馬步軍總管, 爲御營使,拜宣武軍節度使、侍 ·副使, 輒復辭行。 秦王從榮統六軍, 明宗數責大臣 衞親軍馬步 復兼六軍 問 軍都指 敬瑭 .誰可行者,范 平章 諸衞 疑其必及 揮使, 事 7、興唐 副

京師。踏王從珂反於鳳翔,愍帝出奔,遇敬瑭于道,敬瑭殺帝從者百餘人,幽帝于衞州而去。 明年 ,明宗崩,愍帝即位,加中書令。 三月、徙鎭成德。 清泰元年五月, 復鎭 太原

遠等共以爲然。乃上表論廢帝不當立,請立許王從益爲明宗嗣。 遷,是疑吾反也。且太原地險而粟多,吾當內檄諸鎭,外求援於契丹,可乎?」桑維翰、劉知 |天福元年五月,徙鎭天平,|敬瑭果不受命,謂其屬曰:「先帝授吾太原使老焉,今無故而 廢帝下韶削奪敬瑭官爵,

命張敬達等討之,敬瑭求援於契丹。

九月,契丹耶律德光入自鴈門,與唐兵戰,敬達大敗。 敬瑭夜出北門見耶律德光,約爲

父子.

密使事

儒 (武、寰州入于|契丹。 己亥,大赦,改元。 十一月丁酉,皇帝卽位〇, 國號晉。以幽、涿、薊、檀、順、瀛、莫、蔚、朔、雲、應、新、嬀、 掌書記桑維翰爲翰林學士、尙書禮部侍郎,知樞

自立,蓋其志在於爲帝,故使自任其惡也。

於廢帝本紀書「契丹立層」,據所見也,於此書「皇帝卽位」,以自立爲文,原其心也。晉高祖之反,無契丹之助,亦必

門下平章事 閨 1月丙寅,翰林學士承旨、尙書戶部侍郎趙瑩爲門下侍郎,桑維翰爲中書侍郎:同中書 ,兼樞密使(I)。 甲戌,趙德鈞及其子延壽叛于唐來降,契丹鏁之以歸。

晋本紀第八 高祖

次河陽,節度使<u>長從簡</u>級于唐來降○。辛巳,至自太原。 盧文紀、姚顗器。 甲申, 大赦, 殺

〇 是日廢帝由在。

張延朝、劉延朝,赦房暠。

平章事。 建立殺其副使李彥贇。 都虞候祕瓊逐其節度副使李彦琦。 十二月乙酉,如河陽。追降王從珂爲庶人〇。丁亥, 己丑,曹州指揮使石重立殺其刺史鄭玩印。 同州裨將門鐸殺其將楊漢賓。 辛卯,御札求直言。 司空馮道兼門下侍郎、同中書門下 庚子, 天平軍節度使王 癸巳,鎭州 牙內

〇「王從珂」,從晉人本語。

爲公,及隋酅公爲二王後,以周介公備三恪曰。 防禦使秘瓊。戊寅,兵部侍郎李崧爲中書侍郎、同中書門下平章事、 二年春正月癸亥,安遠軍節度使盧文進叛降于吳。 丁卯,天雄軍節度使范延光殺齊州 樞密使。 封唐宗室子

⊕ 唐宗室子,史失其名,書之以見二王後、三恪猶存,不必著其人也。

二月丁酉,契丹使皇太子解里來。

三月庚辰,如汴州。

夏四月丁亥,赦囚,蠲民租賦。 趙瑩使于契丹。 辛卯,宣武軍節度使楊光遠進助國錢。

契丹使宮苑使李可興來。

孝平,廟號睿祖,祖妣來氏諡曰孝平獻;考紹雍諡曰孝元,廟號獻祖,妣何氏諡 祖 汽組 五月壬戌,御札求直言。 | 妣秦氏諡日孝安元; 曾祖郴諡日孝簡, 丁丑,追尊祖考爲皇帝,妣爲皇后:高祖璟諡日孝安, 廟號肅祖,祖妣安氏諡曰孝簡 恭 日孝元懿。 祖 廟號靖 是 諡

彦饒。 重义(三)。 國都指揮 丁未,楊光遠爲魏府四 使侯益、護聖都指揮使杜重威討之。 面行營都部署。 從賓寇河陽,殺皇子重信; 東都巡檢張從賓反,留守判官李遐 寇河南,殺皇子 死之,

六月癸未,契丹使夷離畢來。

天雄軍節度使范延光反。丁酉,傳箭于義成軍節度使符

行營都! 進。 誅。 暉殺其節度使周瓌,右衞大將軍李金全討之^⑤。 甲寅,戍將奉國指揮使馬萬執符彥饒歸于京師, 右監門衞大將軍婁繼英叛降于張從賓。 秋七月,從賓陷汜水關,殺巡檢使宋廷浩。 招討使。 辛酉,杜重威克汜水關⑤。 壬申,楊光遠克博州。 義成軍亂, 壬子,右衞大將軍尹暉叛奔于吳,不克,伏 命殺之于赤岡〇。 殺戍將侍衞馬步軍都指揮使白奉 丙子,安州屯防指揮使王 乙卯,楊光遠爲 魏府

彥饒雖有縱軍之罪,被**誣**以反而見殺,故不書誅,曰「命殺」,嫌萬擅殺。

晉

本

紀第八

离础

- 〇 張從賓投河死,故不書伏誅。
- ② 金全未至而暉走,見殺,故不書暉反,不書克安州,不書伏誅

八月丙申,靜難軍節度使安叔千進添都馬。 乙巳,赦非死罪囚及張從賓、符彥饒、王暉

餘黨。

九月,楊光遠進粟。

多十月辛巳,禁造甲兵。

三年春二月戊戌,諸鎭皆進物以助國日。

Θ 殘民以獻其上,君臣同欲,賄賂公行,至此而不勝其多矣!故總言「諸鎭」,此後不復書矣。

三月壬戌,回鶻可汗王仁美使翟全福來(日)。丁丑,禁私造銅器。

秋七月辛酉,以皇業錢作受命寶〇。

○作寶不必書,「皇業錢」者私錢也,天子畜私錢,故書。

八月戊寅,馮道及左僕射劉昫爲契丹册禮使。 壬午, 澶州刺史馮暉降。 丙戌, 許御署

官選。己丑,蠲水旱民稅。辛丑,歸伶官于契丹曰。

○ 高祖以父事契丹,其有所求不曰與而曰「歸」者,若輸之也。

于契丹。于闐使馬繼榮來,回鶻使李萬金來。已巳,赦魏州,蠲民稅。 九月己酉,赦范延光曰。己未,歸靜鞭官劉守威、金吾勘契官王殷、司天鷄叫學生殷暉 是月,宣徽南院使劉

○ 初,延光請降,高祖不許,延光遂堅壁,攻之,久不克,卒悔而赦之,故不書降。

處讓爲樞密使。

洛陽為西京,雍州爲晉昌軍。戊子,右金吾衞大將軍馬從斌使于契丹。己未,契丹使梅里 多十月戊寅, 契丹使中書令韓頰來奉册日英武明義皇帝(語)。 庚辰,升汴州爲東京,以

戊戌、大赦。庚子,封李聖天爲大寶于闐國王。

十一月辛亥,升廣晉府爲鄴都。

壬戌,除鑄錢令。

十二月丙子,封子」重貴爲鄭王。

四年春正月,盜發唐愍皇帝墓〇。辛亥,澶州防禦使張從恩爲樞密副使。 旌表深州民

李自倫門閭。

愍帝附于明宗徽陵域中,無陵名,故曰「墓」,晉高祖卽位,追謚爲愍皇帝。五代諸帝謚號不可爲法,皆不足道,惟愍 帝宜書者,嫌嘗降爲鄂王也。而國亡禮闕,舊史、實錄皆無奏諡上册月日,故雖當書而不得,因事而見於此爾。

三月乙巳,回鶻使其都督拽里敦來。丙辰,頒調元歷。 鹽州成將王彥忠以懷遠城反。

本 紀 郛 八

髙 ÄH

八四

己未,意忠降,供奉官齊延祚殺之。

夏四月辛巳,封回鶻可汗王仁美爲奉化可汗〔8〕。 甲申,廢樞密使。

秋七月丙辰,復禁鑄錢。

閏月壬申,桑維翰罷。

八月己亥朔, 河決博平。 西戎寇涇州, 彰義軍節度使張彥澤敗之, 執其首領野離羅蝦

獨。

九月丁丑,契丹使粘木孤來。 癸未, 封李從益爲郇國公以奉唐後。 丙戌, 高麗王建使

其廣評侍郎邢順來。

多十一月乙亥,立唐高祖、太宗、莊宗、 明宗、愍帝廟于西京。 戊子, 契丹使遙折來, 吐

蕃罷延族來附。

五 年春正月丁 ,卯朔, 德音除民公私債。 己丑, 回鶻使石海金來。

夏四月甲子,契丹興化王來。

五月丙戌,安遠軍節度使李金全叛附于唐。

六月癸卯,李昇遣其將李承裕入于安州,金全奔于唐,安遠軍節度使馬全節及承裕戰

敗之。丁巳,克安州,承裕奔于雲夢,全節執而殺之。

秋八月丁酉,閱稼于西郊。己未,西京留守楊光遠殺太子太師范延光。

九月丁卯,翰林學士承旨、戶部侍郎和凝爲中書侍郎、同中書門下平章事。 辛巳,閱稼

于沙臺。

冬十月丁未,契丹使舍利來。

十一月丙子,冬至,始用二舞。

六年春正月戊寅,封唐叔虞爲興安王,臺駘爲昌寧公。

二月戊申,停買宴錢。 三月,除民二年至四年以前稅()。

⊖ 見時斂重而民不堪。

夏四月己未,契丹使述括來。 五月,吐渾首領白承福來。

秋七月壬午,突厥使薛同海來。

八月壬辰,如鄴都,開封尹鄭王重貴留守東京,宣徽南院使張從恩東京內外兵馬都監。

壬寅、大赦。甲寅、光祿卿張澄使于契丹。

九月乙亥,前安國軍節度使楊彥詢使于契丹。 丁丑,吐渾使白可久來。 河決中都,入

習

新 Ħ. 代 史 卷

于沓河。

冬十月,河決滑、濮、輝、澶州。 山南東道節度使安從進反。

十一月丁丑,西京留守高行周爲南面軍前都部署以討之。

州行力,敗之。成德軍節度使安重榮反。天平節度使杜重威爲鎭州行營招討使。 丹遣使者來。戊戌,杜重威及安重榮戰于宗城,敗之。 十二月丙戌朔,鄭王重貴爲廣晉尹,徙封齊王。先鋒都指揮使郭金海及安從進戰于唐 丙申, 揳

七年春正月丁巳,克鎭州,安重榮伏誅,赦廣晉。 庚午,契丹使達刺來。

三月,歸德軍節度使安彥威塞決河于滑州。

閏月,天興蝗食麥。

夏五月乙巳,尊皇太妃劉氏爲太后曰。

Θ 高祖所生母也。

六月丙辰, 吐渾使念醜漢來。 乙丑, 皇帝崩于保昌殿〇。

〇 年五十一。

校勘記

翰林學士承旨尚書戶部侍郎趙瑩爲門下侍郎桑維翰爲中書侍郎同中書門下平章事兼樞密使

據薛史卷七六晉高祖紀、卷八九桑維翰趙瑩傅及通鑑卷二八〇,趙瑩、桑維翰並同平章事,兼樞

密使者僅桑維翰。

 Ξ 鄭玩 「玩」,南昌、鄂本及薛史卷九六鄭阮傳、通鑑卷二八〇均作「阮」。

3 | 從賓寇河陽殺皇子重信寇河南殺皇子重乂|| 各本「信」原作「乂」,「乂」原作「信」。按薛史卷七

六晉高祖紀、卷九七張從賓傳及通鑑卷二八一,河陽被殺者爲重信,河南被殺者爲重义,據改。

(1) 回鶻可汗王仁美使翟全福來 見本史卷七校勘記(1)。

(E) 契丹使中書令韓頗來奉冊曰英武明義皇帝 本作「頻」。本史卷七二四夷附錄作「頻」。 「頰」,貴池本作「頝」,南監、汪、汲、殿、南昌、鄂、蜀

できい 封回鶻可汗王仁美爲奉化可汗 見本史卷七校勘記(1)。

(1) 郭金海 您一二三、通鑑卷二八二及本史卷五一安從遊傳均作「郭金海」,據改。 各本原作「郭海金」。薛史卷八〇晉高祖紀、卷九四郭金海傳、卷九八安從進傳、 洲府

新五代史卷九

晉本紀第九

出帝父敬儒,高祖兄也,爲唐莊宗騎將,早卒,高祖以其子重貴爲子。 高祖六子,五皆

早死,而重睿幼,故重貴得立。

我家事也。」高祖爲契丹所立,謀以一子留守太原,契丹使盡出諸子自擇之,指重貴曰:「此 重貴少而謹厚,善騎射,高祖使博士王震教以禮記,久之,不能通大義,謂震曰:「此非

腿 (大者可也。」 途拜金紫光祿大夫,行太原尹、北京留守,知河東節度事。 |天福二年九月, 召拜左金吾衞上將軍。三年冬, 爲開封尹, 封鄭王, 加太尉, 同中書門

六年,高祖幸鄴,留守東京,已而爲廣晉尹,徙封齊王。

下平章事。

于相州之西 七 一年六月乙丑,高祖崩,皇帝卽位于柩前。 庚午,使右驍衞將軍石德超以御馬二,撲祭 山田。 如京使李仁鄭使于契丹, 契丹使梅李來。 丙子, 馮道爲大行皇帝山陵

晉本

紀

第九

出帝

使,門下侍郎竇貞固爲副,太常卿崔悅爲禮儀使,戶部侍郎呂琦爲鹵筂使,御史中丞王易簡

爲儀仗使⑤。 己卯,二 四方館使朱崇節、右金吾衞大將軍梁言使于契丹。

- 夷狄之禮也。
- 舊史、實錄無橋道頓遞使,疑不置,或闕曹。漢高祖亦然。

秋七月壬辰,皇祖母劉氏崩, 酸視朝三日⊖。 丁酉,使石德超撲馬于相州之西山⑤。 庚

Θ

子,大赦。

甲辰,契丹使通事

來。

高祖所生母也,高祖時尊爲皇太后矣,其崩也,喪葬不用后禮,見恩禮之薄。 不書曰皇太后者,於帝爲祖母也,曰

「崩」,正其名也。

前已備見,故文省

八月戊午, 高 行周克襄州 Θ 庚申, 天平軍節度使景延廣、義成軍節度使李守貞、彰德

軍節度使郭謹 ,進錢粟助作山陵。 甲子,契丹使郎五來。 庚午,葬皇祖母於魏縣。 癸酉,契

丹使其客省使張九思來。

Θ 安從進自焚死,故不書伏誅

九月辛丑,李守貞爲大行皇帝 山陵都部署。

冬十月己未,契丹使舍利來。 庚午,回鶻遣使者來。

于契丹。 十一月,契丹使大卿來。庚寅,葬聖文章武孝皇帝于顯陵(100。己亥,牛羊使薫殷使 。庚子,祔高祖神主于太廟。 辛丑,蠲高祖靈車所過民租之半。

○ 陵在河南壽安縣。 五代之亂,至此七君,而不得其死者五,明宗雖善終,而愍帝不克葬,至廢帝時始克葬,故皆不

書。至此始見子得葬其父,故幷祔廟詳書之。

十二月庚午, 丙子,于闐使都督劉再昇來,沙州曹元深、瓜州曹元忠皆遣使附再昇以來。 北京留守劉知遠進百頭穹廬〇。契丹于越使令骨支來。 辛未, 又使野里

⊖ 穹廬,夷狄之用也。

八年春正月,契丹于越使鳥多奧來。

一月壬子,景延廣爲御營使。 。己未,如東京,赦廣晉府囚。 庚申,次澶州,赦囚。

至自鄴都。 庚午,寒食,望祭顯陵于南莊,焚御衣、紙錢曰。

○ 焚衣野祭之類,皆間巷人之事也,用之天子,見禮樂壞甚。

三月己卯朔, 趙瑩罷。 晉昌軍節度使桑維翰爲侍中。 辛丑,引進使、太府卿孟承誨使

于契丹。蝗。

本紀

第九

出帝

夏四月庚午,董殷使于契丹。 供奉官張福率威順軍捕蝗于陳州。

五月,泰寧軍節度使安審信捕蝗于中都。 丁亥,追封皇伯敬儒爲宋王。 癸卯,馮道罷。

甲辰,以旱、蝗大赦。

六月庚戌,祭蝗于皋門。 癸亥,供奉官七人帥奉國軍捕蝗于京畿。 辛未,括借民粟,殺

藏粟者。

秋七月甲午,册皇太后。 丁酉, 射于南莊。 契丹使梅里等來。 甲辰, 供奉官李漢超帥

奉國軍捕蝗于京畿。

八月丁未朔,募民捕蝗,易以栗。辛亥,檢民青苗。

九月戊寅,尊秦國夫人安氏爲皇太妃。 丙申,幸大年莊及景延廣第。

冬十月戊申, 立馮氏爲皇后曰。壬子,畋于近郊,幸沙臺。 丙寅, 製丹使通事劉胤來。

庚午,括借民粟。

○馮氏於帝爲叔母。

十一月己卯,董殷使于契丹。 甲申,幸八角,閱馬牧。 乙未, 契丹使梅里來。 戊戌, 齊

州 刺史楊承祚奔于青州。 辛丑,高麗使其廣評侍郎金仁逢來。

軍節度使楊光遠反,淄州刺史翟進宗死之。 十二月癸丑,給事中邊光範、登州刺史郭彦威使于契丹。 甲寅, 高麗使太相來。

于製丹。甲寅,原仁逢來。

行營招討使。 契丹寇黎陽。 復⊖。大饑。 北 面行營都部署。 開運元年春正月甲戌朔,契丹寇滄州。 壬午,前靜難軍節度使李周留守東京,景延廣爲御營使。乙酉,北征。 辛卯,講武于澶州。契丹屯于元城,趙延壽寇南樂。甲午,劉知遠爲幽州道 括馬。丙申,契丹寇黎陽。辛丑,劉知遠及契丹偉王戰于秀容,敗之。博州 |契丹入鴈門,寇代州。辛巳,殿直||王班使于||契丹,至于||鄴都,不得進而 己卯,陷貝州。庚辰,歸德軍節度使高行周爲 丙戌,

而不書,班以不得進,故書。

刺史周儒叛降于契丹。

二月戊申,前軍都虞候李守貞及契丹戰于馬家渡,敗之。癸丑,北面行營都虞候馬全

節及契丹戰于北平,敗之。

三月癸酉,及契丹戰于戚城,契丹去回。己丑,冀州刺史白從暉及契丹戰于衡水,敗之。

癸巳,籍民爲武定軍。

○ 戰而兩各傷失,收兵徐去,晉不能追,故以自去爲文。

晉本紀

飨

九

出命

夏四月,契丹陷德州,沿河巡檢使梁進敗之,取德州。 甲寅,至自澶州,赦京師。

九四

馬全節及契丹戰于定豐,敗之。辛酉,率借民財。

五月戊寅,李守貞討楊光遠。 丁亥,鄴都留守張從恩爲貝州行營都部署。 辛卯,

貞爲青州行營都部署。

六月,克淄州。丙午,復置樞密使。 丁未,侍中桑維翰爲中書令,充樞密使。 丙辰, 河

決滑州,環梁山,入于汝、濟。

秋七月辛未朔,大赦,改元。 己丑,太子太傅劉昫守司空兼門下侍郎、同中書門下平章

事。

八月辛丑朔,劉知遠爲北面行營都統,順德軍節度使杜威爲都招討使。 戊辰, 旌表陳

州項城民史仁詡門閭。

九月丙子,契丹寇遂城、樂壽,代州刺史白文珂及契丹戰于七里烽,敗之。

多十月庚戌,武寧軍節度使趙在禮爲北面行營副都統,鄴都留守馬全節爲副招討使。

十二月己亥朔,射冤于皋門。 丁巳,楊承勳囚其父光遠以降,殺之日。

〇 出帝已許其不死,旣而命李守貞自殺之,故不書伏誅

閏月乙酉,德晉赦青州囚。契丹寇恆州。

二年春正月,契丹陷豪州。 壬子,馬全節及契丹戰于榆林,兩軍皆潰。 戊午,幸南莊,

張從恩留守東都。 辛酉,高行周爲御營使。乙丑,北征,契丹去。

于戚城。丙戌,閱馬於鐵丘。 二月己巳,幸黎陽。 横海軍節度使田武爲東北面行營都部署,以備契丹⊖。丙子,大閱 丙申,端明殿學士、尙書戶部侍郞馮玉爲戶部尙書、樞密使。

○日「以備契丹」,嫌契丹去而命將。

|威及契丹戰于陽城,敗之,追奔至于衞村,又敗之。 易州戍將孫方諫及契丹諧里戰于狼山,敗之。甲寅,杜威克滿城。 三月戊戌,契丹陷祁州,刺史沈斌死之。丁未,畋于戚城。庚戌,馬全節克泰州。 乙卯,克遂城。庚申,杜 辛亥,

夏四月戊寅,勞旋于城城。己卯,勞旋于王莽河。 甲申,至自澶州,赦左右軍囚。 庚

寅、大賞軍功。

五月丙申朔、大赦。丙午、幸南莊。

六月丁卯,射于繁臺,幸杜威第。旱。

秋八月甲子朔、廢二舞。丙寅、和凝罷。 馮玉爲中書侍郎、同中書門下平章事。

閱馬于茂澤陂。丁丑,括馬。

九月己亥,閱馬于萬龍岡,幸李守貞第。

本紀第 ナム Ш 갂

. 代 史 卷 九

多十月丁丑,高麗使其廣評侍郎韓玄珪、禮賓卿金康等來。 戊寅,射冤于硯臺。

高麗 使其兵部侍郎劉崇珪、內軍卿朴藝言來。

十一月戊戌,封王武爲高麗國王。 己巳,射冤于皋門,幸沙臺。

十二月丁丑,臘,畋于郊。 丁亥,桑維翰罷。 開封尹趙瑩爲中書令, 李崧守侍中、樞密

使。

三年春二月丙子,回鶻使突厥陸來。 壬午,射鴨于板橋,幸南莊

夏六月,孫方諫以狼山叛附于契丹。 丙寅,契丹寇邊。 己丑,李守貞爲行營都部署,義

秋七月,大雨,水,河決楊劉、朝城、武德。

成軍節度使皇甫遇爲副。

河決漁池。

大饑,羣盜起。

八月辛酉,河盗歷亭。

九月,河決澶、滑、懷州。 辛丑,行營馬軍排陣使張彥澤及契丹戰于新興,敗之。 癸卯,

劉 知 遠及契丹戰于朔州,敗之。大雨霖,河決臨黃

多十月,河決衞州,丙寅,河决原武。 。辛未,杜威爲北面行營都招討使, 李守貞爲兵馬

都監。

十一月,永清軍節度使梁漢璋及契丹戰于瀛州(三)、敗積。 契丹寇鎮、定。

杜威、李守貞、張彥澤以其軍叛降于契丹。 庚午,射兔于沙臺。 壬申,張彥澤犯京師,殺開 十二月己未,杜威軍于中渡。壬戌,奉國都指揮使王清及契丹戰于滹沱,敗績,死之曰。

封尹桑維翰。契丹滅晉母。

戰將歿於陣、守將歿於城而不書死者,以其志未可知也。 降而死節明者,自書「死」,如凊是已。 或欲走而不得,或欲降而未暇,遽以被殺爾。若不走、不

〇 出帝雖存,而晉則亡已,故書「滅」。

則得立,爲敬儒子則不得立,於是深諱其所生而絕之,以欺天下爲眞高祖子也。 寘於馬道懷中而託之,出帝豈得立邪。

晉之大臣,既違禮廢命而立之,以謂出帝爲高祖子 絕其所生也。蓋出帝於高祖得爲子而不得爲後者,高祖自有子也。方高祖疾病,抱其子重睿 人後者,爲其父母報。」使高祖無子, 之子猶子也」。重貴書「子」可矣,敬儒,出帝父也,書曰「皇伯」者,何哉?出帝立不以正,而 嗚呼,余書「封子重貴爲鄭王」,又書「追封皇伯敬儒爲宋王」者,豈無意哉!禮:「兄弟 出帝得爲後而立以正,則不待絕其所生以爲欺也。 [禮

晉本紀第

tu

出帝

校勘記

余書曰「追封皇伯敬儒爲宋王」者,以見其立不以正,而滅絕天性,臣其父而爵之,以欺天下

校勘記

也。

(二) 聖文章武孝皇帝 本史卷八及薛史卷七五晉高祖紀、五代會要卷一、通鑑二八〇均作「聖文章

武明德孝皇帝」。

 Ξ 永清軍節度使梁漢璋 谭爲永清軍節度使,薛史卷八四晉少帝紀又云以漢璋爲貝州節度使。查本史卷六○職方考,貝 「淸」,各本原作「靜」。 薛史卷九五梁漢璋傳及通鑑卷二八五俱稱梁漢

州後晉時正爲永淸軍。據改。

新五代史卷十

漢本紀第十

高祖睿文聖武昭肅孝皇帝,姓劉氏,初名知遠,其先沙陀部人也,其後世居于太原。 知

遠弱不好弄,嚴重寡言,面紫色,目多白睛,凛如也。

與晉高祖俱事明宗爲偏將,明宗及梁人戰德勝,晉高祖馬甲斷,梁兵幾及,知遠以所乘

馬授之,復取高祖馬殿而還,高祖德之。高祖留守北京,知遠爲押衙。

袖鐵槌侍高祖以虞變。 路王從珂反,愍帝出奔,高祖自鎭州朝京師,遇愍帝于衞州,止傳舍, 高祖與愍帝議事未決,左右欲兵之,知遠擁高祖入室,敢與左右格 知遠遣勇士石敢

鬭而死,知遠卽率兵盡殺愍帝左右,留帝傳舍而去。

至路州,臨決,指知遠曰:「此都軍甚操刺母,無大故勿棄之。」 高祖卽位於太原,以知遠爲侍衞親軍都虞候,領保義軍節度使。 廢帝入立,高祖復鎭河東,已而有隙,高祖將舉兵,知遠與桑維翰密爲高祖謀畫, 契丹耶律德光送高祖 贊成

漢本紀第十 高祖

00

〇 世俗謂勇猛爲「操刺」,錄其本語。

高 徙 知遠領 加 乃遣端明殿學士和凝就第宣論, 天 福 歸德, 三年, 知遠恥與重威同制,杜門不出。 遷侍衞馬步軍都指揮使, 知遠乃受命。 領忠武軍節度使。 高祖怒, 五年,徙鄴都留守。 欲罷其兵職, 已而以杜重威代知遠領忠武 宰相趙瑩以爲 九月 朝京師 高祖 不可,

幸其第。

六年,拜河東節度使、北京留守。

七年,

高祖崩。

幸 |晉 統。 王攻鴈門,敗之于秀容。 開運 多数数 知遠 從高祖起太原,有佐命功, 而 二年四月, 有異志,每優尊之。 封北平王,三年五月,加守太尉,然王未嘗出兵。 八月,殺吐渾白承福等族,取其貲 拜中書令,封太原王、幽州道行營招 自出帝立,與契丹絕盟,用兵北方,常疑知遠勳位已高 (鉅萬) 良馬數千。 討使,又拜 契丹寇澶州 北 面 別遺偉 行 營都

虜法 貴 几 之如中 一年,契丹犯京師,出帝北遷,王遣牙將王峻奉表契丹,耶律德光呼之爲兒,賜以木柺, 國 几杖,非優大臣不可得。 峻持柺歸, 廣人望之皆避道。 峻還, 爲王言契丹

必不

能

有中國

一乃議

建

國

賊首梁暉取相州來歸己。 月戊辰, 河東 行 軍司 武節都指揮使史弘肇取代州、殺其刺 馬張彦威等上牋勸 進。 辛未, 皇帝即位,稱 和史王暉 天福十二年已。 晉州將藥可儔殺其 磁州

守將駱從朗及括錢使、諫議大夫趙熙來歸。 辛巳,陝州留後趙暉、潞州留後王守恩來歸。

Э 天福,晉高祖年號也。 天福止八年改元開運,至此四年矣。 漢雖建國,而未有國號,又稱晉年號,捨開運而追續天

福爲十二年,初無義理,但書其實爾。

變來降曰「來歸」,哀斯人也。是時天下無主,得其主則往歸之,與乎叛于彼而來於此者異矣。 漢高祖 非有德之君,

惶惶斯人之無所歸者,猶得而歸也,故曰「歸」。

三月丙戌朔,蠲河東雜稅。 壬寅,契丹遯[□],以其將蕭翰爲宣武軍節度使守汴州。 辛卯,延州軍亂,逐其節度使周密。 壬辰,丹州指揮使高彦

Θ 聞與起太原,畏而去,故與自去異其文,「遯」者,退避之稱。 詢以其州來歸。

夏四月己未,右都押衙楊邠爲樞密使,蕃漢兵馬都孔目官郭威權樞密副使。

契丹陷相

州,殺梁暉。癸亥,立魏國夫人李氏爲皇后。甲子,河東節度判官蘇逢吉、觀察推官蘇禹珪

國指 爲中書侍郎、同中書門下平章事。 揮使武行德以河陽來歸。 史弘肇取澤州。 乙丑,侍衞親軍步軍都指揮使史弘肇取谿州。 丙子, 契丹耶律德光卒于欒城, 契丹入于鎮 戊辰, 奉

州

五. 月甲午,太原尹劉崇爲北京留守。 丙申, 如東京。 蕭翰遯歸于契丹, 以郇國公李從

刺史李從朗來歸。

益知南朝軍 漢 本 紀 等 + 戊申,次絳州, 骨 酮

國

事

六月丙辰,次河陽(1),殺李從益及其母于京師。 甲子,至自太原。 戊辰,改國號漢〇,

赦罪人、蠲民稅。 于闖遣使者來

Θ 高祖初建國無國號,蓋其制詔皆無明文,故闕不書。 然稱天福十二年,則國仍號晉可知,但無明據,故愼於所疑爾。

此曹「改國號漢」,則未改之前宜有所稱,此可以推知也。

是夏,劉昫薨。

行營都部署以討之。

秋閏七月乙丑,禁造契丹服器。 天雄軍節度使杜重威反〇, 天平軍節度使高行周為鄴

妣李氏諡日 都 I明貞 曾祖昂諡曰恭僖,廟號德祖 庚辰,追尊祖考爲皇帝,妣爲皇后: 祖妣楊氏 高祖湍諡 ; 日明元, 廟號 祖僎諡日 「昭憲, 廟號

文祖

加,

翼祖,祖妣李氏諡 日昭穆; 考琠諡日 章聖, 廟號顯祖, 妣安氏諡曰章懿。 以漢高皇帝爲高

祖,光武皇帝爲世祖,皆不祧。

Θ 杜重威於晉出帝時避出帝名去「重」,至漢而復之。

八月,護聖指揮使白再榮逐契丹, 以鎭州來歸。 丙申, 安國軍節度使薛懷讓殺契丹之

將劉鐸,入于邢州

九月甲戌,吏部尚書竇貞 固守司空兼門下侍郎,翰林學士、中書舍人李濤爲中書侍郎:

同中書門下平章事。 庚辰, 北征。

冬十月甲申,次韋城,赦河北。

十一月壬申、杜重威降。

十二月癸巳,至自鄴都。

乾祐元年春正月乙卯,大赦,改元。 己未,更名暠。 丁丑,皇帝崩于萬歲殿〇。

〇 年五十四。

高祖愛之,方屬以爲嗣,承訓薨,高祖不豫,悲哀疾劇,乃以承祐屬諸將相。 隱帝,高祖第二子承祐也。 高祖卽位,拜右衞上將軍、大內都點檢。 魏王承訓長而賢, 宰相蘇逢吉曰:

「皇子承祐未封王,請亟封之。」未及封而高祖崩,秘不發喪,殺杜重威。

乾祐元年二月辛巳,封承祐周王。 是日,皇帝卽位于柩前。 壬辰,右衞大將軍、

鳳翔巡

檢使王景崇及蜀人戰于大散關,敗之。癸巳,大赦。

部侍郎盧價 三月壬 為 戌,竇貞固爲大行皇帝山陵使,吏部侍郎段希堯爲副,太常卿張昭爲禮儀使,兵 鹵簿使,御史中丞邊蔚爲儀仗使。 丁丑; 李濤罷。 護國 軍節度使李守貞反,

漢

新 Ħ. 化 焢 绺

陷 E 運 關

鎮寧軍節度使郭從義爲永興軍兵馬都部署。 使王 一峻帥師屯于關西♡。 楊邪爲中書侍郎兼吏部尙書、同中書門下平章事,郭威爲樞密使, 夏四月辛巳,陝州兵馬都監王玉克潼關。 戊子, 壬午,、 保義軍節度使白文珂爲河中兵馬都部 永興軍將趙思縮叛附于李守貞,

河決原武

 Θ **峻不命爲將,又不令討賊,但令以兵實關西,下文乃見命將。**

五月己未,回鶻遣使者來。乙亥,魏州內黃民武進妻一產三男子。 河決滑州魚池。

申, 郭威同中書門下平章事。 秋七月戊申朔,彰德軍節度使王繼弘殺其判官張易。 癸亥,契丹鄭州刺史王彦徽來奔。 **鸜**鵒食蝗。 庚午,殺成德軍副使張鵬 丙辰,禁捕鸛鵒。 庚

八月壬午,郭威討李守貞。

乙亥,王景崇叛附于李守貞。

九月,西面行營都虞候倘弘遷及趙思縮戰,

敗績。

冬十月甲申,吐蕃使斯漫篤藺氈藥斯來。

十一月甲寅,殺太子太傅李松,滅其族。 壬申,葬容文聖武昭胤孝皇帝于睿陵⊙。

① 在河南告成縣。

十二月己卯,彰武軍節度使高允權殺太子太師致仕劉景嚴。

二年日春正月乙巳朔, 赦囚。

0 隱帝即位至此,宜改元而不改元,具周顯德二年注。 而帝名承祐,年名乾祐,舉國臣民共稱而不改避,當時莫大之

失,本紀無譏者,但書其實,後世自見也。

二月丙子,蠲民紐配租。

夏五月,李守貞之將周光遜降。乙丑,趙思綰降。

六月辛卯,回鶻首領楊彥珣來。 西凉府遣使者來。 蝗。

秋七月丁巳,郭威殺華州留後趙思綰于京兆。 甲子,克河中〇。

⊖ 守貞自焚死,故不書伏誅。

八月,郭從義殺前永興巡檢喬守温。 丙戌,郭威使來獻俘。

冬十月,契丹寇趙、魏,羣臣進添都馬。 製丹陷內丘。 己丑,郭威及宣徽南院使王峻伐

契丹。

十一月,契丹遯。

漢本紀第十 隱帝

三年春正月, 西面行營都部署趙暉克鳳翔〇。 丙午, 郭威進添都馬。 趙暉獻馘

俘。

□景崇自焚死,故不書伏誅。

二月甲戌,旌表潁州汝陰民麴温門閭。

三月己酉,寒食,望祭于南御園。

夏四月壬午,郭威以樞密使爲天雄軍節度。

六月癸卯,河決原武。

秋八月,達靼來附。

庚辰,義成軍節度使宋延渥叛附于威。壬午,威犯封丘,泰寧軍節度使慕容彥超軍于七里 多十一月丙子,殺楊那及侍衞親軍都指揮使史弘肇、三司使王章,皆滅其族。 郭威反。

甲申,勞軍于劉子陂。慕容彥超及郭威戰,敗績,開封尹侯益叛降

于威。 郭允明反。乙酉,皇帝崩②,蘇逢吉自殺。漢亡⑤。

癸未,勞軍于北郊。

○ 年二十。周廣順元年葬之許州陽翟縣,號潁陵,爲賊所葬,故不書。

⊖ 自隱帝崩後四十二日,周太祖始即位,而斷自帝崩書「漢亡」者,見帝崩而漢亡矣。 其太后臨朝,湘陰公嗣立,皆周

亦未嘗有法,蓋古人之語爾曰。及後世曲學之士,始謂孔子書「元年」爲春秋大法,遂以改元 话手主,妄庸之史,其記事先後遠近,莫不以歲月一二數之,乃理之自然也。 其謂一爲元, 嗚呼!人君卽位稱元年,常事爾,古不以爲重也。 孔子未修春秋,其前固已如此,雖暴

爲重事。

○ 古謂歲之一月,亦不云一,而曰正月。 國語曾六呂曰元間大呂,周易列六爻曰初九。 大抵古人言數多不云一,不獨

謂年爲元也。

意。 法而 國、黜晉出帝開運四年,復稱天福十二年者,何哉?蓋以其愛憎之私爾。 化二年遇弒,明年,末帝已誅友珪,黜其鳳曆之號,復稱乾化三年,尙爲有說。 居太原,常憤憤下視晉,而晉亦陽優禮之,幸而未見其隙。 出帝已北遷,方陽以兵聲言追之,至土門而還。 不合於理者多矣,皆不足道也。 自漢以後,又名年以建元,而正僞紛雜,稱號遂多,不勝其紀也。 至其年號乖錯以惑後世,則不可以不明。 及其卽位改元,而黜開運之號,則其用 及契丹滅晉,漢未嘗有赴難之 五代,亂世也,其事無 方出帝時 梁太祖 至漢高 漢高祖 以乾 祖

溪本紀第十

腦帝

校勘記

心可知矣。蓋其於出帝無復君臣之義,而幸禍以爲利者,其素志也,可勝歎哉!夫所謂有 諸中必形於外著,其見於是乎!

校勘記

(1) 六月丙辰次河陽 「河陽」,薛史卷一〇〇、通鑑卷二八七作「洛陽」。

新 代史卷十

周 本紀第十

太祖聖神恭肅文武皇帝,姓郭氏,邢州堯山人也。 父簡, 事晉爲順州刺 史 劉仁恭攻

破順州,簡見殺,子威少孤,依路州人常氏。

起兵太原,卽皇帝位,拜威樞密副使。 軍 爲吏所執,繼韜惜其勇,陰縱之使亡,已而復召置麾下。 叱之,屠者披其腹示之曰:「爾勇者,能殺我乎?」威卽前取刀刺殺之,一市皆驚,威頗 奇之。 威嘗游于市,市有屠者,常以勇服其市人。 吏。 路州留後李繼蹈募勇敢士爲軍卒,威年十八,以勇力應募。 漢高祖爲侍衞親軍都虞候,尤親愛之,後高祖所臨鎭,嘗以威從。 威酒醉,呼屠者,使進几割肉,割不如法, 好讀閩外春秋,略知兵法,後爲侍衞 繼韜叛晉附于梁,後莊宗滅梁, 爲人負氣,好使酒,繼韜特 契丹滅晉,漢高祖 自如。

乾祐元年正月, 周 本 紀 第 † – 高祖疾大漸,以隱帝託威及史弘肇等。 太 īН 隱帝卽位, 拜威樞密使。 **一**〇九 是歲

之,久皆無功。 河中李守貞、永興趙思綰、鳳翔王景崇相次反,隱帝遣白文珂、 隱帝謂威曰:「吾欲煩公可乎? · 」 威對曰:「臣不敢請,亦不敢辭,惟陛下命。」 郭從義、 常思等分討

將會射,恣其所取,其餘悉以分賜士卒,將士皆懽樂。 威 《居軍中,延見賓客,褒衣博帶,及臨陣行營,幅巾短後,與士卒無異 , 上所賜予,與諸

乃加拜威同中書門下平章事,使西督諸將

將皆謂守貞窮寇,破在旦夕,不宜勞人如此, 日, 四面攻之,破其羅城,守貞與妻子自焚死,思綰、景崇相次降。 守貞輒復出擊,每出必有亡失。久之,城中兵食俱盡,威曰:「可矣!」乃治攻具,爲期 威 至 二河中, ,自栅其城東,思栅其南,文珂栅其西,調五縣丁二萬人築連壘以護三栅。 威不聽。已而守貞數出兵擊壞連壘,威輒 補

珪、竇 |荆、浙、湖南、皆未及也。」由是濫賞遍于天下。 司 內外,而饋餉以時,故臣得以專事 徒 因言: 臣 隱帝勞威以玉帶,加檢校太師兼侍中,威辭曰:「臣 貞 禹珪 固 王章等皆賜 |幸得率行伍 右 僕射。 以玉帶,威乃受。 「,假漢威靈以破贼者,豈特臣之功,皆將相之賢,有以 已而 叉 ·征伐。」隱帝以威爲賢,於是悉召楊邪、史弘肇、蘇逢吉、禹 日:「此特漢廷親近之臣耳! 威又推功大臣,請加 事 先帝,見功臣多矣,未嘗以玉帶賜 **爵賞,於是加** 漢諸宗室、天下方鎮, 道與固 安朝廷, 司空,逢吉 燕

留守、天雄軍節度使,仍以樞密使之鎮。宰相蘇逢吉以謂樞密使不可以藩鎮兼領, 是多,契丹寇邊,威以樞密使北伐,至魏州,契丹遯。 三年二月,師還。 四月. 拜威鄴都 與史弘

肇等固爭。 。久之,卒以樞密使行,詔河北諸州皆聽威節度。

皆慣 以韶書示殷,殷與弘義遣人告威。 魏仁浦謀於臥內。 州 又韶侍衞馬軍指揮使郭崇殺威及宣徽使王峻于魏。 、然効用。 隱帝與李業等謀,已殺史弘肇等,詔鎭寧軍節度使李弘義殺侍衞步軍指揮使王殷于澶 仁浦勸威反,教威倒用留守印,更爲詔書,詔威誅諸將校以激怒之,將校 已而韶殺威、峻使者亦馳騎至,威匿韶書,召樞密使院吏 韶書先至澶州, 弘義恐事不果,反

帝得威 陂 寅,威率百官詣明德門, 官朝太后于明德門,請立嗣 軍節度使宋延渥叛于漢來降。 率兵拒威,又遣內養驚脫覘威所嚮。 彦超敗,奔于兗州。 十一月丁丑,威途舉兵渡河,隱帝遣開封尹侯益、保大軍節度使張彥超、客省使閻晉卿 奏,以示業等,業等皆言威反狀已白,乃悉誅威家屬于京師。 郭允明反,弑隱帝于趙村。 請立武寧軍節度使資爲嗣。 君。 壬午, 太后 下令:文武百寮、六軍將校,議擇賢明, 犯封丘。 **驚脫爲威所得,威乃附脫奏請縛李業等送軍中。** 甲 辰, 丙戌;威入京師,縱火大掠。 遺太師馮道迎贅于徐州。 及泰寧軍節度使慕容彥超戰于劉子 庚辰, 威至滑州, ,以承大統。 戊子, 辛卯,請太 率百 義成 庚

周本

紀第十

太祖

新 五 代 卷 + -

后臨朝聽政,以王峻爲樞密使,翰林學士、尚書兵部侍郎范質爲副使。

劉贇于宋州,殺之,其將鞏廷美、楊温爲贇守徐州。 十二月甲午朔,威北伐契丹,軍于滑州。 癸丑,至澶州而旋。 戊午,次皋門,漢宰相竇貞固、蘇禹珪來 王峻遺郭崇以騎 七百逆

勸進。 庚申,太后制以威監國。

廣順元年春正月丁卯,皇帝卽位,大赦,改元,國號周。 己巳,上漢太后尊號日昭聖皇

戊寅,漢劉崇自立于太原①。己卯,馮道爲中書令。

○ 吳、獨諸國自立,皆絕而不書,此書,與其不屈于周,語在十國年譜論。

池〇。丁巳,尚書左丞田敏使于契丹。 二月辛丑,西州回鶻使都督來。丁未,契丹兀欲遣使툃骨支來。 回鶻使摩尼來。 癸丑,寒食,望祭于蒲

〇 蒲池、佛寺名也。

三月甲戌,武寧軍節度使王彥超克徐州〇。

Θ 鞏廷美、楊溫不書死之,語在資傳。

夏四月甲午,立夫人董氏爲德妃。

五月辛未,追奪祖考爲皇帝,妣爲皇后:高祖璟諡日睿和,廟號信祖,祖妣張氏諡曰睿

曾祖諶諡曰明憲,廟號僖祖,祖妣申氏諡曰明孝; 祖蘊諡曰翼順,廟號義祖,祖妣韓氏

四日翼敬 ; 考諡日章肅,廟號慶祖,妣王氏諡日章德。

禹珪罷。 六月辛亥, 范質及戶部侍郎判三司李穀爲中書侍郎、 同中書門下平章事 癸丑,范質參知樞密院事。 丁巳,宣徽北院使濯光鄴爲樞密副使。 竇貞固、

蘇

秋七月戊寅,幸王峻第。

八月壬寅,契丹來歸趙瑩之喪。

多十月丙午, 漢人來討♡, 攻自晉州②。

〇. 討加有罪,漢之於周,義所得誅。

0 云「自晉州」者,見漢兵當誅罪人于京師,自晉州而入耳。 攻城無得失不書,此書者,許淡來討

十一月,王峻及建雄軍節度使王彥超拒之。

十二月,慕容彦超反。

|年春正月甲子,侍衞步軍都指揮使||曹英爲||兗州行營都部署。 庚午,高麗王|昭使其廣

評侍郎徐逢來。

一月庚寅,府州防禦使折德晟克岢嵐軍。

三月丁巳朔,寒食,望祭于郊。戊辰,內客省使鄭仁誨爲樞密副使,翟光鄴罷

夏五月庚申,東征,李穀留守東都,鄭仁誨爲大內都點檢。 癸亥,次曹州, 赦流罪以下

囚。乙亥,克兗州⊖。壬午,赦兗州。

① 彦超投井死,故不嘗伏誅。

六月乙酉朔,幸曲阜,祠孔子。庚子,至自兗州。

秋九月乙丑,太僕少卿王演使于高麗。契丹寇邊。

三年春正月乙卯,鱗州刺史楊重訓叛于漢,來附。

閏月丙戌,回鶻使獨呈相温來。

二月甲子,貶王峻爲商州司馬。

三月甲申,封榮爲晉王曰。 丙戌,鄭仁誨罷。 己丑,棣州團練使王仁鎬爲右衞大將軍、

樞密副使。

○ 不書子者,榮於禮不得爲子,不書子則當醬其本姓,又不書者,周人所共諱。

夏六月,大雨,水。

秋七月,契丹盧臺軍使張藏英來奔。

九月,吐渾党富達等來。

冬十月庚申,馮道爲奉迎神主使。

十一月癸未,党項使吳怗磨五等來。

十二月戊申, 四廟神主至自西京, 迎之于西郊, 祔于太廟。 壬申,殺天雄軍節度使王

殷。乙亥,享于太廟。

中書侍郎、同中書門下平章事,王仁鎬罷。是日,皇帝崩于滋德殿曰。 戊寅,罷鄴都。丙戌,鎭寧軍節度使鄭仁誨爲樞密使。壬辰,端明殿學士、戶部侍郎王溥爲 顯德元年春正月丙子朔,有事于南郊,大赦,改元,羣臣上尊號日聖明文武仁德皇帝。

○ 年五十一。書「是日」,連上文,嫌無崩日。

新五代史卷十一

周本紀第十二

奇,善騎射,略通書史黃老,性沈重寡言。 守禮子榮,幼從姑長太祖家,以謹厚見愛,太祖遂以爲子。 世宗睿武孝文皇帝,本姓柴氏,邢州龍岡人也。 太祖爲漢樞密使,榮爲左監門衞大將軍,太祖鎭 柴氏女適太祖,是爲聖穆皇后。 太祖後稍貴,榮亦壯,而器貌英 后兄

天雄,榮領貴州刺史、天雄軍牙內都指揮使。

峻有罪誅,三月,拜榮開封尹,封晉王。是多,卜以來年正月朔旦有事于南郊,而太祖遇疾, 校太傅、同中書門下平章事。榮素爲樞密使王峻所忌,廣順三年正月來朝,不得留。 乾祐三年多,周兵起魏,犯京師,留榮守魏。太祖入立,拜澶州刺史、鎭寧軍節度使,檢 既而

不能視朝者久之。

顯德元年正月丙子,郊,僅而成禮,即以王判內外兵馬事。 周 本 紀 Ħ 1-_ 世 宗 壬辰, 太祖崩,秘不發喪。

— — 八

丙申,發喪,皇帝卽位于柩前♡。右監門衞大將軍魏仁浦爲樞密副使。

0 於書封晉王,正其非子矣。 其餘假竊嗣君之禮,不待證貶而可知,故皆無異辭

尚書張昭爲鹵簿使,御史中丞張煦爲儀仗使,開封少尹權判府事王敏爲橋道頓遞使。 二月庚戌,回鶻遣使者來。丁卯,馮道爲大行皇帝山陵使,太常卿田敏爲禮儀使,兵部 漢人

來討,攻自潞州。

部署。 馬軍都指揮使獎愛能、步軍都指揮使何徽伏誅。 于北郊。 三月辛巳,大赦。 癸巳,及劉旻戰于高原,敗之母,追及于高平,又敗之。丁酉,幸潞州。 癸未,鄭仁誨留守東京。 乙酉,如潞州以攻漢曰。壬辰,次澤州,閱兵 壬寅,天雄軍節度使符彥卿爲河東行營都 己亥,侍衞

-)不曰伐,曲在周,不可以大小爲言,故用兩相攻爲文。
- ⊖ 與其不屈于周,不與其稱帝,故書姓名。

辰 石、沁州。 遼州 夏四月乙卯, 刺史張漢超版于漢來附。 乙丑 馮道薨。 葬神聖文武恭肅孝皇帝于嵩陵曰。 庚午, 赦路州流罪以下囚。 辛酉, 取嵐、 憲州。 汾州防禦使董希顏叛于漢來附。 如太原。 壬戌, 立 忻州監軍李勍殺其刺史趙 衛國夫人符氏爲皇 后。 取 丙

皋,叛于漢來附。

〇 在鄭州新鄭縣。

五月丙子,代州守將鄭處謙叛于漢來附,契丹救漢。 丁酉,回鶻使因難敵略來。

卿及契丹戰于忻口,敗績,先鋒都指揮使史彥超死之。

六月乙巳,班師。乙丑,次新鄭,遂拜嵩陵。庚午,至自太原。

秋七月庚辰,閱稼于南御莊。癸巳,樞密院直學士、工部侍郎景範爲中書侍郎、同中書

門下平章事,魏仁浦爲樞密使。

冬十月甲辰,殺左羽林大將軍孟漢卿。

二年〇春二月,御札求直言。

0 五代亂世,以嗣君即位者五,而改元不依古者四,梁末帝、晉出帝即位踰年,宜改元而不改,又明年然後改,漢隱帝、

周世宗皆仍稱先帝年號,終其世不改,而本紀無畿者,但曹其實,自見其失也。

夏五月辛未,宣徽南院使向訓、鳳翔節度使王景伐圖。 甲戌,大毁佛寺,禁民親無侍養

而爲僧尼及私自度者。

秋九月丙寅朔,頒銅禁。

閏月癸丑,向訓克秦州。

冬十月辛未,取成州。 戊寅、高麗使王子太相融來。 取階州。

十一月乙未朔,李穀爲淮南道行營都部署以伐唐。 戊申,王景克鳳州。

十二月丙戌,鄭仁誨薨。

三年春正月,增築京城。 庚子,向訓留守東京。 壬寅,南征。 辛亥, 侍衞親軍都指揮使

李重 進及唐人戰于正陽,敗之。 甲寅,重進爲淮南道行營都招討使。

二月丙寅,幸下蔡浮橋。 壬申,克滁州。 甲戌,李景來求成,不答。 壬午, 景使其臣鍾

膜來 奉表。 丙戌,取揚州。 辛卯,取泰州

三月庚子,內外馬步軍 ·都軍頭凌彥爲竹龍都部署。 是月,取光、舒、常州曰。

0 書「是月」,見取三州不同日。

夏四月,常、泰州復入于唐。

五月乙卯,至自淮南,赦京師囚。

六月壬申,德音赦淮 南囚

秋七月一皇后崩。 揚、光、舒、滁州復入于唐。

八月乙丑,課民種木及韭。

九月丙午,端明殿學士、左散騎常侍王朴爲尙書戶部侍郎、樞密副使。

冬十月辛酉,葬宣懿皇后于懿陵。

十一月庚寅,廢諸祠不在祀典者。 乙巳,殺李景之臣孫晟⊖。

○ 書「殺景臣」而不書晟死,蓋已深罪周殺忠臣,則晟之死節自著。

四年春正月己丑朔,赦非死罪囚。

二月甲戌,王朴留守東京。乙亥,南征。

三月丁未,克壽州〇。

〇 不書劉仁瞻降,事見死節傳。 蓋仁膽實不降,故書周自克之爾。「克」者,難取之名也,壽難取,則見仁膽之節著,不

書「死之」者,仁鵬自以病死,以其至死守節,故列之死節傳。

夏四月已已,至自壽州。己卯,放降卒八百歸于蜀。癸未,追册彭城郡夫人劉氏爲皇后。

五月丙申,殺密州防禦使侯希進。

秋八月乙亥,李穀罷,王朴爲樞密使。癸未,蜀人來歸我濮州刺史胡立。

多十月己已,王朴留守康京,三司使張美爲大內都點檢。 壬申,南征。

十二月乙卯 ·加州守將范再遇叛于唐,以其州來降。 庚申, 濠州團練使郭廷謂以其州

周本紀第

+ =

世宗

亲 3 化 多 分 一 二

來降口。丁丑,取泰州。

○ 身居其地而來降者書「附」,再遇、廷謂雖以地降,旣降而不居其地,故不書「附」而書「降」。廷謂不書「叛」,事見南唐

世家

五年春正月丁亥,取海州。 壬辰, 取靜海軍。 丁未,克楚州, 守將張彥卿、 鄭昭業死

之

⊖自四年十二月辛酉攻之,彥卿等堅守四十餘日乃克之,其不走不降可知,故予其死。 本紀書「死」者十餘人,宋令詢

及李遐、彦卿、昭業皆以事迹不完不能立傳。然所貴者死爾,本紀著其大節可矣。

二月甲寅,取雄州。丁卯,如楊州。癸酉,如瓜洲。

三月壬午朔,如泰州。 丁亥,復如揚州。 辛卯,幸迎鑾。 己亥,克淮南十有四州,以江

爲界○。三月辛亥,李景來買宴。

○ 丼前所得通十四州耳,書之,見其本志所止。

四月庚申,祔五室神主于新廟。 壬申,至自淮南,回鶻、達靼遣使來。

六月辛未,放降卒四千六百于唐。

秋七月乙酉,水部員外郎韓彥卿市銅于高麗。 丁亥,頒均田圖。

九月,占城國王釋利因德縵使莆訶散來。

多十月丁酉,括民租。

十一月庚戌,作通禮、正樂。

十二月丙戌、罷州縣課戶、俸戶。

六年春正月,高麗王昭遣使者來。辛酉,女眞使阿辨來。

三月已酉,甘州回鶻來獻玉,却之。庚申,王朴薨。丙寅,宣徽南院使吳延祚留守東

京。 癸酉,停給銅魚。甲戌,北征。是月,吳延祚爲左驍衞上將軍、樞密使。

夏四月壬辰,取乾寧軍。辛丑,取益津關,以爲霸州。 癸卯,取瓦橋關,以爲雄州〇。

○ 州縣廢置不書,此書,重復中國故地。世宗下三關,瓦橋、益津以建州及見,淤口關止置案,故舊史、實錄皆闕不

曹,遂不見其取得時日,今信安軍是也。

五月乙巳朔,取瀛州〇。甲戌,至自雄州。

○復中國故地,故不書「契丹」。

六月癸未,立皇后符氏⊖,封子宗訓爲梁王、宗讓燕國公、こ。戊子,占城使莆訶散來。

己丑,范質、王溥參知樞密院事,魏仁浦同中書門下平章事。癸巳,皇帝崩于滋德殿⑤。

周

本紀第十二

世宗

称帝

- Θ 符氏無國爵,不曰立符氏爲皇后,嫌同於不正也。蓋其位先定而後娶,故書曰「立皇后符氏」,文理宜然,無爽貶也
- € 年三十九。

恭皇帝,世宗第四子宗訓也。 世宗卽位,大臣請封皇子爲王,世宗謙抑久之。 及北取

三關,遇疾還京師,始封宗訓梁王,時年七歲。

翰林學士竇嚴爲禮儀使,兵部尚書張昭爲鹵簿使,御史中丞邊歸讜爲儀仗使,宣徽南院使、 顯德六年六月癸巳,世宗崩。 甲午,皇帝卽位于柩前。 癸卯,范質爲大行皇帝山陵使,

判開封府事昝居潤爲橋道頓遞使。

秋七月丁未,戶部尚書李濤爲山陵副使,度支郎中盧億爲判官。

、月庚寅, 封弟熙讓爲曹王 一,熙謹紀王,熙誨蘄王。 壬寅,高麗遣使者來。

九月丙寅,左驍衞大將軍戴交使于高麗

月壬寅,葬睿武孝文皇帝于慶陵〇。 高麗遣使者來。

〇 在鄭州管城縣。

七年春正月甲辰, 遜于位。宋興〇。

Θ 五代之亡,所書不同,隨事爲文爾。「梁亡」見唐之速,「漢亡」見周之遲也。唐欺天下以討賊,周欺天下以立贇。故書 以深戒。周曰「遜于位」,遜,順也,能順乎天命也。 矣,而明宗又稱唐,愍帝之奔,唐又亡矣,而廢帝又稱唐,其亡也不可以屢瞽,故不書也。晉亡曰「契丹滅晉」,明言 「梁亡」,見唐之立速,則知其志不在討賊也;「漢亡」見周之立遲,則知立資者僞也。唐亡無辭,莊宗之弑,唐已亡

卽位之明年,廢天下佛寺三千三百三十六。是時中國乏錢,乃詔悉毁天下銅佛像以鑄錢, 制度、脩通禮、定正樂、議刑統,其制作之法皆可施於後世。其爲人明達英果,論議偉然。 宗區區五六年間,取秦隴,平淮右,復三關,威武之聲震懾夷夏,而方內延儒學文章之士,考 政幾何其不壞矣。至於賽雷山、傳箭而撲馬,則中國幾何其不夷狄矣。可謂亂世也歟!而世 其不乖而不至於禽獸矣。寒食野祭而焚紙錢,居喪改元而用樂,殺馬延及任圜,則禮樂刑 際,則父子骨肉之恩幾何其不絕矣。太妃薨而輟朝,立劉氏、馮氏爲皇后,則夫婦之義幾何 嗚呼,五代本紀備矣①! 君臣之際,可勝道哉。梁之友珪反,唐戕克寧而殺存义、從

周本紀

第十二

恭帝

校

勘記

較彼 其北 以錦囊 爲志意豈小哉!其伐南唐,問宰相李穀以計策,後克淮南,出穀疏,使學士陶穀爲贊,而盛 本也,王者之政自此始!」乃韶頒其圖法,使吏民先習知之,期以一歲大均天下之田, 像,豈其所惜哉?」由是羣臣皆不敢言。嘗夜讀書,見唐元稹均田圖,慨然歎曰:「此致治之 ·日:「吾聞佛說以身世爲妄,而以利人爲急,使其眞身尙在,苟利於世,猶欲割截,況此銅 (我而乘)逃律之殆,得不可失之機,此非明於決勝者,孰能至哉?誠非史氏之所及也! 取 三關,兵不血刃,而史家猶譏其輕社稷之重,而僥倖一勝於倉卒,殊不知其料彊弱 () 管置之坐側。其英武之材可謂雄傑, 及其虛心聽納,用人不疑,豈非所謂賢主哉! 其規

校勘記

備,謂

喪亂之事,無所不有。

(1) 宗讓燕 會要卷二、冊府卷二九六;宗讓封燕公,亦見通鑑卷二九四。據改。 六年,封宗讓爲燕國 國公 「讓」,各本原作「誼」。按本史卷二〇周世宗家人傳,誼早被漢誅,顯德四年追封 公。 薛史卷一一七及卷一一九周世宗紀合。

梁家人傳第一

疎嫡庶亂矣!作家人傳。 自古女禍,大者亡天下,其次亡家,其次亡身,身苟免矣,循及其子孫,雖遲速不同,未有無 也,因於一二女子之娛,至於洞胸流腸,刲若羊豕,禍生父子之間,乃知女色之能敗人矣。 孰不欲戡刃於胸,然卒不能少挫其鋒以得志。梁之無敵於天下,可謂虎狼之強矣。及其敗 禍者也。然原其本末,未始不起於忽微。湯坤之初六日:「履霜,堅冰至。」家人之初九日: 「開有家,悔亡。」其言至矣,可不戒哉!」梁之家事,詩所謂「不可道」者。至於唐、晉以後,親 嗚呼,梁之惡極矣!自其起盜賊,至於亡唐,其遺毒流于天下。天下豪傑,四面並起,

文惠皇后王氏

梁

家人傳第一

文惠皇后王氏

梁太祖 母日文惠皇后王氏,單州單父人也。 其生三子:長日廣王全显,次日朗王存,其

次太祖。

以歸,封晉國太夫人。 巢,遂鎮宣武。 三落魄無行,作賊死矣,何以至此邪!」使者具道太祖所以然,后乃驚喜泣下,與崇母俱載 墮不作業,數加笞責,獨崇母憐之,時時自爲櫛沐,戒家人曰:「朱三非常人也; ,」黃巢起,太祖與存俱亡爲盜,從黃巢攻廣州,存戰死。居數歲,太祖背巢降唐,反以 后少寡,携其三子傭食蕭縣人劉崇家。太祖壯而無賴, 乃遣人以車馬之臟縣,迎后於崇家。使者至門,后惶恐走避,謂劉氏曰:「 縣中皆厭苦之。 崇患太祖慵 宜善遇 朱 破

|太祖莫知其故,后曰:「朱二與汝俱從黃巢,獨死蠻嶺,其孤皆在午溝,汝今富貴,獨不念之 節度使,無忝於先人也。」后惻然良久曰:「汝能至此,可謂英特,然行義未必得如先人也!」 」太祖泣涕謝罪,乃悉召存諸子以歸。 太祖置酒太夫人前,舉觴爲壽,歡甚。 太祖剛暴多殺戮,后每誠之,多賴以全活。 太祖啓曰:「朱五經平生讀書,不登一第,有子爲

大順二年秋,后疾,卜者曰:宜還故鄉。」乃歸。 卒於午溝。 太祖即位,立四廟,追尊皇

元貞皇后張氏

太祖元貞皇后張氏,單州碭山縣渠亭里富家子也。太祖少以婦聘之,生末帝。

貴,封魏國夫人。

之,如期而至。

時時暴怒殺戮,后嘗救護,人賴以獲全。」太祖嘗出兵,行至中途,后意以爲不然,馳一介召 后賢明精悍,動有禮法,雖太祖剛暴,亦嘗畏之。太祖每以外事訪之,后言多中。 太祖

身歸罪,豈不欲明非反乎?」太祖意解,乃免。 中,泣涕請死,太祖怒甚,使左右摔出,將斬之。后聞之,不及履,走庭中持友裕泣曰:「汝東 數騎亡山中,久之,自匿於廣王。后陰使人教友裕脫身自歸,友裕晨馳入見太祖,拜伏庭 郴王友裕攻徐州,破朱瑾於石佛山,瑾走,友裕不追,太祖大怒,奪其兵。友裕惶恐,與

不幸汴州失守,妾亦如此矣!」言已又泣。 亦拜,悽然泣下曰:「克鄆與司空同姓之國,昆仲之間,以小故興干戈,而使吾姒至此;若 太祖已破朱瑾,納其妻以歸,后迎太祖於封丘,太祖告之。后遽見瑾妻,瑾妻再拜,后 太祖爲之感動,乃送瑾妻爲尼,后嘗給其衣食。

粱

家人傳

第一

元貞皇后張

氏

昭

儀陳

新

司空,太祖時檢校官也。

貞皇太后(1),祔于宜陵。后已死,太祖始爲荒淫,卒以及禍云。 天祐元年,后以疾卒。 太祖卽位,追册爲賢妃。 初葬開封縣潤色鄉,末帝立,追諡日元

昭儀陳氏

寺。 與尼數十人畫夜爲佛法,未嘗少懈,太祖以爲愛己,尤寵之。 昭儀陳氏,宋州人也,少以色進。太祖已貴,嬪妾數百,而昭儀專寵。 開平三年,度爲尼,居宋州佛 太祖嘗疾,昭儀

昭容李氏

牽太祖衣,太祖驚走,棟折寢上,太祖德之,拜昭容。皆不知其所終。 昭容李氏,亦以色進。 尤謹愿,未嘗去左右。 太祖病、晝寢方寐、棟折、獨字氏侍側、選

德妃張氏

后,妃請待帝郊天,而帝卒不得郊。 末帝德妃張氏,其父歸霸,事太祖爲梁功臣。 貞明元年(云),妃病甚,帝遽册爲德妃,其夕薨,年二十 帝爲王時,以婦聘之。 帝卽位,將册妃爲

次妃郭氏

四。

命。 號泣迎拜。 已而度爲尼,賜名誓正,居于洛陽。 次妃郭氏,父歸厚,事梁爲登州刺史。妃少以色進。 賀王友雍妃石氏有色,莊宗召之,石氏慢駡,莊宗殺之。 梁亡,唐莊宗入汴,梁故妃妾,皆 次以召妃,妃懼而聽

|莊宗入||汴,命||河南張全義葬其尸,藏其首於太社。 刀鋸,卿可盡我命,無使我落讎人之手!」麟與帝相持慟哭。 初,莊宗之入汴也,末帝登建國樓,謂控鶴指揮使皇甫麟曰:「吾,晉世讎也,不可俟彼 晉天福三年,韶太社先藏罪人首級,許親 是夕,進刃於帝, 麟亦自剄。

粱

家人

傳第

德妃張氏

次

妮郭氏

废王

全昱

屬收葬,乃出末帝首,遣右衞將軍安崇阮與妃同葬之。 妃卒洛陽。

太祖二兄:日全县,日存。 八子:長日友裕, 次日友珪、友璋、友貞、友雍、友徽、友孜

養子日友文。

開平元年五月乙酉,封友文爲博王、友珪郢王、友璋福王、友貞均王、友雍賀王、友徽建

友裕前即位卒,追封郴王,而康王友孜,末帝即位封。

友璋初爲壽州團練使、押左右番殿直、監豐德庫,友珪時,爲鄆州留後,末帝時,爲忠武

軍節度使,徙鎮武寧,及友瘫、友徽皆不知其所終。

廣王全昱

廣王全昱,太祖即位封。 太祖與仲兄存俱亡爲盜,全是獨與其母猶寄食劉崇家。

,乃與其母 俱歸宣武,領山南西道節度使〔言。以太師致仕。

|太祖將受禪,有司備禮前殿,全昱視之,顧太祖曰:「朱三,爾作得否。」太祖宴居宫中,

爲 與王飲博,全是酒酣,取骰子擊盆而进之,呼太祖曰:「朱三,爾碭山一百姓,遭逢天子用汝 四鎮節度使,於汝何負?而滅他唐家三百年社稷,吾將見汝赤其族矣,安用博爲!」太祖 全显亦不樂在京師,常居碭山故里。三子皆封王: 友諒衡王,友能惠王,友誨

不悅,罷會。

年宋州大水,何用此爲!」乃罷友諒,居京師。太祖臥病,全昱來視疾,與太祖相持慟哭, 乾化元年,升宋州爲宣武軍,以友諒爲節度使。 友諒進瑞麥一莖三穗, 太祖怒曰:「今

太祖爲釋友諒,使與東歸。貞明二年,全昱以疾薨。徙衡王友諒嗣封廣王。

室、宗室皆反仄。貞明四年,友能以陳州兵反(四),犯京師,至陳留,兵敗,還走陳州,後數月 官屬,友能初縱之,乙等攻劫州縣,末帝發兵擊滅之。自康王友孜謀反伏誅,末帝始疎斥宗 其學佛者,自立一法,號曰「上乘」,晝夜伏聚,男女雜亂。 妖人母乙、董乙聚衆稱天子,建置 友能爲宋、滑二州留後、陳州刺史, 所至爲不法, 姦人多依倚之。 而陳俗好淫祠左道,

降,末帝赦之,降爲房陵侯。

| 友誨爲陝州節度使,欲以州兵爲亂,末帝召還京師,與友諒、友能皆被幽囚。梁亡,莊

宗入汴,皆見殺。

朗王存 子友寧 友倫

朝王存,初與太祖俱從黃巢攻廣州,存戰死。 存子友寧、友倫

遭攻師範,圍博昌,屠之,清河爲之不流。 戰於石樓,兵敗,**友寧**墮馬見殺。 匹,斬首數千級。 太祖奉昭宗還京師,拜友寧建武軍節度使,賜號「迎鑾毅勇功臣」。 太祖復 使、 襲州刺史。太祖圍鳳翔,遣友寧東備宣武。王師範襲梁,圍齊州,友寧引兵擊之,奪馬千 **|友寧字安仁,幼聰敏,喜愠不形於色。|太祖以爲軍校,** 善用弓劍。 遷衙內制勝 都指揮

太祖 宗涕泣,不知所爲,將奔太原,不果。宰相崔胤遣人止太祖,太祖以爲友倫胤等殺之, 誅胤等,昭宗未從,乃遣友諒至京師,以兵圍開化坊,殺胤及京兆尹鄭元規、皇城使王建勳、 以兵三萬至礬山,晉人乃却,友倫西會太祖於鳳翔。昭宗還長安,拜友倫寧遠軍節度使。 威武將軍。 友倫以兵入路州,取罕之以歸。累遷檢校司空,領藤州刺史。太祖圍鳳翔,晉人襲梁,友倫 東歸、留友倫宿衞,何祭昭宗所爲。 |友倫幼亦明敏,通論語、小學,曉音律。||存已死,|太祖以||友倫爲元從馬軍指揮使,表右 <u></u> 燕人攻魏内黃,友倫以前鋒夜渡河,奪馬千匹。 友倫擊鞠墜馬死,太祖大怒,以兵七萬至河中。 李罕之以潞州降梁,晉人攻潞

飛龍使陳班、閣門使王建襲、客省使王建义、前左僕射張濬。

倫 ,皆當封。 太 祖 即位,已封宗室,中書上議,故皇兄存, 於是追封存朗王、友寧安王、友倫密王。 皇姪建武軍節度使友寧、寧遠軍節度使友

郴王友裕

郴王 [友裕字端夫,幼善騎射,從太祖征伐,能以寬厚得士卒心。

以 敗 福 一百百 也,前 元年,太祖攻鄆,友裕以先鋒次斗門,鄆兵夜擊之,友裕敗走。 發中之,軍中皆大讙呼,晉王喜,遺友裕良弓百矢。 太祖 I 騎前 軍遇 與晉圍黃鄴於西華,鄴卒荷矟登城罵敵,晉王使胡騎連射不能中。 大祖 敵多死。 後至,與友裕相失。 太祖 至村落間, ,始與友裕相得。 太祖卒與敵遇, 太祖 敗而走。 是時,朱宣在濮州,太祖 鎭宣 武,以爲衙內都指揮 敵兵追之甚急, 太祖從後來, 太祖顧友裕, 不知 乃遣友裕先 前至大溝 友裕之 使。

幾不免 2,賴溝 中有積薪,馬乃得過,梁將李璠等死者十餘 人。

虞候朱友恭 一,友裕 讒之太祖 取濮州 ,遂圍時溥於徐州。朱瑾以兵二萬救溥 ,以爲瑾 可追而 友裕不追。 太祖大怒,奪其兵屬龐師古 ٠, 友裕敗蓮于石佛山 ,以友裕屬吏, 瑾 走。

77

家

Å

學第

柳王

友

裕

11

Ŧ

友 文

使 者誤致書於友裕 友裕惶恐,不知所爲,賴張皇后教之, 得死。 權知許州。 許州近蔡

於大寇,居民殘破,友裕招撫流散,增戶三萬餘。

太祖 靈臺、良原,下隴州,楊崇本以邠州降。 兼鎭護國軍,以<u>友裕爲</u>留後。 遷諸軍都指揮使,與平克、鄆,還領許州。 遷忠武軍節度使。 後崇本復叛, 崔洪 奔淮南,友裕引兵定蔡州 太祖遣友裕攻之,屯于永壽。 太祖攻鳳翔、未下、去攻邠州。 市不易肆。 友裕破 友裕以

博王友文

疾卒。

博王友文字德明, 本姓康名勤。 幼美風姿,好學, 善談論, 頗能爲詩, 太祖養以爲

子

加 即位, 太祖 ,以故所領宣武、宣義、天平、護國四鎭征賦,置建昌宮總之,以友文爲使,封博王。 領四鎮,以友文爲度支鹽鐵制置使。 太祖用兵四方,友文征賦聚斂以供軍實。 太

太祖幸西都,友文留守東京。

庶 人友珪者,太祖 初鎮宣武,略地宋、亳間,與逆旅婦人野合而生也。 長而辯點多智。

中,秘喪四日。乃出府庫,大賚羣臣及諸軍。遣受旨丁昭浦矯詔馳至東都,殺友文。又下 家以傳國寶與王氏,使如東都召友文,君今受禍矣!」夫婦相對而泣。左右勸友珪曰:「事急 異圖,將行大逆。昨二日夜,甲士突入大內,賴友珪忠孝,領兵勦戮,保全朕躬。然而疾恙 計生,何不早自爲圖?」友珪乃易衣服,微行入左龍虎軍,見統軍韓勍計事,勍夜以牙兵五 詔曰:「殷艱難創業,踰三十年。託于人上,忽焉六載,中外叶力,期于小康。豈意友文陰畜 而 曰:「我疑此賊久矣,恨不早殺之,逆賊忍殺父乎!」友珪親吏馮廷諤以劍犯太祖,太祖旋柱 百隨友珪,雜控鶴衞士而入。夜三鼓,斬關入萬春門,至寢中,侍疾者皆走。太祖惶駭起呼 決。」蓋心欲以後事屬之。乃謂敬翔曰:「友珪可與一郡,趣使之任。」乃以友珪爲萊州刺史。 妻脹氏,常專房侍疾。 太祖病少間,謂王氏曰:「吾知終不起,汝之東都,召友文來,吾與之 震驚,彌所危殆。 后 博王友文多材藝,太祖愛之,而年又長,太祖即位,嫡嗣未立,心嘗獨屬友文。太祖自張皇 崩 走,劍擊柱者三,太祖憊,仆于牀,廷諤以劍中之,洞其腹,腸胃皆流。。友珪以裀褥裹之寢 友珪於松前卽皇帝位,拜韓勍忠武軍節度使,以末帝爲汴州留後,河中朱友謙爲中書 ()無繼室,諸子在鎭,皆邀其婦入侍。友文妻|王氏有色,尤寵之。 |太祖病久,|王氏與|友珪 太祖素剛暴,旣病而喜怒難測,是時左降者,必有後命,友珪大懼。其妻張氏曰:「大 友珪克平兇逆,厥功靡倫,宜委權主軍國。」然後發喪。乾化二年六月旣

家人傳第一

博王

友文

康王友孜

令。 友謙不受命。 而懷州龍驤軍三千,劫其將劉重霸,據懷州,自言討賊。三年正月,友珪

祀天於洛陽南郊,改元日鳳歷。

位,復友文官爵,廢友珪爲庶人。 與妻張氏趨北垣樓下,將踰城以走,不果,使馮廷諤進刃其妻及己,廷諤亦自殺。末帝即 太祖外孫袁象先至與駙馬都尉趙嚴等,謀與末帝討賊。二月,象先以禁兵入宮,友珪

康王友孜

邪!」乃索寢中,得刺客,手殺之,遂誅友孜。明日,謂趙嚴、張漢傑曰:「幾興卿輩不相見。」 由此遂疎弱宗室,而信任趙、張,以至於敗亡。 刺客夜入寢中。 康王友孜,目重瞳子,嘗竊自負,以爲當爲天子。貞明元年,末帝德妃薨,將葬,友孜使 末帝方寐,夢人害己,旣寤,聞榻上寶劍鎗然有聲,躍起,抽劍曰:「將有變

嗚呼,春秋之法,是非與奪之際,難矣哉!或問:「梁太祖以臣弑君,友珪以子弑父,

其子而後彰,然末帝之志,不可以不伸也。 均,而奪其子,是與其父也,豈春秋之旨哉?」予應之日:「梁事著矣!其父之惡,不待與奪 也。 與弑卽位,踰年改元,春秋之法,皆以君書,而友珪不得列于本紀,何也。且父子之惡 春秋之法,君弑而賊不討者,國之臣子任其責。

校勘記

予於友珪之事,所以伸討賊者之志也。」

- (1) 追諡曰元貞皇太后 薛史卷八梁末帝紀及五代會要卷一均無「太」字。
- (三) 貞明元年 汲本作「貞明年」,百衲本及其他各本均作「貞明五年」。 薛史卷八梁末帝紀、通鑑卷

二六九及本卷康王友孜傳均繫于貞明元年。五代會要卷一作「乾化五年」,亦卽貞明元年。考異

卷六二、纂誤補卷二皆謂「貞明五年」誤。今改。

- [三] 領山南西道節度使 「山」,他本均作「嶺」。
- 貞明四年友能以陳州兵反 薛史卷一○梁末帝紀及通鑑卷二七一均繁於龍德元年四月。
- (至) 太祖外孫袁象先 按蔣史卷五九及本史卷四五袁象先傳,象先母為太祖妹萬安大長公主,象先

乃太祖甥。

深

家

新 五代史卷十

唐太祖家人傳第二

正室劉氏 次妃曹氏

太祖正室劉氏,代北人也;其次妃曹氏,太原人也。

朝。」太祖從之。 斬告者,陰召大將謀保軍以還。遲明,太祖還,與夫人相嚮慟哭,因欲舉兵擊梁。夫人曰: 習兵機,常教其侍妾騎射,以佐太祖。 入城,置酒上源驛,夜半以兵攻之。」太祖左右有先脫歸者,以難告夫人,夫人神色不動,立 「公本爲國討賊,今梁事未暴,而遽反兵相攻,天下聞之,莫分曲直。 太祖封晉王,劉氏封秦國夫人。自太祖起兵代北,劉氏常從征伐。爲人明敏多智略,頗 太祖東追黃巢,還軍過梁,館于封禪寺。梁王邀太祖 不若斂軍還鎮,自訴于

其後,太祖擊劉仁恭,敗歸。 唐 太 和礼 絯 人 第二 TE. 室 (F) 梁遣氏叔踪、康懷英等連歲攻晉,圍太原,晉兵屢敗,太祖 E 次 妃 T EE

故,乃得南歸。 公嘗笑王行瑜棄邠州走,卒爲人擒,今乃自爲此乎?昔公亡在達靼,幾不能自脫,賴天下多 夫人問誰 憂 ,不知所爲。 **"爲此謀者,日:「存信也。」夫人罵曰:「存信,代北牧羊兒耳,安足與計成敗邪** 今屢敗之兵,散亡無幾,一失其守,誰肯從公?北邊其可至乎?」太祖大悟 。大將李存信等勸太祖亡入北邊,收兵以圖再舉,太祖然之。入以語夫人, 且

夫 人無子,性賢,不妬忌,常爲太祖言:「曹氏相當生貴子,宜善待之。」而曹氏亦自讓退, 而止。

已而亡兵稍稍復集。

因

相

得

甚歡

與梁戰 于 以 左 地 嫡 右 無政 以 母: 曹 從 劉 河 氏 先君,幸矣,復何言哉 氏爲皇太妃。 上十餘歲,歲嘗馳省其母至三四,人皆稱其孝。 言者,惟曹氏從容諫譬,往往見聽。及莊宗立,事曹氏尤謹,其救趙破 對晉國夫人,後生子,是謂莊宗,太祖奇之,曹氏由是專寵。 太妃往謝太后,太后有慚色。 太妃曰:「願吾兒享國 莊宗卽位,册 太祖性暴,怒多殺人, **海曹氏** 無窮,使吾獲沒 爲皇太后,而

燕 取 魏

太后于洛也,涕泣而別,歸而相思慕,遂至不起。 七月 莊 宗 滅梁 入汴,使 、薨, 諡日 人迎太后 貞簡,葬于 歸洛, 坤陵。 居長壽宮,而太妃獨留晉陽。 而 太妃 太后聞之,欲馳至晉陽視疾,及其卒也,又 無 諡 葬魏縣。 太妃 與 同光三年 太后 甚 ·五月, 相 其送

皇后劉氏

莊宗神閔敬皇后劉氏, 魏州成安人也。莊宗正室日衞國夫人韓氏,其次燕國夫人伊

氏,其次后也,初封魏國夫人。

常以侯氏從軍。其後,劉氏生子繼岌,莊宗以爲類己,愛之,由是劉氏寵益專,自下魏博、戰 河上十餘年,獨以劉氏從。劉氏多智,善迎意承旨,其佗嬪御莫得進見。 時,莊宗攻梁軍於夾城,得符道昭妻侯氏,寵專諸宮,宮中謂之「夾寨夫人」。莊宗出兵四方, 后幸其宮,置酒爲壽,自起歌舞,太后歡甚,命劉氏吹笙佐酒,酒罷去,留劉氏以賜莊宗。 后,納之晉宮,貞簡太后敎以吹笙歌舞。旣笄,甚有色,莊宗見而悅之。莊宗已爲晉王,太 后父劉叟,黃鬚,善醫卜,自號劉山人。后生五六歲,晉王攻魏,掠成安,裨將袁建豐得

望相高,因大怒曰:「妾去鄉時,略可記憶,妾父不幸死於亂兵,妾時環尸慟哭而去。此田舍 塢,時有黃鬚丈人護之。」及出劉叟示建豐,建豐曰:「是也。」然劉氏方與諸夫人爭寵,以門 其父聞劉氏已貴,詣魏宮上謁。莊宗召袁建豐問之,建豐曰:「臣始得劉氏於成安北

唐

太祖

家人傳第二

皇

后

劉氏

新 五 代 史 卷 + 24

翁安得至此 !」因命答劉叟于宮門。

未,皇帝御文明殿,遺使册劉氏爲皇后(1)。 事 而未發。 莊宗已卽皇帝位,欲立劉氏爲皇后,而韓夫人正室也,伊夫人位次在劉氏上,以故難其 宰相豆盧革、 樞密使郭崇韜希旨, 皇后受册,乘翟車, 上章言腦氏當立, 鹵簿、鼓吹,見於太廟。 莊宗大悅。 同光二年癸 韓

失人等皆不平之,乃封韓氏爲淑妃,伊氏爲德妃

佞佛。 必分爲二,一以上天子,一以入中宮,宮中貨賄山積。 爲佛力。 莊宗自滅梁,志意驕怠,宦官、伶人亂政,后特用事於中。 又好聚斂,分遣人爲商賈,至於市肆之間,薪獨果茹,皆稱中宮所賣。 惟寫佛書, 自以出於賤微,踰次得立,以 饋路僧尼, 而莊宗由此亦 四方貢獻

邑。 后率諸子、諸妃拜之,誠惠端坐不起,由是士無貴賤皆拜之,獨郭崇韜 龍揭片石,常山之人,皆魚鱉也。」會明年滹沱河大水,壞鎭州關城,人皆以爲神。 又有僧誠惠,自言能降龍。 有胡僧自于閩來、莊宗率皇后及諸子迎拜之。 。嘗過鎭州,王鎔不爲之禮,誠惠怒曰:「吾有毒龍五 僧遊五臺山, 遣中使供頓, 不拜 也 所至傾動城 百,當遺 莊宗及

許州節度使温韜以后佞佛, 是時, 皇太后及皇后交通藩鎭,太后稱「誥令」, 因請以私第爲佛寺,爲后薦福。 皇后稱「教命」, 莊宗數幸郭崇韜、元行欽等私 兩宮使者旁午於道

第,常與后俱。 其後,幸張全義第,酒酣, 命后拜全義爲養父。 全義日遣姬妾出入中宮, 問

遺不絕。

諾之。 新喪婦,其復娶乎?吾助爾聘。」后指愛姬請曰:「帝憐行飲,何不賜之?」莊宗不得已,陽 莊宗有愛姬,甚有色而生子,后心患之。莊宗燕居宮中,元行欽侍側,莊宗問曰:「爾 后趣行欽拜謝, , 行欽再拜,起顧愛姬,肩輿已出宮矣。莊宗不樂,稱疾不食者累

皇子、後宮畢從,歷伊闕,宿癰澗,癸未乃還。是時大雪,軍士寒凍,金鎗衞兵萬騎,所至責 民供給,壞什器,徹廬舍而焚之,縣吏畏懼,亡竄山谷。 年夏、秋租稅,百姓愁苦,號泣于路,莊宗方與后荒于畋遊。十二月已卯臘,畋于白沙,后率 同光三年秋大水,兩河之民,流徙道路,京師賦調不充,六軍之士,往往殍踣,乃預借明

兵討魏,始出物以賚軍,軍士負而詬曰:「吾妻子巳餓死,得此何爲!」 旣在天,人如我何!」宰相論于延英,后於屏間耳屬之,因取粧奩及皇幼子滿喜置帝前日: 宰相請出庫物以給軍,莊宗許之,后不肯,曰:「吾夫婦得天下,雖因武功,蓋 「諸侯所貢,給賜已盡,宮中所有惟此耳,請鬻以給軍!」宰相惶恐而退。及趙在禮作亂,出 明年三月,客星犯天庫,有星流于天棓。占星者言:「御前當有急兵,宜散積聚以禳之。」 亦有天命。命

唐

左右救 萬,當 子谷 袍帶以賜之, 莊宗 悉給爾等。 道 之而死。 路路 東 隘 幸 容哥對曰:「盡矣。」軍 狹 汴州 。」對曰:「陛下與之太晚, |容哥曰:「皇后惜物,不以給軍,而歸罪於我。 莊宗見從官執兵仗者,皆以好言勞之曰:「適報 從駕兵二萬五千,及至萬勝,不得進而還,軍士離散,所亡太半。 士叱容哥曰:「致吾君 得者亦不感恩。」莊宗泣 至此, 事若不測,吾身萬段矣 皆由 下, 魏王 爾 因 靟 顧內庫使張容哥索 得蜀 因 抽 金銀 刀逐之, 五十 至陽

莊宗 諡 寺爲尼。 神閔 崩 郭 從謙 ,后與李存渥等焚嘉慶 在道 全后 反,莊宗中流矢,傷甚,臥絳霄殿廊下,渴欲得飲, 興存渥姦,及至太原,乃削髮爲尼。 殿, 擁 百 騎 出 師子門。后於馬上 明宗入立,遣人賜后死。 立以囊 后令宦官進飱酪, 盛 金器寶帶, 晉 天福五年,追 欲於太原造 不自省視

捘

以水而

死

殿入宫, 宫 人 正 侍眞、懿才、咸 · 還其家,獨夏 **贊華性酷毒,喜殺人,婢妾微過,常加刲灼。** 自 唐 選得三十餘 末 喪亂, 氏 一、瑤芳、懿德、宣一等,其餘名號,不可勝紀。 后妃之制不備, (無所 人。 虢國 歸, 乃以 大人夏氏以嘗幸於莊宗, 河陽節度使夏魯奇同 至莊宗 時, 後宮之數尤多, 夏氏懼, 姓 守殷 也,因 求離婚, 不敢留。 有昭 以 莊宗遇弑,後宮散 歸之,後嫁 乃削髮爲尼以卒。 容、 明宗 昭儀、昭媛、 立, 契丹突欲 悉放 走,朱守 出使、 莊 而韓 李贊 宗 御

脩、克恭、克寧,皆不知其父母名號。 其世次不可詳見。 唐自朱邪得姓而爲李氏,得國而爲晉,得天下而爲唐。 其可見者,曰太祖四弟、八子、五孫,三世而絕。 其始出於夷狄,而終以亂亡,故 太祖四弟曰:克讓、克

關,爲賊所敗,奔于南山,匿佛寺,爲寺僧所殺。 追兵乃止,克讓奔于鴈門。 温、石的歷等十餘騎,彎弧躍馬, 時以部族歸唐,唐處之河西,嘗遣一子宿衞京師,賜第於親仁坊。 守將段文楚。 克讓,少善騎射,爲振武軍校,從討王仙芝,以功拜金吾衞將軍,留京師。 唐發兵討太祖, 明年, 遭王處存以兵圍親仁坊, 突圍而出。 太祖復歸唐, 處存以千餘人追至渭橋, 克讓還宿衞京師。 捕宿衛子克讓。克讓與其僕何相 其後太祖起兵雲中,殺 黄巢犯長安,克讓守潼 克讓等射殺百餘人, 李氏自憲宗

唐

太 加 家

人

僦 第 _

克 詉

莵 伒

克

杰

克脩

巢, 爲先鋒,遷左營軍使。 克脩字崇遠, 從討龐勛, 路州 以 5功拜朔 孟 方立 州 遷 于 刺 那州 史。 太祖鎭鴈門,以爲奉誠軍使。 晉 取路州, 表克脩昭義 軍節度使。 從入 翻 數出 討黃 山山

饋甚薄,太祖大怒,詬而擊笞之。 東擊方立,又與李罕之攻寇懷、孟之間。 克脩慚憤、發疾卒。 其後, 太祖自 [將擊方立,還軍過路, 二子:嗣弼、 嗣 克脩性儉嗇,

供

嗣 弼為涿州 刺史,天祐十九年,契丹攻破涿州,嗣弼殁于虜

梁將 嗣 肱、 人。 少有膽略,從周德威數立戰功,爲馬步軍 梁太祖 圍 隋縣, 嗣 肱從存審救蓨, 梁 軍 ·解去, 都虞候。 嗣肱 李存審敗梁 功為 多 ٠, 超 拜 軍 蔚 于 胡 州 壁, 刺 嗣 鴈門 肱 獲

| 媽、儒 以北都 、武三州, 知兵 (馬使。 拜新州刺史、山北都團 累遷澤、 代二州 刺 史。 回練使。 新州 同光元年春,卒于官 王 郁 叛晉, 、契丹, 山後諸州皆 叛, 嗣 肱取

克恭

至長子,爲野人所殺,傳首于屬。國乃入路州,自稱留後,以附于梁。 被傷,奔入路州。牙將安居受亦叛,殺克恭及元審,使人召霸,霸不受命,居受懼而出奔,行 百人,獻于太祖,行至銅鞮,其將馮霸以其徒叛。太祖遣李元審討之,戰于沁水,元審大敗 克恭,初爲決勝軍使。 且哀其見答以死。 克恭橫暴不法, 又不習軍事, 克脩卒, 以克恭代爲昭義軍節度使。 由是潞人皆怨。 克脩爲人簡儉,路人素安 克恭選後院勁兵王

克寧

檢校太保、振武軍節度使,軍中之事,無大小皆決克寧。 間,後奔達靼,入破黃巢,克寧未嘗不從行。 克寧,爲人仁孝,居諸兄弟中最賢,事太祖小心不懈。 太祖鎭太原, 以爲內外制置蕃漢都知兵馬使, 太祖與赫連鐸、李可舉戰雲、蔚

再拜稱賀,莊宗乃卽晉王位。 敢以軍府煩季父,以待兒之有立。」克寧曰:「吾兄之命,以兒屬我,誰敢易之!」因下而北面 「兒年孤稚,未通庶政,雖有先王之命,恐不足以當大事。 |太祖病,召莊宗侍側,屬張承業與克寧曰:「以亞子屬公等。」太祖崩,莊宗告於克寧曰: 叔父勳德俱高,先王嘗任以政矣,

唐

優假。 占之道也。 子之功爲多,故尤寵愛之,衣服禮秩如嫡。諸養子麾下皆有精兵,恃功自恣,自先王時常見 初, 及新王立,年少,或託疾不朝,或見而不拜。養子存顥、存實告克寧曰:「兄亡弟及, 、太祖 以叔拜姪,理豈安乎?人生富貴,當自取之。」克寧曰:「吾家三世,父慈子孝,先 起於雲、朔之間,所得曉勇之士,多養以爲子,而與英豪戰爭,卒就霸業,諸養

王土字,苟有所歸,吾復何求也!」

吾家。」承業等請誅克寧。 召承業、存璋告之曰:「季父所爲如此,奈何?然骨肉不可自相魚肉,吾當避賢路以紓禍於 兼領大同軍節度使。於是幸臣<u>史</u>敬鎔見太后,告克寧與存顯謀執王及太后以降梁。 於羣言,遂至於禍。 克寧妻孟氏素剛悍,存願等各遣其妻入說孟氏,孟氏數以迫克寧。 都虞候李存質得罪於克寧,克寧殺之,而與張承業、李存璋有隙, 乃伏兵於府,置酒大會,克寧旣至,執而殺之。 克寧仁而無斷, 叉求

太川 一子 存美,存霸一存禮,存足,存处,存確,存紀

|月辛亥, 韶封存美等七人爲王。 蓋存霸、存渥、存紀與莊宗同母也,存美、存义、存確、存 |太祖子八人:莊宗長子也,次日|存美、存霸、存禮、存渥、存义、存確、存紀。 同光三年十

禮不知其母名氏號位。 存美封邕王,存霸永王,存禮薛王,存湿申王,存义睦王,存確通王,

存紀雅王。

號泣,爲婦翁稱冤,言甚怨望。」莊宗大怒,以兵圍其第而誅之,幷誅千郎。 陰察外議以爲如何,而宦官因欲盡誅崇韜親黨以絕後患,乃誣言:「存义過千郎,酒酣,攘臂 承恩寵,而士或因之以求官爵,存义及存渥等往往朋淫于其家。及崇韜被族,莊宗遣宦官 |子術,能役使鬼神,化丹砂、水銀。| 莊宗頗神之,拜千郎檢校尙書郎,賜紫,其妻出入宮禁, 存义歷建雄、保大二軍節度使。 娶郭崇韜女。 是時,魏州妖人楊千郎用事, ,自言有墨

護。」彥超欲留之,爲軍衆所殺。 麾下皆散走,惟使下康從弁不去。 渥與劉皇后同奔于太原,行至風谷,爲部下所殺。 守,存屋河中節度使,宣麻未訖,郭從謙反,攻興教門,存渥從莊宗拒賊。 而已。 存霸歷昭義、天平、河中三軍節度使,存渥義成、天平二軍節度使,皆居京師,食其俸祿 趙在禮作亂,乃遣存霸於河中。 存霸乃剪髮、衣僧衣,謁符彥超曰:「願爲山僧,冀公庇 李嗣源兵反,嚮京師,莊宗再幸汜水,徙存霸北京留 存霸聞京師亂,亦自河中奔太原,比至, 莊宗中流矢崩,存

太祖

難,主上尋求,恐其失所。今上旣監國典喪, 宜密爲之所,以安人情。」乃卽民家殺之。 赴 妈; 存紀、存確聞郭從謙反,奔于南山,匿民家。 如不幸物故者,收瘞以聞。」存紀等所匿民家以告安重誨,重誨謂霍彥威曰:「二王逃 此禮如何?」彥威曰:「上性仁慈,不可聞奏。 明宗詔河南府及諸道:「諸王出奔,所至送

存美素病風,居太原,與存禮皆不知其所終。

北宗五子 繼岌 繼潼 繼嵩 繼蟾 繼嶢

莊宗五子:長日繼岌,其次繼潼、繼嵩、繼蟾、繼曉。 繼岌母日劉皇后,其四皆不著其母

名號。

|革爲相,建言:唐故事,皇子皆爲宮使。因以鄴宮爲興聖宮,以繼岌爲使。 莊宗卽位,繼岌爲北都留守,判六軍諸衞事。 遷檢校太尉、同中書門下平章事。 豆盧

同光三年,封魏王。是歲伐蜀,以繼岌爲西南行營都統,郭崇韜爲都招討使,工部尚書

成都 然繼岌雖爲都統,而軍政號令一出崇韜。 取 乘竹興至昇仙橋,素衣、牽羊,草索繫首,肉袒、銜璧、興櫬,羣臣衰絰,徒跣以降。 至 、壁,崇韜解縛,焚櫬。 一州鎭皆迎降,遂食其粟。 颲 將兵萬人屯利州,分其半逆戰于三泉,爲先鋒康延孝所敗,衍懼, 、翰林學士李愚皆參軍事。 唐軍自文州間道以入。十月已酉,繼岌至綿州,衍上牋請降。 自出師至降附,凡七十五日,兵不血刃,自古用兵之易,未有如此。 至興州,蜀將程奉璉以五百騎降, 九月戊申,將兵六萬自鳳翔入大散關,軍無十日之糧,而所 因以其兵修閣道, 以過唐軍。 斷吉柏江浮橋,奔歸 丙辰, 入成都。 繼岌下而

留 庭, 尊之廟 樂奉崇韜 叉 端崇留 見崇韜專任 而 初, 都 T 鎖 蜀 堂之上,期以一天下而 統府惟 莊宗遣宦者供奉官李從襲監中軍,高品李廷安、呂知柔爲典謁。 父子,而魏王所得,匹馬、東帛、唾壺、麈柄而已;崇韜日決軍事,將吏賓客趨走盈 、從襲等因言崇韜 軍事 大將晨謁,牙門闃然。 ,益不平之。 制 有異志, 及破濁,蜀之貴臣大將,自王宗弼已下,皆爭以圖寶貨、妓 四方,必不棄元老於蠻夷之地。 勸繼岌爲備。 由是 從襲等不勝其憤。 繼岌謂崇韜曰:「陛下倚侍中如衡、革, 已而宗弼率蜀人見繼岌, 此 事 ·非予敢. 從襲等素惡崇韜 知

禮益慢, 莊宗 聞崇韜欲留蜀 延嗣 怒,從襲等因 一,亦不 悅 告延嗣 遺宦 者向 崇韜有異志,恐危魏王 延嗣 極繼岌班師。 延嗣 延嗣還, 至 成都, 具言之。 端崇 不出迎,及 劉皇后涕

唐

太

旭

家

人

傳

第二

莊

宗

五子

苟不 從襲 韜。 示繼 語 江 告 姃 詬 111 岌 等 嗣 明 莊 林 保 力爭 年 全繼岌 言 繼岌 使 崇韜 Ė 圖 人崇韜 莊宗 月, 中事 繼 日 方 岌 莊宗 知 遣 ::「今大軍 報 曰:「傳 勢已不 之,則 示 任 得 圜 遺 留 言未 等分 已 宦官馬彦 任 吾 可, 一將發, 而 圜 屬無 從之。 審 出 禍 守 機 招 蜀 豈 類 未 珪往視 之作, 集, 矣 可 有 詰 以 恐 便令果決? 愛端 待 日 間 後 繼发 **院崇韜去**: 知祥之至, 從襲 生變, 不 豈 ·容髮, 日 可 以 就。 作此 故 」皇后 都 安 上 丽 統命召崇韜 崇韜 無 能 是時 未 負 詔 辽 刨 心 期 書 千 還。 不 事 兩 班 裑 里 但 Ш 師 在 請, 而 新定, 皇后 從襲 有 繼 彦珪 覆稟命 党发登樓 因 日。 手 等泣 自 孟 將 教 彦 爲 乎 知祥 行 玤 教 安 曰:「今有 以 ! 見 至 與 避 能 未 劉 劉 繼 蜀 之。 至, 殺 皇后 皇后 发, 招 出 所 密 崇韜 討 使 皇 以 日 敕 在 使 后教 殺 彦 盜 崇 珪 臣 賊

當 榻 襲 內 IJ 謂 殺 難 , 至 而 臥 我 繼 繼 興平 岌 岌 行至 環縊殺之。 環 多 , 渭 班 聞 漽 疑 大 明 師 河 宗 事 久 西 Ź, 已去 二月, 反 都 亿 一, 兵 圓 謂 留 , 從後 繼 入京 守 福 軍 岌 不 張 至 至 籛 乳 川 師 泥 , 葬機 发 再 斷 母 溪, 繼岌欲 王, 浮 橋 先鋒 宜 吾不忍 繼 華州之西南 自 退 康 岌 保 圖 姃 機機 不 鳳 見王 孝 裑 翔 叛 岌 度 徘 王 至 據 乃循 総发 武 徊 岩 漢 泣 功 州 **111** 河 少病閥 下 路 李從 , 而 繼岌遺任 求 謂 東 生 李環 襲 至 , 勸 無子 當 **渭南** 繼 路 買 岌 「吾道 討 山 馳 明宗已即位 以 左 平 趣京 右皆潰。 俠。 之。 虚 途窮 師 繼 四 以 岌 月 , T. 面 從 救 辛

昇

階

繼岌從

者

李

環

過碎

其首

率征蜀之師二萬至京師,明宗撫慰久之,問圜繼岌何在,圜具言繼岌死狀。

封。 當莊宗遇弑時,太祖子孫在者十有一人,明宗入立,其四人見殺,其餘皆不知所終,太 同光三年,詔以皇子繼嵩、繼潼、繼蟾、繼曉皆爲光祿大夫,檢校司徒。 蓋其皆幼,故不

祖之後遂絕⊖。

□ 梁、唐家人傳,皆先兄弟而後諸子,兄弟之子,各從其父,此理之常也。 至莊宗七弟所書事迹,不以長幼爲次者,各 因其死之先後而書之,便於述事爾,無定法也

校勘記

同光二年癸未皇帝御文明殿遣使册劉氏爲皇后 冊命……四月己卯,帝御文明殿,冊魏國夫人劉氏爲皇后」。 是二月癸未爲制命之日,册封則在 年二月「癸未,宰相豆盧革率百官上表請立中宮,制以魏國夫人劉氏爲皇后,仍令所司擇日備禮 四月己卯。 史卷五唐莊宗紀及通鑑卷二七三繁在同光二年二月癸未。按薛史卷三一唐莊宗紀載: 南監、汪、汲、殿、南昌、鄂、蜀、劉校本作「同光二年四月已卯」,百衲本作「同光二年癸未」。本 百衲本、贵池本並有脫 製。 「同光二年癸未」,貴池本作「同光四年己卯」, 同光二

新五代史卷十五

唐明宗家人傳第三

皇后曹氏 皇后夏氏

明宗三后一妃:和武憲皇后曹氏生晉國公主,昭懿皇后夏氏生秦王從榮、愍帝, 宣憲

皇后魏氏,路王從珂母也; 淑妃王氏,許王從益之慈母也。

曹氏、夏氏皆不見其世家。 夏氏無封爵,明宗未即位前卒。 明宗天成元年,封楚國夫

追册爲皇后,諡曰昭懿。 人曹氏為淑妃,追封夏氏晉國夫人。 長興元年,立淑妃爲皇后,而夏氏所生二子皆已王,乃

皇后魏氏

店

明

宗家

人傳

第三

皇后曹氏

皇后夏氏

皇后魏氏

淑妃王氏

以歸。 國夫人。 |魏 氏 居數年,魏氏卒,葬太原。其子是爲路王從珂。 廢帝卽位,追奪魏氏爲皇太后,議建陵寢,而太原石敬瑭反,乃於京師河南府東立 ,鎭州平山人也。 初適平山民王氏,生子十歲矣。明宗爲騎將,掠平山,得其子母 明宗時,從珂已王,乃追封魏氏爲魯

淑妃王氏

寢宮。

清泰三年六月丙寅,遣工部尚書崔儉奉上皇太后寶册(1),諡曰宣憲。

所歸。 氏爲人簡質,常避事,由是王氏專寵。 氏素得謝金甚多,悉以遺明宗左右及諸子婦,人人皆爲王氏稱譽, 明宗益愛之。 而夫人曹 淑妃王氏,邠州餅家子也,有美色,號「花見羞」。少賣梁故將劉鄩爲侍兒,鄩卒,王氏無 是時,明宗夏夫人已卒,方求別室,有言王氏於安重誨者,重誨以告明宗而納之。

少懈,皇后心亦益愛之。然宮中之事,皆主於妃。明宗病,妃與宦者孟漢瓊出納左右,遂專 我。」王氏曰:「后,帝匹也,至尊之位,誰敢干之!」乃立曹氏爲皇后,王氏爲淑妃。 后亦甚謹,每帝晨起,盥櫛服御,皆妃執事左右,及罷朝,帝興皇后食,妃侍,食徹乃退,未嘗 明宗卽位,議立皇后,而曹氏當立,曹氏謂王氏曰:「我素多病,而性不耐煩,妹當代 妃事皇

爲五廟,使從益歲時主祠。 祀,服色、旌旗一依舊制。太常議立莊宗、明宗、愍帝三室,以至德宮爲廟;詔立高祖、太宗, 祖皇后事妃如母。天福四年九月癸未,韶以郇國三千戶封唐許王從益爲郇國公,以奉唐 至此,何忍獨生,妹自勉之!」太后乃與帝俱燔死,而妃與許王從益及其妹匿於鞠院以免。 · 唐兵犯京師,廢帝聚族將自焚。妃謂太后曰:「事急矣,宜少回避,以俟姑夫。」太后曰:「我家 得命,若大兒不容,則死之日,何面見先帝!」因泣下。廢帝亦爲之悽然,待之頗厚。石敬 怒,賜司衣王氏死,而事連太妃,由是心不悅,欲遷之至德宮,以太后素善妃,懼傷其意而 靜。從榮已死,司衣王氏以謂秦王實以兵入宮衞天子,而以反見誅,出怨言。愍帝聞之,大 從益自言求見秦王。明宗遣乳嫗將兒往來秦府,遂與從榮私通,從榮因使王氏伺察宮中動 氏,見明宗已老而秦王握兵,心欲自託爲後計,乃曰:「兒思秦王。」是時從益已四歲,又數教 皇太后,妃爲皇太妃。初,明宗後宮有生子者,命妃母之,是爲許王從益。 止,然待之甚薄。 晉高祖立, 妃自請爲尼, 不可, 乃遷于至德宮。 晉遷都汴, 以妃子母俱東, 置於宮中, 高 廢帝入立,嘗置酒妃院,妃舉酒曰:「願辭皇帝爲比丘尼。」帝驚,問其故,曰:「小兒處偶 從益乳母司衣王

用

事,殺安重誨、秦王從榮,皆與焉。

劉鄩諸子,皆以妃故封拜官爵。愍帝卽位、册尊皇后爲

宗

家人傳第三

淑

妲王氏

見明宗 延壽 娶從 H 畫 帝 像,焚香再拜, 益 刨 妹, 付 是爲永安公主。 妃 母子俱還洛陽。 顧妃曰:「 公主不知其母爲誰 明宗與我約爲弟兄, 契丹犯京師, 趙延壽所尚明宗公主已死, 素亦養於妃, 爾吾嫂也。」已而靳之曰:「今日 妃至京師 上婚 耶律德光乃爲 乃吾 徳光

媥 也。 乃拜從益 爲彰信 軍節度使,從益辭,不之官,與妃俱還洛陽

侍衞 翰率 豈 子 母母 福 逃 親 契丹諸將 邪 德 於徽 光 軍 一都指 禍 北 陵 行 歸、留蕭翰守汴州。 拜殿 揮 至 域 矣! 使。 中 公上,晉 ·, 以 」乃以王松、趙上交爲左右丞 翰留契丹兵千人屬祚而 避 羣 一使者,使者迫之以東,遂以從益權 臣拜殿下。 漢高 祖起太原,翰欲北 羣臣入謁太妃,妃曰:「吾家子母孤 去。 相, 李式、 去, 乃使人召從益 知 翟光料 南 朝軍 爲樞密使, 國 事 弱,爲翰 委以 從 益 燕將 中國。 御崇元殿 所 劉 迫,此 從益

兵閉 兒,使每歲寒食持 招行 城 漢 周 自 高 守。 m 祖 不 擁 主, 妃日 兵 而 ::「吾家亡國之餘,安敢與人爭 遣郭從義先入京師殺妃母子。 南 盂飯酒明宗墳上。」聞者悲之。 從 益遺人召高行 周 武 行德 天下 妃臨 等爲拒,行周等皆不至, 從益死時年十七。 1! 死呼曰:「吾家母子何罪? 乃遣人上書迎漢 乃 高 與王 加 松謀 何不留 高 祖 以 聞 其

皇后孔氏

及册命而難作。 愍帝哀皇后孔氏,父循,横海軍節度使。 |愍帝出奔,后病子幼,皆不能從。 后有賢行,生四子。愍帝即位, 廢帝入立,后及四子皆見殺。 立爲皇后,未 晉高祖立,

明宗子

追諡日哀。

從璟

明宗四子,曰:從璟、從榮、從厚、從益。

逼,公等不克其心,我亦不能至

魏,願歸衞天子。」

行欽釋之。

莊宗憐其言,賜名繼璟,以 往宣睽意,毋使自疑。」從璟馳至衞州,爲元行欽所執,將殺之,從璟呼曰:「我父爲亂軍所 軍變于魏,莊宗謂從璟曰:「爾父於國有大功,忠孝之心,朕自明信。今爲亂軍所逼,爾宜自 從璟初名從審,爲人曉勇善戰,而謙退謹敕。從莊宗戰,數有功,爲金槍指揮使。

唐

明宗家人傳第三

皇后孔氏

明宗子

斩 Ξī. 10 史

爲己子。

已渡黎陽,復欲遣從璟通問。行欽以爲不可,遂殺之。明宗卽位,贈太保。 從莊宗如汴州,將士多亡於道,獨從璟不去,左右或勸其逃禍,從璟不聽。 莊宗聞明宗

喪而 父子之際詳矣, 使其不幸而遭焉, 其亦如是而已矣!從璟之於莊宗, 敗則待罪於君, 射父,願無與兵焉!」則又號泣而呼其父曰:「盍拾兵而歸我君乎!」君敗則死之,父敗則終 志從其義,可也。」身居君所則從君,居父所則從父。 其從於君者,必辭其君曰:「子不可以 私則兩害,以其義則兩得。其父以兵攻其君,爲其子者,從父乎?從君乎。曰:「身從其居, 人倫之大本;忠孝,臣子之大節。豈其不相爲用,而又相害者乎?抑私與義而已耳。蓋以其 事君。 嗚呼!無父鳥生,無君鳥以爲生,而世之言曰:「爲忠孝者不兩全。」夫豈然哉?君父, 其從於父者,必告之曰:「君不可以射也,盍捨兵而歸吾君乎!」君敗則死之,父 赦己則終喪而事之。 古之知孝者莫如舜, 知義者莫如孔、 知所從而得其死矣。 孟, 其於君臣

秦王從榮,天成元年,以檢校司徒兼御史大夫,拜天雄軍節度使、同中書門下平章事。

三年,徙鎭河東。長興元年,拜河南尹,兼判六軍諸衞事

與諸 義雖不能曉,然尙喜屢聞之,其餘不足學也。」 作歌詩,甚無謂也。 招文學之士,賦詩飲酒,故後生浮薄之徒,日進諛佞以驕其心。自將相大臣皆患之,明宗頗 知其非而不能裁制。 [儒講論經義爾。] 明宗曰:「經有君臣父子之道,然須碩儒端士,乃可親之。 從璟死,從榮於諸皇子次最長,又握兵柄。然其爲人輕雋而鷹視,頗喜儒,學爲歌詩,多 汝將家子,文章非素習,必不能工,傳於人口,徒取笑也。 從榮嘗侍側,明宗問曰:「爾軍政之餘,習何事業?」對曰:「有暇讀書, 吾老矣,於經 吾見先帝好

乘輅 而居右。 中書令。 者因禘、嘗而發鹤祿,所以示不敢專。 車, 是歲秋,封從榮秦王。故事,諸王受封不朝廟,而有司希旨,欲重其禮,乃建議曰:「古 具鹵簿,至朝堂受册,出,載册以車,朝于太廟,京師之人皆以爲榮。三年,加兼 有司又言:「故事, 親王班宰相下,今秦王位高而班下, 今受大封而不告廟,非敬順之道也。」於是從榮朝服, 不稱。」於是與宰相分班

書不 DU 年 悅 ٠, 加 尚書令,食邑萬戶。 顧左右曰:「羣臣欲立太子, 太僕少卿何澤上書,請立從榮爲皇太子。 吾當養老於河東。」乃召大臣議立太子事, 是時明宗已病 大臣皆

兵, 每 匹、絹 帖。 莫敢 得澤 # 耳。 爾。」從榮出, 無 其 叉 天下大元帥之名,其禮 延光等患之,乃加從榮天下兵馬大元帥。 可否。 入朝 + 升 兼 <u>pc</u> ; 班 同中書門下平章事者,初見亦如之,其後許 了,以數百騎先後,張弓挾矢,馳 在宰相 從榮入白曰:「臣聞姦人言,欲立臣爲太子,臣實不願也。」明宗曰:「此羣臣之欲 其諸軍指揮使,人絹十匹; 見范延光、趙延壽等曰:「諸公議欲立吾爲太子, 上。」從榮大宴元帥府,諸將皆有頒 無所考按。 請自節度使以下,凡領兵職者,皆具櫜鞬以 都頭 走道 上,見者皆震懾。從榮又命其寮屬及四 包下,七 有司又言:「元帥或統諸道,或專一 如客禮。 給 匹至三匹。 控鶴、奉聖、嚴衞指揮 凡元帥府文符行 是欲奪吾兵柄而幽之東宮 又請嚴衞 **、捧 理千 使, 天下, 面, 方游士 人 人 軍 為牙 皆用 馬 禮 自 庭 前

敢言者 帥 崔 悦 m 不 · 刑部 · 得 事 惟延光、 詰 ,者請爲諸王擇師傅,以 侍 屬 郎任贊 寮 非吾所 延壽陰有避禍意, 為元 帥 諭 判官。 也。 加加 將相 訓 明宗曰:「學士代予言, 導。 數見明宗, 大 臣見從榮權位 宰相難其事 游泣求解樞密, ,因請 益 隆 不可也。」從榮 從榮自! 而 輕 擇。 二人皆引去, 脫 加 從榮 畄 此 丽 皆 (乃請) 恚 日 知 其禍 翰林 而從榮之 任以元 而莫 學士

試

作征

准檄

,陳己所以平一

天下之意

難作。

者曰:「大家省事乎?」曰:「吾不知也。」有頃,六宮皆至,曰:「大家還魂矣!」因進粥一器。 上守漏宮女曰:「夜漏幾何?」對曰:「四更矣!」帝卽唾肉如肺者數片,溺涎液斗餘。 從榮等去,乃遷於雍和殿,宮中皆慟哭。至夜半後,帝蹶然自興於楊,而侍疾者皆去,顧殿 問起居於廣壽殿,帝不能知人。 十一月戊子,雪,明宗幸宮西士和亭,得傷寒疾。己丑,從榮與樞密使朱弘昭、馮贇入 王淑妃告曰:「從榮在此。」又曰:「弘昭等在此。」皆不應。

至旦,疾少愈,而從榮稱疾不朝。

以兵入宮。使其押衙馬處鈞告弘昭等,欲以牙兵入宿衞,問何所可以居者。 義誠有子在秦王府,不敢決其謀,謂弘昭曰:「僕爲將校,惟公所使爾 入告王淑妃以謀之,曰:「此事須得侍衞兵爲助。」乃召侍衞指揮使康義誠,謀於竹林之下。 具以告從榮,從榮還遣處鈞語弘昭等曰:「爾輩不念家族乎?」弘昭、贇及宣徽使孟漢瓊等 愀然有不足之色。其入問疾也,見帝已不知人,旣去,而聞宮中哭聲,以謂帝已崩矣,乃謀 「宮中皆王所可居,王自擇之。」因私謂處鈞曰:「聖上萬福,王宜竭力忠孝,不可草草。」處鈞 初,從榮常忌宋王從厚賢於己,而懼不爲嗣。 其平居驕矜自得,及聞人道宋王之善,則 !」弘昭大懼 弘昭等對日

明日,從榮遣馬處鈞告馮贇曰:「吾今日入居興聖宮。」又告義誠,義誠許諾。 質即馳入

危窘。 有種 誠自處置,毋令震動京師。」踏王子重吉在側,明宗曰:「吾與爾父起微賤,至取天下,數救我 相 爾!今安危之機,間不容髮,奈何以子故懷顧望,使秦王得至此門,主上安所歸乎? 顧 見義誠及弘昭、漢瓊等坐中興殿閣議事, 號 乎? 泣。 從榮得何氣力,而作此惡事 」漢瓊曰:「賤命不足惜,吾自率兵拒之。」卽入見曰:「從榮反,兵已攻端門。」宮中 明宗問弘昭等曰:「實有之乎?」對曰:「有之。」明宗以手指天泣下,良久曰:「 ! 爾亟以兵守諸門。」重吉卽以控鶴兵守宮門。 質責義誠曰:「主上所以畜養吾徒者, 吾輩 今日 義 一復

定鼎門,牙兵劫嘉善坊而潰。 兵五百自左掖門出,方渡河,而後軍來者甚衆,從榮乃走歸河南府,其判官任贊已下皆走出 懼,索鐵厭心,自調弓矢。 閉,叩左掖門,亦閉,而於門隙中見捧聖指揮使朱弘實率騎兵從北來,即馳告從榮。 謂輦曰:「明日而今,誅王居敏矣!」因陣兵橋北,下據胡牀而坐,使人召康義誠。 劉贊、王居敏,而所昵者劉陟、高輦。 是日,從榮自河南府擁兵千人以出。 皇城使安從益率騎兵三百衝之,從榮兵射之,從益稍却。 從榮夫妻匿牀下,從益殺之。 從榮兵出,與陟、輦並轡耳語,行至天津橋南, 從榮寮屬甚衆, 而正直之士多見惡,其尤所惡者 而端門已 弘實 指 日景 騎

此, 慚見羣臣!」君臣相顧,泣下沾襟。 明宗聞從榮已死,悲咽幾墮于榻, 絕而蘇者再。 從榮二子尚幼,皆從死。後六日而明宗崩。 馮道率百寮入見, 明宗日:「吾家事若

明宗姪

從璨

明宗兄弟皆不見于世家,而有姪四 人, 曰:從璨、從璋、從温、從敏。

戲登御榻, 性 倜儻,輕財好施 從樂初爲右衞 重酶奏其事 ,重誨忌之。 大將 ,,貶房州司戶參軍,賜死。 軍,安重誨用事 明宗幸汴州, ,自諸王將相皆下之,從璨爲人剛猛,不能少屈,而 以從璨爲大內皇城使。 重酶見誅,詔復其官,贈太保。 嘗於會節園飲 酒酣,

從璋

郡公。 宗 將 宗 小即位 軍 從璋字子良,少善騎射。 「以爲捧聖左廂都指揮使,改皇城使,領饒州 居 從璋爲人貪鄙 ,從障欲率民爲貢獻,其從事 「久之,出鎭保義,徙河中。 ,自鎭保義,始折節自脩,在南陽頗有遺愛。 莊宗時,將兵戍常山,聞明宗兵變于魏,乃亦起兵據邢州。 長興 ,諫以爲不可,從璋怒, 、四年夏,封洋王。 刺史, 拜彰國 晉高祖 引弓欲射之, 坐罷爲右聽 軍節度使,徙鎮 立,徙鎭威勝 天福二年卒,年五 降封 義成。 隴 衞 ۰---西 明 明

唐

明

宗家人

傳

第

=

明

宗

姪

從温

高祖 立,復爲忠武軍節度使。從温爲人貪鄙,多作天子器服以自僭,宗族、賓客諫之,不聽, 從温字德基,初爲北京副留守。 歷安國、忠武、義武、成德、武寧五節度使,封克王。

其妻關氏大呼于牙門曰:「從温欲反,而造天子服器。」從温大恐,乃悉毀之。

訴,事下有司,從温具伏。 繩之以法!」從温由此益驕。 是時從璋子重俊爲號州刺史,坐贓,亦以太后故,罪其判官高獻而已。 明宗諸子八人,至晉出帝時六已亡歿,惟從温、從敏在,太后常曰:「吾惟有一兄,豈可 出帝懼傷太后意,釋之而不問。 嘗誣親吏薛仁嗣爲盜,悉籍沒其家貲數千萬。 開運二年,徙河陽三城,卒于官。 仁嗣等詣 重俊復爲商州 闕自

從敏

刺史。

坐與其妹姦及殺其僕孫漢榮掠其妻,賜死。

入立 封涇王。 ,遷皇城使、保義軍節度使,與討王都。 從敏字叔達,爲人沉厚寡言,善騎射。 漢高祖時,爲西京留守,封秦國公。 初從莊宗爲馬步軍都指揮使兼行軍 歷鎭橫海、義武、成德、歸德、保義、昭義、河陽 周廣順元年卒,贈中書令,諡曰恭惠。 司馬,明宗 唐明宗家人傳第三

校勘記

(1) 遺工部尚書崔儉奉上皇太后實冊 有獲居儉傳,其人歷刑、吏、兵部侍郎,尚書左丞,戶部尚書,未長工部。然薛史卷一四三禮志稱 「崔儉」,薛史卷四八唐末帝紀作「崔居儉」。按本史卷五五

「尚書左丞崔儉」,官名與崔居儉傳正合,崔居儉又似卽崔儉。

待考。

新五代史卷十六

唐廢帝家人傳第四

皇后劉氏

即位,立爲皇后。 廢帝皇后劉氏,父茂威,應州渾元人也。 后爲人彊悍,廢帝素憚之。 初封沛國夫人,廢

帝

牛衞將軍,權知天雄軍府事。 方用兵,而令昭之亂作。 軍亂者三千餘人皆死。有司請以延皓行軍法,廢帝以后故,削其官爵而已。 軍士,軍士皆怨。捧聖都虞候張令昭以其屯駐兵逐延皓,延皓走相州。 天雄軍節度使。延皓爲人素謹厚,及貴而改節,以后故用事,受財,掠人園宅,在鄴下不恤 其弟延皓,少事廢帝爲牙將,廢帝即位,拜宮苑使、宣徽南院使。 令昭乃閉城, 遣其副使邊仁嗣請己爲節度使。 已而遣范延光討之,令昭敗走邢州,追至沙河,斬之,屯駐諸 清泰二年,爲樞密使、 廢帝以令昭爲右千 是時,石敬瑭已反,

唐

殿帝家

人傳

第四

皨

后

劉氏

重美

廢帝二子,曰重吉、重美,一女爲尼,號幼澄,皆不知其所生。

掌親兵,乃出重吉爲亳州團練使,居幼澄於禁中,又徙廢帝北京。 人殺重吉于宋州,幼澄亦死。 廢帝鎭鳳翔,重吉爲控鶴指揮使,與尼俱留京師。 控鶴,親兵也。 廢帝自疑,乃反。 愍帝遣 愍帝卽位,不欲重吉

重美

重美,幼而明敏如成人。廢帝卽位,自左衞上將軍領成德軍節度使、兼河南尹、判六軍

諸衞事,改領天雄軍節度使、同中書門下平章事,封雍王。

皆出城以藏竄,門者禁止之。重美曰:「國家多難,不能與民爲主,而欲禁其避禍,可乎?」 言,以爲然,而劉延皓與劉延朗等迫之不已,廢帝遂如河陽,留重美守京師。京師震恐,居民 石敬瑭反,廢帝欲北征,重美謂宜持重,固請毋行。廢帝心憚敬瑭,初不欲往,聞重美

佗日重勞民力,取怨身後耳!」后以爲然。 廢帝自焚,后及重美與俱死。 因縱民出。及晉兵將至,劉皇后積薪于地,將焚其宮室,重美曰:「新天子至,必不露坐,但

梁博王友文之不別,何哉?著禍本也,梁太祖之禍,自友文始,存之所以戒也。 之也。而別其家者,昭穆親疏之不可亂也。號可同,家不可以不別,所以別嫌而明微也。 爲一家,世宗爲一家。別其家而同其號者,何哉?唐從其號,見其盜而有也;周從其號,與 號而三姓,周一號而二姓。唐太祖、莊宗爲一家,明宗、愍帝爲一家,廢帝爲一家;周太祖 臣父父子子之道乖,而宗廟、朝廷,人鬼皆失其序,斯可謂亂世者歟!自古未之有也。唐一 嗚呼!家人之道,不可不正也。夫禮者,所以別嫌而明微也。甚矣,五代之際,君君臣

新五代史卷十七

晉家人傳第五

高祖皇后李氏

帝立,常疑高祖必反。 三年,公主自太原入朝千春節,辭歸,留之不得,廢帝醉,語公主曰: 「爾歸何速,欲與石郎反邪?」旣醒,左右告之,廢帝大悔。公主歸,以語高祖,高祖由是益 高祖皇后李氏,唐明宗皇帝女也。后初號永寧公主,清泰二年封魏國長公主口。自廢

皇太后。 皇太后,然卒不奉册而高祖崩,故后訖高祖世亦無册命。出帝天福八年七月,册尊皇后爲 妃,高祖庶母劉氏也。高祖以宗廟未立,謙抑未皇。七年夏五月,高祖已病,乃韶尊太妃爲 高祖卽位,公主當爲皇后。天福二年三月,有司言:「皇太妃尊號已正,請上寶册。」太

新五代史卷十七

太后爲人彊敏,高祖常嚴憚之。 出帝馮皇后用事,太后數訓戒之,出帝不從,乃及于

敗。

負 ! 超勸止之。及得德光所與書,乃滅火出上苑中。 否?」又問契丹先爲晉獲者及景延廣、桑維翰等所在。 且曰:「吾有梳頭妮子竊一藥囊以奔于晉,今皆在否?吾戰陽城時,亡奚車一 昔先帝起太原時,欲擇一子留守,謀之北朝皇帝,皇帝以屬我,我素以爲其所知,卿爲 開運三年十二月,耶律德光已降晉兵,遣張彥澤先犯京師,以書遺太后,具道已降晉 帝召當直學士范質, 太后與帝聞彥澤至,欲自焚,嬖臣薛 謂曰:「杜郎一何相 乘, 在

我草奏具言之,庶幾活我子母。」質爲帝草降表日:

神明。 露蒙霜,度鴈門之險;馳風擊電,行中冀之誅。黃鉞一麾,天下大定,勢凌宇宙,義感 衆一旅,兵連禍結,力屈勢孤。翁皇帝救患摧剛,興利除害,躬擐甲胄,深入寇場。 孫男臣重貴言:頃者唐運告終,中原失馭,數窮否極,天缺地傾。先人有田一成,有 功成不居,遂興晉祚,則翁皇帝有大造於石氏也。 犯

果貽赫怒,禍至神惑,運盡天亡。十萬師徒,望風東手;億兆黎庶,延頸歸心。臣負義 或 重 |事,皆委將相大臣。 至於擅繼宗祧,旣非稟命; 輕發文字,輒敢抗尊。 旋屬天降鞠凶,先君卽世,臣遵承遺旨,纂紹前基。 諒闇之初,荒迷失次,凡有軍 自啓釁端

也。 雷霆,未賜靈誅,不絕先祀,則百口荷更生之德,一門銜無報之恩,雖所願焉,非敢望 包羞,貪生忍恥,自貽顚覆,上累祖宗,偷度朝昏,苟存視息。 臣與太后、妻馮氏於郊野面縛俟罪次。 翁皇帝若惠顧疇昔,稍霽

又爲太后表曰:

德光報曰:「可無憂,管取一喫飯處。」 視景偷生,惶惑之中,撫問斯至,明宣恩旨,曲示含容,慰諭丁寧,神爽飛越。 豈謂已垂 發自冀北,親抵河東,跋履山川,踰越險阻。立平互嬖,遂定中原,救石氏之覆亡,立晉 之命,忽蒙更生之恩,省罪責躬,九死未報。今遣孫男延煦、延寶,奉表請罪,陳謝以聞。 追,戚實自貽,咎將誰執!今穹旻震怒,中外攜離,上將牽羊,六師解甲。妾舉宗負釁, 朝之社稷。不幸先帝厭代,嗣子承祧,不能繼好息民,而反虧恩辜義。兵戈屢動,駟馬難 念先皇帝頃在井、汾,適逢屯難,危同累卵,急若倒懸,智勇俱窮,朝夕不保。皇帝阿翁 晉室皇太后新婦李氏妾言:張彥澤、傅住兒等至,伏蒙皇帝阿翁降書安撫者。妾伏

今日豈不相憫邪?」寺僧辭以虜意難測,不敢獻食。帝陰祈守者,乃稍得食。 近勳以兵守之(11)。是時雨雪寒凍,皆苦饑。太后使人謂寺僧曰:「吾嘗於此飯僧數萬, 四年正月丁亥朔,德光入京師,帝與太后肩輿至郊外,德光不見,館于封禪寺,遣其將

人人傳

第五

高祖

皇后

李

十、東西班五十、醫官一、控鶴官四、御廚七、茶酒司三、儀鸞司三、六軍士二十人從,衞以騎 歸!」於是太后與馮皇后、皇弟重奪、皇子延煦、延寶等舉族從帝而北,以宮女五十、宦者三 失者,違先君之志,絕兩國之歡。然重貴此去,幸蒙大惠,全生保家,母不隨子,欲何所 曰:「吾聞重貴不從母教而至于此,可求自便,勿與俱行。」太后答曰:「重貴事妾甚謹 辛 jp 一個光降帝爲光祿大夫、檢校太尉,封「負義侯」,遷於黃龍府。
一個光使人謂太后 所

悞我,不令我死!」又行五六日,過海北州,至東丹王墓,遣延煦拜之。又行 又行七八日,至錦州,虜人迫帝與太后拜阿保機畫像。帝不勝其辱,泣而呼曰:「薛超 自 一渤海國 1幽州行士餘日,過平州,出楡關,行砂磧中,饑不得食,遣宮女、從官,採木實、野蔬而 鐵州。 又行七八日,過南海府,遂至黃龍府。 :十餘日,渡遼

兵三百。所經州縣,皆故晉將吏,有所供饋,不得通。路傍父老,爭持羊酒爲獻,衞兵推隔

不使見帝,皆涕泣而去。

永康王使人扶起之,與坐,飲酒奏樂。 陽 里 ,帝白衣紗帽 mi 是歲六月,契丹國母徙帝、太后于懷密州,州去黃龍府西北一千五百里。 國母爲永康王所囚,永康王遣帝、太后還止遼陽,稍供 ,與太后、皇后詣帳中上謁,永康王止帝以常服見。 而永康王帳下伶人、從官,望見故主,皆泣下,悲不自 給之。明年四月,永康王至遼 帝伏地雨泣 自自 行過遼陽二 陳過咎。

廣人常以五月上||座避暑,八月下||脛。至八月,永康王下||脛,太后自馳至霸州見永康王,求於 妻兄<u>禪奴愛帝小女,求之,帝辭以尚幼。永康王馳一騎取之,以賜禪奴。</u>脛,虜地,尤高涼, 五月,永康王上陘,取帝所從行宦者十五人、東西班十五人及皇子延煦而去。 永康王

勝,爭以衣服藥餌爲遺。

漢兒城側賜地種牧以爲生。永康王以太后自從,行十餘日,遣與延煦俱還遼陽。

使趙延暉避正寢以館之。去建州數十里外得地五十餘頃,帝遣從行者耕而食之。 明年乃漢乾祐二年,其二月,徙帝、太后于建州。自遼陽東南行千二百里至建州,節度

我爲虜地鬼也!」遂卒。帝與皇后、宮人、宦者、東西班,皆被髮徒跣,扶异其柩至賜地,焚 無知則已,若其有知,不赦爾於地下!」八月疾亟,謂帝曰:「我死,焚其骨送范陽佛寺,無使 明年三月,太后寢疾,無醫藥,常仰天而泣,南望戟手駡杜重威、李守貞等曰:「使死者

周顯德中,有中國人自契丹亡歸者,言見帝與皇后諸子皆無恙。 後不知其所終。

其骨,穿地而葬焉。

安太妃

出帝皇后馮氏

- 八〇

妃。 **颺**之,庶幾遺魂得反中國也。」旣卒,砂磧中無草木,乃毀奚車而焚之,載其燼骨至建州。 妃老而失明,從出帝北遷,自遼陽徙建州,卒於道中。 安太妃 ,代北人也,不知其世家,爲敬儒妻,生出帝, 封秦國夫人。 臨卒謂帝曰:「當焚我爲灰、南向 出帝立, 尊爲皇太

出帝皇后馮氏

太后亦卒,遂拄葬之。

笑,聲聞于外。 常鼓吹,命后至 慶。」左右皆失笑, 居,有色,出帝悅之。 都 不任大慶。」羣臣出,帝與皇后酣飮歌舞,過梓宮前,酹而告曰:「皇太后之命,與先帝不任大 副留守。 出帝皇后馮氏,定州人也。 高祖留守鄴都,得濛驩甚, 西御莊,見于高祖影殿。 帝亦自絕倒,顧謂左右曰:「我今日作新女壻,何似生?」后與左右皆大 高祖崩,梓宮在殯,出帝居喪中, 父濛,爲州進奏吏,居京師,以巧佞爲安重誨所喜, 乃爲重胤娶濛女,後封吳國 羣臣皆賀。 帝顧謂馮道等曰:「皇太后之命 納之以爲后。 一大人。 是日 了,以六軍仗衞、太 、 重胤早卒, ,與卿 以爲鄴 后寡

后旣立, 專內寵,封拜宮官尙宮、 知客等皆爲郡夫人, 又用男子李彥弼爲皇后宮都押

亂人倫之大典。」后隨帝北遷,哀帝之辱,數求毒藥,欲與帝俱飮以死,而藥不可得。後不知 衙。 其兄玉執政,內外用事,晉遂以亂。 契丹犯京師,暴帝之惡于天下曰:「納叔母於中宮,

敬暉、 然粗 重胤皆不知其於高祖爲親疎也。 二叔父,一兄六弟,七子二孫,而有略有詳,非惟禍亂多故而失其事實,抑亦無足稱焉者。 元皇帝、萬友、萬詮,孝元皇帝生高祖,萬友生敬威、敬贇,萬詮生敬暉,而敬儒、敬德、敬殷、 存其見者,以備其闕云。二叔父曰萬友、萬詮,兄曰敬儒,弟曰敬威、敬德、敬殷、敬贇、 晉氏始出夷狄而微,終爲夷狄所滅,故其宗室次序本末不能究見。 其可見者曰:高祖 重胤,子曰重貴、重信、重义、重英、重進、重睿、重杲,孫曰延煦、延寶。 孝平皇帝生孝

敬威、敬德 愛之,養以爲子,故於名加「重」而下齒 後 於諸弟 ,而高祖世獨不得追封,此又可疑也。 重胤、 重英, 高祖 反時死。 諸子。 高祖少子日馮六,未名而卒,而舊說以重睿爲幼子 高祖 重胤,高祖弟也,亦不 叔、兄與弟敬殷、子重進,皆前即 知其爲親疎, 位卒,而 然高 加

,孝元皇帝第二子也,而敬儒爲兄,疑其長子也,則於高祖屬長而親,然贈官反最

高

祖

晉家

人傳第

五

敬威

者,非也。

太傅。 徒 兼 御 石氏世事軍中,萬友、萬詮職卑不見。 t史大夫、上柱國贈太師。 <u>萬</u>詮亦自金紫光祿大夫、檢校司空兼御史大夫、上柱國贈 出帝天福八年五月,追封皇叔祖萬友爲秦王,萬詮加贈太師,追封趙王。 天福二年正月,萬友自故金紫光祿大夫、檢校司

敬威

爲沂州 日:「生而 敬威字奉信,唐廢帝時爲彰聖右第三都指揮使,領常州刺史。 馬 步軍指揮使,以高祖反誅。 《有死,人孰能免。吾兄方舉大事,吾不可偷生取辱,見笑一時。」遂自殺。 聞高祖舉兵太原, 謂人 敬德時

敬儒 大夫、檢校尙書左僕射兼御史大夫、上柱國贈太傅,而獨 三皇叔皆爲太師,而皇伯敬儒始追封宋王,亦加贈太師 天福二年正月, 七年正 月, 追封敬威廣王,敬德福王,敬殷通王, 贈敬威、敬德皆爲太傅,并贈敬殷以檢校太子賓客,亦贈太傅, 不得封。 皆贈太尉。 出帝天福八年五月,加贈 敬儒始以故金紫光禄 而 不及

敬贇

敬贇字德和,少無賴,翁身民間。高祖使人求得之,補太原牙將。 即位,以爲飛龍皇城

使,累遷曹州防禦使。

天福五年多,拜河陽三城節度使。

出帝時,加同中書門下平章事,始漸驕恣。帝嘗遣使者至,必問曰:「小姪安否?」陝人 敬贇性貪暴, 高祖為擇賢佐吏輔之, 而敬贇亦憚高祖嚴, 未嘗敢犯法。 歲餘,徙鎮保

苦其暴虐,召還京師,以其皇叔不能責也,斥其元從都押衙蘇彥存、鄭温遇以警之。

年七月,復出爲威勝軍節度使。歲餘,出帝以曹州爲威信軍,授敬贇節度使。 契丹犯邊,敬贇從出帝幸澶淵,使以兵備汝陽,守麻家渡,未嘗見敵,皆無功。 在曹貪暴尤 開運元

甚,久之,召還。

張彥澤兵犯京師,敬贇夜走,踰城東垣,墮沙濠溺死,時年四十九。

韓王敬暉

楚 Ŧ 重 信

五 代 史 卷 + -6

以廉儉見稱,卒于官,贈太傅。 韓王 敬暉字德昭(三),爲人厚重剛直, |天福八年,加贈太師,追封韓王。 勇而多智, 高祖尤愛之。 子曦嗣。 高祖時爲曹州防禦使,

贈太傅,追封重英號王,重胤郯王,重進變王。 月,高祖爲二子發哀,皆贈爲太保;幷贈重進以故左金吾衞將軍贈太保。七年正月, 重胤爲皇城副使,居京師。 高 祖李皇后生楚王重信,其諸子皆不知其母。當高祖起太原,重英爲右衞大將軍〔8〕, 聞高祖舉事,匿民家井中,捕得誅之,丼族民家。 |出帝||天福八年五月,皆加贈太師。 天福二年正 ,皆加

楚王重信

從賓 旭 節 度 使,有善政 ::「此兒爲善被禍,吾哀之甚,自我而已,豈有例邪! 亦反,重信見殺,時年二十。 |楚王||重信字||守字,爲人敏悟多智而好禮。 高祖 下韶褒之。 高祖欲贈重信太尉,大臣 是歲范延光反,詔前靈武節度使張從賓發河陽兵討延光, 天福二年二月,以左曉衞上將軍拜河陽三城 」乃贈太尉。 引漢故事 ,皇子無爲三公者。 七年正月, 加贈太師 高

壽王重义

壽王。 爲東都留守。 壽王重义字弘理,爲人好學,頗知兵法。 出帝天福八年五月,加贈太師。 張從賓反,攻河南,見殺,時年十九,贈太傅。 皆無子。 高祖即位, 拜左驍衞大將軍。 医福七年正月,加贈太尉,追封 高祖幸汴州,以

重睿

武,皆不之鎮。 尹,以左散騎常侍邊蔚權知開封府事。開運二年五月,拜重睿雄武軍節度使,歲餘,徙鎮忠 多事,議立長君,而景延廣已陰許立出帝,重睿遂不得立。出帝以重睿爲檢校太保、開封 因以宦者抱持寘道懷中,高祖雖不言,左右皆知其以重睿託道也。 重睿爲人貌類高祖。 契丹滅晉,重容從出帝北遷,後不 高祖队疾,宰相馮道入見臥內,重睿尚幼,高祖呼出使拜道於前, ·知其所終。 高祖崩,晉大臣以國家

習

家人

傳

第五

露王

重义

重容

重果

延腴

延

躗

重杲

八年五月、加贈太師。 陳王重杲,高祖幼子也。 小字馮六、未名而卒、贈太傅、追封陳王、賜名重杲。出帝天福

延煦、 延煦 延寶,高祖諸孫也,出帝以爲子。 延寶

參知州事。 開運二年秋,以延煦爲鄭州刺史。延煦少,不能視事,以一宦者從之,又選尙書郎路航 宦者遂專政事,每詬辱航,出帝召航還。 已而徙延煦齊州防禦使。

歲殿,所以賜予甚厚,君臣窮極奢侈,時人以爲榮。 後所獻不可勝數。三年五月,遣宗正卿石光贊以聘幣一百五十床迎于其第,出帝宴在禮萬 斂,趙在禮所積鉅萬,爲諸侯王最。 三年,拜鎭寧軍節度使。 是時,河北用兵,天下旱蝗,民餓死者百萬計,而諸鎭爭爲聚 出帝利其費,乃以延煦娶在禮女,在禮獻絹三千匹,前 在禮謂人曰:「吾此一婚,其費十萬。」十

一月,徙延煦鎮保義。

北遷,不知其所終。 知所在,疑已焚之。先帝受命,命玉工製此璽,在位羣臣皆知之。」乃已。後延煦等從出帝 與前史所傳者異,命延煦等還報求眞璽。出帝以狀答曰:「頃路王從珂自焚於洛陽,玉璽不 **齎**降表、玉璽、金印以歸<mark>契丹,而延寶時亦爲威信軍節度使矣。</mark>契丹得璽,以爲製作非工, 自延煦爲齊州防禦使,而延寶代爲鄭州刺史。及契丹滅晉,出帝與太后遣延煦、延寶

使其不忍而外陽絕之,是大僞也。 凡物生而有知,未有不愛其父母者。使是子也,能忍而眞絕其天性歟,曾禽獸之不若也。 自諱其所生,而絕其天性之親,反視以爲叔伯父,以此欺其九族,而亂其人鬼親疎之屬曰。 欺以爲我生之子,曰:「不如此,則不能得其一志盡愛於我,而其心必二也。」而爲其子者,亦 世閭閻鄙俚之人則諱之,諱則不勝其欺與僞也。故其苟偷竊取嬰孩襁褓,諱其父母,而自 嗚呼!古之不幸無子,而以其同宗之子爲後者,聖人許之,著之禮經而不諱也。 而後

〇一作序。

諱哉!其簡易明白,不苟不竊,不欺不僞,可以爲通制而公行者,聖人之法也。 者,未有不由父母而生者也,故爲人後者,必有所生之父,有所後之父,此理之自然也,何必 惟聖人則不然,以謂人道莫大於繼絕,此萬世之通制而天下之公行也,何必諱哉!所謂子 夫闆閻鄙俚之人之慮於事者,亦已深矣!然而苟竊欺偽不可以爲法者,小人之事也。

也。 敬儒,絕其父道,臣而爵之,非特以其義不當立,不得已而絕之,蓋亦習見閭閻鄙俚之所爲 「爲人後者,爲其父母報。」自三代以來,有天下國家者莫不用之,而昏氏不用也。 ! 恩有屈於義,故降其服以期。服,外物也,可以降,而父母之名不可改,故著於經日: 又以謂爲人之後者所承重,故加其服以斬。而不絕其所生之親者,天性之不可絕也, 出帝之於

得天下,高祖 如寒食野祭而焚紙錢, 五代,干戈賊亂之世也,禮樂崩壞,三綱五常之道絕,而先王之制度文章掃地而盡於是 以耶律德光爲父,而出帝於德光則以爲祖而稱孫,於其所生父則臣而名之,是 天子而爲閭閻鄙俚之事者多矣!而晉氏起於夷狄, 以篡逆而

豈可以人理責哉

(1) 凊泰二年封魏國長公主 按五代會要卷二,李后長興四年改封魏國公主,清泰二年進封晉國長

公主。此疑誤。

(三)崔延勳 「延」、貴池、殿、蜀、劉校本同、南監、汪、汲、南昌、鄂本作「廷」。 薛史卷八五晉少帝紀、

通鑑卷二八六亦作「廷」。

韓王敬暉 薛史卷八七晉宗室傳及冊府卷二九六作「韓王暉」。又薛史稱暉爲晉高祖從兄,與此

及删府作弟異。

重英爲右衞大將軍 他本均無「大」字。

靍

人 儜 第

五

校 勘

記

新五代史卷十八

漢家人傳第六

皇后李氏

高祖皇后李氏,晉陽人也,其父爲農。 高祖少爲軍卒,牧馬晉陽,夜入其家劫取之。 高

祖已貴,封魏國夫人,生隱帝。

足,士亦不以爲怨也。」高祖爲改容謝之。高祖卽位,立爲皇后。高祖崩,隱帝册尊爲皇太 義兵,民未知惠而先奪其財,殆非新天子所以救民之意也。今後宮所有,請悉出之,雖其不 開運四年,高祖起兵太原,賞軍士,帑藏不足充,欲斂於民。后諫曰:「方今起事,號爲

有朝廷,非太后所宜言也。」太常卿張昭聞之,上疏諫帝,請:「親近師傅,延問正人,以開聰 帝年少,數與小人郭允明、後贊、李業等游戲宮中,后數切責之。 帝曰:「國家之事,外

后。

英

家人你第六

皇后李氏

高祖

二弟

三子

迟差十八

明。」帝益不省。 其後,帝卒與允明等謀議,遂至於亡。

臨兵,太后止之曰:「郭威本吾家人,非其危疑,何肯至此! 今若按兵無動,以詔諭威,威必 有說,則君臣之際,庶幾尙全。」帝不從以出,遂及於難 而去,曰:「何必謀於閨門!」那等死,周太祖起兵嚮京師,慕容彥超敗於劉子陂,帝欲出自 相議之。」李業從旁對曰:「先皇帝平生言,朝廷大事,勿問書生。」太后深以爲不可, 初,帝與允明等謀誅楊邪、史弘肇等,議已定,入白太后。 太后曰:「此大事也,當與宰 帝拂衣

臨朝。 是遷后於太平宮,上尊號日昭聖皇太后。 未終殘年、屬 高,德聲昭著,剪除禍亂,安定家邦,謳歌有歸,歷數攸屬,所以軍民推戴,億兆同歡。 周太祖入京師,舉事皆稱太后誥。已而議立湘陰公贇爲天子,贇未至,太祖乃請太后 已而太祖出征契丹, 此多難,唯以衰朽,託於始終。 軍士擁之以還。|太祖請事太后爲母,太后誥曰:「侍中功烈崇 顯德元年春崩日。 載省來牋,如母見待,感認深意,涕泗橫流。」於 老身

D 隱帝,舊史、實錄皆無皇后。 帝立三年崩,時年二十,蓋未嘗立后也。

高祖二弟 信 高祖三子 承訓 承祐 承励

乾祐元年,拜贇徐州節度使。 高祖二弟三子:弟曰崇、曰信,子曰承訓、承祐、承勳。 承訓早卒,追封魏王。承祐次立,是謂隱帝。 崇子日<u>營</u>,高祖愛之,以爲己子。 承勳爲開封尹。

矣!」道見質,傳太后意召之。 使質,高祖愛之,以爲子,宜立爲嗣。」乃遣太師馮道率羣臣迎贇。 謂太祖曰:「公此舉由衷乎?」太祖指天爲誓。道旣行,謂人曰:「吾平生不爲謬語人,今謬語 臣請見承勳視起居,太后命以臥榻舁承勳出見羣臣,羣臣視之信然,乃共奏曰:「徐州節度 州節度使寶,開封尹承勳,皆高祖之子,文武百辟,其擇嗣君以承天統。」於是周太祖與王峻 入見太后,言:「開封尹承勳,高祖皇帝之子,宜立。」太后以承勳久病,不任爲嗣。 |河東節度使||崇等在者四人,乃爲太后誥曰:「河東節度使||崇,許州節度使||信,皆||高祖之弟,徐 **馮道等,道殊無意,太祖不得已,見道猶下拜,道受太祖拜如平時,徐勞之曰:「公行良** ,」太祖意色皆沮,以謂漢臣未有推立己意,又難於自立,因白漢太后擇立漢嗣。 而宗室 周太祖已敗漢兵于北郊,隱帝遇弒。|太祖入京師,以謂漢大臣必相推戴,及見宰相 道揣周太祖意不在贇, 太祖與羣

郭崇以兵七百騎衞營。 遺崇護衞,非惡意也。」贇召崇,崇不敢進,馮道出與崇語,崇乃登樓見贇,已而奪贇部下兵。 **贇行至宋州,太祖自澶州爲兵士擁還京師,王峻慮贇左右生變,遣侍衞馬軍指揮使** 崇至宋州,<u>齊</u>登樓問崇所以來之意,崇曰:「澶州軍變, ,懼未察之,

漢 家

人人傳

第六

高祖二弟三子

此來,所恃者以公三十年舊相,是以不疑。」道默然。 「勿草草,事豈出於公邪!」道已去,郭崇幽贇于外館,殺賈正及判官董裔、牙內都虞候劉 太祖以書召道先歸,留其副趙上交、王度奉贇入朝太后。 **贇客將**賈正等數目道, 欲圖之。 道乃先還,贇謂道曰:「寡人 贅日:

福、孔目官夏昭度等。

以幽死 適當改卜之初,俾膺分土之命,濱可降授開府儀同三司,檢校太師、上柱國,封湘陰公。」贇 高祖近親,立爲漢嗣,乃自藩鎭召赴京師。 太祖已監國,太后乃下誥曰:「比者樞密使郭威,志安宗社,議立長君,以徐州節度使贇 雖誥命已行,而軍情不附,天道在北,人心靡東。

拒命。 月,彦超克徐州,庭美等皆見殺。 杒 太祖 質自徐州入也,以都押牙鞏庭美、教練使楊温守徐州。 拜王彥超徐州節度使,下韶諭庭美等許以刺史,井韶鸞赦庭美等。 庭美等聞贇不得立,乃閉城 廣順元年三

|承勳,廣順元年以病卒,追封陳王。

畏天下而難之,故假贇以伺間爾。 鳴 呼 予旣悲湘陰公贇之事,又嘉庭美、楊温之所爲。 當是之時,天下皆知贇之必不立也,然庭美、温之區區爲 質於漢非嫡長,特以周氏移國,

贇 等款狀亦不見,是皆不可知也。 夫史之闕文,可不愼哉。 嘉二人之忠而悲其志,然不得列於死節之士者,惜哉! 也,周嘗遣人招庭美等,予得其詔書四,皆言庭美等嘗已送款於周,後懼罪而復叛,然庭美 人之事 〈守孤城以死,其始終之迹,何媿於死節之士哉! 然予考於實錄,二人之死狀不明。夫二 ,固知其無所成,其所重者死爾,然史氏不著,不知其何以死也。當王彥超之攻徐州 其疑以傳疑,則信者信矣。 予固

蔡王信

而 領許州。 蔡王信, 高祖寢疾,隱帝當立爲嗣,楊邪等受顧命,不欲信在京師, 高祖之從弟也。高祖鎭太原,以信爲興捷軍都指揮使領義成軍節度使, 乃遣信就鎮, 信涕泣 徙

流盈前,信命樂飲酒自如也 信所至黷貨,好行殺戮。 軍士有犯法者,信召其妻子,對之刲剔支解,使自食其肉,血

立,幾落賊手。 楊邠等死,信大喜,謂其寮佐曰:「吾嘗爲天無眼,而使我鬱鬱於此者三年矣! 主上孤 諸公可以勸我一杯矣。」已而聞難作,信憂不能食。 周太祖軍變於澶州,王

英家

人傳

第六

祭 王 信

① 傳,先營而後信,亦便於述事爾。 選前申州刺史馬鐸以兵巡

峻遺前申州刺史馬鐸以兵巡檢許州,信乃自殺。 周太祖卽位,追封察王〇。

新五代史卷十九

周太祖家人傳第七

皇后柴氏

位,后已先卒,乃下詔:「故夫人柴氏,追册爲皇后,諡曰聖穆。」 飲博任俠,不拘細行,后常諫止之。」太祖狀貌奇偉,后心知其貴人也,事之甚謹。及太祖即 太祖一后三妃。 聖穆皇后柴氏,邢州堯山人也,與太祖同里,遂以歸焉。 太祖微時,喜

淑妃楊氏

張文禮所殺,鎭州亂,妃亦流寓民間,後嫁里人石光輔,居數年,光輔死。 淑妃楊氏,鎭州眞定人也。父弘裕,眞定少尹。妃幼以色選人趙王宮,事王鎔。 周 太 祖 家人傳第七 皇 后 柴 氏 淑 妃 楊 氏 貴 妃 張 氏 太祖柴夫人卒,聞 一九七

妃有色而賢,遂娶之爲繼室。

太祖方事漢高祖於太原,天福中妃卒,遂葬太原之近郊

矣,願以授之。」太祖曰:「吾方思之,豈忘爾父邪!」卽召弘裕,弘裕老不能行,乃就其家拜 太祖卽位,廣順元年九月,追册爲淑妃。 拜妃弟廷璋爲右飛龍使,廷璋辭曰:「臣父老

金紫光祿大夫、眞定少尹。

俟。 顯德元年,世宗已敗劉旻於高平,遂攻太原,太原閉壁被圍,乃遷妃喪而葬之。

貴妃張氏

從諫館於妃家,見妃尙幼,憐之,而從諫家在太原,遂以妃歸,爲其子婦。 鎔爲諮呈官,官至檢校工部尚書。鎔死,鎭州亂,莊宗遣幽州符存審以兵討張文禮,裨將武 貴妃張氏,鎭州眞定人也。祖記,成德軍節度判官、檢校兵部尚書。父同芝,事趙王王

<u>吳國夫人。太祖以兵入京師,漢遺劉銖戮其家,妃與諸子皆死。太祖即位,追册爲貴妃。</u> 久之,太祖事漢高祖於太原,楊夫人卒,而武氏子亦卒,乃納妃爲繼室。太祖貴,累封

德妃董氏 子侗信 姪守愿奉超 遜

德妃董氏,鎭州靈壽人也。 祖文廣,唐深州錄事參軍。 父光嗣, 趙州昭慶尉。 妃幼穎

悟,始能言,聞樂聲知其律呂。

得妃憐之,養以爲子,過於所生。居五六年,妃家悲思,其兄|珥求之人間,莫知所在。 年七歲,鎭州亂,其家失之,爲潞州牙將所得,寘諸褚中以歸。路將妻嘗生女,輒不育, 路將

仕于京師,遇瑀,欣然歸之,年十三。

由太原入京師,太祖從,過洛陽,聞妃有賢行,聘之。太祖建國,中宮虛位,遂册爲德妃。 **瑀以嫁里人劉進超,進超亦仕晉爲內職。** 契丹犯闕,進超歿于虜中,妃嫠居洛陽。漢高

廣順三年卒,年三十九。

旭

妃兄三人:两官至太子右贊善大夫,玄之、自明皆至刺史。

誅。 **青哥、意哥,不知其母誰氏。** 初 ,帝舉兵于魏,漢以兵圍帝第,時張貴妃與諸子青哥、意哥,姪守筠、奉超、定哥,皆被 太祖卽位,詔故第二子青哥贈太尉,賜名侗,第三子意哥

周

太祖家

人傳

第

七

德妃

蓝

氏

校勘

記

贈 司空,賜名信; 皇姪守筠贈左領軍衞將軍,以筠聲近榮,爲世宗避,更名守愿; 奉超贈左

監門衞將軍,定哥贈左千牛衞將軍,賜名遜。

傅, 將 情。 奉超、贈左千牛衞將軍遜等,頃因季世,不享遐齡,每念非辜,難忘有慟。 軍, 追封郯王; 故皇弟赠太保侗(1)、贈司空信、景運初啓、大年不登、俾予終鮮、實勤予懷。 世宗顯德四年夏四月癸未, 奉超右衞大將軍,遜右武衞大將軍。」 信司徒,杞王。」又詔曰:「故皇從弟贈左領軍衞將軍守愿、贈左監門衞將軍 韶曰:「禮以緣情,恩以悼往,矧在友于之列, 守愿可贈左衛大 尤鍾惻愴之 侗可贈太

校勘記

故皇弟贈太保侗 與上文「詔故第二子青哥贈太尉,賜名侗」不合。 「太保」,貴池、汲、殿、蜀、劉校本同,南監、南昌、鄂本作「太尉」。 薛史卷一一七周世宗紀、卷一二二剡王侗傳亦 按作「太保」

作「太保」,一

作「太尉」。

待考。

新五代史卷二十

周世宗家人傳第八

柴守禮

畏避之,號「十阿父」。守禮卒年七十二,官至太傅。 晏二、王彥超、韓令坤等同時將相,皆有父在洛陽,與守禮朝夕往來,惟意所爲,洛陽人多 言,第以元舅禮之。而守禮亦頗恣橫,嘗殺人于市,有司以聞,世宗不問。是時,王溥、王 光祿大夫、檢校司空、光祿卿。致仕,居于洛陽,終世宗之世,未嘗至京師,而左右亦莫敢 守禮字克讓,以后族拜銀青光祿大夫、檢校吏部尙書、兼御史大夫。世宗卽位,加金紫 周太祖聖穆皇后柴氏,無子,養后兄守禮之子以爲子,是爲世宗。

嗚呼,父子之恩至矣!孟子言:舜爲天子,而瞽叟殺人,則棄天下,竊負之而逃。 周 世宗家人傳第八 柴守 禮 皇后劉氏 以謂

謂孝矣 下 耳。 其意 寧受屈法之過,以申父子之道,其所以合於義者,蓋 何 雖 人 下可無舜 m 失刑 亦 渚 ,未必能使天下無殺 可 ? 能棄,而父亦不 多矣 輕, 然 予讀周史,見守禮殺人、世宗寢而 而 一、蓋天子有宗廟社稷之重、百官之衞、朝廷之嚴,其不幸有不得竊而逃,則 ,不可無至公,舜可棄天下,不可刑其父,此爲世立言之說也。 不孝重 有不得如其意,則擇其輕重而處之焉。 也。 可刑也。 人,而殺其父,滅天性而 刑者所以禁人爲非, 孝者所以教 然則爲舜與世宗者,宜如何無使瞽叟、守禮至於殺人, 不問,蓋進任天下重矣,而子於其父亦至矣, 絕 知權也。 人道, 世宗之知權,明矣夫! 孰爲重? 人爲善, 君子之於事 其意 權其所謂 一也, 。然事固有不得 `, 擇其輕重 輕重者 孰爲 重? 一而處之 則 則 如 刑 故 미 天 如

皇后劉氏

郡夫人。 封 彭 城 世宗三皇后。 、縣君。 世宗顯德四年夏四月, 世宗從太祖 貞惠 皇后劉氏,不知其世家, 于 魏,后留京師, 始韶彭城郡夫人劉氏追册爲皇后 太祖 舉兵 蓋微時所娶也, 漢 誅其族 (11) 世宗爲 有司益 太 左監 祖 卽 円 貞 惠 位 門衞 追 將 封 軍 彭城 陵日 得

惠陵。

呈后符氏

切諫止之,世宗不聽。師久無功,遭大暑雨,后以憂成疾而崩。議者以方用兵,請殺喪禮, 右,后必從容伺顏色,漸爲解說,世宗意亦隨解,由是益重之。世宗征胜,后以帝不宜親行, 劉夫人卒,遂納以爲繼室。 世宗即位,册爲皇后。 世宗卞急多暴怒,而後嘗追悔,每怒左 有命,天也。何必妄毁形髮爲!」太祖於后有恩,而世宗性特英銳,聞后如此,益奇之。及 爲父。其母以后夫家滅亡,而獨脫死兵刃之間,以爲天幸,欲使削髮爲尼,后不肯曰:「死生 家,后儼然坐堂上,顧軍士曰:「郭公與吾父有舊(三),汝輩無犯我!」軍士見之不敢迫。太 祖聞之,以謂一女子能使亂兵不敢犯,奇之,爲加慰勉,以歸彥卿。后感太祖不殺,拜太祖 免,手自殺其家人,次以及后,后走匿,以帷幔自蔽,崇訓惶遽求后不得,遂自殺。 漢兵入共 下母,吾取天下復何疑哉!」於是決反。而漢遣周太祖討之,逾年,攻破其城。崇訓知不 守貞出其家人使聽之,術者聞后聲,驚曰:「此天下之母也!」守貞益自負,曰:「吾婦猶爲天 初適李守貞子崇訓。守貞事漢爲河中節度使,已挾異志。有術者善聽人聲以知吉凶 宣懿皇后符氏,其祖秦王存審,父魏王彥卿。 后世王家,出於將相之貴,爲人明果有大

周世

宗家人傳第八

皇后

行氏

世宗

七子

新

於是百官朝臨于西宮,三日而釋服,帝亦七日而釋,葬於新鄭,陵曰懿陵。

後立皇后符氏,后妹也。 國初,遷西宮,號周太后。

世宗七子

不知其母爲誰氏。宜哥與其二,皆爲漢誅。 世宗子七人:長日宜哥,次二皆未名,次日恭皇帝,次日熙讓,次日熙謹,次日熙誨,皆 太祖卽位,詔賜皇孫名誼,贈左曉衞大將軍

誠,左武衞大將軍; 誠,左屯衞大將軍。

圧;鹹太保,韓王。」而皇子在者皆不封。 載惟往事,有足傷懷,宜增一字之封,仍贈三台之秩。 誼可贈太尉,追封越王; 誠太傅, 吳 天闕之端,愈動悲傷之抱。故皇子左驍衞大將軍蔵、左武衞大將軍誠、左屯衞大將軍誠等, 世,而後議之可也。明年夏四月癸未,先封太祖諸子。又詔曰:「父子之道,聖賢不忘,再思 顯德三年,羣臣請封宗室,世宗以謂爲國日淺,恩信未及於人,而須功德大成,慶流于

讓亦拜左驍衛上將軍,封燕國公。後十日而世宗崩,梁王卽位,是爲恭皇帝。其年八月,宗 六年,北復三關,週疾,還京師。 六月癸未,皇子宗訓,特進左衞上將軍,封梁王;而宗

軍衞大將軍,蘄王。 讓更名熙讓, 封曹王。 皇朝乾德二年十月,熈蓮卒。 熙謹、熙誨皆前未封爵,遂拜熙謹右武衞大將軍,封紀王; 熙讓、熙誨,不知其所終。 熙海左領

已,不敢有非漢之辭焉,蓋知其曲在己也。故略存其辭,以見周之有媿於其心者矣! 屈,太祖雖深恨之,然以餘辭直,終不及其家也。 周太祖舉兵于魏,漢遣劉銖誅其家族於京師,酷毒備至;後太祖入立,遣人責銖,銖辭不 嗚呼!至公,天下之所共也。 其是非曲直之際,雖父愛其子,亦或有所不得私焉。 及追封妻子之被殺者,其言深自隱痛之而 當

校勘記

- (二)王晏 貴池、南監、汪、南昌、鄂本同。 汲、殿、蜀、劉校本「王」作「汪」。
- (三) 漢誅其族 貴池本同。他本均作「漢誅太祖家屬,后見殺」。
- (三) 郭公與吾父有舊 貴池本同。他本「吾」下均有「王」字。

新五代史卷二十一

梁臣傳第九

覽者詳其善惡焉。 非一代,不可以國繫之者,作雜傳。 夫入于雜,誠君子之所羞,而一代之臣未必皆可貴也, 得死節之士三人焉。其仕不及于二代者,各以其國繫之,作梁、唐、晉、漢、凋臣傳。其餘仕 嗚呼!孟子謂「春秋無義戰」,予亦以謂五代無全臣。 無者,非無一人,蓋僅有之耳,余

敬翔

中,乃客大梁。翔同里人王發爲汴州觀察支使,遂往依焉。 敬翔字子振,同州馮翊人也,自言唐平陽王暉之後。少好學,工書般,乾符中舉進士不

久之,發無所薦引,翔客益窘,爲人作牋刺,傳之軍中。 太祖素不知書,翔所作皆俚俗

粱

臣傳第九

敏翻

所記 者,應變出奇以取勝,養秋古法,不可用於今。」太祖大喜,補以軍職,非其所好, 語,太祖愛之,謂發曰:「聞君有故人,可與俱來。」翔見太祖,太祖問曰:「聞子讀 |何等事?」|翔日:「諸侯爭戰之事 `耳。」太祖曰:「其用兵之法可以爲吾用乎? 乃以爲館驛 翔日 春秋 兵

之。太祖奉昭宗自岐還長安,昭宗召翔與李振升延喜樓勞之,拜太府卿。 太祖 與蔡人戰汴郊,翔時時爲太祖謀畫, 多中,太祖 欣然, 以謂得翔之晚, 動靜 輒以問

翔出,亦佯醉去。 |太祖入內殿,將有所託。|太祖益懼,辭以疾。|昭宗曰:「卿不欲來,可使|敬翔來。」|太祖遽麾 而左右無敢動者,太祖流汗狹背,由此稀復進見。昭宗遷洛陽,宴崇勳殿,酒半起,使人召 初,太祖常侍殿上,昭宗意衞兵有能擒之者,乃佯爲鞋結解,以顧太祖,太祖跪而結之,

不聽。 躁,殺唐大臣幾盡,然益以翔爲可信任。 太祖已破趙匡凝,取荆、襄,遂攻淮南。 兵出光州,遭大雨,幾不得進,進攻壽州,不克,而多所亡失,太祖始大悔恨。 翔切諫,以謂新勝之兵,宜持重以養威。 歸而忿 太祖

梁之篡弑,翔之謀爲多。 太祖卽位,以唐樞密院故用宦者,乃改爲崇政院,以翔爲使。

寐, ,自言惟馬上乃得休息。 翔爲人深沉有大略,從太祖用兵三十餘年,細大之務必關之。 而太祖剛暴難近,有所不可,翔亦未嘗顯言,微開其端, 翔亦盡心勤勞,晝夜不 太祖意

悟,多爲之改易。

相; 車服驕侈,別置典謁,交結藩鎭,權貴往往附之,寵信言事不下於翔。當時貴家, 侍太祖,出入臥內如平時,翔頗患之。劉氏誚翔曰:「爾以我嘗失身於賊乎?尚讓,黃家宰 時溥,國之忠臣。 太祖破徐州,得時溥寵姬劉氏,愛幸之,劉氏故尚讓妻也,乃以妻翔。 以卿門地,猶爲辱我,請從此訣矣!」翔以太祖故,謝而止之。劉氏 翔已貴,劉氏猾 往往効

翔 中書侍郎、同中書門下平章事。翔以友珪畏己,多稱疾,未嘗省事。 太祖崩,友珪立,以翔先帝謀臣,懼其圖己,不欲翔居內職,乃以李振代翔爲崇政使,拜

楊劉 益削 劉 餘 邮鋒平? 了<u>,李</u>亞子負薪渡水,爲士卒先。陛下委蛇守文,以儒雅自喜,而遣賀瓌爲將,豈足當彼之 末帝卽位,趙嚴等用事,頗離問舊臣,翔愈鬱鬱不得志。其後,梁盡失河北,與晉相拒 陛下處深宮之中,所與計事者,非其近習,則皆親戚之私,而望成事乎?臣聞晉攻楊 翔日:「故時河朔半在,以先帝之武,御魏虎之臣,猶不得志於晉。今晉日益 臣雖憊矣,受國恩深,若其乏材,願得自效。」嚴等以翔爲怨言,遂不用。 疆, 梁日

梁臣

傳第九

用段凝,臣已爭之,今凝不來,敵勢已迫,欲爲陛下謀,則小人間之,必不見聽。 從先帝三十餘年,今雖爲相,實法氏老奴爾,事陛下如郎君,以臣之心,敢有所隱?陛下初 望不來。 請先死,不

君。」 **|振謬爲丈夫矣!復何面目入梁建國門乎?** 翔 與李振俱爲太祖所信任,莊宗入汴,詔赦梁羣臣,李振喜謂翔曰:「有詔洗滌,將朝新 一」乃自經而卒。

忍見宗廟之亡!」君臣相向慟哭。

朱珍 李唐賓附

將五 宣武 一十餘人,皆 朱珍,徐州豐人也。 珍爲太祖創 可用。 立 |軍制,選將練兵甚有法。 梁敗黃巢、破秦宗權、東井克鄆,未嘗不 少與龐師古等俱從梁太祖爲盜。珍爲將, 太祖得諸將所募兵及佗降兵、皆以屬珍、珍選 -在戰 中,而常勇出 善治軍選上, 諸 太祖 將 初鎭

太祖與晉王東逐黃巢,還過汴,館之上源驛,太祖使珍夜以兵攻之,晉王亡去,珍悉殺

其麾下兵。

義成軍亂,逐安師儒,師儒奔梁。 太祖遺珍以兵趨滑州,道遇大雪,珍趣兵疾馳,一夕

辛 |城下,遂乘其城。|義成軍以爲方雪,不意|梁兵來,不爲備,遂下之。

邪 ? 吾麥,柰何!今珍至,吾事濟矣!且賊方息兵養勇,度吾兵少,而未知珍來, 而已,宜出其不意以擊之。」乃出兵擊敗鬥等,宗權由此敗亡,而梁軍威大振,以得珍兵故 兵於淄青。 」立斬仁遇以徇軍,軍中皆感悅。 秦宗權遣盧瑭、張咥等攻梁,是時梁兵尙少,數爲宗權所困。太祖乃拜珍淄州刺史,募 |珍偏將張仁遇白||珍日:「軍中有犯令者,請先斬而後白。」||珍日:「偏將欲專殺 珍得所募兵萬餘以歸,太祖 |大喜日:「賊在吾郊,若踐 謂吾不過堅守

約 發, 軍人從城上磔石以投之, 珍軍皆死甕城中, 珍僅以身免, 太祖不之責 還 活,留珍攻鄆州。 開門爲內應。 珍從太祖攻朱宣,取<u>曹州</u>,執其刺史丘弘禮。 **珍信之,夜率其兵叩鄆城門,朱裕登陴,開門內珍軍,珍軍已入甕城而垂門** 1珍去

第二十里,
造精兵

挑之,

即人不出。 又取濮州, 朱裕詐爲降書,陰使人召珍, 刺史朱裕奔于鄆州。 也。 太祖乃

也。

州 殺魏豹子軍二千於臨黃。 魏博軍亂,囚樂彦貞。 太祖遣珍救魏, 珍威振河朔。 魏人殺彥貞,珍乃還。 珍破黎陽、臨河、李固 梁攻徐州,遣珍先攻下豐 分遣母金、范居實等略澶

梁臣傳

第

九

朱珍

艈

師古

縣,又敗時溥於吳康,與李唐賓等屯蕭縣。

赋, 私 掠 迎其家置軍中,太祖疑珍有異志,遣唐賓伺察之。 四方,唐賓常與珍俱,與珍威名略等,而驍勇過之,珍戰每小却, ,珍單騎追之,交訴太祖前。 濱者,陝人也。 初爲尚讓偏將,與太祖戰尉氏門,爲太祖所敗,唐賓乃降梁。 太祖 兩惜其材,爲和解之。 珍與唐賓不協,唐賓不能忍,夜走還宣 唐賓佐之乃大勝。 梁兵攻 珍嘗

至梁 明 餘人叩頭救珍,太祖大怒,舉胡牀擲之曰:「方珍殺唐賓時, 事 日 而 唐賓, 圖之。 ,敬翔恐太祖暴怒不可測,乃匿使者,至夜而見之,謂雖有所發,必須明旦,冀得少緩其 |珍屯||蕭縣,聞太祖將至,戒軍中治館廐以待。 佯收唐賓妻子下獄。 唐賓以讓珍,珍怒,拔劍而起,唐賓拂衣就珍,珍卽斬之,遣使者告唐賓反。 既夕,乃引珍使者入見,太祖 因 如珍軍,去蕭 大驚,然已夜矣,不能 一舍,珍迎謁,太祖命武 唐賓部將嚴郊治廐失期,軍吏督之,郊訴 獨不救之邪 有所發,翔因 士執之。 」存等退, 從容爲太祖畫。 諸將霍存等十 |珍 | 経 | 松 使者

龐師古

死。

龎 師古, 曹州南華人也, 初名從。 梁太祖鎭宣武, 初得馬五百匹爲騎兵,乃以師古將

之,從破黃巢、秦宗權,皆有功。

都,見殺。 薄,太祖表師古徐州留後。 溥於石佛山, 瑾收餘兵去。 時,朱珍、李唐賓已死,師古與霍存分將其兵。 敗之,斬首二千級。孫儒逐楊行密,取揚州,淮南大亂,太祖遣師古渡淮攻儒,爲儒所敗。是 太祖攻時溥未下,留兵屬師古守之,師古取其宿遷,進屯呂梁。 梁兵攻剛州,臨濟水,師古徹木爲橋,夜以中軍先濟。朱宣走中 太祖以友裕可追而不追,奪其兵以屬師古。 郴王友裕攻徐州,朱瑾以兵救時溥, 溥以兵二萬出戰,師古 師古攻破徐州, 友裕敗 斬

動。 曰:「准人決河,上流水至矣!」師古以爲搖動士卒,立斬之。已而水至,兵不能戰,遂見殺。 自其微時事太祖,爲人謹甚,未嘗離左右,及爲將出兵,必受方略以行,軍中非太祖命,不妄 師古營清口,地勢卑,或請就高爲栅,師古以非太祖命不聽。惟人決水浸之,請者告 太祖已下茂、鄆,乃遣師古與葛從周攻楊行密于淮南,師古出淸口,從周出安豐。 師古

敗以死。 嗚呼,兵之勝敗,豈易言哉!梁兵彊於天下,而吳人號爲輕弱,然師古再舉擊吳, 其後,太祖自將出光山,攻壽春,然亦敗也。蓋自高駢死,唐以梁兼統淮南,遂與 輒再

粱

臣傳

第九

腳師古

葛從周

以寡而 孫、楊爭、凡三十 敗衆、 以弱 -年間,三舉而三敗。 而勝彊者, 顧吳豈足以知之哉 以至疆遭至弱而如此,此其不可以理得 豈非適與其機會邪?故曰:「兵者凶器, 也 兵法固有

葛從周

戰者危事也。」可不愼哉

太祖 復騎, 葛 從周字通美,濮州甄城人也。 與敵步鬭傷面,身被數瘡,偏將張延壽從旁擊之,從周得與太祖俱去。 少從黃巢,敗降梁。從太祖攻蔡州,太祖墜馬,從周扶 太祖 虚 臘

諸將,獨用從周、延壽爲大將。

臨河 乞兵 太祖 觚 戦 (於梁, 遣從周 秦宗權掠地領、亳,及梁兵戰于焦夷,從周獲其將王涓一人。從朱珍收兵淄青,遇東兵 珍得兵歸, 會太祖 ,太祖遣從周、丁會等救之, 入路州 於內黃,敗魏兵於永定橋。 從周功爲多。 晉兵攻之,從周不 張全義襲李罕之於河陽, 能守, 敗晉兵於沈河。 從丁 會攻宿州, 走河陽。 以水 太祖 路州 罕之奔晉, 攻魏, 浸其城,遂 馮霸殺晉守將李克恭以降梁, 召晉兵以攻全義, 從周 一破之。 與丁會先下黎陽、 太祖攻朱瑾 全義

于兗州

朱下,留從周圍之, 蓮閉壁不出, 從周詐言救兵至, 陽避之高吳, 夜半潛還城下,

以 謂從周已去,乃出兵收外壕,從周掩擊之,殺千餘人。

兵出山東攻相、衞,太祖遣從周略地山東,下洺州,斬其刺史邢善益,又下邢州, 于清口。 於中都,又攻兗州,走朱瑾。太祖表從周兗州留後,以兗、鄆兵攻淮南,出安豐,會龐師古 晉王怒,自將擊從周,從周雖大敗,而梁兵擒其子落落,送于魏,斬之。遂徙攻鄆州,擒朱宣 馬 從 周至軍,益閉壘不出,而鑿三闇門以待,晉兵攻之,從周以精兵自闇門出擊,敗晉王兵。 晉攻魏,魏人求救,太祖遣侯言救魏,言築壘于洹水。 從周行至濠州,聞師古死,遽還,至渒河將渡而淮兵追之,從周亦大敗。 又下磁州,殺其刺史袁奉滔。 五日而下三州。太祖乃表從周兼邢州留後。 太祖怒言不出戰,遺從周代言。 是時,晉 走其刺史

至于臨淸,擁之御河,溺死者甚衆。 從周以五百騎出戰,曰:「大敵在前,何可返顧!」使閉門而後戰。破其八棚,燕兵走,追 劉仁恭攻魏,已屠貝州, 羅紹威求救于梁,從周會太祖救魏, 太祖以從周爲宜義行軍司馬。 入于魏州。 燕兵攻館陶

之機在吾心,暉豈足以知之! 後取之。」諸將頗以爲然。 |暉語諸將曰:「吾王以我監諸將,今||燕兵來,不可迎戰,宜縱其入城,聚食倉廩,使兩困而 太祖遣從周攻劉守文于滄州, 從周怒曰:「兵在上將,豈監軍所得言!且暉之言乃常談爾,勝敗 一」乃勒兵逆仁恭于乾寧,戰于老鵶堤, 以蔣暉監其軍。 守文求救于其父仁恭,仁恭以燕兵救 仁恭大敗, **斬首三萬餘**

梁臣

級,獲其將馬愼交等百餘人,馬三千匹。 **遽**還,敗晉兵于青山。 遂從太祖攻鎭州,下臨城,王鎔乞盟,太祖表從周泰寧軍節度使。 是時,守文亦求救於晉,晉爲攻邢、洛以牽之,從周

圧,食其俸于家。 爲鄭所得, 金吾衞 從氏叔琮攻晉太原,不克。 上將軍,以疾致仕,拜右衞上將軍,居于偃師。 ,厚遇之而不殺。 卒,贈太尉。 太祖還自鳳翔,乃遺從周攻鄰,從周卒招降鄰。 梁兵西攻鳳翔, 青州王師範遣其將劉鄩襲兗州, 末帝即位,拜昭義軍節度使、陳留 太祖 即位,拜左 從周家屬 郡

霍存

|

|<br 霍存, 洺州 曲周 人也。 少從黄巢, 巣敗, 存乃降梁。 存爲將驍勇, 善騎射。 秦宗權攻

魏,取淇門,殺三千人。 **濱以攻溥,破碭山,存獲其將石君和等五十人。** 下,遂下之。 從朱珍掠淄青、龐師古攻時溥,皆有功。 從攻路州 梁得曹州,太祖以存為刺史,兼諸軍都指揮使。 與晉人遇,戰馬牢川,存入則當其前,出則爲其殿,晉人却, 朱珍與李唐賓俱死,乃以龐師古代珍、存代 梁攻宿州,葛從周 引水浸之,丁會與存 **遂東攻** 戦 唐 城

豈勞吾親閱邪!諸君寧復思之乎?」佗日語又如此。 之,遂敗瑾等於石佛山,存中流矢卒。太祖已卽位,閱騎兵於繁臺,顧諸將曰:「使霍存在, 祖曰:「強來必與時溥俱,不若遣存邀之。」存伏兵蕭縣,已而瑾果與溥俱出迷離,存發伏擊 梁攻啊州,朱瑾來救,梁諸將或勸太祖縱僅入鄆,耗其食,堅圍勿戰,以此可俱弊。

張存敬

李罕之與晉人攻張全義於河陽,太祖遣存敬與丁會等救之,罕之解圍去。太祖以存敬 張存敬, 譙郡人也。爲人剛直有膽勇, 少事梁太祖爲將, 善因危窘出奇計。

鴟堤。 取其瀛、莫、祁、景四州。梁攻定州,與王處直戰懷德驛,大敗之,枕尸十餘里。梁已下鎭、 爲諸軍都虞候。太祖攻徐、兗,以存敬爲行營都指揮使。從甚從周攻滄州,敗劉仁恭於老 還攻王鎔於鎭州,入其城中,取其馬牛萬計。遷宋州刺史。復從諸將攻幽州,存敬

後,復徙宋州刺史,未至,卒于河中,贈太傅。

,乃遣存敬攻王珂于河中,存敬出含山,下晉、絳二州,珂降于梁。

太祖表存敬護國軍留

存敬子仁潁、仁愿。 深 E 傳 第 九 張 存 仁愿有孝行,存敬卒,事其兄仁潁,出必告,反必面,如事父之禮。 敬 符 道 梕

仁愿曉法令,事梁、唐、晉,常爲大理卿,卒,贈秘書監

符道昭

使,以亂不果行。 愛之,養以爲子,名繼遠。 符道昭,蔡州人也。 太祖爲元帥,初開府,而李周彝以鄜州降,以爲左司馬,擇右司馬難其人, 爲秦宗權騎將,宗權敗,道昭流落無所依,後依鳳翔李茂貞, 梁攻茂貞,道昭與梁兵戰,屢敗,乃歸梁, 太祖表道昭秦州節度

勳助紹威誅牙兵。 羅紹 一威將誅其牙兵,惡魏兵疆,未敢發,求梁爲助。 牙兵已誅, 魏兵在外者聞之皆亂, 魏將左行遷據歷亭、史仁遇據高唐以 太祖乃悉發魏兵使攻燕,而遣馬嗣

及得道昭,乃授之。

叛,道昭等從太祖悉破之。

|英等攻路州,築夾城爲蚰蜒塹以圍之,逾年不能下,晉兵攻破夾城,道昭戰死。 道昭爲將,勇於犯敵而少成筭,每戰先發,多敗,而周彝等繼之乃勝。 開平元年與康懷 寇彦卿

劉捍

劉捍,開封人也。 爲人明敏有威儀,善擯贊。 太祖初鎮宣武,以爲客将,使從朱珍募兵

淄青。

臣」。梁兵攻淮南,遣捍先之淮口,築馬頭下浮橋以渡梁兵。 浮橋于淮北,以渡歸師。 李茂貞計事。 太祖意,鎔乃聽命。 太祖北攻鎮州,與王鎔和,遣捍見鎔,鎔軍未知梁意,方嚴兵,捍馳一騎入城中,兪鎔以 唐昭宗召見,問梁軍中事,稱旨, 梁兵攻定州,降王處直,捍復以一騎入慰城中。 拜宋州刺史。 ,賜以錦袍,拜登州刺史,賜號「迎鑾毅勇功 太祖出光山攻壽州, 太祖 圍鳳翔,遣捍 又使捍作 入見

知俊反,以路誘捍將吏,執捍而去,知俊械之,送于李茂貞,見殺。 太祖卽位,遷左天武指揮使、元從親軍都虞候、左龍虎統軍,出爲佑國軍留後。 太祖哀之,贈捍太傅。 同州

寇彦卿

都 指 揰 彦 使, 逈 領 字 洛 州 刺 開封人也,世事宣武軍爲牙將。 史。 羅紹 ·威將誅牙軍,太祖遣<>>>與計 太祖 一初就鎭,以爲 事 一彦卿陰爲紹威計畫 通 引官 累遷右 長直

嘗 彦 一敬 卿 翔、 身長八尺,隆準方面 |劉| ,捍、寇彦卿皆 天 爲我生之。」其愛之如 語音如鍾,工騎射, 好書史,善同太祖意,動作皆如旨。 此。 賜 以所 乘愛馬「一丈鳥」。 太祖 太祖 圍

鳳翔

以

彦

卿

為為都排

陣使,

产卵

乘

鳥

馳突陣

前,

大祖

目之曰:「眞神將

也

誅

牙

軍

宗既 宗行 傍徨 趣 屋 官官 爲 家 栰 出 不 至 初 來,不 恋 華 浮 明年 太祖 州 去 澗 謂 遣 可 與崔胤 而 太祖以兵 下, 其左右爲俚語 人 八告太祖 日留 道路號哭,仰 謀,欲 也。」彦 至 以 河中 遷 何皇 都 卿 云 洛陽, 一、「粒干 復 后 遣 天 馳 八大駡 彦 有 娠, 卿 丽 至 華 奉表 昭宗不 Ш 日 願留 ٠, 頭 卽 凍 國 迫 日迫 華州 許。 賊 死 請 公崔胤、 雀,何 遷 一昭宗 待 其後 都 冬 朱温 上道 不 而 昭宗 彦 纸 卿 使我 去 奔于 因 生 太祖 悉 一處樂。 至 驅徙 鳳翔 此 大 怒, 長 相 安居人 太祖以兵圍之, 昭宗 與泣下 顧 彦 亦 卿 以 顧 沾襟。 膽 東,皆拆 陵 汝往 廟 昭 昭

晨朝 查卿 以錢償現家以贖罪。 至 太 天 加 津 卽 橋 位 民梁現不 拜 彦卿 感 避道 化 御史司憲崔沂劾奏彦卿, 軍 一,前 節 度 届品 使。 捽 現投 歲餘 橋 上石 召爲 欄以死。 左金吾衞 請論如法 彦 大將 卿 太祖 見太祖 軍 , 不得已, 充 金 自 善街 首 **責授彦卿左衞** 太祖 仗 使。 惜 之, 卿 詔

中郎將。復拜相州防禦使,遷河陽節度使。

勝口。彥卿明敏善事人,而怙寵作威,好誅殺,多猜忌。卒于鎭,年五十七。 太祖遇弑,逐卿出太祖畫像事之如生,嘗對客語先朝,必涕泗交下。末帝卽位,徙鎭威

校勘記

(二) 威勝 按本史卷六〇職方考,鄧州、梁置宣化軍,唐改威勝。疑此當作宣化。

新五代史卷二十二

梁臣傳第十

康懷英

康懷英,兗州人也。 事朱瑾爲牙將,梁兵攻瑾,瑾出略食豐、沛間,留懷英守城,懷英卽

以城降梁,僅遂奔于吳。太祖得懷英大喜。

萬餘人,太祖喜曰:「邑名武功,眞武功也。」以名馬賜之。 後從氏叔琮攻趙匡凝,下鄧州。 梁兵攻李茂貞于岐,以懷英爲先鋒,至武功,擊殺岐兵 是時,李周彝以鄜坊兵救岐,屯于

昭宗還京師、賜懷英「迎鑾毅勇功臣」。 英以爲夜中不欲驚它軍,獨以二千人出戰,遲明,岐兵解去, 三原界,懷英擊走之,因取其翟州而還。 岐兵屯奉天, 懷英栅其東北。 身被十餘瘡。 夜半,岐兵攻之,懷 李茂貞與梁和,

楊行密攻宿州 太祖遣懷英擊走之,表宿州刺史。 遷保義軍節度使。

梁

思安 潞 州 代 期 犪 會 必 得 (英將,降懷英爲都虞候。 以 路州 乃築夾城圍之。 叛梁降晉,太祖命懷英爲招討使,將行,太祖戒之,語甚切,懷英惶恐, 晉遣 久之,思安亦無功, 周 信德威 屯于 | 観柳 數攻夾 太祖 大怒, 城、懷英 罷思安,以同 不敢出戰,太祖 州 劉 知 乃 俊 以 以 李

岡 以 周 「去歳 能 招 擎之, 德 討 敵 直 版處還 梁, 使。 興 趨 非徒 兵, 夾 而 知 城, 彼所憚者,先王 太陰虧食, 俊 太祖聞晉 解 未 攻破 圍 至軍,太祖 亦足 之。 有 占者以爲不利, 以定霸也。」乃與德威等疾馳六日至 喪, 懷英大敗, 也。 德威 自至澤州,爲懷英等軍援, 今聞吾王之喪,謂我新 去, 亡大將三百人, 亦歸 吾獨違之而致敗, 洛陽, 而諸 懷英 路那亦少 立, 且督之。 以百騎 未 非爾 一北黄 能 弛。 過也。」 出兵,其意必怠,宜出 已而晉王李克用卒,莊宗 遁 碾, 莊宗謂 歸, 會天 一釋之, 詣 德威曰:「晉之所 闕 大昏霧, 請 以爲右衞上 死 伏兵三 太祖 其 不 將 垂 以 召

感 遣 化。 英 劉 文別 其後朱友謙叛附于晉,以懷英討之,與晉人戰白徑嶺, 知 俊 叛, 寧以牽之。 奔于岐, 懷英取 以懷英爲保義 寧、 慶、 軍節 衍三 度使、 州 還至 西路 昇平 副 招 討 知俊 使。 懷英又大敗。 掩 知俊以 擊之, 岐 懷 兵 英 徙鎭永平, 圍 靈 敗。 武, 徙 鎭

軍。

指 ;揮使|盧洪討|蟾,洪亦叛,師範僞爲好辭召洪,洪至,迎於郊外,命|鄟斬之坐上,因使|鄟攻|張 劉鄩,密州安丘人也。 少事青州王敬武,敬武卒,子師範立,棣州刺史張蟾叛,師範遣

蟾,破之。

師範表擲登州刺史,以爲行軍司馬。

外,鄩乃使人負油鬻城中,悉視城中虛實出入之所。油者得羅城下水竇可入,鄩乃以步兵 素好兵書,有機略。 五百從水竇襲破之,徙從周家屬外第,親拜其母,撫之甚有恩禮。 梁太祖西攻鳳翔,師範乘梁虛,陰遣人分襲梁諸州縣,它遣者謀多漏洩,事不成。 是時,梁已破朱瑾等,悉有克、鄆,以葛從周爲兗州節度使,從周將兵在 鄒

攻。 多以人出, 外援不至,人心頗離, 母呼從周曰:「劉將軍待我甚厚,無異於汝。 |鄰| 太祖已出昭宗于鳳翔,引兵東還,遣朱友寧攻師範、從周攻鄩。 乃悉簡婦人及民之老疾不足當敵者出之, 非吾素遺 !者,皆勿以行。」又下令城中曰:「吾遣從副使者得出,否者皆族。」城中 副使王彦温踰城而 奔, 守陴者多逸。 人臣各爲其主, 汝可察之!」從周爲之緩 獨與少壯者同辛苦, 鄩乃遺人陽語彥温 **鄩以版興置從周母城** , 分 衣 食, 曰:「副使勿 堅守以待。

梁臣

感, 奔者乃止。 已而梁兵聞之,果疑彥温非實降者,斬之城下, 由是城守益堅。

魯 爲元從都押衙。 素服 亦降 , 皆用軍禮,鄭居自如,太祖益奇之。 乘驢歸梁。 師範兵已屈,從周以禍福諭鄭,鄭報曰:「俟吾主降,即以城還梁。」師範敗,降梁, 從周爲具齎裝, 是時,太祖已領四鎮, 太祖賜之冠帶,飮之以酒,鄩辭以量小,太祖曰:「取兗州, 送鄩歸梁, 鄭曰:「降將蒙梁恩不誅, 將吏皆功臣舊人,哪一旦以降將居其上,及諸將見 幸矣!敢乘馬而衣裘乎?」乃 量何大乎?」以 鄩乃

翔 太祖乃以長安爲永平軍,拜鄩節度使。 太祖卽位,累遷左龍武統軍。 劉知俊叛,陷長安,太祖遣鄩與牛存節討之, 末帝即位,領鎭南軍節度使,爲開封尹。 知俊走鳳

降晉。 之往 及 至 樂平 河以饋軍 一來城上,而潛 楊 莊宗入魏, 師厚卒,分相、魏爲兩鎮,末帝恐魏 遇雨,不克進 軍出黃澤關襲太原。 |鄰以謂晉兵悉從莊宗赴魏,而太原可襲,乃結草爲人,執以旗幟, 而旋,急趨臨淸, 爭魏積粟,而周德威已先至, 鄩乃屯于峷縣, 晉兵望|梁壘旗幟往來,不知其去也, 兵亂,遣鄩以兵屯于魏縣。魏兵果亂,劫賀德倫 以故不 以驢負 追。 築甬道 鄩

將軍與國同心,宜思良畫! 久之,末帝以書賣鄩曰:「閫外事全付將軍, 」鄭報日:「晉兵甚銳, 河朔諸州一旦淪沒。 未可擊, 宜待之。」末帝復遣問鄭必勝 今倉儲已竭, 飛 輓

療機 以河水一杯飲之,諸將莫測,或飲或辭,鄭曰:「一杯之難猶若此,滔滔河流可盡乎?」諸將 必敗人事。 之策,鄩曰:「臣無奇術,請人給米十斛,米盡則敵破矣!」末帝大怒,謂鄩曰:「將軍蓄米,將 [乎?將破敵乎?]乃遣使者監督其軍。 今敵盛,未可輕動,諸君以爲如何?」諸將皆欲戰,鄩乃悉召諸將坐之軍門,人 鄭召諸將謀曰:「主上深居禁中, 與白 面 1兒謀,

皆失色。

保滑州。末帝以爲義成軍節度使。明年,河朔皆入于晉,降鄩亳州團練使。 城,莊宗與符存審爲兩方陣夾之,鄰爲圓陣以禦晉人。兵再合,鄰大敗,南奔,自黎陽濟河, 命符存審守魏,陽爲西歸,潛兵貝州。鄭果報末帝曰:「晉王西歸,魏無備,可擊。」乃以兵萬 人攻魏城東,莊宗自艮州返趨擊之。鄭忽見晉軍,驚曰:「晉王在此邪!」兵稍却,追至故元 曰:「劉鄩學六韜,喜以機變用兵,本欲示弱以襲我,今其見迫,必求速戰。」乃聲言歸太原, 是時,莊宗在魏,數以勁兵壓鄟營,鄭不肯出,而末帝又數促鄭,使出戰。莊宗與諸將謀

尹皓、段凝等素惡專,乃譖之,以爲鄭與友謙親家,故其逗留以養賊。 已而鄭兵數敗,乃罷 陷 兗州張萬進反,拜<u>鄭</u>兗州安撫制置使。 萬進敗死,乃拜鄭泰寧軍節度使。 朱友謙叛,

=

子遂凝、遂雍, 事店皆爲刺史。 | 專妾|| 王氏有美色,| 專卒後,入明宗宮中,是爲|| 王淑妃。

明宗晚年,淑妃用事,鄩二子皆被恩寵。

留守。 由是事無 確閉門不內,悉封府庫以待路王。 <u>路王從珂反於鳳翔,時遂雅爲西京副留守,留守王思同率諸鎭兵討鳳翔,戰敗東歸,遂</u> 大小皆與圖議。 廢帝入立,拜遂雍淄州刺史,以鄭兄琪之子遂清代遂雍爲西京副 潞王前軍至者,悉以金帛給之。 路王見遂雍,握手流涕,

郊 爲安州防禦使以卒。 遂清爲母執轡行數十里,州人咸以爲榮。 逐清歷易、棣等五州刺史,皆有善政, 遂清性至孝, 居父喪哀毀, 遷鳳州防禦使、宣徽北院使, 鄉里稱之。 **嘗爲淄州** 刺史, 判三司。 迎其母, 晉開運 母及 中

牛存節

湘 꼐 牛存節字贊正,青州博昌人也。 當得英雄 事之。」乃率其徒十餘人歸梁太祖。 初名禮,事諸葛爽於河陽,爽卒,存節顧其徒曰:「天下 存節爲人木疆忠謹, 太祖愛之,賜之名

字,

以爲

小校。

河陽, 食,存節以金帛就民易乾葚以食軍,擊走罕之。太祖攻魏, 張 座 攻 汴,存 節 破 其 二 寨 。 全義乞兵於梁,太祖以存節故事 梁攻濮州,戰南劉橋、范縣,存節功多。 河陽,知其間道,使以兵爲前鋒。 存節下魏黎陽、臨河, 李罕之圍張全義於 是時歲饑, 兵行乏 殺魏萬二

千人,與太祖會內黃。 遷滑州牢城遏後指揮使。

州團 揮使。 攻而去。 乃夜以兵急趣徐州,比傅徐城下,谨兵方至,望其塵起,驚日:「梁兵已來,何其速也!」不能 史。朱瑾走吳,召吳兵攻徐、宿,存節謀曰:「淮兵必不先攻宿,然宿溝壘素固,可以禦敵。」 進, 遂破朱宣。 起,鄆人登城望火,言伏不敢動,與存節失期,存節獨破鄆西甕城門,奪其濠橋,梁兵得俱 「練使、元帥府左都押衙 梁兵攻鄲,存節使都將王言藏船軍西北隅濠中,期以日午渡兵踰濠急攻之。 太祖攻鳳翔,使召存節。存節爲將,法令嚴整而善得士心,潞人送者皆號泣。累拜邢 已而太祖使者至,授存節軍機,悉與存節意合,由是諸將益服其能。遷路州都指 從葛從周攻淮南,從周敗渒河,存節收其散卒八千以歸。 拜亳、宿二州刺 會營中火

不可失也。」諸將皆不欲救之。 節等以餘兵歸,行至天井關,聞晉兵攻澤州,存節顧諸將曰:「吾行雖不受命, 太祖卽位,拜右千牛衞上將軍。從康懷英攻路州,爲行營排陣使。 存節戒士卒熟息, 已而謂曰:「事急不赴, 豈曰 晉兵已破夾城,存 I勇乎! 然澤州要害 」舉策

梁厄

傳第

+

牛存節

骎

si 约

三三〇

遷左龍虎統軍、六軍都指揮使、絳州刺史,遷鄜州留後。 守,晉人穴地道以攻之,存節選勇士數十,亦穴地以應之,戰于隧中,敵不得入,晉人解去。 m 先,士卒隨之。 比至澤州,州人已焚外城,將降晉,聞存節至,乃稍定。 存節入城,助澤人

久,欲以渴疲之,存節禱而擇地鑿井八十,水皆甘可食,友謙卒不能下。 存節東西受敵。 日 州 劉知俊叛,奔鳳翔,乃遷存節匡國軍節度使。 同州水鹹而無井, 知俊叛梁,以渴不能守而走,故友謙與岐兵合圍持 友珪立, 朱友謙叛附于晉, 西連鳳

「歸京師,將卒,語其子知業日:「忠孝,吾子也。」不及其佗。 晉相距於河上,存節病瘠,而梁、晉方苦戰,存節忠憤彌激,治軍督士,未嘗言病。 宋帝立,加同中書門下平章事,徙鎭天平。 蔣殷反徐州, 贈太師。 遺存節攻破之,以功加太尉。 病革,

張歸霸 弟歸厚 歸弁

張歸霸 清河 人也。 末帝娶其女,是爲德妃。 歸霸少與其弟歸厚、歸弁俱從黃巢,巢敗

東走,歸霸兄弟乃降梁。

秦宗權攻汴,歸霸戰數有功。 張晊軍赤岡,以騎兵挑戰,矢中歸霸, 歸霸拔之,反以射

手五 败, 一發而斃,奪其馬而歸。 一百人伏湟中,太祖以騎數百爲遊兵,過脛栅,脛出兵追太祖,歸霸發伏,殺晊兵千人,奪 太祖從高丘望見,甚壯之,賞以金帛,幷以其馬賜之。 使以弓

馬數十匹。

阴平元年,拜右龍虎統軍、左驍衞上將軍。 仁恭於內黃, 太祖得拔營去。 又破濮州。 太祖攻蔡州,蔡將蕭顥急擊太祖營,歸霸不暇請,與徐懷玉分出東南壁門,合擊敗之, 晉人攻魏,歸霸從萬從周救魏,戰洹水,歸霸擒克用子落落以與魏人。 功出諸將右。 太祖攻兗、鄆,取曹州, 光化二年,權知邢州。遷萊州刺史,拜左衞上將軍、曹州刺史。 使歸霸以兵數千守之,與朱瑾逆戰金鄉, 二年,拜河陽節度使,以疾卒。 大敗之。 又破劉

子漢傑,事木帝爲顯官,以張德妃故用事。梁亡,唐莊宗入汴,遂族誅。

丽 ·却,諸將乘之, **西**遂大敗。 弟歸厚,字德坤。 爲將善用弓槊,能以少擊衆。 太祖大悅,以爲騎長。 張晊屯赤岡,歸厚與晊獨戰陣前,咥憊

梁攻時溥,歸厚以麾下先進九里山,遇徐兵而戰, 梁故將陳璠叛在徐, 歸厚望見識之,

瞋 (目大駡, 馳騎直往取之, 矢中其左目。 梆王

臣傳

第

+

張

歸網

建師師

太祖卒與軍兵遇,太祖

宣武。 必死矣。 數十騎衞太祖先還。 登高望之,鄆兵纔千人,太祖與歸厚以廳子軍直衝之,戰已合,鄆兵大至,歸厚度不能支,以 遷右神武統軍,歷洛、晉、絳三州刺史,與晉人屢戰未嘗屈。 歸厚體被十餘箭,得筠馬乃歸,太祖見之,泣曰:「爾在,喪軍何足計乎!」使异歸 歸厚馬中矢僵,乃持樂步鬭。 太祖還軍中, 遣脹筠馳騎第取之,以爲 乾化元年, 拜鎭國軍節

歸弁,爲將亦善戰,開平初爲滑州長劍指揮使。 子漢融。梁亡,皆族誅。 度使,以疾卒。

子漢卿。

王重師

加 不 察,攻 虎、 脚, 爲 拔 山 軍 指 揮 使 。 王重師,許州長社人也。爲人沈嘿多智,善劍槊。秦宗權陷許州,重師脫身歸梁,從太 重師苦戰齊、魯間,威震鄰敵。遷潁州刺史。

使醫理之,逾月乃愈。 重師遽起,悉取軍中藍毯沃以水,蒙之火上,率精卒以短兵突入,梁兵隨之皆入,遂取濮 重 太祖攻濮州,已破,濮人積草焚之,梁兵不得入。是時,重師方病金瘡,臥帳中,諸將強 師身被八九瘡, 軍士負之而還。 王師範降,表重師青州留後,累遷佑國軍節度使、同中書門下平章 太祖 聞之,驚日:「柰何使我得濮州而失重師乎!」

事。居數年, 甚有威惠。

怒己,捍至,重師不出迎,見之青門,禮又倨,捍因馳白太祖,言重師有二志。 重師溪州刺史,再貶崖州司戶參軍,未行,賜死。 君練兵小敗,太祖以其擅發兵,挫失國威,將召而罪之,遭劉捍代重師。 重師與劉捍故有隙, **捍嘗構之太祖,太祖疑之。** 重師遺其將張君練西攻那、鳳而不先 重師不知太祖 太祖益怒、貶

徐懷玉

徐懷玉,亳州焦夷人也。 少事梁太祖,與太祖俱起微賤。 懷玉爲將,以雄豪自任,而勇

於戰陣。從太祖鎭宣武,爲永城鎮將。

候。 克捷,所得賞賚,往往以分士卒,爲梁名將。本名踪,太祖賜名懷玉。 又破宗權於板橋、赤岡,拔其八栅。從太祖東攻兗、郿,破徐、宿。 秦宗權攻梁,壁金煶、靈昌、酸棗,懷玉以輕騎連擊破之,俘殺五千餘人,遷左長劍都處 懷玉金創被體,戰必

懷玉獨完一軍,行收散卒萬餘人以歸。遷沂州刺史,屬歲屢豐,乃繕兵治壁,爲戰守具。 從太祖攻魏,敗魏兵黎陽,遂東攻克,破朱瑾於金鄉。又從龐師古攻楊行密,師古敗清

粱

已而 三 王師範叛梁,攻東境,懷玉屢以州兵擊破之。 遷齊州防禦使。

攻之,懷玉堅守,敗晉兵于洪洞。拜保大軍節度使。 于澤州、晉人攻之、爲隧以入,懷玉擊之隧中、晉人乃却。太祖時,歷曹、晉二州刺史,晉數 天復四年,以州兵西迎昭宗都洛陽,遷華州觀察留後,以兵屯雍州。 太祖崩,友珪自立,朱友謙附于晉,以 遷右羽林統軍,屯

襲鄜州、執懷玉殺之。

新 五代史卷二十三

梁臣傳第十

楊師厚

厚在籍中。 楊師厚,潁州斤溝人也。 師厚在晉,無所知名,後以罪奔于梁,太祖以爲宣武軍押衙、曹州刺史。梁攻王 少事河陽李罕之,罕之降晉,選其麾下勁卒百人獻于晉王,師

師範,師厚戰臨朐,擒其偏將八十餘人,取棣州,以功拜齊州刺史。

敗之,匡凝棄城走。 太祖攻趙匡凝於襄陽,遣師厚爲先鋒。師厚取穀城西童山木爲浮橋,渡漢水,擊匡凝 師厚進攻荆南,又走匡凝弟匡明,功爲多,拜山南東道節度使、同中書

門下平章事

/华

F

傳第十

楊 ήij Ą

降其守者,遂克之。 劉知俊叛,攻陷長安,劉鄩、牛存節等攻之,久不克。 晉周德威攻晉州以應知俊,師厚敗之于蒙坑,以功遷保義軍節度使,徙 師厚以奇兵出,旁南山入其西門,

鎖宣義

為天 遇弑 夜擊 厚攻 逻。 行迷 雄 梁軍 楽疆 と失道 明年 是 軍 莳 一、梁軍 節 发珪自立, 一,明旦 少間,而晉軍 ,三月⊖ 不能下。 梁兵攻趙久無功,太祖病臥洛陽,少間, 渡使。 大擾,太祖 ,次魏縣,聞敵將至, 師厚乘間殺魏牙將潘晏、 攻燕,燕王 與師厚皆棄輜 太祖怒,自往督兵戰, 劉守光求援 梁兵潰 重 優亂不可 南 臧延範等,逐出節度使羅周翰, 走。 於梁,太祖 乃破,屠之, 太祖 止,久之無敵, 乃自將北擊趙。 還東都, 爲之擊趙以牽晉, 進圍蓨縣。 師厚留屯 乃定。 師厚從太祖 魏州 已 晉史建瑭以 而 屯于龍花, 友珪因以 太祖 至洹 明年, 疾 輕兵 師 夜 乃

〇一作日。

得志, 以 曰:「吾二十年不負、朱家,今若不行, 倨)勁兵二萬朝京 難 自太祖 制。 乃復置銀槍效節 時 與晉 `魏恃牙兵,其 師, 戦 、留其 河北, 軍 八帥得以 、兵城外, 師 友珪 厚常爲招討 陰欲圖之,召師厚入計事 倔 以十餘人自從,入見友珪,友珪益恐懼 。 則 見疑 羅紹威 使,悉領梁之勁兵。 m 生事 時,牙兵盡 ,然吾知上爲 死, 其吏田 太祖崩,師厚遂逐 魏勢孤,始爲梁所制。 雖往, 温等勸師厚勿行 賜 無 與 如 其帥, 延萬 我 何也。」乃 而 師 而 還。 稍 師 厚 厚

已而末帝謀討友珪,問於趙嚴,

巖曰:「此事成敗,

在招討楊公爾。

得其一言踰禁軍

時,吾不能卽討。今君臣之分已定,無故改圖,人謂我何?」其下或曰:「友珪弒父與君,乃 天下之惡,均王仗大義以誅賊,其事易成。彼若一朝破賊,公將何以自處?」師厚大悟,乃造 吾事立辦。」末帝乃遣馬愼交陰見師厚,布腹心。 師厚猶豫未決,謂其下曰:「方邸王弑逆

發卒,末帝爲之受賀於宮中。 其將王舜賢至洛陽,見袁象先計事,使朱漢賓以兵屯滑州爲應。宋帝卒與象先殺友珪。 | 末帝即位, 封師厚鄴王, 詔書不名, 事無巨細皆以諮之, 然心益忌而畏之。 由是始分相、魏爲兩鎭。 魏軍亂,以魏博降晉,梁失河北自此 。已而師厚瘍

王景仁

始。

威儀,臨敵務以身先士卒,行密壯之。 王景仁,廬州合淝人也。 初名茂章,少從楊行密起淮南。景仁爲將驍勇剛悍, 質略無

已破一栅,連戰不已。 師範以兵背城爲兩栅,友寧夜擊其一栅,栅中告急,趣景仁出戰,景仁按兵不動。 友寧 梁太祖遣子友寧攻王師範于青州(三),師範乞兵於行密,行密遣景仁以步騎七千救師 遲明,景仁度|友寧兵已困,乃出戰,大敗之,遂斬友寧, 以其首報

梁瓦傳第十

王景

1

行密

又敗。 於此也。」虔裕三請,景仁乃行,而虔裕卒戰死,梁兵以故不能及,而景仁全軍以歸。 留軍不行,解鞍而寢,虔裕疾呼曰:「追兵至矣,宜速走,虔裕以死遏之!」景仁曰:「吾亦戰 問:「飲酒者爲誰?」曰:「王茂章也。」太祖歎曰:「使吾得此人爲將,天下不足平也!」梁兵 毀棚而出,驅馳疾戰,戰酣退坐,召諸將飲酒,已而復戰。太祖登高望見之,得靑州降人, 是時,梁太祖方攻鄆州,聞子友寧死,以兵二十萬倍道而至,景仁閉壘示怯,何梁兵怠, 景仁軍還,梁兵急追之,景仁度不可走,遣裨將李虔裕以衆一旅設覆於山下以待之,

之,未有以用,使多宰相班,奉朝請而已。 祖素識景仁,乃造人召之,景仁間道歸梁,仍以爲寧國軍節度使,加同中書門下平章事。 求宣州故物,景仁惜不與,渥怒,以兵攻之。景仁奔于錢鏐,鏐表景仁領宣州節度使。梁太 景仁事行密,爲潤州團練使。 行密死,子屋自宣州入立,以景仁代守宣州。屋已立,反

仁於魏以待。景仁已過邢、洺,使者及之,景仁不奉詔,進營於柏鄉。乾化元年正月庚寅, 日有食之,崇政使敬翔白太祖曰:「兵可憂矣!」太祖爲之旰食。是日,景仁及晉人戰,大敗 陰虧,不利行師。」太祖亟召景仁等還,已而復遣之。景仁已去,太祖思術者言,馳使者止景 開平四年,以景仁爲北面招討使,將韓勍、李思安等兵伐趙,行至魏州,司天監言:「太

於柏鄉 ,景仁歸訴於太祖 ·太祖曰:「吾亦知之,蓋韓勍、李思安輕汝爲客,不從節度爾。」乃

罷景仁就第,後數月,悉復其官爵。

去。 戰于霍山 末帝立, ·以景仁爲淮南招討使,攻廬、壽,軍過獨山,山有楊行密祠,景仁再拜號泣而 景仁歸京師,病疽卒, 贈太尉。

貨環

自効。 賓以逆瓌,而夜黑,兵失道,旦至與野東,遇瓌兵,擊之,瓌等大敗。 路窮,登塚上大呼曰:「我賀瓌也,可勿殺我! | 褒等兵趨||待賓館矣!以六壬占之,得「斬關」♡,以爲吉,乃選精兵夜疾馳百里, 及懷寶等至克城下以招瑾,瑾不納,因斬懷寶等十餘人,而獨留壞。 懷寶、柳存等以兵萬 三千餘人。 賀瓌字光遠,濮州人也。 從太祖平青州,以爲曹州刺史。 是日,大風揚沙蔽天,太祖曰:「天怒我殺人少邪? 人救兗州,瓌趨待賓館,欲絕梁餉道。 事鄭州朱宣爲都指揮使。 太祖卽位,累遷相州刺史。 」太祖馳騎取之,并取懷寶等數十人,降其卒 梁太祖攻朱瑾于兗州,宣遣瓌與何 梁太祖略地至中都,得降卒, . 」卽盡殺降卒三千人,而縶懷 末帝時,遷左龍虎統軍 瓌走,梁兵急追之, 瓌顧 | 塚感太祖 不殺,誓以身 期先至待

梁臣

傳

第十

賀

璁

王檀

宣義軍節度使。

日卦名。

疾卒,年六十二,贈侍中。 之,晉軍亂,斬其將周德威,盡取其輜重。 擊晉軍,壞大敗,晉遂取濮州, 中歸其老疾於鄴,以輕兵襲濮州。 而栅,相持百餘日。壞與彥章有隙,伏甲殺之,莊宗喜曰:「將帥不和,梁亡無日矣!」乃令軍 諸州皆入于晉。晉軍取楊劉,末帝乃以瓌爲招討使,與謝彦章等屯于行臺。 貞明元年,魏兵亂,賀德倫降晉,晉王入魏州。 有子光圖〇 城德勝,夾河爲栅。 | 褒自行臺躡之, 戰于胡柳陂, 晉人輜重在陣西, 壞軍將薄 軍已勝,陣無石 | 壞以舟兵攻南栅,不能得, 劉鄩敗于故元城,走黎陽,貝、衞、洛、 山,日暮,晉兵仰攻之,瓌軍下山 晉軍迫壞十里 還軍行臺, 以

⊖ 凡言有子某者,皆仕皇朝有聞。

王檀

王檀字衆美,京兆人也。 少事梁太祖爲小校,尚讓攻梁,戰尉氏門,檀勇出諸將,

奇之,遷踏白副指揮使。

攻王師範,檀以一軍破其密州,拜密州刺史。 幷獲其將一人。 從 (朱珍募兵東方,戰數有功。 從太祖破魏內黃,遷衝 梁與察兵戰板橋,李重裔馬路,爲察兵所擒, 山都虞候。 太祖卽位,遷保義軍節度使,潞州東北面招討 復從朱珍攻徐州, 檀獲其將一人。 檀馳取之, 梁兵

王景仁敗於柏鄉,晉兵圍邢州, 太祖大懼,欲自將救之,檀止太祖,請自拒敵, 力戰,·

全那州

了以功加同中書門下平章事

,進封瑯琊

郡王。

使。

年五十八,贈太師,諡曰忠毅。 以奇兵西出陰地襲太原,不克而還。 友珪立,徙鎮宣化。 貞明元年又徙匡國。 徙鎭天平,檀嘗招納亡盜居帳下 是時,莊宗取魏博,檀以謂晉兵悉在河北, 帳下兵亂, 入殺檀

馬嗣勳

乃留 爋 持 事梁,太祖 牌 馬嗣 印降梁。 勳,濠州鍾離 以爲宣武軍元從押衙。 楊行密攻遂,遂又使嗣勳乞兵於太祖。 人也,少事州爲客將,爲人材武有辯。 梁兵未至,濠州已沒,嗣勳無所歸, 梁太祖攻濠州 刺史張遂遣嗣

粱

E

傳第

-|-

馬

嗣動

王

虔

裕

軍,牙軍不知兵所從來,莫能爲備,殺其八千餘人,遲明皆盡。 助 軍,乞兵於梁,梁女嫁魏,適死,太祖乃遣嗣勳以長直千人爲綵興 葬。 太祖 嗣勳館銅臺,夜與魏新鄉鎭兵攻石柱門,入迎紹威家屬,衞之。 西攻 鳳翔 ,行至華州,遣嗣勳入說韓建,建即時出降。 嗣勳中重瘡卒。 、入魏,致兵器於興中,聲言 天祐 二年,羅紹威將誅牙 乃益取魏甲兵攻牙 太祖即位

王虔裕

贈太保。

中和 梁兵躡之,戰于萬勝戍,賊敗而東,虔裕功爲多,乃表虔裕義州刺史。 太祖數爲所窘,而梁未有佗將,乃以虔裕將騎兵,常爲先鋒擊巢陳、蔡間,拔其數栅,巢走, 後爽爲汝州防禦使,率兵北擊沙陀,還入長安攻黃巢,爽兵敗降巢,巢以爽爲河陽節度使。 三年,孫儒陷河陽,虔裕隨爽奔于梁〔三〕。是時,太祖新就鎭,黃巢、秦宗權等兵方盛, 王虔裕, 瑯琊臨沂人也。 爲人健勇善騎射,以弋獵爲生。少從諸葛爽起青、 |棣間, 其

境(图),太祖遣虔裕拒賢於尉氏,戰敗,失一裨將,太祖怒,拘虔裕於軍中。

黃巢已去,秦宗權攻許、鄭,與梁爲敵境,大小百餘戰,虔裕常有功。

秦宗賢攻汴南

梁旗 那 州孟遷降梁,爲晉人所圍,太祖遣虔裕以精兵百人疾馳,夜破晉圍,入邢州, 已而晉兵復來,遷執虔裕降于晉,見殺。 遲明,立

謝彥章

時,賀瓌善用步卒,而彥章與孟審澄、侯温裕皆善將騎兵,審澄、温裕所將不過三千,彥章多 大盤中, 爲行 謝彥章,許州人也。幼事葛從周,從周憐其敏惠,養以爲子,授之兵法,從周以千錢置 !陣偏伍之狀,示以出入進退之節,彥章盡得之。 及壯,事梁太祖爲騎將。

而

益辨。

陣使 也。 左右 | 瓌心忌之。 **彦章請持重以老敵, 珪乃誣彦章以爲將反。** 「馳驟、疾若風雨。 已而晉兵棚之,壞疑彥章陰以告晉,益惡之。 ,屯于行臺。 **彥章事末帝,累遷匡國軍節度使。 彦章與壞行視郊外,壞指 彥章爲將,好禮儒士,雖居軍中,嘗儒服,或臨敵御衆,肅然有將帥之威,** 晉人望其行陣齊整,相謂曰:「謝彥章必在此也! 一地語彦章日:「此地岡 貞明四年,晉攻河北,賀瓌爲北面招討使,彦章爲排 彦章故與馬步都虞候朱珪 使珪伏甲殺之, . 阜隆起,其中坦然, 」其名 有隙, 瓌欲速 審澄 重 敵中如此。 營棚之地 温裕皆

②

臣傳

第十

謝彦章

校勘

ĒĽ.

校勘記

- (二) 明年太祖遇弒 按本史卷二梁太祖紀、薛史卷七梁太祖紀、卷八梁末帝紀及通鑑卷二六八,屠
- 棗曬在乾化二年三月,同年六月郢王友珪弒梁太祖。此言「明年」誤。
- (三) 梁太祖遣子友寧攻王師範於靑州 五代史纂誤(下簡稱纂誤)卷上云:「今按家人傳,友寧乃梁祖

兄存之子,其後中書上議,亦皆謂之『皇姪』,今此乃以『子』名之,誤也。」按冊府卷二九九亦

稱友

- **寧爲太祖姪,纂誤判斷可信。**
- 2 中和三年孫儒陷河陽虔裕隨爽奔於梁 本史卷四二李罕之傳云:「諸葛爽死, 其將劉經立爽子
- 孫儒陷河陽,仲方奔梁。 仲方……已而孫儒陷河陽,仲方奔於梁。」通鑑卷二五六記諸葛爽卒於光啓二年十月,十二月 薛史卷一五李罕之傳略同。 此處紀年不合,「爽」顯爲「仲方」之訛。
- 秦宗賢 貴池本及薛史卷二一王虔裕傳同。他本及本史卷一梁太祖紀、 通鑑卷二五六作

賢。

新五代史卷二十四

唐臣傳第十二

郭崇韜

莊宗爲晉王,孟知祥爲中門使,崇韜爲副使。 郭崇韜,代州鴈門人也,爲河東教練使。 爲人明敏,能應對,以材幹見稱。 中門之職,參管機要,先時,吳珙、張虔

厚等皆以中門使相繼獲罪。知祥懼,求外任,莊宗曰:「公欲避事,當舉可代公者。」知祥乃薦

崇韜爲中門使,甚見親信。

欲 解圍去,莊宗未決,崇韜曰:「契丹之來,非救文禮,爲王都以利誘之耳,且晉新破梁軍,宜 晉兵圍張文禮于鎭州,久不下,而定州王都引契丹入寇(1)。 契丹至新樂, 晉人皆恐,

乘已振之勢,不可遽自退怯。」莊宗然之,果敗契丹。 梁王彥章擊破德勝,唐軍東保楊劉,彥章圍之。 莊宗登壘,望見彥章爲重塹以絕唐軍、 莊宗即位,拜崇韜兵部尚書、樞密使。

應

臣傳第十二

郭崇留

以 州 趨 夜 歸。 荒 口 督 楊 為 以 輕 也 莊宗 2 圖 也 臣 六日 乃造 笑曰:「我知其心矣,其欲持久以弊我也。」即引 願 間 然 |崇韜:「計安出?」是時, 得兵數千,據河下流 迎 壘 一崇韜與毛璋將數千人夜行 板 成。 擊,遂敗之。 、築之功難卒就, 彦章果引 兵 陛下日 (急攻之,時方大暑,)彦章兵熱死,及攻壘不克,所失太半, 「樂壘於必爭之地,以應 唐已得鄆州矣, 7,所過 以精兵挑戰,使彥章兵不得東, 驅掠居人, 崇韜因日:「彦章 短兵出戰,為彥章伏兵 卸州 毁屋伐木,渡河築壘 爲名,彥章必來爭 圍我於此 十月 壘 於博州 (所射, ,其志在 ,既分其兵 成矣。」莊宗 大 東, 取 敗 鄆 m

莊 功 仗 梁 間 悠悠 臨 m 놅 約 諸 河 गर्प 涿 思 鼅 將 康 方商 將 休 兵 又 唐 征 諸 息。 孝 聞 自 賈, 疲 毋 將 延 失 自 戦 皆 相 孝言 / 徳勝 今得 征輸 梁 争、 目 攻 奔 生民 . |唐 必 深方召諸鎭 唐 庶幾以爲後 梁兵 鄆州 (集,薪芻糧 ,先見崇韜 得鄆州 苦 日 1轉餉 不 掠 能 澶、 者 兵 圖 隔 餉 守 崇韜 。」莊宗 欲 河 相, 而 + 難守 大舉 其積如 棄 餘 取 延之臥內, 乏, 年矣。 黎陽、 不悅 ,不 唐諸 山 雖 ·岩 欲 況 棄 將 衞 退 自 指 今大 臥 |
軍 皆 州 盡得梁虛實。 5 失南城 河 與梁 帳 憂 爲 號 中 惑 而 界 李 已 而 繼 召 以 建 保 誰 1崇韜 西 調 韜 楊劉 爲 取 自 以澤路 成 是時, 陛 衞 問計 河 败 下守之? 以 州 未 道路轉徙, 莊宗 北 叛 黎陽 [ii] 崇韜 入 知 人 軍朝城 于 公皆引 H 莊宗 以 |梁, 唐 耗 河 契丹數 首 陛 未 想之, 爲 亡太半 段 失德勝 以 下 界, 望 凝 興 兵 成 與 犯 軍

節度使,依前樞密使。 屬於魏,夜渡楊劉,從鄆州入襲汴,用八日而滅梁。莊宗推功,賜崇韜鐵券,拜侍中、成德軍 一梁之虚實,此眞天亡之時也。願陛下分兵守魏,固楊劉,而自陬長驅擣其巢穴,不出半月, 而魏、博五州,秋稼不稔,竭民而斂,不支數月,此豈按兵持久之時乎?臣自康延孝來,盡得 勾使,以紹宏領之。凡天下錢穀出入于租庸者,皆經內勾。旣而文簿繁多,州縣爲弊, 崇韜不欲紹宏在己上,乃以張居翰爲樞密使,紹宏爲宣徽使。 以天下爲己任,遇事無所回避。而宦官、伶人用事,特不便也。 未立,而劉氏有寵,宜請立劉氏爲皇后,而多建天下利害以便民者,然後退而乞身。天子以 下。』今公權位已隆,而下多怨嫉,一失其勢,能自安乎?」景韜曰:「奈何?」對曰:「今中宮 罷其事,而紹宏尤側目。 崇韜頗懼,語其故人子弟曰:「吾佐天子取天下,今大功已就,而羣 「古者命將,鑿凶門而出。況成算已決,區區常談,豈足信也!」莊宗卽日下令軍中,歸其家 天下定矣!」莊宗大喜曰:「此大丈夫之事也!」因問司天,司天言:「歲不利用兵。」崇韜曰: 小 ,交興,吾欲避之,歸守鎭陽,庶幾冤禍,可乎?」故人子弟對曰:「俚語曰:『騎虎者,勢不得 莊宗與諸將以兵取天下,而崇韜未嘗居戰陣,徒以謀議居佐命第一之功,位兼將相,遂 初,崇韜與宦者馬紹宏俱爲中門使,而紹宏位在上。 及莊宗卽位,二人當爲樞密使,而 紹宏失職怨望,崇韜因置內

唐臣傳

間,其可動乎?」崇韜以爲然,乃上書請立劉氏爲皇后 公有大功而無過,必不聽公去。是外有避權之名,而內有中宮之助,又爲天下所悅,雖有讒

側。且藏于私家,何異公帑?」明年,天子有事南郊,乃悉獻其所藏,以佐賞給 巨 萬 ',豈少此邪?今藩鎭諸侯,多梁舊將,皆主上斬袪射鈎之人也。 今一切拒之,豈無反 <u>崇韜素廉,自從入洛,始受四方路遺,故人子弟或以爲言,崇韜曰:「吾位兼將相,祿賜</u>

鎭。』今天下一家,俊賢並進,臣憊矣,願乞身如約。」莊宗召崇韜謂曰:「朝城之約,許卿 鎮,不許卿去。欲捨朕,安之乎?」崇韜因建天下利害二十五事,施行之。 陽,優詔不允。崇韜又曰「臣從陛下軍朝城,定計破梁,陛下撫臣背而約曰:『事了,與卿一 莊宗已郊,遂立劉氏爲皇后。崇韜累表自陳,請依唐舊制,還樞密使於內臣,而幷辭鎮

可股居天下之尊,使卿無尺寸之地?」崇韜辭不已,遂罷其命,仍爲侍中、樞密使。 |李嗣源爲成德軍節度使,徙崇韜忠武。|崇韜因自陳權位已極,言甚懇至。| 莊宗曰:「豈

常爲租庸惜財用,陛下雖欲有作,其可得乎? 曰:「吾富有天下,豈不能作一樓?」乃遣宮苑使王允平營之。 宦官進曰:「臣見長安全盛時,大明、興慶宮樓閣百數。今大內不及故時卿相家。」莊宗 同光三年夏,霖雨不止,大水害民田,民多流死。莊宗患宮中暑濕不可居,思得高樓避 一一班宗乃使人問崇韜曰:「昔吾與梁對壘於河 宦官曰:「郭崇韜眉頭不伸,

之難,常如河上,則可使繁暑坐變淸凉。」莊宗默然。終遣允平起樓,崇韜果切諫。宦官曰: 「陛下昔以天下爲心,今以一身爲意,艱難逸豫,爲慮不同,其勢自然也。 上,雖祁寒盛暑,被甲跨馬,不以爲勞。今居深宮,蔭廣廈,不勝其熱,何也?」崇韜對曰: 願陛下無忘創業

使天下之人, 言陛下用法不公, 臣等之過也。」莊宗曰:「貫, 公所愛, 任公裁決!」因起入宮, 崇韜隨之,論不已,莊宗自闔殿門,崇韜不得入。 貫卒見殺。 罪無佗,橋道不修,法不當死。」莊宗怒曰:「太后靈駕將發,天子車輿往來,橋道不修,卿言 無罪,是朋黨也!」崇韜曰:「貫雖有罪,當具獄行法于有司。陛下以萬乘之尊,怒一縣令, 未有以發。皇太后崩,葬坤陵,陵在壽安,莊宗幸陵作所,而道路泥塗,橋壞。莊宗止興問 法者,皆按誅之。全義大怒,嘗使人告劉皇后,從容爲白貫事,而左右日夜共攻其短。莊宗 唐時張全義爲尹,縣令多出其門,全義廝養畜之。及貫爲之,奉全義不屈,縣民恃全義爲不 所求請,書積几案,一不以報,皆以示崇韜。景韜數以爲言,宦官、伶人由此切齒。河南自故 「爾之所部,復問何人!」即下貫獄,獄吏榜掠,體無完膚。明日,傳詔殺之。景韜諫曰:「貫 「誰主者?」宦官曰:「屬河南。」因亟召貫,貫至,對曰:「臣初不奉詔,請詰主者。」 莊宗曰: 「崇韜之第,無異皇居,安知陛下之熱:」由是讒間愈入。 河南縣令羅貫,爲人彊直,頗爲崇韜所知。貫正身奉法,不受權豪請託,宦官、伶人有

唐厄

停第十二

郭믫

韜

帥, 得之矣,無以易卿也。」乃以繼岌爲西南面行營都統〔三〕,崇韜爲招討使,軍政皆決崇韜 唐故事 乃曰:「契丹爲患北邊,非總管不可禦。魏王繼岌,國之儲副,而大功未立; 阴 年 ·征蜀(ll),議擇大將。 ,也。」莊宗曰:「繼岌,小子,豈任大事?必爲我擇其副。」崇韜未及言,莊宗曰:「吾 時明宗爲總管,當行。 而崇韜以讒見危,思立大功爲自安之 且親王為元

許之。 見魏王, 軍至成都, 軍入蜀,所過迎降。 請崇韜留鎭蜀。 宗弼遷衍于西宮,悉取衍嬪妓、珍寶奉崇韜及其子廷誨。 繼岌頗疑崇韜,崇韜無以自明,因以事斬宗弼及其弟宗渥、宗勳, 王衍弟宗弼,陰送款于崇韜,求爲西川兵馬留後,崇韜以節度使 又與蜀人列狀

沒

其家財。

蜀人大恐。

石 遂皆 王。 襲 言蜀天下之富 多等共 官,至 切 莊宗怒,遣宦官馬彥珪至蜀, 崇韜素嫉宦官,嘗謂繼岌曰:「王有破蜀功,師旋,必爲太子,俟主上千秋萬歲後,當盡 一百九十二萬緡,金銀二十二萬兩,珠玉犀象二萬,文錦綾羅五 〈構之。 幽 思 一於扇 有以圖之。 國也,所得 延嗣 馬、 亦不 還,上蜀簿,得兵三十萬, 可騎。」繼岌監軍李從襲等見崇韜專任軍事,心已不平,及 莊宗 止於此邪? 聞破蜀,遣宦官向 視崇韜去就。 上延嗣 因言蜀之寶貨皆入崇韜,且誣其有異志,將 馬九千五百匹,兵器 延嗣勞軍 彦珪以告劉皇后, ,崇韜不郊 七百萬, 劉皇后教彦珪矯韶魏王 迎,延嗣 十萬匹。 糧二 大怒, 莊宗 百五 聞 因 十三萬 此言 危魏 與從

崇韜有子五人,其二從死于蜀, 。餘皆見殺。 其破蜀所得, 皆籍沒。 明宗即位, 韶許

葬,以其太原故宅賜其二孫。

館爲崇文館。以其姓郭,因以爲子儀之後,崇韜遂以爲然。 諸蠻,欲因以綏來之,可謂有志矣 而去,聞者頗以爲笑。然崇韜盡忠國家,有大略。 當崇韜用事,自宰相豆盧革、韋悅等皆傾附之。 其已破躅,因遣使者以唐威德風論南韶 崇韜父諱弘,革等卽因佗事,奏改弘文 其伐蜀也,過子儀墓,下馬號慟

安重海

安重誨,應州人也。 其父福遷,事晉爲將,以曉勇知名。 梁攻朱宣于郸州, 晉兵救宣,

宣敗,福遷戰死。

皆重誨與霍彥威決之。明宗卽位,以爲左領軍衞大將軍、樞密使, 固辭不拜,改兵部尚書,使如故。 重誨少事明宗,爲人明敏謹恪。 明宗鎭安國,以爲中門使,及兵變于魏,所與謀議大 在位六年,累加侍中兼中書令。 兼領山南東道節度

唐臣傳

第十二

安重

E

動 訽 雖其盡忠勞心,時有補益,而恃功矜寵,威福自出,旁無賢人君子之助,其獨見之 自 爲 中門使, `已見親信,而以佐命功臣,處機密之任,事無大小,皆以 | 參決,其勢傾

慮,禍釁所生,至於臣主俱傷,幾滅其族,斯其可哀者也

决杖而已。 駕 應子軍士桑弘遷,毆傷相州錄事參軍;親從兵馬使安虔,走馬衝宰相前導。弘遷罪死,虔 重誨嘗出,過御史臺門,殿直馬延悞衝其前導,重誨怒,即臺門斬延而後奏。 重誨以斬延,乃請降敕處分,明宗不得已從之,由是御史、諫官無敢言者。 是時,

州反,重誨遣人矯詔馳至其家,殺圜而後白,誣圜與守殷通謀,明宗皆不能詰也。 其威福自出,多此類也。 天下議己,因取三司積欠二百餘萬,請放之,冀以悅人而塞責,明宗不得已,爲下詔蠲除之。 宰相任圜判三司,以其職事與重誨爭,不能得,圜怒,辭疾,退居于磁州。朱守殷以汴 而重酶恐

使 答其人而遣之。<u>夏州李仁福進白鷹,重</u>誨却之,明日,白曰:「陛下韶天下毋得獻鷹鶴,而仁 福 重酶 違 [詔獻鷹,臣已却之矣。] 重誨出,明宗陰遣人取之以入。 佗日,按鷹于西郊,戒左右:「無 是時,四方奏事,皆先白重海然後聞。 知也!」宿州進白兔,重誨曰:「兔陰且狡,雖白何爲?」遂却而不白。 河南縣獻嘉禾,一莖五穗,重誨視之曰:「僞也。」

明宗爲人雖寬厚,然其性夷狄,果於殺人。馬牧軍使田令方所牧馬,瘠而多斃,坐劾當

羽? 以聞。 掲 位, 死 辱國,固止之。及政還,返譖於重誨曰:「昭遇見鏐,舞蹈稱臣,而以朝廷事私告鏐。」昭遇坐 遇復使於鏐。而政恃重誨勢,數凌辱昭遇,因醉使酒,以馬箠擊之。繆欲奏其事,昭遇以爲 叛; **鶻**侯三馳傳至其國。侯三至醴泉縣,縣素僻,無驛馬,其令劉知章出獵,不時給馬, 絕錢鏐之臣 此類也。 死,重海諫曰:「使天下聞以馬故,殺一軍使,是謂貴畜而賤人。」令方因得減死。 繆遣使朝京師,寓書重誨,其禮慢。重誨怒,未有以發,乃遣其嬖吏韓政、副供奉官鳥昭 黃龍 四方騷動,師旅並興,如投膏止火,適足速之。此所謂獨見之慮,禍釁所生也。 」報曰:「彥温非叛也,得樞密院宜, 請公趨歸朝廷耳! 路王 史獄,乃下制削奪繆官爵,以太師致仕,於是錢氏遂絕於唐矣… 錢鏐據有兩浙,號兼吳越而王,自梁及莊宗,常異其禮,以羈縻臣屬之而已。明宗即 重酶旣以天下爲已任,遂欲內爲社稷之計,而外制諸侯之礥。然其輕信韓玫之潛,而 明宗大怒,城知章至京師,將殺之,重誨從容爲言,知章乃得不死。其盡忠補益,亦 莊 |從珂爲河中節度使,重誨以謂從珂非李氏子,後必爲國家患,乃欲陰圖之。 l;徒陷<u>彦温於死,而不能去潞王之患;李嚴一出而知祥貳,仁</u>矩未至而**董璋** 其牙內指揮使楊彥温閉城以叛。 從珂遣人謂彦温 !」從珂走虞鄉, 曰:「我遇汝厚, 馳騎上變。 何苦而反 明宗遣回 侯三遽 明宗 從珂

篖

H

傳

绑

+

安重酶

三五三

糞,以相養活,今貴爲天子,獨不能庇之邪!使其杜門私第,亦何與公事!」重誨由是不復 非臣所宜言,惟陛下裁之!」明宗曰:「吾爲小校時,衣食不能自足,此兒爲我擔石灰,拾馬 臣者。」明宗曰:「皆非公等意也!」道等惶恐而退。 中, 第。 史,以 疑 討之,而誠曰:「爲我生致彥温,吾將自訊其事。」彥稠等攻破河中, 口 其 事 拿 重 ,未辨明,公等出此言,是不欲容吾兒人間邪?」趙鳳因言:「春秋貴帥之義,所以勵爲 誘致之。 明日,重誨乃自論列,明宗曰:「公欲如何處置,我卽從公!」重誨曰:「此父子之際, 声 不明, 數諷宰相 率羣臣稱賀,明宗大怒曰:「朕家事不了,卿等不合致賀!」從珂罷鎭,居淸 欲 、究其所以,乃遣殿直都知范氲以金帶襲衣、金鞍勒馬賜彥温 重誨固請用兵,明宗不得已,乃遣侍衞指揮使藥彥稠、西京留守索自通 言從珂失守, 宜得罪, 馮道 因白請行法。明宗怒曰:「吾兒爲姦人所 居數日,道等又以爲請,明宗顧左右而 希重酶旨, 斬彦温 ,拜彦温絳州 化里 率兵 以滅 刺

將更代,多用已所親信,必以精兵從之,漸令分戍諸州,以虞緩急。二人覺之,以爲圖已,益 使以制璋,且削其地,璋以兵攻殺仁矩。二人遂皆反。唐兵戍躅者,積三萬人,其後知祥 不自安。 孟 知祥鎭西川,董璋鎭東川,二人皆有異志,重誨每事裁抑,務欲制其姦心,凡兩川守 旣而遣李嚴爲西川監軍,知祥大怒,斬嚴;又分閬州爲保寧軍,以李仁矩爲節度

殺璋,乘據兩川,而唐之精兵皆陷蜀。

也。」趙鳳以爲大臣不可輕動。遂以范延光爲樞密使,而重誨居職如故。 德使孟漢瓊至中書, 趣馮道等議代重誨者, 馮道曰:「諸公苟惜安公, 使得罷去, 是紓其禍 之曰:「事已辨,愼無措之胸中!」重誨論請不已,明宗怒曰:「放卿去, 殷不惠無人!」顧武 詰彥温, 具伏其詐, 於是君臣相顧泣下。 彥温、行德、儉皆坐族誅。 恐,請究其事。明宗初頗疑之,大臣左右皆爲之辨,旣而少解,始告重誨以彥温之言,因廷 邊彥温云:『重誨私募士卒,繕治甲器,欲自伐吳。又與諜者交私。』」明宗以問重誨,重誨惶 然,乃以玉帶與諜者,使遺知誥爲信,其直千緡。初不以其事聞,其後逾年,知誥之問不至, 始奏貶鏻行軍司馬。已而捧聖都軍使李行德、十將張儉告變,言:「樞密承旨李虔徽語其客 言:「徐知誥欲舉吳國以稱藩, 初,明宗幸汴州, 重誨建議,欲因以伐吳,而明宗難之。其後戶部尚書李鏻得吳諜者 願得安公一言以爲信。」鳞即引諜者見重誨, 重酶因求解職,明宗慰 重誨大喜以爲

夜不絕,斃踣道路者,不可勝數。 也。」乃請行。 苦輸送,往往亡聚山林爲盜賊。明宗謂重誨曰:「事勢如此,吾當自行。」重誨曰:「此臣之責 <u></u> 董璋等反,遣石敬瑭討之,而川路險阻,糧運甚艱,每費一石,而致一斗。 自關以西,民 關西之人聞重酶來,皆已恐動,而重酶日馳數百里,遠近驚駭。督趣糧運,日 重酶過鳳翔,節度使朱弘昭延之寢室,使其妻子奉事左

巨傳

第

+=

安重節

使還, 亦言西人震駭之狀, 因述重**誨**過惡。 下。 · 甚 謹 重酶去,弘昭馳騎上言:「重誨怨望,不可令至行營,恐其生事。」而宣徽使孟漢瓊自行營 重 施 酒酣,爲弘昭 言:「昨被讒構, 幾不自全,賴人主明聖,得保家族。」因感歎泣 重酶行至三泉,被召還。 過鳳翔, 弘昭拒而不

納,

重誨懼,馳趨京師。未至,拜河中節度使。

璋率兵 安得來 之。」又遣宦者使于重誨。 廷遣樂彦 師 率兵如河 發棄市。 行至陝州,下獄。 明宗下韶,以其絕錢鏐,致孟 未 重誨已罷,希旨者爭求其過。 圍 晚 稠 」已而曰:「此非渠意,爲人所使耳。吾以一死報國,餘復何言!」乃械送二子于京 中虞變。 ,何遽如此! 重酶第,入拜于庭。 重誨益懼,因上章告老。以太子太師致仕,而以李從璋爲河中節度使,遣藥彥稠 ||率師至矣!」||重誨曰:「吾死未塞責,遽勞朝廷興師,以重明主之憂。」光業至,從 重誨子崇緒、崇贊,宿衞京師,聞制下,卽日奔其父,重誨見之,驚曰:「渠 .」又擊其首,夫妻皆死,流 明宗又遣翟光業至河中,視重誨去就,戒曰:「有異志,則與從璋圖 使者見重誨,號泣不已,重誨問其故,使者曰:「人言公有異志,朝 重酶降而答拜,從璋以檛擊其首,重誨妻走抱之而呼曰:「令 知祥、董璋反,及議伐吳,以爲罪。 官者安希倫,坐與重誨交私,常與重誨陰同宮中動息,事 M 盈庭。 從璋檢責其家貨, **幷殺其二子,其餘子孫** 不及數千緡而

之,至梁戒其禍,始更用士人,其備顧問、參謀議于中則有之,未始專行事於外也。至崇韜、 崇政使聞,得旨則復宣而出之。一梁之崇政使,乃唐樞密之職,蓋出納之任也,唐常以宦者爲 重酶爲之,始復唐樞密之名,然權侔於宰相矣。 而奉行之。宰相有非其見時而事當上決者,與其被旨而有所復請者,則具記事而入⊖,因 嗚呼,官失其職久矣!予讀梁宣底,見敬翔、李振爲崇政院使,凡承上之旨,宜之宰相 樞密之任旣重,而宰相自此失其職也。 後世因之,遂分爲二,文事任宰相,武事任

〇「記事」,若今學士院諮報,今士大夫間以文字相往來謂之「簡帖」,俚俗猶謂之「記事」也。

校勘記

- (1) 王都引契丹入寇 **醉史卷二九唐莊宗紀及通鑑卷二七一均作「王郁」。** 「王都」,薛史卷五七郭崇韜傳同, 本史卷三九王處直傳、卷七二四夷附錄、
- **S** 明年征蜀 唐 E 傳 第 + = 按本史卷五及薛史卷三三唐莊宗紀、通鑑卷二七三俱載: 校 勘 al. 同光三年八月癸未殺羅 二五七

實,九月庚子征閩。此言「明年」誤。

宗紀、通鑑卷二七三俱作「西川四面」。 「西南面」,本史卷一四繼岌傳同。本史卷五及薛史卷三三唐莊

(三) 乃以繼岌爲西南面行營都統

新五代史卷二十五

唐臣傳第十三

周德威

改容,人見之,凛如也。事晉王爲騎將,稍遷鐵林軍使,從破王行瑜,以功遷衙內指揮使。 其小字陽五,當梁、晉之際,周陽五之勇聞天下。 周德威字鎭遠,朔州馬邑人也。爲人勇而多智,能望塵以知敵數。 其狀貌雄偉, 笑不

兵始交,德威部下見白馬朱甲者,因退走,軍果奮稍急追之,德威同章已過,揮鐵鎚擊之,中 其部兵曰:「見白馬朱甲者,當佯走以避之。」兩軍皆陣, 德威微服雜卒伍中。 白馬被朱甲以自異,出入陣中,求周陽五,欲必生致之。晉王戒德威曰:「陳野义欲得汝以求 刺史,見白馬朱甲者,宜善備之!」德威笑曰:「陳章好大言耳,安知刺史非臣作邪?」因戒 梁軍圍晉太原,令軍中曰:「能生得周陽五者爲刺史。」有曉將陳章者,號陳野义,常乘 陳章出挑戰,

唐

臣傳

第十三

用德威

章隨馬,遂生擒之。

入,伏梓宮前慟哭幾絕,晉人乃安。遂從莊宗復擊梁軍,破夾城,與李嗣昭歡如初。以破夾 除使人以喪及克寧之難告德威,且召其軍。 王喪在殯,莊宗新立,殺其叔父克寧,國中未定,而晉之重兵,悉屬德威于外,晉人皆恐。莊 嗣昭與德威素有險,晉王病且革,語莊宗曰:「梁軍圍路,而德威與嗣昭有隙,吾甚憂之!」 使、 梁軍捨燕攻路, 梁 攻燕,晉遣德威將五萬人爲燕攻梁,取潞州,遷代州刺史、內外蕃漢馬步軍都指揮 圍以夾城,路州守將李嗣昭閉城拒守,而德威與深軍相持於外踰年。 德威聞命,即日還軍太原,留其兵城外,徒步而

擊之,使敵知吾之衆寡,則吾無所施矣!」德威曰:「不然,趙人能城守而不能野戰。吾之取 懼也!其一甲直數十千,擒之適足爲吾資,無徒望而愛之,當勉以往取之。」退而告莊宗曰: 金銀,其光耀日,晉軍望之色動。德威勉其衆曰:「此汴、宋傭販兒,徒飾其外耳,其中不足 里,營于野河北。曆兵少,而景仁所將神威、龍驤、拱宸等軍,皆梁精兵,人馬鎧甲飾以組 **德威先屯趙州。多,梁軍至柏鄉,趙人告急,莊宗自將出贊皇,會德威于石橋,進距柏鄉五** 城功,拜振武節度使、同中書門下平章事。 「梁兵甚銳,未可與爭,宜少退以待之。」莊宗曰:「吾提孤軍出千里,其利速戰。 今不乘勢急 |天祐七年秋,|梁遣||王景仁將魏、滑、汴、宋等兵七萬人擊趙。| 趙王王鎔乞師于晉,晉遣

於幽州,

破其外城,守光閉門距守。

劉

守光僭號於燕,晉遣德威將三萬出飛狐以擊之。

横尸數十里,景仁以十餘騎僅而免。 矣! 勝。」諸將亦皆以爲然。 吾轉戰,其來必不暇齎糧糗,縱其能齎,亦不暇食,不及日午,人馬俱饑,因其將退而擊之 吾之勝地!」乃使人告德威曰:「吾當爲公先,公可繼進。」德威諫曰:「梁軍輕出而遠來, 里,汴、宋之軍居西,魏、滑之軍居東。 千繼之。 與俱見,莊宗笑曰:「果如公所料。」乃退軍鄗邑。 曰:「吾方思之耳。」已而德威獲梁遊兵,問景仁何爲,曰:「治舟數百,將以爲浮梁。」德威引 敵出營,擾而勞之,可以策勝也。」承業入言曰:「德威老將知兵,願無忽其言!」莊宗遽起 且吾兵少而臨賊營門,所恃者,一水隔耳。使梁得舟栰渡河,吾無類矣!不如退軍鄗邑,誘 勝,利在騎兵,平川廣野,騎兵之所長也。 不悅,退臥帳中,諸將無敢入見。 德威謂監軍張承業曰:「王怒老兵。 不速戰者,非怯也。 」又墜其東偏曰:「梁軍走矣!」梁陣動,不可復整,乃皆走,遂大敗。 景仁怒,悉其軍以出,與德威轉鬭數十里,至于鄗南。 至未申時,梁軍東偏塵起,德威鼓譟而進,塵其西偏曰:「魏、滑軍走 自梁與晉爭,凡數 莊宗策馬登高,望而喜曰:「平原淺草,可前可却,眞 今吾軍於河上,迫賊營門,非吾用長之地也。」莊 德威晨遣三百騎叩梁營挑戰,自以勁兵三 一戰,其大敗未嘗 兩軍皆陣,梁軍橫亙六七 如如 自鄗追至于柏鄉, 此

宗

而晉軍盡下燕諸州縣,獨幽州不下,圍之踰年乃破之,

德威入祁溝關

取涿州,

遂圍守光

玤

馬

方

馳

,不可止,縱其少過,奮檛擊之,廷珪墜馬,

逐見擒

U 德 功 威 拜 盧 於 陣 龍 . , 曰: 「此周 軍節 虚度使。 陽五 德 威 也 雖爲大將,而常身與士卒馳騁矢石之間。 一」乃挺槍馳騎 追之。 德威佯走, 度廷珪 II. 守光曉將單廷珪 及, 側 身少却,廷

徳威 先馳 脏宗 樂平 與劉 鄭相持于魏 遇雨 不得進 而還。 | 事夜潛軍 軍而 德威與鄰俱東,爭 出黃澤關以襲太原, 敗之。 趣臨淸。 德威自幽州以千騎入<u>土門以</u>蹄 臨淸有積 栗,且晉軍餉道也,

也。 以 吾爲 戰 州 之軍居左, 宜 趨 汴州 ?,信宿 坂 按 ,可以計 莊宗 公殿。 軍 勝。 莊宗 **M** 而近 日:「吾軍河上,終日 動 軍宿胡 勇而 據之,以故莊宗卒能困鄰 + 」遽督 勝 德威之軍居右,而輜重次右之西。 五 ,而難與力爭也。 而 年 梁軍父母妻子 好戰,尤銳於見敵 臣請以騎 軍而 - , 德威 柳陂,黎明,侯騎報曰:「梁軍至矣!」莊宗問 出 將燕兵三萬人, 軍擾之,使其營棚不 德威 ,皆在其中,而梁人家國繫此 I俟敵, 翻其 且吾軍 徳威 子 今見敵 先至此, 糧爨具而營棚完, 日:「吾不 與鎭、定等軍從莊宗于河上, 老將,常務持 不擊, -得成, 兵已接, 知 死 復何爲乎? 樵爨不暇 所矣 重以挫人之鋒,故其用兵,常伺敵之隙 莊宗率銀槍軍馳入梁陣,梁軍小敗 一舉。 į 前 給, 戦於德威 遇 顧 吾以深入之兵 是謂以逸待勞之師 因其勞乏而 梁軍 李存審曰:「公以輜 自 麻家渡進軍 而陣"王 , 德威對曰:「此去汴 乘之, ,當其必死之 居中 臨濮, 可以 也。 鎭 重 定定 先 勝 以

犯晉 時,加贈太尉八八郎享莊宗廟。 與諸將相持而哭曰:「吾不聽老將之言,而使其父子至此! 卓 重,輜重見梁朱旗,皆驚走入德威軍,德威軍亂, 晉高祖追封德威燕王。子光輔,官至刺 梁軍乘之,德威父子皆戰死。 ·] 莊宗卽位, 贈德威太師 明宗

符存審 子彦超 彦饒 彦卿

使,賜姓李氏,名存審 刑,因往就召,使歌而悅之,存審因得不死。 得善歌者佐酒,妓言:「有符存常爲妾歌,甚善。」主將馳騎召存審 曰:「願就死于彼,冀得垣土覆尸。」主者哀而許之,爲徙垣下。 符存審字德群,陳州宛丘人也。 初名序,少微賤, 嘗犯法當死, 其後事李罕之, 從罕之歸晉, 而主將方飮酒,顧其愛妓,思 ,而存審以徙垣下故,未加 臨刑,指旁壞垣顧主者 晉王以爲義兒軍

处建 梁夾城,遷忻州 從李嗣昭攻汾州,執李瑭,遷左右廂步軍指揮使。 塘 從晉王擊李匡傷,爲前鋒,破居庸關。 軍下博,擊走梁軍,遷領邢州團練使。 刺史、蕃漢馬步軍指揮使。 晉、趙攻燕、梁救燕、擊趙深州, 又從擊王行瑜, 魏博叛梁降晉,存審爲前鋒,屯臨淸。 又從嗣昭攻路州, 破龍泉寨, 以功遷檢校左僕射。 降丁會。 圍蓨縣, 從周德威 存審 莊宗 與 破

膨

爲安國 軍節度使。 毛璋以滄州降,徙存審橫海,加同中書門下平章事

胡柳 北爲 而存審獨以爲當救,曰:「願假臣騎兵五千足矣!」及遣存審分兵救之,卒擊走 陂 「兩城,晉人謂之「夾寨」。遷內外蕃漢馬步軍總管。 契丹圍幽州,是時晉與梁相持河上,欲發兵,兵少,欲勿救,懼失之。莊宗疑,以問 , 晉軍晨敗, 亡周德威, 存審與其子彥圖力戰, 暮復敗梁軍於土山, 遂取德勝, 築河南 製丹。 諸將, 從戰

牧馬于沙苑,鄰以謂晉軍且懈,乃夜遯去,存審追擊于渭河,又大敗之。 軍擊勢,大敗之,鄩閉壁不復出。存審曰:「鄩兵已敗,不如逸之。」乃休士卒,遣裨將王建及 勝。」乃按軍不動。 降,人心頗持兩端,管軍屯朝邑,諸將皆欲速戰, 敗而 而營,斷我餉道,以持久困我, 中兵少而弱,梁人素易之,且不虞晉軍之速至也。 走,關兵追之,晉騎反擊,獲其騎兵五十,梁人知其晉軍也,皆大驚。 梁朱友謙以河中同州降晉,梁遣劉鄩攻同州, 居旬日,望氣者言:「有黑氣,狀如鬭鷄。」存審曰:「可以一戰矣!」乃進 則進退不可,敗之道也。不若緩師示弱, 存審曰:「使梁軍知吾利於速戰, 存審 友謙 選精騎二百雜河中兵出擊鄰壘,陽 求救,乃遣存審與李嗣昭救之。 伺隙出奇, 然河中糧 則將 少而新 可以 河

張文禮弑趙王王鎔,晉遣閻寶、李嗣昭等攻之,至輒戰死,最後遣存審破之。

存審爲將,有機略,大小百餘戰,未嘗敗衄,與周德威齊名。德威死,晉之舊將獨存審

契丹攻遮處,乃以存審爲盧龍軍節度使。 時存審已病,辭不肯行,莊宗使人慰諭,彊遣

之日:「爾其勉哉!」存審三子: 彥超、彥饒、彥卿。 里,四十年間取將相,然履鋒冒刃出死入生而得至此也。」因出其平生身所中矢鏃百餘而示 亟,乃請許其來朝。 徙存審宣武軍節度使,卒于幽州。 臨終,戒其子曰:「吾少提一劍去鄉 射鈎斬祛之人,皆得親見天子,奉觴爲壽,而獨予棄死於此,豈非命哉!」崇韜度存審病已 上,輒不許,存審伏枕嘆曰:「老夫事二主四十年,今日天下一家,四夷遠俗,至于亡國之將、 訴于崇韜曰:「吾夫於國有功,而於公鄕里之舊,奈何忍令死棄窮野!」崇韜愈怒。存審章累 時,郭崇韜權位已重,然其名望素出存審下,不樂其來而加己上,因沮其事,存審妻郭氏泣 莊宗滅梁入洛,存審自以身爲大將,不得與破梁之功,怏怏,疾益甚,因請朝京師。

見殺。明宗卽位,彥超來朝,明宗德之,勞曰:「河東無事,賴爾之力也。」以爲建雄軍留後。 太原,彥超見留守張憲謀之。憲,儒者,事莊宗最久,不忍背恩,欲納之,彥超不從,存霸遂 彦超爲汾州刺史。

郭從謙弑莊宗,明宗入洛陽,是時,彦超爲北京巡檢,永王存霸奔于

噟

傳

第十三

符存節

遷北京留守,徙鎭昭義,罷爲上將軍,復爲泰寧軍節度使,又徙安遠。

彦超主藏奴王希全盜其貲, 彦超稍責之, 奴懼, 夜叩其門, 言有急, 彦超出, 見殺,贈太

尉

餘人,卽日牒州事與推官韋儼。明宗下詔褒其忠略。 吾於南衙。」乃陰與拱衙指揮使龐起伏甲于衙內。明日,諫等皆集,伏兵發,誅諫等,殺四 三州刺史。 諫爲亂,殺權知州高逖,迫彥饒爲帥。 次子彥饒,爲汴州馬步軍都指揮使。 彥饒陽許之曰:「欲吾爲帥,當止焚掠,明日以軍禮**見** 天成元年,發汴兵三千戍瓦橋關,控鶴指揮使張 其後累遷彰聖都指揮使,歷曹、沂、饒

因并 過,而公怒不息,欲與延光同反邪!」拂衣而起,彥饒不復留之,其麾下大譟,追奉進殺之, 兵卒豈公所得斬邪?何無主客之禮也!」奉進怒曰:「軍士犯法,安有彼此! 且僕 已 以侍衛兵從廢帝至河陽。 ·斯之,彥饒怒。 明日,奉進從數騎過彥饒謝不先告而殺,彥饒曰:「軍士各有部分,養成 范延光反, 白奉進以侍衞兵三千屯滑州。 兵士犯法, 奉進捕得五人, 其三人義成兵也, 清泰三年,自饒州刺史拜忠正軍節度使、侍衞馬步軍都指揮使。晉高祖起太原,彥饒 廢帝敗,晉高祖以楊光遠代彥饒將親軍,徙彥饒義成軍節度使。

彦饒 不之止也。 已而屯駐軍將馬萬等聞亂,以兵擒彥饒送之京師,遂以彥饒應延光反聞。

行至赤岡、高祖使人殺之、下韶削奪在身官爵。

彥饒與晉初無釁隙,以一旦之忿,不能馭其軍,殺率進巳非其本意,以反見誅,非其罪

也!

史建瑭 子国翰

京師 敬思登驛樓,射殺梁兵十餘人,會天大雨,晉王得與從者俱去,縋尉氏門以出。而敬思爲梁 置酒上源驛,獨敬思與薛鐵山、賀回鶻等十餘人侍。晉王醉,留宿梁驛,梁兵夜圍而攻之。 追兵所得,見殺。 t,擊秦宗權于陳州,嘗將騎兵爲先鋒。 晉王東追黃巢于冤朐,還過梁,軍其城北。 梁王 史建瑭,鴈門人也。 晉王爲鴈門節度使,其父敬思爲九府都督,從晉王入關破黃巢,復

鄉。 建瑭所殺,相戒常避史先鋒。梁遣王景仁攻趙,晉軍救趙,建瑭以先鋒兵出井陘,戰于柏 梁軍爲方陣,分其兵爲二:汴、宋之軍居左,魏、滑之軍居右。 建瑭 少事軍中爲裨校,自晉降丁會,與梁相距於路州,建瑭已爲晉兵先鋒。 周德威擊其左,建塘擊其 梁兵數為

唐

Hi

傳第十

=

史

建玻

梁軍皆走,遂大敗之。以功加檢校左僕射。

力以收燕者,二人之力也。後從莊宗入魏博,敗劉鄩於故元城,累以功歷具、相二州刺 去,蓨縣人追擊之,梁軍棄其輜重鎧甲不可勝計。梁太祖方病,由是增劇。而晉軍以故得幷 皆北攻燕,獨符存審與建瑭以三千騎屯趙州。梁軍已破棗彊,存審扼下博橋。建瑭 而梁芻牧者所出,各遇晉兵,有所亡失,其縱而不殺者,歸而皆言晉軍且至。 日,建瑭率百騎爲梁旗幟,雜其芻牧者,暮叩梁營,殺其守門卒,縱火大呼, 人會下博。至暮,擒梁兵數十,皆殺之,各留其一人,縱使逸去,告之曰:「晉王軍且大至。」明 五百 ·騎爲五隊:一之衡水,一之南宮,一之信都,一之阜城,而自將其一,約各取梁獨牧者十 十八年,晉軍討張文禮於鎭州,建瑭以先鋒兵下趙州,執其刺史王鋋。 天站 九年,晉攻燕,燕王劉守光乞師于梁,梁太祖自將擊趙,圍棗彊、蓨縣。是時晉精兵 兵傅鎭州, 斬擊數十百人。 梁太祖 分其麾 液拔營 史。

攻其城門,中流矢卒,年四十二。

州防禦使、義成軍節度使,所至兵民稱慕之。 部 曲 語未嘗不名。 建瑭子匡翰,尚晉高祖女,是爲魯國長公主云。 歷天雄軍步軍都指揮使、彰聖馬軍都指揮使。 医翰爲將,沉毅有謀,而接下以禮 事晉爲懷和二州刺史、鄭 一, 與

史氏世爲將,而匡翰好讀書,尤喜春秋三傳,與學者講論,終日無倦。

·談者未有偶爾! 《成軍從事關澈尤嗜酒,嘗醉駡||匡翰曰:「近聞張彥澤臠張式, 」三屆翰不怒,引滿自罰而慰勉之,人皆服其量。卒年四十。 未見史匡翰斬關澈,天

義

王建及

梁奪,則吾軍危矣,奈何。」建及選二百人馳擊梁兵,梁兵敗,解去。從戰棒縣、故元城,皆 先登陷陣,以功累拜遼州刺史,將銀槍效節軍。 邑野河上,鎭、定兵扼河橋,梁兵急擊之。莊宗登高臺望見鎭、定兵將敗,顧建及曰:「橋爲 王建及、許州人也。少事李罕之,從罕之奔晉,爲匡衞指揮使。梁、晉戰怕鄉,相距鄗

之,建及以銀槍軍繼進,梁兵下走,陣山西,晉兵遂得土山。諸將皆言:「潰兵未集,旦暮不 因白莊宗曰:「請登高望臣破敵 先至,登山而陣。|莊宗至山下望梁陣堅而整,呼其軍曰:「今日之戰,得山者勝。」因馳騎犯 可戰。」閻實曰:「彼陣山上,吾在其下,尚能擊之,況以高而擊下,不可失也。」建及以爲然, 晉攻楊劉,建及躬自負葭葦堙塹,先登拔之。從戰胡柳,晉兵已敗,與梁爭土山,梁兵 ! 」卽呼衆曰:「今日所失輜重皆在山西,盍往取之!」卽馳

旗

H 傳

第十

=

£ 业 及

元 行 欽

焚梁戰艦,建及以二舟載甲士隨之,斧其竹笮,梁兵皆走。晉軍乃得渡,救南城,瓌圍解去。 建及重鎧執矟呼曰:「梁、晉一水間爾,何必巧爲!吾今破之矣。」即以大甕積薪,自上流縱火 河,晉兵不得渡,南城危甚。莊宗積金帛於軍門,募能破梁戰艦者,至於吐火禁咒莫不皆有。 犯梁陣,梁兵大敗。晉遂軍德勝,爲南北城于河上。梁將賀瓌攻其南城,以竹笮維戰艦于

監其軍,令圖言:「建及得士心,懼有異志,不可令典牙兵。」即以爲代州刺史。建及怏怏而

魏,益 與行欽相拒廣邊軍,凡八戰,明宗七射中行欽,行欽拔矢而戰,亦射明宗中股。 囚之,又使行欽害諸兄弟。 卒,年五十七。 元行欽, 幽州人也。爲劉守光裨將,守光篡其父仁恭,使行欽以兵攻仁恭於大安山而 自 選曉將自衞,聞行欽曉勇,取之爲散員都部署,賜姓名曰李紹榮。 明宗撫其背而飮以酒曰:「壯士也!」因養以爲子。 1莊宗得魏博,建及將銀槍效節軍。 建及爲將,喜以家貲散士卒。 莊宗遣宦官章令圖 元行欽 其後晉攻幽州, · 守光使行欽募兵雲、朔間。 是時明宗掠地 常從明宗戰,數立功。 行欽屢敗, 莊宗已下 山北,

殿,酒酣樂作,道平生戰陣事以爲笑樂,而怪行欽不在,因左右顧視曰:「紹榮安在?」所司 奏曰:「奉敕宴使相,紹榮散官,不得與也。」莊宗罷會不樂。 泣曰:「富貴與卿共之!」由是寵絕諸將。 爾之。行欽望其旗而識之,馳一騎,奮劍斷其二矛,斬首一級,梁兵解去。 莊宗還營,持<u>行</u>欽 莊宗好戰而輕敵,與梁軍戰潘張,軍敗而潰,莊宗得三四騎馳去,梁兵數百追及,攢矟 **拜忻州刺史,遷武寧軍節度使。|莊宗宴羣臣於內** 明日,即拜行欽同中書門下平

自此不召羣臣入內殿,但宴武臣而已。

河攻冠氏門,不克。 益召諸鎭兵,皆屬行欽。行欽屯澶州,分諸鎭兵爲五道,毀民車輪、門扉、屋椽爲筏,渡長慶 **暉從旁奪詔書壞之,軍士大譟。行欽具以聞,莊宗大怒,敕行欽:「破城之日,無遺種!」乃** 自新。」行欽曰:「天子以汝等有社稷之功,小過必當赦宥。」在禮再拜,以詔書示諸軍。 **|**欽曰:「將士經年離去父母,不取敕旨奔歸,上貽聖憂,追悔何及! 若公善爲之辭,尙能改過 行營招撫使,將二千人討之。行欽攻鄴南門,以詔書招在禮。 趙在禮反於魏,莊宗方選大將擊之,劉皇后曰:「此小事,可趣紹榮指揮。」乃以爲鄴都 在禮送羊酒犒軍,登城謂行 皇甫

宗討之。明宗至魏,軍城西,行欽軍城南。而明宗軍變,入于魏,與在禮合。 是時,那、洛諸州,相繼皆叛,而行欽攻鄴無功,莊宗欲自將以往,羣臣皆諫止,乃遣明 行欽聞之,退

唐臣

傳第

十三

元行欽

屯衞州,以明宗反聞

從莊宗幸汴州,行至滎澤,聞明宗已渡黎陽,莊宗復遣從璟通問于明宗,行欽以爲不可,因 行欽乃縶從璟,將殺之,從璟請還京師,乃許之。 莊宗遣金槍指揮使李從璟馳詔明宗計事。 從璟,明宗子也。 明宗自魏縣引兵南,行欽率兵趨還京師。 行至衞州, 而明宗已反,

擊殺從璟。

髻斷髮,置之于地,誓以死報,君臣相持慟哭。 騎渡河,自求總管,卿等各陳利害。今日俾我至此,卿等何如?」行欽泣而對曰:「臣本小 人,蒙陛下撫養,位至將相。 危難之時,不能報國,雖死無以塞責。」因與諸將百餘人,皆解 曰:「卿等從我久,富貴急難無不同也。 問其冢名,野人曰:「愁臺也。」莊宗益不悅,因罷酒去。 明宗入汴州,莊宗至萬勝鎭不得進,與行欽登道旁冢,置酒,相顧泣下。 今茲危蹙,而默默無言,坐視成敗。 。西至石橋,置酒野次,莊宗謂行欽 我至滎澤,欲單 有野人獻雉,

瞋目直視曰:「先皇帝何負於爾!」乃斬于洛陽市,市人皆爲之流涕。 送號州,刺史石潭折其兩足,載以檻車,送京師。明宗見之,罵曰:「我兒何負於爾!」行欽 莊宗還洛陽,數日,復幸汜水。郭從謙反,莊宗崩,行欽出奔。 行至平陸,爲野人所執

也。 其誠節有足嘉矣。及莊宗之崩,不能自決,而反逃死以求生,終於被執而見殺。其言雖不 方明宗之兵變于魏,諸將未知去就,而行欽獨以反聞,又殺其子從璟,至於斷髮自誓, 嗚呼!死之所以可貴者,以其義不苟生爾。故曰:主在與在,主亡與亡者,社稷之臣

安金全

屈,而死非其志也,烏足貴哉!

安金全,代北人也。爲人聽果,工騎射,號能擒生踏伏。事膏爲騎將,數從莊宗用兵有

功,官至刺史,以疾居于太原。

至。 也。 甲跨馬,召率子弟及故將吏得百餘人,夜出北門,擊檀於羊馬城中,檀軍驚潰,而晉救兵稍 軍張承業大恐,率諸司工匠登城扞禦,而外攻甚急。 然莊宗不以金全爲能,終其世不錄其功。 一旦不守,則大事去矣!老夫誠憊矣,然尙能爲公破賊。」承業喜,授以甲兵。 莊宗已下魏博,與梁相距河上。梁將王檀襲太原,晉兵皆從莊宗于河上,太原無備,監 金全疆起謂承業曰:「太原,晉之根本 金全被

金全與明宗有舊,明宗卽位,拜金全振武軍節度使、同中書門下平章事。 臣 傳 第 + Ξ 安 \$. 全 亵 建 蠳 西 方 群队 二七三 在鎭二年,召

亲牙什多名二

還京師、以疾卒。

袁建豐

長習騎射,爲鐵林都虞候,從擊王行瑜、李匡威,以功遷突陣指揮使。 **袁建豐**, 不知其世家也。 晉王討黃巢至華陰,闌得之,時方九歲,愛其俊爽,收養之。 從莊宗破夾城,戰怕

拜洺州 鄉,遷左廂馬軍指揮使。 刺史。 擊梁將王千,斬首千餘級,獲其將校七十餘人。 明宗爲衙內指揮使,建豐爲副使,從莊宗入魏,取衞、磁、洺三州, 遷相州刺史。 從戰胡柳,指

明宗卽位,以舊恩召還京師,親幸其第,撫慰甚厚,加檢校太尉,遙領鎭南軍節度使,俾

食其俸以卒,贈太尉。

揮使孟謙據相州叛,建豐還討平之。

徙隰州

刺史、病風廢。

西方鄴

西方鄴,定州滿城人也。 父再遇,爲汴州軍校,鄰居軍中,以勇力聞。 年二十,南渡河

遊梁,不見用,復歸莊宗于河上,莊宗以爲孝義指揮使,數從征伐有功,同光中爲曹州刺史,

以州兵屯汴州。

弑。 宗於汜水,嗚咽泣下,莊宗亦爲之噓晞,乃使以兵爲先鋒。

莊宗至|汴西,不得入,還洛陽,遇 欲殺之,以堅人心。循知其謀,取藏其家,鄴無如之何。而明宗已及汴,乃將五百騎西迎莊 恩,奈何欲納總管而負國!」循不答。||鄴度循不可爭,而石敬瑭妻,明宗女也,時方在汴,鄴 迎莊宗,所以供帳委積如一,曰:「先至者入之。」鄴因責循曰:「主上破梁而得公,有不殺之 明宗入洛,鄴請死於馬前,明宗嘉歎久之。 明宗自魏反,兵南渡河,而莊宗東幸汴州,汴州節度使孔循懷二志,使北門迎明宗,西門

乃拜鄴夔州 三州,乃以夔州爲寧江軍,拜鄴節度使。 刺史,剧璋以兵出三峽。 已而訓等無功見黜,諸將皆罷,璋亦嘗出兵,惟鄴獨取 。已而又取歸州,數敗季興之兵。

明年,荆南高季興叛,明宗遣襄州節度使劉訓等招討,而以東川董璋爲西南面招討使,

達素剛,辭益不遜,遂死于獄中。 鄴 ,武人,所爲多不中法度,判官譚善達數以諫。 | 鄴病,見善達爲祟,卒于鎭。 鄴怒, 遺人告善達受人金, 下獄。

校勘記

(二) 加贈太尉 纂誤補卷二云:"太尉亞於太師,德威以太師而加太尉,乃事之必不然者。 薛史惟言

天成中詔配享莊宗廟廷而已。 此疑有衍文。」

 \exists 尚晉高祖女是爲魯國長公主 「女」,薛史卷八八史匡翰傳作「妹」。金石萃編卷一二〇史匡翰碑

云匡翰「尚魯國大長公主」。考薛史卷八一晉少帝紀載: 天福七年,「樂平公主史氏,進封魯國大

長公主。」按唐制,皇姑爲大長公主。晉少帝爲晉高祖從子,則史氏應是晉高祖妹。

新五代史卷二十六

唐臣傳第十四

符習

拜習天平軍節度使、東南面招討使,習亦未嘗攻取。 使,習辭曰:「魏博六州,霸王之府也,不宜分割以示弱,願授臣河南 莊宗用佗將破之。拜習成德軍節度使,習辭不敢受,乃以相、衞二州爲義寧軍,以習爲節度 王冤。」莊宗壯之,乃遣閻寶、史建瑭等助習討文禮,以習爲鎭州兵馬留後。習攻文禮不克, 趙,受趙王恩,王嘗以一劍與臣使自効,今聞王死,欲以劍自裁,念卒無益,請擊趙破賊,報 晉軍德勝,張文禮殺趙王王鎔,上書莊宗,求習歸趙。 符習,趙州昭慶人也。少事趙王王鎔爲軍校,自晉救趙,破梁軍柏鄉,趙常遣習將兵從 後徙鎭安國,又徙平盧 莊宗遣之, 習號泣曰:「臣世家 一鎭,得自攻取之。」乃

趙在禮作亂,遣習以鎭兵討賊。 習未至魏,而明宗兵變,習不敢進。 二七七 明宗遣人招之,習

唐

15 件 绑 -79

徘 哲

家屬由是獲免。而公懺宣言一一人不便習之嚴急,不欲習復來,因自求爲節度使。明宗乃以 房知温代習鎭平盧行了,拜公儼登州刺史。公儼不時承命,知温擒而殺之。習復鎭天平,徙 分兵守城,以虞外變,習家不足慮也。」希望信之,乃悉分其兵守城,公嚴因擒希望斬之,習 之。指揮使王公嚴素爲希望所信,紿希望曰:「內侍盡忠朝廷,誅反者家族,孰敢不效命!宜 鎭宣武。 其四,復何猶豫乎?」習意乃決。 平盧監軍楊希望聞習爲明宗所召,乃以兵圍習家屬,將殺 見明宗於胙縣,而以明宗舉兵不順,去就之意未決,霍彦威給習曰:「主上所殺者十人,公居

風卒,贈太師。 習 [素爲安重誨所不悅,希其旨者上言習厚斂汴人,乃以太子太師致仕,歸昭慶故里,明

州 ,州人號泣送葬者數千人,當時號爲良刺史。|蒙,少好學,性剛鯁,爲<u>成德軍</u>節度副使。 習二子:令謙、蒙。 令謙,有勇力,善騎射,以父任爲將,官至趙州刺史,有善政,卒于

後事晉,官至禮部侍郎。

鳥震

河上,而鎔爲張文禮所弒,慶從習討文禮,而家在趙,文禮執震母妻及子十餘人以招震,慶 身先士卒。晉軍攻破鎭州,慶以功拜刺史,歷深、趙二州。 不顧。文禮乃自斷其手鼻,割而不誅,縱至習軍,軍中皆不忍正視。震一慟而止,憤激自劇, 鳥震,冀州信都人也。少事趙王王鎔爲軍卒、稍以功遷裨校,隸符習軍。 習從莊宗于

成于<u>盧</u>臺軍。始至而戍兵龍咥等作亂,見殺,贈太師。 刺史,兼北面水陸轉運使。明宗聞其名,擢拜河北道副招討使,領寧國軍節度使,代房知温 慶爲人純質,少好學,通左氏春秋,喜作詩,善書。 及爲刺史,以廉平爲政有聲,遷<u>冀州</u>

利害不繫焉者, 如是而不顧其親, 雖不以爲利, 猶曰不孝, 况因而利之乎! 失能事其親以 害於其親者,猶將辭其祿而去之。矧其事衆人所皆可爲,而任不專己,又其爲與不爲,國之 食人之祿而任人之事,事有任,專其責,而其國之利害,由己之爲不爲,爲之雖利於國,而有 嗚呼!忠孝以義則兩得,吾旣已言之矣,若烏震者,可謂忠乎?甚矣,震之不思也。夫

唐

臣

傳第

+ 四

鳥 震

孔 識

然後能事其君以忠,若鳥震者,可謂大不孝矣,尙何有於忠哉!

孔謙

善事人,莊宗及其左右皆悅之。自少爲吏,工書算,頗知金穀聚斂之事。 十餘年,大小百餘戰,謙調發供饋,未嘗闕乏,所以成莊宗之業者,謙之力爲多,然民亦不勝 孔謙,魏州人也,爲魏州孔目官。 魏博入于晉,莊宗以爲度支使。謙爲人勤敏,而傾巧 晉與梁相拒 河上

崇韜,崇韜亦不肯當。 革嘗以手書假租庸錢十萬,謙因以書示崇韜,而微泄其事,使革聞之。革懼,遂求解職以讓 不若復用張憲。」乃趣召憲。 謙 可。」崇韜以爲然,因以憲留守北都,而以宰相豆盧革判租庸。謙益失望,乃陰求革過失,而 其苦也。 ?,委一小吏可辦。 已怏怏。 | 班宗初建大號,議自謂當爲租庸使,而郭崇韜用魏博觀察使判官張憲爲使,以謙爲副。 旣而莊宗滅梁,讓從入汴,謂崇韜曰:「鄴,北都也曰,宜得重人鎭之,非張憲不 |鄴都天下之重,不可輕以任人。」| 革以語崇韜 莊宗問:「誰可者?」崇韜曰:「孔謙雖長於金穀,而物議未可居大任, 憲爲人明辯,人頗忌之,謙因乘間謂革曰:「租庸錢穀,悉在 崇韜罷憲不召,以興唐 目

削

期

乃止。 尹王正言爲租庸使。 已而正言病風,不任事,景進數以爲言,乃罷正言,以謙爲租庸使,賜「豐財贍國功 謙益憤憤,因求解職。 莊宗怒其避事,欲寘之法,賴伶官景進救解之,

臣。

者, 谷徑路,禁止行人,以收商旅征算;遣大程官放猪羊柴炭,占庇人戶;
更制括田竿尺;盡 率州使公廨錢。 事 不奉韶, 卒行直帖。 而謙直以租庸帖調發諸州,不關觀察,觀察使交章論理,以謂:「制敕不下支郡,刺史不專奏 了,唐制也。 謙悉違詔督理。故事:觀察使所治屬州事,皆不得專達,上所賦調,亦下觀察使行之。 **謙無佗能,直以聚斂爲事。 莊宗初卽位,推恩天下,除百姓田租,放諸場務課利欠負** 租庸直帖,沿僞梁之弊,不可爲法。 由是天下皆怨苦之。 又請減百官俸錢,省罷節度觀察判官、推官等員數。 ' 今唐運中興,願還舊制。」韶從其請,而**謙** 以至鄣塞天下山

明宗立,下詔暴謙罪,斬于洛市,籍沒其家。 **遂罷租庸使額,分鹽鐵、度支、戶部爲三**

張延朗

司。

糧料使 張 延期 \`,後徙鎭<u>宣武、</u>成德,以爲元從孔目官。 事梁,以租庸吏爲鄆州糧料使。 明宗卽位,爲莊宅使、宣徽北院使、忠武 明宗克鄆州,得延朗,復以爲 軍節

度使。

宗滅梁 後用 始。 道 號 無常,隨時調斂,兵罷則止。 鹽 日 鐵 判三司。 完兵,以國計爲重,遂以宰相領其職。乾符已後,天下喪亂,國用愈空,始置租庸使,用兵 長 《轉運等使,兼判戶部度支事。 興元年拜三司使。 因而 不改。 延朗因請置三司使,事下中書。 明宗入立,誅租庸使孔謙而廢其使職,以大臣一人判戶部、度支、鹽鐵, 唐制:戶部度支以本司郎中、侍郎判其事,而有鹽鐵轉運使。 梁興,始置租庸使,領天下錢穀,廢鹽鐵、戶部、度支之官。 韶以延朗充三司使, 班 中書用唐故事,拜延朗特進、工部尙書,充諸 在宣徽使下。 三司置使 自此 其

為吏部尙 延朗不 延朗 書 號爲有心計,以三司爲己任,而天下錢穀亦無所建明。 至 兼 「,附使者報曰::「三司事忙,無暇。」聞者笑之。 中書門下平章事 ,判三司 歷泰寧、雄武 明宗常出遊幸, 軍節度使。 召延朗共 廢帝以

征 而心畏高祖 晉 高 加 有異志,三司 遲疑不決, 財貨在 延朗與劉延朗等勸帝必行。 太原 者,延期悉調取之,高祖深以爲恨。 延朗籍諸道民爲丁及括其馬, 晉兵起,廢帝欲親 1

李嚴

李嚴,幽州人也,初名讓坤。 事劉守光爲刺史,後事莊宗爲客省使。 嚴爲人明敏多藝

能,習騎射,頗知書而辯。

爾!」嚴曰:「唐滅梁如拉朽,況其不及乎!唐兵布天下,發一鎭之衆,可以滅虜使無類。然 不一也。」光嗣曰:「荆、湖、吳越非吾所知,若鳳翔則蜀之姻親也,其人反覆,其可信乎?又 聞契丹日益疆盛,大國其可無慮乎?」嚴曰:「契丹之彊,敦與僞梁?」光嗣曰:「比梁差劣 貢賦,效珍奇,願自比於列郡者,至無虚月。天子方懷之以德,而震之以威,天下之勢,不得 宋光嗣召嚴置酒,從容問中國事。嚴對曰:「前年天子建大號于鄴宮,自鄆趨汴,定天下不旬 而淮南楊氏承累世之彊,鳳翔李公恃先朝之舊,皆遣子入侍,稽首稱藩。至荆、湖、吳越,修 日,而梁之降兵猶三十萬,東漸于海,西極甘凉,北懾幽陵,南踰閩嶺,四方萬里,莫不臣妾。 :天生四夷,不在九州之內,自前古王者,皆存而不論,蓋不欲窮兵黷武也。」圖人聞|嚴應 同光三年,使于閩,爲王衍陳唐興復功德之盛,音辭淸亮,閩人聽之皆竦動。 衍樞密使

唐

臣

傳第十四

李蹑

껃

對,愈益奇之。

國,謂之『入草』,王衍其能免爲『入草人』乎?」於是決議伐蜀 草物」,由是嚴無所得而還,惟得金二百兩、地衣、毛布之類。 莊宗聞之,大怒曰:「物歸中 遺嚴以名馬入圖,市珍奇以充後宮,而圖法嚴禁以奇貨出劍門,其非奇物而出者,名曰「入 是時,蜀之君臣皆庸暗,而恃險自安,窮極奢僭。 嚴自蜀還,具言可取之狀。 初,

客省使如故。 聞之喜,卽馳騎入益州。 |孝至漢州,王衍告曰:「得李嚴來卽降。」衆皆以伐圖之謀自嚴始,而||衍怨嚴深,不宜往。 多,魏王繼岌西伐,以嚴爲三川招撫使,與康延孝以兵五千先行,所過州縣皆迎降。 衍見嚴,以妻母為託,即日以**蜀**降。嚴還,明宗以爲泗州防禦使, 延

過,不宜以 將行,其母 有 其後孟 公意自欲來邪? 舊恩,而惡其來。 知祥)喜怒殺人,恐失士大夫心。」莊宗怒稍解,命知祥監笞嚴二十而釋之。 ·日··「汝前啟破蜀之謀,今行,其以死報蜀人矣!」嚴不聽。 爲中門使,嚴嘗有過,莊宗怒甚,命斬之,知祥戒行刑者少緩,入白 |知祥屈彊於蜀,安重誨稍裁抑之,思有以制知祥者,嚴乃求爲西川兵馬都監。 」嚴曰:「君命也。」知祥發怒曰:「天下藩鎭皆無監軍,安得爾獨 蜀 人聞嚴來,亦皆惡之。 嚴至,知祥置酒從容問嚴曰三朝 初,嚴與知祥同事莊 | 莊宗 公曰:「嚴· 廷以 知 來 祥 此? 雖 典

李仁矩

樓而靴走庭中,璋責之曰:「爾以西川能斬李嚴,謂我獨不能斬爾邪!」顧左右牽出斬之。 璋置酒召仁矩,仁矩辭弊不往,於傳舍與倡妓飮。 璋怒,率衙兵露刃之傳舍,仁矩惶恐,不 仁矩涕泣拜伏謝罪,乃止。明日,璋置酒召仁矩,見其妻子,以厚謝之。仁矩還,言璋必 天南郊,東、西川當進助禮錢,使仁矩越之。仁矩恃恩驕恣,見藩臣不以禮。 李仁矩,不知其世家。 少事明宗爲客將,明宗卽位,以爲客省使、左衞大將軍。 東川節度使董 明宗祀

以書示樞密承旨李虔徽,使白重酶,重酶不省。 髦,又以兵戍之,是將殺我也。若唐復遣一騎入|斜谷,吾反必矣!與汝自此而決。」光業私 仁矩為節度使,遣姚洪將兵戍之。 障以書至京師告其子光業曰:「朝廷割我支郡,分建節 仁矩素爲安重誨所親信,自璋有異志,重誨思有以制之,乃分東川之閬州爲保寧軍,以

仁矩至鎭,何璋動靜必以聞,璋益疑懼,遂決反。 重酶又遣荀咸义將兵益戍閬州,

臣傳第十四

李仁

矩

毛瓏

二八六

自退。」仁矩曰:「濁懦,安能當我精銳之師!」卽驅之出戰,兵未交而潰,仁矩被擒,幷其家 心久矣,常以利啖吾兵,兵未可用,而賊鋒方銳,宜堅壁以挫之。守旬日,大軍必至,敗當 亟言以爲不可,重誨不聽。
咸义未至,障已反,攻閬州,仁矩召將校問策,皆曰:「障有二

毛環

屬皆見殺。

毛璋,滄州人也。 梁末,戴思遠爲橫海軍節度使,璋事思遠爲軍校。晉已下魏博,思遠

棄滄州出奔,璋以滄州降晉,以功爲貝州刺史。

多不法,議者疑其有異志,乃徙璋鎭昭義。璋初欲拒命,其判官邊蔚切諫諭之,乃聽命。 障爲人有膽勇,自晉與梁相拒河上,璋累戰有功。莊宗滅梁,拜璋華州節度使。 在鎭

子,有叔父在閩,欲往省之,而無私書。障無罪名,有司議:「璋前任藩鎭,陰畜異圖,及處班 遺子廷赟持書往西川,疑其有姦。 其所得圖妓爲王衍宮中之戲于前。明宗聞而惡之,召爲金吾上將軍。 障累歷藩鎮,又在<u>華州得魏王</u>繼岌伐蜀餘貲,旣富而驕,益爲淫侈。 明宗乃遣人追還廷贇,丼障下御史獄。 東川董璋上書言璋 嘗服赭袍飲酒,使 廷贇款稱實璋假

行,不愼行止。」乃停璋見任官,勒還私第。

夢奇受賂而劾獄不盡,乃移軍巡獄。 馬借夢奇而無受路。 **滅口。旣出**而責賂於璋,不與,延祚乃詣臺自言,并璋復下獄,鞫之無狀。中丞<u>呂夢</u>奇議 曰:「璋前經推劾,已蒙昭雪,而延祚以責賂之故,復加織羅。」乃稍宥璋。 璋款上,有告者言 初,廷贇之蜀,與其客趙延祚俱,及召下獄,延祚多捃璋陰事欲言之,璋許延祚重路以 障坐長流儒州,已而令所在賜自盡。 獄吏希旨,鍛鍊其事, 障具伏:許路延祚而未與,嘗以

校勘記

(二) 明宗乃以房知溫代習鎭平盧 年。此處「房知溫」當是「霍彥威」之誤。 八月,霍彦威代符習鎮平盧,殺王公儼。 本史卷六及薛史卷三七唐明宗紀、通鑑卷二七五均載"天成元年 又按薛史卷四三唐明宗紀,房知溫鎮平盧乃在長興三

 \exists 鄴北都也 月,復北都爲鎭州,太原爲北都。三年,改東京爲鄴都,洛陽爲東都。 按本史卷五唐莊宗紀,同光元年四月,以魏州爲東京,太原爲西京,鎮州爲北都。 此稱鄴爲北都,恐誤。

新五代史卷二十七

唐臣傳第十五

朱弘昭 馮贊附

昭乃死。 師,璋不許,遂相猜忌,弘昭益開懷待之不疑,璋頗重其爲人。後璋有軍事,遣弘昭入朝,弘 董璋爲東川節度使,乃以弘昭爲副使。 朱弘昭,太原人也。少事明宗爲客將,明宗即位,爲文思使。 遷左衞大將軍內客省使、宣徽南院使、鳳翔節度使。 西川孟知祥殺其監軍李嚴,弘昭大懼,求還京 與安重誨有隙,故常使于

敬瑭以糧餉不繼,遽燒營返軍。 恩,而所以讒間之端,因泣下。 弘 昭迎謁,禮甚恭,延重誨于家,使其妻妾侍飲食。 孟 知祥反,石敬瑭伐蜀,久無功,明宗遣安重誨督軍。是時重誨已有間。 弘昭卽奏言重誨怨望,又陰遣人馳告敬瑭,使拒重誨。 重酶亦以被讒召還,過鳳翔、弘昭閉門不納,重酶由此得罪 重酶以弘昭厚己,酒酣, 具言蒙天子厚 重誨至鳳翔,

唐

臣傳第十

Ħ.

朱弘昭

度使。

死。 樞密使范延光尤惡弘昭爲人,罷爲左武衞上將軍、宣徽南院使。 久之,爲山南東道節

足當大任。」明宗叱之曰:「公等皆不欲在吾目前邪?吾養公等安用!」弘昭惶恐,乃視事。 瓊、王淑妃進說,故皆得罷。以弘昭及馮蠶代延壽、延光,弘昭入見,辭曰:「臣廝養之才,不 延壽日夕更見,涕泣求去,明宗怒而不許。 是時, 明宗已病,而秦王從榮禍起有端,唐諸大臣皆欲引去以避禍。樞密使范延光、趙 延壽使其妻興平公主入言於中,延光亦因孟漢

爲節 度使,以贇爲進奏官。 馮贇者,亦太原人也。 其父璋, 事明宗爲闍者。 明宗即位,即爲客省使、宣徽北院使。 歷河東忠武節度使、三司

使

昭、贇 是時, 陰謀 皆唐大臣,以漢瓊故,輕易其地,又不降制書,第遣使者監其上道,從珂由此遂反。 此 四人。 明宗病甚,大臣稀復進見,而孟漢瓊、王淑妃用事,弘昭及贇並掌機務於中,大事皆決 嘗 乃議徙成德范延光代漢瓊,北京留守石敬瑭代延光,鳳翔路王從珂代敬瑭 弘昭、贇遣漢瓊至魏, 事梁張漢傑, 及殺秦王而立愍帝,益自以爲功。 又事郭崇韜,兩人皆輒敗死, 召愍帝入立,而留漢瓊權知後事。 又其所用多非其人,給事中陳义,爲人險譎,好 弘昭乃引以爲樞密直學士,而 明年正月, 漢瓊 請 入朝, 用其謀。 三人者 弘

濛,濛曰:「神言如此,我能傳之,不能解也。」帝卽以濛爲館驛巡官。 神, 昭尚書令,資中書令。 死,子母棄尸于道,妻子皆見殺。[資有子三歲,其故吏]張守素匿之以免。 漢高祖卽位,贈弘 昭入見甚急,弘昭呼曰:「窮至此邪!」乃自投于井以死。安從進聞之,亦殺贇于家,贇母新 其言吉凶無不中,圖素信之。嘗引濛見帝,聞其語聲,驚曰:「此非人臣也!」圖使濛問於 制書,遣供奉官趙處愿促帝上道。帝疑惑,召昭胤等計議,昭胤等皆勸帝反,由是事無大 李專美,牙將宋審虔,客將房暠,而延朗爲孔目官。 初,愍帝卽位,徙廢帝爲北京留守,不降 小,皆此五人謀之。而暠又喜鬼神巫祝之說,有瞽者張濛,自言事太白山神,神,魏崔浩也, 神傳語曰:「三珠倂一珠,驢馬沒人驅。 劉 |延朗,宋州虞城人也。 初,廢帝起於鳳翔,與共事者五人:節度判官韓昭胤,掌書記 劉延朗 歲月甲庚午,中興戊己土。」圖不曉其義,使問

吾兒婦,君之女也,其以歸,無使及禍。」乃拔劍大哭,欲自裁,而家人止之。 使者促弘

從珂兵已東,愍帝大懼,遣人召弘昭計事。弘昭謂其客穆延暉曰:「上召我急,將罪我

唐臣傳第十五

劉延期

濛 即位之日,受册明宗柩前。 懼,又遣暠問神,神曰:「王兵少,東兵來,所以迎王也。」已而東兵果叛降于帝。帝入京師 文遇計事。 事 於 神言,豈不驗哉! ,離間骨肉,將問罪於朝!」遣使者馳告諸鎭,皆不應,獨隴州防禦使相里金遣其判官薛 是決反,使專美作檄書,言:「朱弘昭、馮贇幸明宗病,殺秦王而立愍帝。 帝 將反, 帝得文遇,大喜。 mi 兵少,又乏食,由此 」由是暠益見親信,而專以巫祝用事。 册曰:「維應順元年,歲次甲午,四月庚午朔。」帝回顧暠曰:「張 而延朗調率城中民財以給軍。 【甚懼,使暠問濛,濛傳神語曰:「王當有天下, 王思同率諸鎭兵圍鳳翔,廢帝 帝年少,小人用 可無憂!

議 衞 皇 儿 |城使,暠爲宣徽北院使,延朗爲莊宅使。 久之,昭胤、暠爲樞密使,延朗爲副使,審虔爲侍 而 軍 帝旣立,以昭胤爲左諫議大夫、端明殿學士,專美爲比部郎中、樞密院直學士,審虔爲 昭胤、暠及延朗掌機密。 都 :指揮使,而薛文遇亦爲職方郞中、樞密院直學士。 由是審虔將兵,專美、文遇主謀

胤 數寇北邊,以高祖爲大同、振武、威塞、彰國等軍蕃漢馬步軍都總管, 求 歸 、専美 鎭 初, 且難言之,乃陽爲羸疾,灸灼滿 帝與晉高祖俱事明宗,而心不相悅。 日:「敬瑭與趙延壽皆尙唐公主,不可獨留。」乃復授 身, 冀帝憐而遣之。 帝旣入立,高祖不得已來朝,而心頗自疑,欲 高祖 延朗等多言敬瑭 河東而遣之。 屯于忻州。 可留 是時, 而屯兵忽 京 師, 契丹 昭

變,擁高祖呼「萬歲」,高祖懼,斬三十餘人而後止。於是帝益疑之。

高祖總管,徙鄭州。延期等多言不可,而司天趙延義亦言天象失度,宜安靜以弭災,其事遂 堪,因數求解總管以探帝心。是時,帝母魏氏追封宣憲皇太后,而墓在太原,有司議立寢 后居中,因得何帝動靜言語以報高祖,高祖益自危懼。每帝遣使者勞軍,卽陽爲羸疾不自 宿中興殿廬,召見訪問,常至夜分而罷。是時,高祖弟重胤爲皇城副使,而石氏公主母曹太 高祖建言陵與民家墓相雜,不可立宮。帝疑高祖欲毁民墓,爲國取怨,帝由此發怒,罷 是時,高祖悉握精兵在北,饋運芻糧,遠近勞弊。帝與延朗等日夕謀議,而專美、文遇迭

立。帝得書大怒,手壞而投之,召學士馬胤孫爲答韶,曰:「宜以惡語詆之。」 制,文武兩班皆失色。居五六日,敬瑭以反聞。敬瑭上書,言帝非明宗子,而許王從益次當 今年當得一賢佐以定天下,卿其是邪!」乃令文遇手書除目,夜半下學士院草制。明日宣 之事,斷在陛下。且歐瑪徙亦反,不徙亦反,遲速爾,不如先事圖之。」帝大喜曰:「術者言股 後月餘,文遇獨直,帝夜召之,語罷敬瑭事,文遇曰:「臣聞『作舍道邊,三年不成』。國家

」由此不欲行。而延朗等屢迫之,乃行。至懷州,帝夜召李崧問以計策。 延朗等請帝親征,帝心憂懼,常惡言敬瑭事,每戒人曰:「爾無說石郎, 文遇不知而

傳

繼至, 之。遺審虔將千騎至白馬坡踏戰地,審虔曰:「何地不堪戰?雖有其地,何人肯立于此?不 如還也。」帝遂還,自焚。 小人,致悞大事,刺之益醜。」乃已。是時,契丹已立敬瑭爲天子,以兵而南,帝惶惑不知所 帝見之色變,崧躡其足,文遇乃出。 ` 高祖入京師,延朗等六人皆除名爲民。 帝曰:「我見文遇肉顫,欲抽刀刺之。」崧曰:「文遇

書侍 之,後復以爲將。 枕而已。 曰:「吾積錢三十 一少及無賂者得惡州,或久而不得,由是人人皆怨。 ?鄭、同中書門下平章事,出爲河陽節度使,與審虔、文遇皆不知其所終。 初, 延朗與屠並掌機密,延朗專任事,諸將當得州者,不以功次爲先後,納路多者得善 每延朗議事, 萬于此, 歲餘卒。 則垂 不知何人取之!」遂爲追兵所殺。 專美事晉爲大理卿, 頭陽睡不省。 及晉兵入,延期以一騎 開運中卒。 暠心息之,而不能爭也, 當晉之將起, 晉高祖聞屬常不與延朗 走南山, 廢帝以昭胤爲中 過其家, 但 日 指 飽 事 食高 而嘆 哀

爲之謀,未必能不敗,況如此五六人者哉!故幷述以附延朗,見其始終之際云。 如此 一,覽者 嗚 呼, 禍 即 以深 福 成敗之理,可不戒哉!張濛神言驗矣,然焉知其不爲禍也!予之所記,大抵 、思焉。 廢帝之起,所與圖 [議者,此五六人而 Ę 考其逆順之理,雖有智者

康思立

使。 明宗卽位,歷應嵐二州刺史、宿州團練使、昭武軍節度使,徙鎭保義,皆有善政。 康思立,本山陰諸部人也。 少爲騎將,從莊宗破梁夾城,戰怕鄉, 累以功遷突騎指揮

拒邪?徒陷陝人於死耳!」捧聖兵聞之,皆解甲,思立途開門迎從珂。 珂兵已至,思立乃以捧聖兵城守,從珂兵傅其城,呼曰:「西兵十萬策新天子,爾五百人其能 千人屬思同。 路王從珂反於鳳翔,愍帝遣王思同等討之,思立有捧聖、羽林屯兵千五百人,乃以羽林 思同至鳳翔,軍叛,降于從珂。 思立聞之,欲盡誅羽林千人家屬,未及,而從 廢帝即位"以思立初

無降意,頗不悅之,徙安遠,又徙安國,以年老罷爲右神武統軍。

兵出 [團柏谷救張敬達,未至,而敬達死,楊光遠降晉,思立疾,卒于道。 石敬瑭反太原,廢帝以思立爲北面行營馬軍都指揮使。 廢帝幸懷州,遣思立將從駕騎 晉高祖入立, 贈太子

少師。

康義誠

在禮 從破朱守殷, 康 至魏而 義誠字信臣,代北三部落人也。 軍變,義誠前陳莊宗過失,勸明宗南 遷侍衞親軍馬步軍都指揮使, 以騎射事晉王,莊宗時爲突騎指揮使。 嚮。 領河陽三城節度使。 明宗卽位, 遷捧聖指揮使, 出爲山南東道 從明宗討 領汾 節 州 度 刺 趙

使,復爲親軍都指揮使,領河陽,加同中書門下平章事

義誠 義誠卒不 結之,遺其子事秦王府。 獨持兩端。 秦王從榮素驕, 出 兵。 從榮已舉兵,至天津橋,弘昭等入,以反白,明宗涕泣召義誠,使自處置 馬軍指揮使朱弘實以兵擊從榮,從榮敗走,見殺。 自爲河南尹,典六軍,拜大元帥,唐諸大臣皆懼禍及, 明宗病,從榮謀以兵入宮,唐大臣朱弘昭、馮贇等皆以爲不可, 思自脱, 獨義誠心 而 而

府 誠已殺岳,又以從榮故,與弘實 召岳檢閱從榮家貲。 路王從珂反鳳翔, 王思同率諸鎭兵圍之, 興元張虔釗兵叛降從珂, 司使孫岳嘗爲馮贇言從榮必敗之狀,義誠聞而不悅。 岳至,義誠乘亂,使人射之, 岳走至通利坊見殺, 有隙。 愍帝卽位, 弘實常以誅從榮功自負,義誠 及從榮死,義誠始 思同走, 明宗 心 引 不 能 兵 諸鎭兵皆 益 入河南 不 平。

唐臣傳第十五 康義誠 藥彥稠

嗚呼

五代爲國,興亡以兵,而其軍制,後世無足稱焉。

此五代之遺制也。

然原其始起微矣,

及其至也,

可謂

盛哉!當唐之末,方鎭之兵多

惟侍衞親軍

·之號,今猶因之而

矣,凡一軍有指揮使一人,而合一州之諸軍,又有馬步軍都指揮使一人,蓋其卒伍之長也。

干。 其所 大計 不如以見兵守京師以自固,彼雖幸勝,特得虔釗 以西,扼關而守,招集亡散,以爲後圖。」、愍帝以爲然,幸左藏庫,親給將士人絹二十匹、錢五 前,帝不能決,遂斬弘實,以義誠爲招討使,悉將禁軍以西。 誠怒曰:「如此言,弘實反矣! 無鬭志,而義誠盡將以西,疑其二心,謂義誠曰:「今西師小衄,而無一騎東者,人心可知。 是時,明宗山陵未畢,帑藏空虚。 也! 見迫,不能獨違。 愍帝大怒,謂朱弘昭等曰:「朕新卽位,天下事皆出諸公,然於事兄,未有失節,諸公以 !」弘昭等惶恐不能對,義誠前曰:「西師驚潰,主將怯耳。 今京師兵尙多,臣請盡將 事一至此,何方轉禍?吾當率左右往迎吾兄,遜以位,苟不吾信,死 」弘實曰:「公謂誰欲反邪? 軍士負物揚言曰:「到鳳翔更請一分。」朱弘實見軍士 一軍耳。 」其聲厲而聞。 諸鎭之兵在後,其敢徑來邪! 愍帝召兩人,爭於

愍帝奔衞州, 義誠行至新安, 降于從珂。 清泰元年四月, 斬于興教門外, 夷其族。

二九七

其職益 更置之始。今天下之兵,分屬此兩司矣。 密使並執國政,而以肇尤專任,以至於亡。 者,其權豈不益 亡,六軍諸衞又益以廢,朝廷無大將之職,而舉天下內外之兵皆侍衞司矣。 何?」可不戒哉!然是時,方鎭各自有兵,天子親軍不過京師之兵而已。今方鎭名存而實 私兵也,推其名號可知矣。天子自爲將,則都指揮使乃其卒伍之都長耳。 自梁以宣武軍 大臣宗室一人判六軍諸衞事,此朝廷大將天子國兵之舊制也。而侍衞親軍者,天子自將之 親軍馬步軍都指揮使。當是時,天子自有六軍諸衞之職,六軍有統軍,諸衞有將軍,而 重,漢有侍衞司獄,凡朝廷大事皆決侍衞獄。是時,史弘肇爲都指揮使,與宰相、樞 ·建國,因其舊制,有在京馬步軍都指揮使,後唐因之,至明宗時,始更爲侍衞 重哉!親軍之號,始於明宗,其後又有殿前都指揮使,亦親軍也,皆不見其 語曰:「涓涓不絕,流爲江河。 熒熒不滅,炎炎奈 然自漢、周以來, 則爲都指揮使 又以

樂彦棚

州 遷侍衞步軍都虞候,領壽州節度使。 藥彥稠, 沙陀三部落人也。 初爲騎將, 安重海矯詔遣河中指揮使楊彥温逐其節度使路王 明宗卽位, 拜澄州刺史。從王晏球破王都定

從珂。 以彥稠爲招討使,明宗疑彥温有所說,戒彥稠得彥温毋殺,將訊之。 彦稠希重誨旨,

殺彥温以滅口,明宗大怒,然不之罪也。

可失信。」因悉以賜彥稠。 而彥稠以党項所掠回鶻進奉玉兩團及遺秦王金裝胡鞍等來獻,明宗曰:「吾已語彥稠矣,不 至,彥稠等自牛兒族入白魚谷,盡誅其族,獲其大首領連香等,遣人上捷。 與靈武康福會兵擊之,阿埋等亡竄山谷。 曰:「吾誅党項,非有所利也。凡軍中所獲,悉與士卒分之,毋以進奉爲名,重斂軍士也。」已 長興中爲靜難軍節度使,党項阿埋、屈悉保等族抄掠方渠,邀殺回鶻使者,明宗遣彥稠 又逐鹽州諸戎,取其所掠男女千餘人。 明宗以謂党項知懼,可加約束而綏撫之。使者未 明宗謂其使者

路王從珂反, 彥稠爲招討副使。 王思同兵潰, 彥稠與思同俱東走, 爲路王兵所得, 囚之

華州獄,已而殺之。晉高祖立,贈侍中〇。

○ 彥稠與思同俱以敗走,時愍帝猶在,唐未亡,二人走歸國,於節未虧,異於元行欽之走也。 **彥稠直被執見殺爾,餘無可稱,故不列於死事。** 然思同辭義不屈,其死可

新五代史卷二十八

唐臣傳第十六

豆盧革

豆盧革,父瓚,唐舒州刺史。 豆盧爲世名族,唐末天下亂,革避地之中山,唐亡,爲王處

莊宗在魏,議建唐國、而故唐公卿之族遭亂喪亡且盡,以革名家子,召爲行臺左丞相。

直掌書記。

高。 莊宗 貶南海,後事梁爲禮部侍郎。 書郎蕭希甫駁正,革頗患之。 即位,拜同中書門下平章事。 革以說能知前朝事,故引以佐己,而說亦無學術,徒以流品自 莊宗已滅梁,革乃薦韋說爲相。 革雖唐名族,而素不學問, 除拜官吏,多失其序,常爲尙 說,唐末爲殿中侍御史,坐事

是時 ,莊宗內畏劉皇后,外惑宦官、伶人,郭崇韜雖盡忠於國,而亦無學術,革、說俯仰

唐

员

傳第十六

豆鼠

旅 纠 朝 利 綶 有 所 默 狂 號 至 部部 無 建 紀 哭道 有私 所 銓 綗 爲 崔 未 一路者 一片路出 **沂等皆貶**, 立 是歲冬,選 唯 ,議者以爲宜革 敕 詸 不 端等。 可 勝數。 而已。 人吳延皓改亡叔 說、 革詣閣 及崇韜死, 以漸 唐、梁之際, 而季父、母舅反拜姪、甥者, 門待罪。 . · · ; 而 崇韜疾惡太甚, 以告身行 說 , 仕宦 乃教門人上書言其事 由是 事 遭亂奔亡, 事發, 以新 果於必行,說、 法從 延皓及選吏尹政皆坐 丽 崇韜 事 吏部銓文書不完, 問請論 往往 而 議 革心 以 以僞 者 法。 亦 知 以 濫 其 是 罪 駁放 死 未 時 因緣以爲姦 行,倘 唐 可 而 新 **斃**踣 書左 丽 滅 不能 堀 丞

宰相 使孔 陛 下 謙 是 威德著 成歲, 水旱 謙 大 不 毕 于 知 水 应 所 相 四 爲。 海 職 万 , 今西兵 也。 地 樞 」莊宗乃命學士草 密 連震,流民殍死者數萬 小 吏段徊 、破蜀,所得珍寶億萬, 曰:「臣嘗見前 一韶,手 人,軍 自 1書之, 朝 可以給 故事 士妻子皆採稆以 以問 軍 國有大故, 革 水旱, 說。 天之常道 則天子 食。 革、 說 莊宗 不 以 不足 能 朱 日 對 書 以 憂 御 責 第 也。 札 問 ы

爲拾 遺 革 ·自爲 一,父子同省,人以爲非, 相 遭 天下多故, 而 遽改佗官, 方服 丹砂 鍊氣以求 而革以說子爲 長 生,嘗 弘文館學士, 疅 m 數 日 幾死。 說以革子為集賢院 人 各以 其 學

客 趣 使入朝。 莊宗 崩 革為 樞密使安重海詬之于朝曰:「山陵使名尚在,不俟改命, Ш 一陵使, 莊宗 已附 廟 革 以故 事 置 出鎮 乃還 私 第, 數 遽履新朝, 日 未 得 命, 以我武人 而 拉 人 省

唐 臣 僔 第 -|-六 盧 稈

溆 可欺邪! 州 說賣官與選人,責授革費州司戶參軍,說夷州司戶參軍,皆員外置同正員。 刺 史,所在馳驛發遣。 ·]諫官希旨,上疏誣|革縱田客殺人,說坐與隣人爭井,遂俱罷。 宰相鄭珏、任圜三上章,請毋行後命,不報。 革贬辰州刺史, 武 革復坐請俸私自 已而竄革陵

州 說合州,皆長流百姓。

與之。 兵伐蜀 季 與無 初,說嘗以罪竄之南海,遇赦,還寓江陵,與高季興相知,及爲相,常以書幣相問遺。 及革、說再貶,因以其事 ,季興請以兵入三峽,莊宗許之,使季興自取變、忠、萬、歸、峽等州爲屬郡。 功,而唐用佗將取五州。 歸罪二人。 明宗初即位,季興數請五州,以謂先帝所許,朝廷不得已而 天成二年夏、韶陵、合州刺史監賜自盡。 及破蜀, 唐

|革子昇 說子濤,皆官至尙書郎,坐其父廢。 至晉天福初,濤爲尚書膳部員外郎,卒。

盧程

族, 變服爲道 與程門地相等, **盧程**,不知其世家何人也。 一士,遊諸 提 侯間。 因共薦之以爲河東節度推官。 豆盧革爲王處直判官, 唐昭宗時,程舉進士,爲鹽鐵出使巡官。 盧汝弼爲河東節度副使,二人皆故唐時名 唐亡、避亂燕、趙,

置酒 . 謂監軍張承業日:「吾以巵酒辟一書記於坐。」 莊宗嘗召程 草文書,程辭不能。 其後戰胡柳, 因舉巵屬巡官馮道。 掌書記|王緘歿于陣(こ), 莊宗還軍太原, 程位在道上,以嘗

辭不能,故不用,而遷程支使。 程大恨曰:「用人不以門閥而先田舍兒邪!」

入 百 言 度 豆 人未備 |盧革興程皆故||唐時名族,可以爲相,||莊宗以程爲中書侍郎、同平章事。是時, 莊宗 已卽位,議擇宰相,而盧汝弼、蘇循已死,次節度判官盧質當拜,而質不樂任事,乃 |莊||宗聞其聲以問左右, 對曰:「宰相檐子 朝廷新造,

蟲 之,乃罷爲右庶子。 少 争 、門。」莊宗登樓視之,笑曰:「所謂似是而非者也。 少忤其意,必加笞辱。人有假驢夫於程者,程帖興唐府給之,府吏啓無例,程怒笞吏背。 謂 ,任圜,莊宗姊婿也,詣程訴其不可。 程 恃婦家力也 郭崇韜曰:「殷悞相 奉皇 一太后册, ! 莊宗入路,程於路墜馬,中風卒,贈禮部尚書。 宰相取給州縣,何爲不 `自魏至太原,上下山險,所至州縣,驅役丁夫,官吏迎拜,程坐肩 此癡物, 敢辱予九卿 程 问! 戴華陽巾,衣鶴氅, ! 」園不對 趣令自盡, 而 去, 夜馳 崇韜亦欲殺之, 據几 至 決事, 博州見莊宗。 視 圜駡曰:「爾何 賴盧質力解 莊宗大 爽自

邪?仁者之勇,何其壯也!」 嗣昭 李嗣 卒免於禍, 圜之力也。 嗣昭畫守計,甚嘉之,由是益知名。 危 昭節度昭義,辟圜觀察支使。 任圜,京兆三原人也。 一甚,問圜去就之計,圜勸嗣昭堅守以待,不可有二心。 嗣昭從莊宗戰胡柳,擊敗梁兵,圓頗有功,莊宗勞之日:「儒士亦破體 爲人明敏,善談辯,見者愛其容止,及聞其論議縱橫,益皆悚動。 梁兵築夾城圍路州,踰年而晉王薨,晉兵救潞者皆解去。 其後嗣昭與莊宗有隙,圜數奉使往來,辨釋讒構, 已而莊宗攻破梁夾城,聞圜爲 嗣昭

乃遺子送狀乞降, 布款誠,以此計之,子亦難免。 球等閉城堅守,不可下, 圜數以禍福諭鎭 曰:「以子先人,固難容貸,然罰不及嗣,子可從輕。 曰:「城中兵食俱盡,而久抗王師,若泥首自歸,懼無以塞責,幸公見哀,指其生路。」 圜告之 張文禮弑王鎔,莊宗遣嗣昭討之。 人皆稱園其言不欺。 然坐而待弊,曷若伏而俟命?」處球流涕曰:「公言是也! 既而佗將攻破鎭州, 嗣昭戰歿,圜代將其軍,號令嚴肅。 人, 鎭人信之。 其如拒守經年,傷吾大將,一朝困竭,方 國嘗擁兵至城下,處球登城呼園 處球雖見殺,而鎭之吏民以嘗 既而文禮子處

唐

乞降,故得保其家族者甚衆。

許 獻 年 端等 氏者尤有色,彭略 多爲其 崇韜 郭崇韜 其 T, 崇韜 /後以鎭 因 八所賣。 兼領 以 鎭 深德彭,不殺, 州爲北京,拜圜 成 州 及崇韜 事託 德軍節度使, 守者匿之。 之,而圜 領鎮 由是 工部尚書,兼真定尹、北京副留守知留守事,爲政有 改圓 多所違異。 彭爲園謀隱公廨錢。 與圓 後 事 行 有隙。 予覺 軍司 ,召彭詣京師, 初, 馬,仍知 同光三年, 圜 推 真定府 官張彭爲人傾險 莊宗遣官 將罪之,彭懼, 圜 靇 事。 司馬,守工 者選故趙王 買 與崇韜素相善,又爲其 貧 悉以前 部尚 震, 一時宮人百 圜 書。 所隱 不 能祭, 公錢簿書 惠愛。 餘 信 有 明 任 司

| 群等兵 便之。 中 懇 書 解 不 魏 就 下 Ŧ 擊敗 一繼岌暨崇韜伐 卒 章事 繼岌殺崇韜 延孝 , 於漢州 兼 級判三司 蜀 ,以圜代將其軍而旋。 m 懼圓 魏王 是時, 文已於後, |先至渭南,自殺, 明宗新 誅孔謙, 乃辟圜參魏王 康 延孝反,繼岌 圜悉將其軍 軍 事 俊, 遣圜將 以東。 抑絕僥倖,公私 蜀 滅 三千人, 明宗 表圜 嘉 黔南節度使, 其 會董 功, 給 璋 拜 孟 買 同 知 圜

卿崔 雅 不 欲琪 協 是 可 秋 也。」重誨以爲然。 為 **韋**說、 相 謂 豆盧革罷 重 施 日:「李琪 相, 佗目, 園與安重 海、 非 明宗問誰可相者,重誨即以協對。 無 **、文藝** 但不 鄭廷 、孔循 廉 耳 ! 議擇當 宰相 端 爲 相者 方有 器度者足以爲 園前爭日:「重誨 圜 意 屬 李琪 之,太 III 压 未諳 循

唐臣傳第十六 任闡 趙鳳

採擢, 協, 重位 朝 馮道皆拜相。 贸 位 重酶等退休於中興殿廊下,孔循 河乎? [乃何人!」

圓謂重誨曰:「字琪才藝,可兼時輩百人,而讒夫巧沮, 近人物,爲人所賣。 如棄蘇合之丸而取蜣蜋之轉也!」重誨笑而止。 無功 卿等更自詳審。 |肅或未可,則馮書記先朝判官,稱爲長者,可以相矣!」馮書記者 ?幸進,此不 協在相位數年,人多嗤其所爲,然圜與重誨交惡自協始。 知書,以臣 然吾在藩時,識易州 天下皆知崔協不識文字,而虛有儀表,號爲『沒字碑』。臣以陛下誤加 不揖,拂衣而 一人収笑足矣,相位有幾,豈容更益笑端? 刺史章肅 去, 行且駡曰:「天下事 ,世言肅名家子, 然重酶終以循言爲信, 忌害其能,若舍琪而相 " 且待我甚厚, 置之此 一則任圜, 了,道也。 」明宗曰:「宰相 居月餘, 二則任圜 議未決, 協與

給券卒自內出,圜益憤沮。 益 也。」宮人奏曰:「妾在長安, 辨於帝前, 相惡。 故時使臣出四方,皆自戶部給券,重誨奏請自內出,圜以故事爭之,不能得, 而園邊求罷職,乃罷爲太子少保。 **園聲色俱厲。** 明宗罷朝,後宮嬪御迎前問曰:「與重誨論者誰? 重誨嘗過圜,圜出妓,善歌而有色,重誨欲之,圜不與,由是二人 見宰相奏事,未嘗 園不自安,因請致仕,退居于磁州 如此, 蓋輕大家耳! 」明宗由是不悅, 」明宗曰:「宰相 **遂與重**酶 而使臣

朱守殷 知而不問,爲下詔,坐圜與守殷通書而言涉怨望。 反于汴州,重海誣圜與守殷連謀,遣人矯制殺之。 愍帝即位,贈圜太傅。 圜受命怡然,聚族酣飲而死。

趙鳳

燕王 度判官。 弟守奇自匿。 趙 鳳, 晉取鄭州 幽州人也,少以儒學知名。 ,莊宗聞鳳名,得之喜,以爲扈鑾學士。 守奇奔梁,梁以守奇爲博州刺史, 燕王劉守光時,悉黥燕人以爲兵,鳳懼,因髡爲僧,依 鳳爲其判官。 莊宗卽位,拜鳳中書舍人、翰林 守奇卒, 鳳去為鄆州 節

固請 牋上全義,以父事之,鳳上書極言其不可。 不可以示天下。」是時,皇后及羣小用事,鳳言皆不見納。 [籍沒,鳳又上書言:「繼孫爲全義養子,不宜有別籍之財, 莊宗及劉皇后幸河南尹張全義第,酒酣, 全義養子郝繼孫犯法死,宦官、伶人冀其貲財, 命皇后拜全義爲父。 而於法不至籍沒, 明日, 遣宦者命學士作 刑人利

循教重誨求儒者置之左右,而兩人皆不知唐故事,於是置端明殿學士,以馮道及鳳爲之。 明宗武君,不通文字,四方章奏,常使安重誨讀之。 重酶亦不知書, 奏讀多不 一稱旨。 汎

下,而結銜又在官下。 鳳好 直 丽 性 削 強,素與任園善,自園 明年,鳳遷禮部侍郎,因諷圜升學士於官上,又詔班在翰林學士上。 爲相,頗薦進之。 初,端明殿學士班在翰林學士

園天下義士,豈肯謀反!而公殺之,何以示天下?」

重海慚不能對。

人,皆將奔走吉凶之說,轉相惑亂,爲患不細。」明宗遂不復召 思玄豹以爲神,將召至京師,鳳諫曰:「好惡,上所愼也。今陛下神其術而召之,則傾國之 也,此不足當之。」乃指明宗於下坐曰:「此是也!」因爲明宗言其後貴不可言。明宗卽位, 重誨欲試玄豹,乃使佗人與明宗易服,而坐明宗於下坐,召玄豹相之,玄豹曰:「內衙,貴將 術士周玄豹以相法言人事多中,莊宗尤信重之,以爲北京巡官。 明宗爲內衙指揮使,

宰相率百官詣閤,請罷幸鄴,明宗不聽,人情大恐,羣臣不復敢言。鳳手疏責安重誨,言甚 北行,軍中爲之洶洶。而定州王都以爲天子幸汴州誅守殷,又幸鄴以圖己,因疑不自安。 朱守殷反,明宗幸汴州,守殷已誅,又韶幸鄴。是時,從駕諸軍方自河南徙家至汴,不欲

僞。」因以斧斫之,應手而碎。是時,宮中施物已及數千,因鳳碎之乃止。 有僧遊西域, 得佛牙以獻,明宗以示大臣。鳳言:「世傳佛牙水火不能傷, 請驗其眞

切直,重誨以白,遂罷幸。

翰林學士,而嶠亦訐直敢言,與鳳素善。及鳳已貴,而嶠久不遷,自以材名在鳳上而不用, 天成四年夏,拜門下侍郎、同中書門下平章事。 祕書少監于嶠者,自莊宗時與鳳俱爲

唐臣

傳第十六

趙瓜

怒,鳳卽左遷嶠祕書少監。 因 於從者直廬而去。 與蕭希甫數非斥時政,尤詆訾鳳,鳳心銜之,未有以發。 省吏白鳳,嶠溺於客次,且詬鳳。 [嶠因被酒往見鳳] 鳳知其必不遜,乃辭以沐髮, 鳳以其事聞,明宗下詔奪嶠官,長流武 而嶠與隣家爭水醬,爲安重誨所 嶠詬直吏, 又溺

州

百姓,又流振武,天下冤之。

歷艱危,致陛 之所扶持也,若折其一棟,去其一柱,則傾危矣。 中興殿, 啓曰:「臣聞姦人有誣重誨者。」明宗曰:「此閑事,殷已處置之,卿可無問也。」鳳曰: 「臣所聞者,繫國家利害,陛下不可以爲閑。」因指殿屋曰:「此殿所以尊嚴宏壯者,棟梁柱石 其後安重海爲邊彥温等告變,明宗韶彥温等廷詰,具伏其詐,卽斬之。 ·|下爲中興主,安可使姦人動搖!」明宗改容謝之曰:「卿言是也。」 遂族<u>彥</u>温等 大臣, 國之棟梁柱石也,且重誨起微賤, 後數日, 鳳奏事

自筮 度使。 其 投蓍而 後 鳳 在鎮 重酶得罪,羣臣無敢言者, [歎日:「吾家世無五十者,又皆窮賤, 所得俸祿, 悉以分將校賓客。 獨鳳數言重誨盡忠。 廢帝 **吾今壽過其數而富貴,** 入立,召爲太子太保。 明宗以鳳爲朋黨, 病足居于家,疾篤, 復何求哉 罷爲安國軍節

二年卒于家。

癥

李襲吉

李襲吉,父圖,洛陽人,或曰唐相林甫之後也。 乾符中, 襲吉舉進士,爲河中節度使李

都推鹽判官。 後去之晉,晉王以爲楡次令,遂爲掌書記。

襲吉博學,多知唐故事。遷節度副使,官至諫議大夫。

晉王與梁有隙,交兵累年,後晉

於暮夜,金戈鐵馬,蹂踐於明時」,歎曰:「李公僻處一隅,有士如此,使吾得之,傅虎以翼 王數困,欲與梁通和,使襲吉爲書論梁,辭甚辨麗。 梁太祖使人讀之,至於「毒手尊拳,交相

襲吉爲人恬淡,以文辭自娛,天祐三年卒。以盧汝弼代爲副使。

」顧其從事微翔曰:「善爲我答之。」及翔所答,書辭不工,而襲吉之書,多傳於世。

也!

故事。 汝弼工書畫,而文辭不及襲吉。 其父簡求爲河東節度使,爲唐名家, 晉王薨,莊宗嗣爲晉王,承制封拜官爵皆出汝弼。十八年,卒。 故汝弱亦多知唐

莊宗即位,贈襲吉禮部尚書、汝弼兵部尚書。

張憲

天雄軍節度使掌 張 憲 字允中,晉陽人也。 手書記。 莊宗卽位,拜工部侍郎、租庸使,遷刑部侍郎、判吏部銓、東都副留 爲人沈靜寡欲,少好學,能鼓琴飲酒。 莊宗素知其文辭,以爲

守。憲精於吏事,甚有能政。

也 乃別治宮西爲鞠場,場未成,莊宗怒,命兩虞候亟毀壇以爲場。 場爲即位壇,於是憲言:「卽位壇,王者所以興也。 莊宗幸東都,定州王都來朝,莊宗命憲治鞠場,與都擊鞠。 漢鄗南、魏繁陽壇, 杒, 憲退而歎曰:「此不祥之兆 莊宗建號於東都, 至今皆在, 不可毁。」 以鞠

緒,今復何在?」

這瓊爲憲解之乃已。 其嬖伶史彥瓊曰:「我與羣臣博,須錢十餘萬,而憲以故紙給我。 **責**>>>>> **宣憲馳自取之,左右諫之乃止。又問憲庫錢幾何?憲上庫簿** 初, 明宗北伐契丹,取魏鎧仗以給軍,有細鎧五百,憲遂給之而不以聞。 有錢三萬緡,莊宗益怒, 我未渡河時, 莊宗至魏, 庫錢常百 大

郭崇翰伐蜀 薦憲可任爲相,而宦官、伶人不欲憲在朝廷,樞密承旨段徊曰:「宰相在天

方。」乃以爲太原尹、北京留守。 面 前,事有非是,尙可改作,一方之任,苟非其人,則爲患不細。 憲材誠可用,不如任以一

求生,彥超麾下兵大髞,殺存霸。 張昭遠教憲奉表明宗以勸進,憲涕泣拒之。已而存霸削髮,見北京巡檢符彥超,願爲僧以 莊宗遇弒,明宗入京師,太原猶未知,而永王存霸奔于太原。 「吾本書生,無尺寸之功,而人主遇我甚厚,豈有懷二心以幸變,第可與之俱死爾 上存亡未可知,存霸之來無詔書,而所乘馬斷其鞦,豈非戰敗者乎!宜拘之以俟命。」憲曰: 趙 在禮作亂、憲家在魏州,在禮善待其家,遣人以書招憲,憲斬其使,不發其書而上之。 憲出奔沂州,亦見殺。 左右告憲曰:「今魏兵南嚮,主 !」憲從事

俱死, 死,予亦以爲不然。 調忠矣。 莫得而考正。 憲之事,尤爲之痛惜也。予於舊史考憲事實,而永王存霸、符彥超與憲傳所書始末皆不同, 嗚呼!予於死節之士,得三人而失三人焉。 及存霸被殺,反棄太原而出奔, 當其不顧其家,絕在禮而斬其使,涕泣以拒昭遠之說,其志甚明。 蓋方其變故倉卒之時,傳者失之爾。 然要其大節,亦可以見也,憲之志誠可 予之於憲固欲成其美志,而要在憲失其官守而其死不明, 然猶不知其心果欲何爲也。 **鞏廷美、楊温之死,予旣已哀之。** 而舊史書憲坐棄城 至其欲與存霸 故不得列于 至於張 而賜

Æ

臣

傳第十

六

張

脂希

Ħì

死節也。

蕭希甫

爲靑州節度使,以希甫爲巡官。 蕭 希甫,宋州人也。 爲人有機辯,多矯激,少舉進士,爲梁開封尹袁象先掌書記。 希甫不樂,乃棄其母妻,變姓名,亡之鎭州, 自 一稱青州 掌書 象先

宗將建國 于魏,置百官,求天下隱逸之士,幽州李紹宏薦希甫爲魏州推官。

鎔以希甫爲參軍,尤不樂,居歲餘,又亡之易州,

削髮爲僧,居百丈山。

莊

記,謁趙王王鎔。

莊宗

即帝位,欲以知制誥,

有韶定內宴儀,問希甫:「樞密使得坐否?」希甫以爲不可。

事 ? 樞 !密使脹居翰聞之怒,謂希甫曰:「老夫歷事三朝天子,見內宴數百,子本田 」希甫不能對。 由是宦官用事者皆切齒。 宰相豆盧革等希宦官旨,共排斥之,以爲駕 舍見,安知宮禁

部郎中,希甫失志,尤怏怏。

燛 居于魏州,人有引漢李陵書以譏之曰:「老母終堂,生妻去室。」時皆傳以爲笑。 莊宗滅梁,遣希甫宣慰青齊, 希甫始知其母已死, 而妻袁氏亦改嫁矣。 希甫 乃發哀服

|明宗卽位,召爲諫議大夫。是時,復置颳函,以<u>希甫爲使,希甫建言:「自兵亂相乘,王綱</u>

與隣人爭井,井有寶貨。」有司推劾,井中惟破釜而已,革、說終皆貶死。 豆盧革、韋說頗沮難之。其後革、說爲安重誨所惡,希甫希旨,誣奏:「革縱田客殺人,而說 紀。而颳函一出,投訴必多,至於功臣貴戚,有不得繩之以法者。」乃自天成元年四月二十 八日昧爽已前,大辟已上,皆赦除之,然後出匭函以示衆。初,明宗欲以希甫為諫議大夫, 大壞,侵欺凌奪,有力者勝。凡略人之妻女,占人之田宅,姦贓之吏,刑獄之冤者,何可勝 明宗賜希甫帛百

匹、栗麥三百石,拜左散騎常侍。

起,因大詬詈。 入,道等坐廊下不起,旣出,希甫召堂頭直省朝堂驅使官,責問宰相、樞密見兩省官何得不 廷,宰相馮道、趙鳳, 狀,斬筠,軍士詣安重誨求希甫啖之。是時,明宗將有事於南郊,前齋一日,羣臣習儀于殿 希甫性褊而躁進,嘗遣人夜叩宮門上變,言河堰牙官李筠告本軍謀反,詰旦,追問無 是夜、託疾還第。 河南尹秦王從榮 月餘, 坐告李筠 事動搖軍衆,貶嵐州司戶參軍,卒于貶 樞密使安重誨候班于月華門外。 希甫與兩省班先

劉贊

時,累遷中書舍人、御史中丞、刑部侍郎。 由 食食贊於牀下,謂之曰:「肉食,君之祿也,爾欲之,則勤學問以干祿; · 是贊益力學,舉進士。爲羅紹威判官,去爲租庸使趙巖巡官,又爲孔謙鹽鐵判官。 劉 魏州人也。 。父玭爲縣令,贊始就學,衣以青布衫櫺,每食則玭自肉 守官以法,權豪不可干以私 吾肉,非爾之食也。」 而別以蔬

事 ,因請王得自擇,秦王卽請贊,乃拜贊祕書監,爲秦王傅。 贊泣曰:「禍將至矣!」 是時,秦王從榮握兵而驕,多過失,言事者請置師傅以輔道之。大臣畏王,不敢決其

率以正道。秦王嘗命賓客作文於坐中,贊自以師傅,恥與羣小比伍,雖操筆勉彊,有不悅之 秦王惡之,後戒左右對來不得通,對亦不往,月一至府而已,退則杜門不交人事 秦王所請王府元帥官屬十餘人,類多浮薄傾險之徒,日獻諛諂以驕王,獨贊從容諷諫,

其 在 意 女皆死, 與其謀。 職 爾,使秦王得入光政門,當待贊等如何?吾徒復有家族邪!且法有首從,今秦王夫婦 不逾月,詹事王居敏及劉贊皆以正直爲王所惡, 已而秦王果敗死,唐大臣議王屬官當坐者,馮道曰:「元帥判官任贊與秦王非素好,而 而贊等止其一身幸矣!」道等難之。 而諮議參軍高輦與王最厚,輦法當死,其餘可次第原減。」朱弘昭曰:「諸公不知 而馮贇亦爭不可, 河南府判官司徒詡病告家居久,皆宜 贊等乃免死。

實僚奪官者乎,不死幸矣!」已而贊長流嵐州百姓。 初,贊聞秦王敗,即白衣駕驢以俟,人有告贊奪官而已:贊曰:「豈有天子冢嗣見殺, **清泰二年,詔歸田里,行至石會關,** 而 病

何瓚

何瓚,閩人也,唐末舉進士及第。 莊宗爲太原節度使,辟爲判官。 莊宗每出征伐,留張

莊宗建大號于鄴都,拜瓚諫議大夫,瓚

盧莊宗事不成,求留守北京。

時,孟知祥已有二志,方以副使趙季良爲心腹,聞瓚代之,亟奏留季良,遂改瓚行軍司馬。 **瓚與明宗有舊,明宗卽位,召還,見於內殿,** 勞問久之,已而以瓚爲西川節度副使。 是

原,知祥以軍禮事瓚,瓚常繩以法,知祥初不樂,及瓚爲司馬,猶勉待之甚厚。 司馬,置之私第,瓚飮恨而卒。 瓚恥於自辭,不得已而往,明宗賜予甚厚。 初, 知祥在北京為馬步軍都虞候,而瓚留守太 知祥反,罷瓚

唐臣傳第十六 何瓚 校勘記

校勘記

(二)王緘 薛史卷六○有傳作「緘」,又本史卷七二四夷附錄及契丹國志卷一六韓延徽傳並及此人,皆作 「緘」,百衲、貴池本作「諴」,南監、汪、汲◆殿、鄂、蜀、劉校本作「緘」,惟南昌本作「緘」。按

「緘」。據改。

二八

新五代史卷二十九

晉臣傳第十七

桑維翰

舉進士,可以從佗求仕者,維翰慨然,乃著日出扶桑賦以見志。又鑄鐵硯以示人曰:「硯弊 則改而佗仕。」卒以進士及第。晉高祖辟爲河陽節度掌書記,其後常以自從。 如一尺之面。」慨然有志於公輔。 桑維翰字國僑, 河南人也。 爲人醜怪,身短而面長,常臨鑑以自奇曰:「七尺之身,不 初舉進士,主司惡其姓,以「桑」「喪」同音。 人有勸其不必

興晉,維翰之力也。高祖即位,以維翰爲翰林學士、禮部侍郎、知樞密院事,遷中書侍郎、同 己以篡唐。 遠贊成之,因使維翰爲書求援於契丹。耶律德光已許諾,而趙德鈞亦以重賂啖德光,求助 高祖自太原徙天平,不受命,而有異謀,以問將佐・將佐皆恐懼不敢言,獨維翰與劉知 高祖懼事不果,乃遣維翰往見德光,爲陳利害甚辯,德光意乃決,卒以滅唐而

晋

中書門下平章 兼樞密使。 天福四年,出爲相州節度使,歲餘 、徙鎮

祖在鄴,維翰來朝,徙鎭晉昌。 高祖 「北面之事,方撓吾胸中,得卿此疏,計已決矣,可無憂也。」維翰又勸高祖幸鄴都。 重違 吐渾 重榮 T 白 承 福爲契丹所迫,附鎭州安重榮以歸晉,重榮因請與契丹絕好,用吐渾以攻之。 意未決。維翰上疏言契丹未可與爭者七, 高祖召維翰使者至臥內,謂曰: 七年,高

密院學士皆廢。 以爲浮薄。天福五年九月,詔廢翰林學士,按唐六典歸其職於中書舍人,而端明殿學士、樞 制 事無巨細,一以委之。數月之間,百度寖理。初,李瀚爲翰林學士,好飮而多酒過,高 契丹而安天下,非用維翰不可。」乃出延廣於河南,拜維翰中書令,復爲樞密使,封魏國 出帝卽位,召拜侍中。 及維翰爲樞密使,復奏置學士,而悉用親舊爲之。 而景延廣用事,與契丹絕盟,維翰言不能入,乃陰使人說帝曰:

見疎。 維 唯輸以爲 帝欲 維 帝飲 翰 開 權勢旣盛,四方賂遺,歲積鉅萬。 ·驟黜維翰,大臣劉昫、李崧皆以爲不可,卒以玉爲樞密使, 酒過度得疾,維翰遣人陰白太后,請爲皇弟重睿置師傅。 封 尹。 維 |翰遂稱足疾,稀復朝見。 內客省使李彥韜、端明殿學士馮玉用事,共讒 既而以爲相,維翰 帝疾愈,知之,怒,乃罷

契丹 了屯<u>中渡,破欒城,杜重威等大軍隔絕,維翰曰:「事急矣!」乃見馮玉等計事,而謀</u> lis.

不合。又求見帝,帝方湖鷹於苑中,不暇見,維翰退而數曰:「晉不血食矣!」

邪 ! 赴侍衞司獄。 德光至京師,使人檢其尸,信爲縊死,乃以尸賜其家,而貲財悉爲彥澤所掠。 人縊殺之,以帛加頸,告德光曰:「維翰自縊。」德光曰:「我本無心殺維翰,維翰何必自致。」 未嘗不流汗。初,彥澤入京師,左右勸維翰避禍,維翰曰:「吾爲大臣,國家至此,安所逃死 貌旣異,素以威嚴自持,晉之老將大臣,見者無不屈服,彥澤以曉捍自矜,每往候之,雖多月 嘗議毋絕盟而已違之也,不欲使維翰見德光,因諷彥澤圖之,而彥澤亦利其貲產。 安得無禮邪!」彥澤股栗不敢仰視,退而謂人曰:「吾不知桑維翰何如人,今日見之,猶使人 兩人爲言。 」安坐府中不動。彥澤以兵入,問:「維翰何在?」維翰厲聲曰:「吾,晉大臣,自當死國 E如此,其可再見乎?」乃以帝命召維翰。 自契丹與晉盟,始成於維翰,而終敗於景延廣,故自兵興,契丹凡所書檄,未嘗不以此 耶律德光犯京師,遣張彥澤遺太后書,問此兩人在否,可使先來。 維翰知不免,顧崧曰:「相公當國,使維翰獨死?」崧慚不能對。 維翰行,遇李崧,立馬而語,軍吏前白維翰,請 是夜,彥澤使 而帝以維翰 維翰狀

景延廣

以挽 九疆見稱。 景 延廣字航川,陝州人也。 事梁邵王友誨,友誨謀反被幽,延廣亡去。後從王彥章戰中都,彥章敗,延廣 父建善射, 嘗教延廣曰:「射不入鐵, 不如不發。」由是 延度

身被數創,僅以身冤。

徙鎭河陽三城,遷馬步軍都指揮使,領天平。 誅, 重 「練使,徙領寧江軍節度使。 天福四年,出鎭義成,又徙保義,復召爲侍衞馬步軍都虞侯, 高祖惜其才,陰縱之使亡,後錄以爲客將。 明宗時,朱守殷以汴州反,晉高祖爲六軍副使, 高祖 即位,以爲侍衞步軍都指揮使, 主誅從守殷反者。 延廣爲汴州軍校當 領果州

也,因請載于紙,以備遺忘。延廣敕吏具載以授瑩,瑩藏其書衣領中以歸,具以延廣語告契 十萬口, 翁要戰, 則來, 佗日不禁孫子, 取笑天下。」瑩知其言必起兩國之爭, 懼後無以取信 者喬瑩曰:「先皇帝北朝所立,今天子中國自册, 獨不肯,但致書稱孫而已,大臣皆知其不可而不能奪。契丹果怒,數以責晉,延廣謂契丹使 高祖崩,出帝立,延廣有力,頗伐其功。 初,出帝立,晉大臣議告契丹,致表稱臣,延廣 可以爲孫,而不可爲臣。且晉有橫磨大劍

銀、飾以龍鳳、又進帛五千匹,綿一千四百兩,馬二十二匹,玉鞍、衣襲、犀玉、金帶等,請賜 天福八年秋,出帝幸大年莊還,置酒延廣第。 延廣所進器服、鞍馬、茶牀、椅榻皆裹金

契丹益怒。

從官, 孔目官等稱是。時天下旱、蝗,民餓死者歲十數萬,而君臣窮極奢侈以相誇尙如此 自皇弟重睿, 下至伴食刺史、重睿從者各有差。 帝亦賜延廣及其母、妻、從事、押衙、

留守西京。 不得與,故契丹凡所書檄,未嘗不以延廣爲言。契丹去,出帝還京師,乃出延廣爲河南尹, 已去,延廣獨閉壁不敢出。 契丹嘗呼晉人曰:「景延廣喚我來,何不速戰?」是時,諸將皆力戰,而延廣未嘗見敵。 軍救之,三將得出,皆泣訴。然延廣方握親兵,恃功恣橫,諸將皆由其節度,帝亦不能制也。 城,高行周、符彥卿兵少不能救,馳騎促延廣益兵,延廣按兵不動。三將被圍數重,帝自御 明年春,契丹入寇,延廣從出帝北征爲御營使,相拒澶、魏之間。 明年,出帝幸澶淵,以延廣從,皆無功。 自延廣一言而契丹與晉交惡,凡號令征伐一出延廣,晉大臣皆 先鋒石公霸遇虜於戚 契丹

廣來,而割鎭、定與我,乃可和。」晉知其不可,乃止。契丹至中渡,延廣屯河陽,聞杜重威 妓樂,惟意所爲。 延廣居洛陽,鬱鬱不得志。見晉日削,度必不能支契丹,乃爲長夜之飲,大治第宅,園置 後帝亦追悔,遺供奉官張暉奉表稱臣以求和,德光報曰:「使桑維翰、景延

西走閩,必追而取之。」而延廣顧盧其家,未能引決,廣騎奄至,乃與從事閻丕馳騎見德光於 <u>德光犯京師,行至相州,遺騎兵數千雜晉軍渡河趨洛,以取延廣,戒曰:「延廣南奔吳,</u> 降,乃還。

晉臣傳

第十

را-

景延

吳

服。 高祖時,贈侍中。 封丘 廣曰:「南北失權,皆因爾也。」召喬瑩質其前言,延廣初不服,瑩從衣領中出所藏書,延廣乃 一,丼丕見鎖。 將送之北行,至陳橋,止民家。夜分,延廣伺守者殆,引手扼吭而死,時年五十六。 因以十事責延廣,每服一事,授一牙籌,授至八籌,延廣以面伏地,不能仰視,遂叱而鎖 延廣曰:「丕,臣從事也,以職相隨,何罪而見鎖?」丕乃得釋。 徳光責延

也同,其故何哉。蓋夫本末不順而與夷狄共事者,常見其禍,未見其福也。可不戒哉!可 連,敗約起爭,發自延廣。然則晉氏之事,維翰成之,延廣壞之、二人之用心者異,而其受禍 空國興師,應若符契,出危解難,遂成晉氏,當是之時,維翰之力爲多。及少主新立,釁結兵 然方其以逆抗順,大事未集,孤城被圍,外無救援,而徒將一介之命,持片舌之彊,能使契丹 嗚呼, 自古禍福成敗之理,未有如晉氏之明驗也!其始以契丹而興,終爲契丹所滅。

吳巒

不戒哉!

死事。

太原, 守,契丹以兵圍之。高祖入立,以雲州入于契丹,而巒猶守城不下,契丹圍之凡七月。高祖義 吳巒字寶川, 召契丹爲援, ,鄆州盧縣人也。少舉明經不中,清泰中爲大同沙彥珣節度判官。晉高祖起 契丹過雲州,彥珣出城迎謁,爲契丹所虜。城中推巒主州事,巒即閉門拒

| 一個所為,乃以書告契丹,使解兵去。高祖召轡,以爲武寧軍節度副使、諫議大夫、復州防禦使。

亂, 開運 善撫 周 薪草焚其梯衝殆盡。 其子崇範以自隨。 憀,乃陰使人亡入契丹,言具州積粟多而無兵守,可取。 顯德中卒。 4十萬, 即投 士卒,會天大寒,裂其帷幄以衣士卒,士卒皆愛之。 元年正月,契丹南寇,圍貝州,巒命珂守南門。 出帝卽位,與契丹絕盟,河北諸州皆警,以謂貝州水陸之衝,緩急可以轉餉,乃積芻粟 ,以王令温爲永淸軍節度使。令温牙將邵珂, 并死。 令温 而令温家屬爲契丹所虜,出帝憫之,以令温爲武勝軍節度使, 源州 晉大臣以巒前守雲州七月,契丹不能下,乃遣巒馳驛代令温守貝州。 已而 河間 ||珂自南門引||契丹入,||轡守東門方戰,而左右報||珂反, 人也口。 契丹圍三日,四面急攻之,巒從城上投 素驕很難制, 珂因求見樹,願自效,樹推心信之。 令温以事朝京師,心頗疑珂,乃質 令温奪其職。 後累歷方鎮, 巒顧城中已 珂開居無 巒

王令溫疑邵珂而質其子矣,樹不能察其好,反委以兵。 及契丹入貝州,又不拒戰,遠投井死,其死不足貴,故不列於

新五代史卷三十

漢臣傳第十八

蘇逢吉

蘇逢吉,京兆長安人也。漢高祖鎭河東,父悅爲高祖從事,逢吉常代悅作奏記,悅乃言

之高祖。 高祖召見逢吉,精神爽秀,憐之,乃以爲節度判官。

通,逢吉輒取內之懷中,何高祖色可犯時以進之,高祖多以爲可,以故甚愛之。然逢吉爲人 高祖性素剛嚴,賓佐稀得請見,逢吉獨入,終日侍立高祖書閣中。兩使文簿盈積,莫敢

囚,無輕重曲直悉殺之,以報曰:「獄靜矣。」 貪詐無行,喜爲殺戮。 高祖嘗以生日遺逢吉疏理獄囚以祈福,謂之「靜獄」。 逢吉入獄中閱

逢吉以爲己任。 高祖建號,拜逢吉中書侍郎、同中書門下平章事。是時,制度草創,朝廷大事皆出逢 然素不學問,隨事裁決,出其意見,是故漢世尤無法度,而不施德政,民

漢

15

傳第十

· 八

蘇隆古

莫有所稱焉。

曮子,家世王侯,當有奇貨,使人告永吉,許以一州,而求其先王玉帶,永吉以無爲解,逢吉 楚王重路,遣人求之,許以一州,筠怏怏,以其橐裝之半獻之。而皆不得州。 乃使人市一玉帶,直數千緡,賣永吉償之,前客省使王筠自晉末使楚,至是還,逢吉意筠得 離 華。 高 祖旣定京師,逢吉與蘇禹珪同在中書,除吏多違舊制。 然高祖方倚信二人,故莫敢有告者。 鳳翔李永吉初朝京師,逢吉以永吉故秦王從 逢吉尤納貨路,市權器官,謗

^{常嶼、}(叢等,下獄,)||松款自誣伏:「興家僮二十人,謀因<u>高祖山陵爲亂。」獄上中書,逢吉改「二</u> 十人」爲「五十人」,遂族崧家。 晉相李崧從契丹以北,高祖入京師,以崧第賜逢吉,而崧別有田宅在西京,逢吉遂皆取

暴之山麓、宛轉號呼、 者張令柔盡殺平陰縣十七村民數百人。衞州 十數共逐盜,入于山 盜族誅,已非王法, 沉鄰保乎!」逢古恡以爲是,不得已, 但去族誅而已。 是時,天下多盜,逢吉自草詔書下州縣,凡盜所居本家及鄰保皆族誅。或謂逢吉曰:「爲 中,盜皆散走。 累日而死。 聞者不勝其冤, 仁魯從後至,見民捕盜者,以爲賊,悉擒之, 刺史葉仁魯聞部有盜 而逢吉以仁魯爲能,由是天下因盜殺人 自 帥兵捕之。 於是 御州 斷其脚筋, 時村民 捕賊使

滋濫。

妻武氏卒, 逢吉已貴,益爲豪侈,謂中書堂食爲不可食,乃命家廚進羞, 諷百官及州鎭皆輸綾絹爲喪服。 武氏未期, 除其諸子爲官。 日極珍善。 繼母死, 有庶兄自外

來,未白逢吉而見其諸子,逢吉怒,託以它事告於高祖,杖殺之。

逢吉嘗從高祖征鄴,數使酒辱周太祖於軍中,太祖恨之。 其後隱帝立,逢吉素善李濤

諷濤 請罷太祖與楊邠樞密。 李太后怒濤離間大臣,罷濤相, 以楊邠兼平章事,事悉關決。

逢吉、禹珪由是備位而已。乾祐二年,加拜司空。

弘肇 議。 周太祖鎭鄴,不落樞密使,逢吉以謂樞密之任,方鎭帶之非便, 弘肇怨逢吉異己,已而會王章第,使酒坐中,弘肇怒甚。 興史弘肇爭, 於是卒如 逢吉謀求出鎮以避之,

既而 中輟,人問其故,逢吉曰:「苟捨此而去,史公一處分,吾虀粉矣!」

殺、爲左右所止。 每見業等,以言激之,業等卒殺弘肇,即以逢吉權知樞密院。方命草麻,聞周太祖起兵, 無吉事也。」周太祖至北郊,官軍敗于劉子陂。 逢吉夜宿金祥殿東閣,謂司天夏官正王處訥曰:「昨夕未瞑,已見李崧在側, 是時,隱帝少年,小人在側。弘肇等威制人主,帝與左右李業、郭允明等皆思之。 明日與隱帝走趙村,自殺於民舍。周太祖定京師,泉其首,適當李崧被刑 逢吉宿七里, 夜與同舍酣飲, 索刀將自 生人接死 逢吉 乃

漢臣

傳第十

八

硃

逢吉

史弘

新 代

之所。 廣順 初, 賜其子西京莊井宅一 區

史弘肇

兵, 使、侍衞步軍都指揮使。 左右指揮,領雷州刺史。 ,隸開道指揮,選爲禁兵。 史弘肇字化元,鄭州榮澤人也。 高祖建號於太原,代州王暉拒命,弘肇攻破之,以功拜忠武軍節度 漢高祖典禁兵,弘肇爲軍校。 爲人驍勇,走及奔馬。 其後,漢高祖鎭太原, 梁末, 調民七戶出一兵,弘肇 使將武 節 爲

城歸漢。 是時契丹北歸、留耿崇美攻王守恩於路州。 而河陽武行德、澤州翟令奇等,皆迎弘肇自歸。 高祖遺弘肇前行擊之,崇美敗走, 弘肇入河陽,高祖從後至,遂入 守恩以

師。

行 兵 、所至,秋毫無犯,兩京帖然。 弘肇爲將,嚴毅寡言,麾下嘗少忤意,立檛殺之,軍中爲股慄,以故高祖起義之初, 高祖疾大漸,與楊邠、蘇逢吉等同授□顧命。 遷侍衞親軍馬步軍都指揮使,領歸德軍節度使、同中書門 弘肇

一作受。

民, 南以嚣茶。 解暉狡酷,因緣爲姦,民抵罪者,莫敢告訴。 女以爲婢。 指示之, 更卽腰斬之。 又爲斷舌、決口、斮筋、折足之刑。 者, 輒腰斬于市。 流言以相驚恐。 隱帝時, 於是前資故將失職之家,姑息僮奴,而廝養之輩,往往脅制其主。 **僮隱其錢,福進笞責之,僮乃誣告福進得趙延壽玉枕,以遺吳人。** 河中李守貞、鳳翔王景崇、永興趙思綰等皆反,關西用兵,人情恐懼,京師之 市有醉者忤一軍卒,誣其訛言,坐棄市。凡民抵罪,吏以白弘肇,但以三 弘肇出兵警察,務行殺戮,罪無大小皆死。是時太白晝見,民有仰觀 燕人何福進有玉枕,直錢十四萬,遣僮賣之淮 李崧坐奴告變族誅, 弘肇捕治,福 弘肇取其幼 侍衛孔目官

進棄市,帳下分取其妻子,而籍其家財。

弘肇不喜賓客,嘗言:「文人難耐,呼我爲卒。」

訟之三司,三司直温。拯訴之弘肇,弘肇以謂潁己屬州,而温不先白己,乃追温殺之,連坐

弘肇領歸德,其副使等月率私錢千緡爲獻。潁州麴場官麴温與軍將何拯爭官務(1),

者數十人。

肇輒斬之。 業等嬉遊無度,而太后親族頗行干託,弘肇與楊邠稍裁抑之。太后有故人子求補軍職,弘 周太祖平李守貞,推功羣臣,弘肇拜中書令。隱帝自關西罷兵,漸近小人,與後贊、李 帝始聽樂, 賜敎坊使等玉帶、錦袍,往謝弘肇, 弘肇怒曰:「健兒爲國征行者未

英臣

傳

第十

八

史弘隆

有偏賜,爾曹何功,敢當此乎!」悉取所賜還官。

教之。 峻置酒公子亭和解之。 若『毛錐子』安足用哉?」三司使王章曰:「無『毛錐子』,軍賦何從集乎?」「毛錐子」,蓋言筆 相,公若殺之,致天子何地乎?」弘肇馳馬去,別送至第而還。 語詬逢吉, 也。 **貸日**「此國家事也,何必介意乎!」途俱飮釂。 貞固第,弘肇厲聲舉爵屬太祖曰:「昨日廷論,何爲異同?今日與公飲此。」逢吉與邠亦舉大 弘肇默然。 周 太祖出鎭魏州,弘肇議帶樞密行,蘇逢吉、楊邠以爲不可,弘肇恨之。明日,會飮竇 蘇逢吉戲日:「坐有姓閻人,何憂罰虧!」弘肇妻閻氏,酒家倡,以爲譏己,大怒,以醜 逢吉不校。 他日,會飲章第,酒酣,爲手勢令,弘肇不能爲,客省使閻晉卿坐次弘肇,屢 弘肇欲歐之,逢吉先出。 弘肇 弘肇日:「安朝廷, 定禍亂, 直須長槍大劍, 起索劍欲追之,楊邪泣曰:「蘇公,漢字 由是將相如水火。

邠、王章等入朝, 鍛甲聲, 數有忿言, 是時 以爲兵至, 李業、郭允明、後贊、聶文進等用事,不喜執政。 業等乘間潛之, 坐廣政殿東廡,甲士數十人自內出,擒弘肇、邠、章斬之,非族其 達旦不寐。 以謂弘肇 由 「是與業等密謀禁中。 一威震人主, 不除必爲亂。 乾祐 而隱帝春秋漸長,爲大臣所制, 三年多十月十三日, 隱帝頗欲除之。 弘肇 夜聞作坊 與楊

弘肇已死,帝坐崇元殿召羣臣,

告以弘肇等謀反,

羣臣莫能對。

又召諸軍校見於萬歲

殿,帝曰:「弘肇等專權,使汝曹常憂橫死,今日吾得爲汝主矣!」軍校皆拜。 追封弘肇鄭王,以禮歸葬。 周太祖即位,

楊邠

楊那,魏州冠氏人也。少爲州掌籍吏,租庸使孔謙領度支,補邪勾押官,歷孟、華、鄆三

州糧料院使。事漢高祖爲右都押衙,高祖卽位,拜樞密使。

使, 洲泣訴李太后前, 太后怒, 罷濤相, 加洲中書侍郎兼吏部尚書、同平章事。 是時, 逢吉、

爲,凡門蔭出身,諸司補吏者,一切罷之。 禹珪頗以私賄除吏,多繆。哪爲相,事無大小,必先示哪,哪以爲可,乃入自,而深革逢吉所

以故秉大政而務苛細,凡前資官不得居外,而天下行旅,皆給過所然後得行。旬日之間,人 |邠雖長於吏事,而不知大體,以謂爲國家者,帑廩實,甲兵完而已,禮樂文物皆虛器也。

那常與王章論事帝前,帝曰:「事行之後,勿使有言也!」 那邊曰:「陛下但禁聲,有臣

情大擾,那度不可行而止。

臣傳

第十八

楊邠

王章

所愛耿夫人爲后,那又以爲不可;夫人死,將以后禮葬之,哪又以爲不可。 在。」聞者爲之戰慄。 李太后弟業求爲宣徽使,帝與太后私以問邪,邠止以爲不可。 由是隱帝大怒, 帝欲立

而左右乘間構之,與史弘肇等同日見殺。

| 邠爲人頗儉靜,四方之略雖不却,然往往以獻於帝。 知史傳有用,乃課吏傳寫。未幾,及於禍。 周太祖卽位,追封弘農王。 居家謝絕賓客,晚節稍通縉紳,延

王章

乃出,爲河陽糧料使。漢高祖典禁兵,補章孔目官,從之太原。 <u></u> **翁白文珂與副招討李周善,乃以章託周。周匿章褚中,以橐駝負之洛陽,藏周第。** 王章、魏州南樂人也。爲州孔目官、張令昭逐節度使劉延皓、章事令昭。令昭敗、章婦 唐滅,章

乏絕。 時,漢方新造,承契丹之後,京師空乏,而關西三叛作,周太祖用兵西方,章供饋軍旅,未嘗 「省耗」,緡錢出入,皆以八十爲陌,章減其出者陌三;州縣民訴田者,必全州縣覆之,以括 高祖即位,拜三司使、檢校太尉。 高祖崩,隱帝卽位,加太尉、同中書門下平章事。 是 然征利剝下,民甚苦之。往時民租一石輸二升爲「雀鼠耗」,章乃增一石輸二斗爲

國邪! 不能滿,往往復增之。 其隱田。 」百官俸廩皆取供軍之餘不堪者,命有司高估其價,估定又增,謂之「擡估」,章猶意 天下由此重困。 民有犯鹽、礬、酒麴者,無多少皆抵死,吏緣爲姦,民莫堪命。 然尤不喜文士,嘗語人曰:「此輩與一把算子,未知顚倒,何益於 已而與

劉銖

史弘肇等同日見殺。

檢校太師、同平章事,又加侍中。 人慘酷好殺戮,高祖以爲勇斷類已,特信用之。高祖卽位,拜永興軍節度使,徙鎭平盧, 劉銖,陝州人也。少爲梁邵王牙將,與漢高祖有舊,高祖鎭太原,以爲左都押衙。 鉄為 加

用,民不堪之。隱帝患銖剛暴,召之,懼不至。是時,沂州郭淮攻南唐還,以兵駐青州,隱帝 之,謂之「隨年杖」。每杖一人,必兩杖俱下,謂之「合歡杖」。又請增民租,畝出錢三十以爲公 苦,錄乃一切禁之。然錄用法,亦自爲刻深。民有過者,問其年幾何,對日若干,卽隨其數杖 民負失期者,務吏擅自攝治,置刑獄,不關州縣。而前爲吏者,納其厚賂,縱之不問。民頗爲 是時,江淮不通,吳越錢鏐使者常泛海以至中國。而濱海諸州皆置博易務,與民貿易。

漢

[]

傳

第十八

劉 劉

李樂

乃遣符彥卿往代錄。錄顧禁兵在,莫敢有異意,乃受代還京師。

與李業等梟首於市,赦其妻子。 馬傷甚,而軍士逼辱,迨有微生,吾欲奏太后,貸其家屬,何如?」羣臣皆以爲善。乃止殺餘 獨無故人之情乎?吾家屠滅,雖有君命,加之酷毒,一何忍也。今公亦有妻子,獨念之 與綠俱見執。 知開封府,周太祖兵犯京師,錄悉誅太祖與王峻等家屬。太祖入京師,錄妻裸露以席自蔽, 鉄嘗切齒於史弘肇、楊邠等,已而弘肇等死,錄謂李業等曰:「諸君可謂僂儸兒矣。」權 銖謂其妻曰:「我則死矣,汝應與人爲婢。」太祖使人責銖曰:「與公共事先帝, 太祖卽位、賜陝州莊宅各一區。

李業

察其變動,以考順逆吉凶而已,禳除之事,非臣所知也。然臣所聞,殆山魈也。」皇太后乃召 中數見怪物投瓦石、撼門扉。 即位,業以皇太后故,益用事,無顧憚。 時天下旱、蝗,黃河決溢,京師大風拔木,壞城門,宮 李業,高祖皇后之弟也。后昆弟七人,業最幼,故尤憐之。高祖時,以爲武德使。隱帝 隱帝召司天趙延义問禳除之法,延义對曰:「臣職天象日時,

漢 臣 魯 第 -八 並 文 雏 後 辔 三十七

尼誦 及聶文進、後贊、郭允明等狎昵,多爲廋語相誚戲,放紙鳶于宮中。太后數以灾異戒帝,不 **"佛書以禳之,一尼如廁,旣還,悲泣不知人者數日,及醒訊之,莫知其然。而帝方與**業

告北兵之來者。及漢兵敗于北郊,業取內庫金寶,懷之以弈其兄保義軍節度使洪信, 懼,謂大臣曰:「昨太草草耳。」業請出府庫以賚軍,宰相蘇禹珪以爲未可,業拜禹珪於帝前 神武統軍袁義、侍衞馬軍都指揮使閻晉卿等率兵担威于澶淵。兵未出,威已至滑州,帝大 曰:「相公且爲官家勿惜府庫。」乃詔賜京師兵及魏兵從威南者錢人十千 督其子弟作書,以 此 怨望,謀殺邪等。邪等已死,又遣供奉官孟業以詔書殺郭威于魏州。威舉兵反,隱帝遣左 時宣徽使闕,業欲得之,太后亦遣人諷大臣。大臣楊邪、史弘肇等皆以爲不可。業由

聶文進

拒

而

不納。

業走至絳州,爲人所殺。

高祖即位,歷 邷 文進、丼州人也。少爲軍卒、善書算、給事漢高祖帳中。 |拜領軍屯衞將軍、樞密院承旨。 周太祖爲樞密使,頗親信之,文進稍橫恣。 高祖鎭太原,以爲押司官。 遷

右領 軍大將軍 入謝,召諸將軍設食朝堂,儀鸞、翰林、御廚供帳飲食, 文進自如, 有司不敢

文進點閱兵籍, 周太祖鎭鄴,文進等用事居中,及謀殺楊邠等, 指麾殺戮, 以爲已任。 周太祖在鄴聞那等遇害, 文進夜作詔書,制置中外。 初以爲文進不與, 及發詔 那等已死,

書,皆文進手跡,乃大詬之。

慕容彥超敗走,帝宿于七里,文進夜與其徒飲酒,歌呼自若。 周兵至京師,隱帝敗于北郊,太后懼,使謂文進善衞帝,對曰:「臣在此,百郭威何害 明旦,隱帝遇弑,文進 亦自殺。

後贊

) 邪 等。 州 之,以爲牙將。 慕容彥超執送京師,梟首于市。 後贊,兗州瑕丘人。 邪等死, 隱帝悔之,贊與允明等番休侍帝,不欲左右言已短。 高 祖 即位, 其母,倡也。 拜飛龍使,隱帝尤愛幸之。 贊幼善謳,事張延朗。 楊邪等執政, 延朗死,贊 贊久不得遷, 隱帝兵敗北郊,攢奔兗 更事漢高祖 乃共謀殺 高祖 愛

勘記

郭允明

郭允明,少爲漢高祖廝養,高祖愛之,以爲翰林茶酒使。 隱帝尤狎愛之,允明益驕横無

顧避,大臣不能禁。

允明使荆南高保融,車服導從如節度使,保融待之甚厚。 允明乃陰使人步測其城池高

下,若爲攻取之計者,以動之。則人皆恐,保融厚路以遣之。 遷飛龍使。

已而李業與允明謀殺楊邪等,是日無雲而昏,霧雨如泣, 日中, 載哪等十餘尸暴之市

門,不得入,帝走趙村,允明從後追之,弑帝于民舍,乃自殺。

允明手殺那等諸子於朝堂西廡,王章壻張貽肅血流逆注。

隱帝敗于北郊,還至封丘

中。

校勘記

(1) 何拯 貴池本同。他本皆作「陳拯」。

新五代史卷三十一

周臣傳第十九

王朴

有隙,朴見漢興日淺,隱帝年少孱弱,任用小人,而邠爲大臣,與將相交惡,知其必亂,乃去 王朴字文伯,東平人也。少舉進士,爲校書郎,依漢樞密使楊邪。邪興王章、史弘肇等

| 那東歸。後||李業等教||隱帝誅權臣,| 那與章、弘肇皆見殺,三家之客多及,而| 朴以故獨免。 周世宗鎭澶州,朴爲節度掌書記。世宗爲開封尹,拜朴右拾遺,爲推官。世宗卽位,遷

比部郎中,太平邊策,日:

濫,天下離心,人不用命,吳、閩乘其亂而竊其號,幽、井乘其間而據其地。 之時,君暗政亂,兵驕民困,近者姦於內,遠者叛於外,小不制而至于僭,大不制而至于 唐失道而失吳、蜀,晉失道而失幽、抖。觀所以失之之由,知所以平之之術。當失 平之之術,

周

臣

傳第十九

王朴

此民之心同,是與天意同"與天意同,則無不成之功。 人安將和,有必取之勢,則知彼情狀者願爲之間諜,知彼山川者願爲之先導。 俟其倉廩實、器用備、人可用而舉之。彼方之民,知我政化大行,上下同心,力彊財足, 彼民與

羣下知法,諸將用命,一稔之後,可以平邊。 必須 如此 四 北諸州乃國家之所有也。 其地,必大發以來應,數大發則民困而國竭,一不大發則我獲其利。 衆之彊弱,攻虚擊弱, 處先撓之,備東則撓西,備西則撓東,彼必奔走以救其弊,奔走之間,可以知彼之虛實 面 《以殭兵攻,力已竭,氣已喪,不足以爲邊患,可爲後圖。 了,則用力少而收功多。 並進,席卷而蜀平矣。 攻取之道,從易者始。當今惟吳易圖,東至海,南至江,可撓之地二千里。從少備 則所向無前矣。 既得江北,則用彼之民,揚我之兵,江之南亦不難而平之也。 吳、蜀平,幽可望風而至。 唯抖必死之寇,不可以恩信誘、 得吳,則桂、廣皆爲內臣,岷、蜀可飛書而召之。 勿大舉,但以輕兵撓之。彼人怯弱, 方今兵力精練,器用具備, 彼竭我利, 如不至,則 知我師入 則江

臣書生也,不足以講大事,至于不達大體,不合機變,惟陛下寬之一

以爲奇,引與計議天下事,無不合,遂決意用之。顯德三年,征淮,以朴爲東京副留守。還, 中丞楊昭儉與朴皆言用兵之策,朴謂江淮爲可先取。世宗雅已知朴,及見其議論偉然,益 拜戶部侍郎、樞密副使,遷樞密使。 四年,再征淮,以朴留守京師。 時文士皆不欲上急於用武,以謂平定僭亂,在修文德以爲先。惟翰林學士陶穀竇儀、御史 問治道,選文學之士徐台符等二十人,使作爲君難爲臣不易論及平邊策,朴在選中。 位,銳意征伐,已撓羣議,親敗劉旻於高平,歸而益治兵,慨然有平一天下之志。 遷左諫議大夫,知開封府事。歲中,遷左散騎常侍,充端明殿學士。是時,世宗新卽 數顧大臣 而當

謂十二律管互吹,難得其眞,乃依京房爲律準,以九尺之絃十三,依管長短寸分設柱,用七 法,以歲軌離交朔望周變率策之數,步日月五星,爲欽天曆。六年,又詔朴考正雅樂,朴以 之法,莫不通焉。」顯德二年,詔|朴校定大曆,乃削去近世符天流俗不經之學,設通、經、統三 世宗之時,外事征伐,而內修法度。。朴爲人明敏多材智,非獨當世之務,至於陰陽律曆

留京 其陳用兵之略, 非特一時之策。至言諸國興滅次第云:「淮南可最先取, 丼必死之寇, '師'廣新城,通道路,壯偉宏闊,今京師之制,多其所規爲。 其所作樂,至今用之不可 朴性剛果,又見信於世宗,凡其所爲,當時無敢難者,然人亦莫能加也。 世宗征淮,朴

聲爲均,樂成而和。

周臣傳

第十

儿

王朴

鄭仁飾

四四四四

最後亡。」其後宋興,平定四方,惟井獨後服,皆如朴言。

五 十四。 六年春,世宗遣朴行視汴口,作斗門,還,過故相李穀第,疾作,仆于坐上,舁歸而卒,年 世宗臨其喪,以玉鉞叩地,大慟者數四。贈侍中。

鄭仁誨

量,必富貴,非吾所及也。」仁誨後棄紹光去,還鄕里,事母以孝聞。 仁誨,拔劍欲殺之,左右皆奔走,仁誨植立不動,無懼色,紹光擲劍于地,撫仁誨曰:「汝有器 鄭仁誨字日新,太原晉陽人也。初,事唐將陳紹光。 紹光爲人聽勇而好使酒,嘗因醉怒

省使。 攻河東,仁海留守東都。 恩州團練使、樞密副使,累遷宣徽北院使,出爲鎭寧軍節度使。 質問,仁誨所對不阿,周太祖益奇之。漢興,周太祖爲樞密使,乃召仁誨用之,累官至內客 漢高祖爲河東節度使,周太祖居帳下,時時往過仁誨,與語甚懽。 太祖破李守貞於河中,軍中機畫,仁誨多所參決。太祖入立,以仁誨爲大內都 明年多,以疾卒。世宗將臨其喪,有司言歲不利臨喪,世宗不聽,乃 顯德元年,拜樞密使。 每事有疑,即從仁誨 點檢、 世宗

先以桃茢而臨之。

仁誨自其微時,常爲太祖謀畫,及居大位,未嘗有所聞,而太祖、世宗皆親重之,然亦能

謙謹好禮,不自矜伐,爲士大夫所稱。 贈中書令,追封韓國公,諡曰忠正。

扈載

拜水部員外郎、知制誥。 遷翰林學士,賜緋,而載已病,不能朝謝。 居百餘日, 乃力疾入直 因遊相國寺,見庭竹可愛,作碧鮮賦,題其塵,世宗聞之,遣小黃門就壁錄之,覽而稱善,因 再遷監察御史。其爲文章,以辭多自喜。常次歷代有國廢興治亂之迹爲運源賦,甚詳。又 扈載字仲熙,北燕人也。少好學,善屬文。廣順初,舉進士高第,拜校書郎,直史館。 世宗憐之,賜告還第,遺太醫視疾。

以穀能知人而朴能薦士。 賢退不肖爲職,何言命邪?」已而召拜知制誥。及爲學士,居歲中病卒,年三十六。議者 「扈載不爲舍人,何也?」敷曰:「非不知其才,然載命薄,恐不能勝。」朴曰:「公爲宰相,以進 初,載以文知名一時,樞密使|王朴尤重其才,薦於宰相|李穀,久而不用,|朴以問|穀曰"

是時,天子英武,樂延天下奇才,而尤禮文士,載與張昭、竇儼、陶穀、徐台符等俱被進

唐

臣

傳第十九

扈載

獻,其辭大抵類俳優。而賦以不幸早卒,論議雖不及昭、儼,而不爲穀之諛也。 諛取合人主,事無大小,必稱美頌贊,至於廣京城、爲木偶耕人、紫芝白兔之類,皆爲頌以 | 穀居數人中, 文辭最劣,尤無行。昭、儼數與論議,其文粲然,而穀徒能先意所在,以進

漢,而材智於周哉?惟知所用爾。 取戰勝;內修制度,議刑法,定律曆,講求禮樂之遺文,所用者五代之士也,豈皆愚怯於晉、 用,亡國之臣也。王朴之材,誠可謂能矣。不遇世宗,何所施哉?世宗之時,外事征伐,攻 注目,終日而勞心,使善奕者視焉,爲之易置其處則勝矣。 勝者所用,敗者之棊也; 興國所 故日,治國譬之於奕,知其用而置得其處者勝,不知其用而置非其處者敗。敗者臨某 嗚呼!作器者,無良材而有良匠;治國者,無能臣而有能君。蓋材待匠而成,臣待君而

子、小人各適其分, 而身享安榮。治亂相去雖遠甚, 而其所以致之者不多也, 反其所置而 能,使君子、小人皆失其所,而身蹈危亡。治國之君,能置賢智於近,而置愚不肖於遠,使君 嗚呼,自古治君少而亂君多,況於五代,士之遇不遇者,可勝歎哉! 夫亂國之君, 常置愚不肖於上, 而彊其不能, 以暴其短惡, 置賢智於下, 而泯沒其材

